

## Kölfel

*Kapas akom*

**I. Iten ei puk: Kölfel. Ei puk a iteni ei it, pun mine a mak lon, köl mi fel, souläng ra eäni lon ar fel ngeni Kot seni me lom tori ikenai.**

**II. Chon makei ei puk: Mi wor ekoch chon makei ei puk. Ikkei iter:**

Tafit a makei ina epwe ükükün 73

Ekewe mwirimwirin Kora 10

Asaf 12

Salomon 2

Etan 1

Heman 1

pwal Moses 1

Mi pwal wor ekoch Kölfel esap fat iö a makeer.

**III. Itelapemongen ei puk: Ngüni, kopwe mwareiti ewe Samol mi Lapalap.**

**IV. Kapas aüchean ei puk: Än chon lükülük mwareiti Kot me ar iotek.**

**V. Masouen ei puk Kölfel: Ei puk eu puken köl me iotek me lon Paipel. A lefiletam lefilen fansoun än ekewe chon mak makei ekei Kölfel, pun ekei köl minen fansoun Moses tori fansoun än chon Juta liwinsefäl seni ar oola. Nge ekewe chon Israel ra achufengeni ekei köl me iotek o aea lon fansoun ar fel ngeni Kot. Mürin ra apacha ekei Kölfel ngeni nöür Paipel. Mi wor chomong sokun Kölfel: Kölün mwareiti me fel ngeni Kot, iotekin tün<sup>gor</sup> alilis, tün<sup>wün</sup> me küna manau, tün<sup>goren</sup> amusamusen tipis, kölün kilisou fän iten än Kot afeiöchüür, pwal**

**tüngor pwe Kot epwe apwüngü chon oputer. Ekei iotek ra eäni fän iten eman chök ika fän iten eu mwü. Ekoch ekei iotek ra pwärätä mefien mwökütükütün leluken eman aramas, nge ekoch ra pwärätä osupwangen me mefien nöün Kot aramas meinisín. Jesus a aea ekei Kölfel, pwal ekewe chon makei Testament mi Fö ra aea ekoch wokisin seniir. Iei mine ekei Kölfel ra aüchea me ren ekewe souläng lon mwichiefel seni lepoputan tori ikenai.**

**VI. Tettelin masouen ei puk: Ekei 150 Kölfel ra kinikinitiu lon limu kinikin:**

1. Kölfel 1-41: Usun aramas me än Kot föri läng me fanüfan
2. Kölfel 42-72: Usun chon Israel me ar ngasala
3. Kölfel 73-89: Usun än aramas fel ngeni Kot, pwal usun ewe imwenfel
4. Kölfel 90-106: Usun än aramas siamü won fanüfan
5. Kölfel 107-150: Usun än aramas mwareiti Kot me än Kot kapas

## **AEUIN PUK**

### **1**

*Eman aramas mi pwüng me eman aramasangau  
1.1-6*

<sup>1</sup> Ra feiöch ekewe aramas resap fetal fän öüröüräen aramasangau,

resap apirü föförün ekewe chon tipis,

resap pwal nom ren ekewe chon turunufas,

<sup>2</sup> nge ra pwapwaiti än ewe Samol mi Lapalap allük o ekieki usun lerän me lepwin.

- <sup>3</sup> Ätekewe ra wewe ngeni irä mi mär ünükün ekewe  
chanpupu,  
ra ua lon fansoun räs,  
nge chör resap aiolol.  
Meinisin mine ra föri a fisiöch. ✧
- <sup>4</sup> Nge ekewe aramasangau resap iei usun.  
Pun ra wewe ngeni pipi asepwäl a ässala.
- <sup>5</sup> Iei mine ekewe aramasangau resap üöch lon ewe  
ränin kapwüng,  
nge ekewe chon tipis resap nom lon mwichen  
chon pwüng.
- <sup>6</sup> Pun ewe Samol mi Lapalap a emweni o tümwünü  
ekewe chon pwüng,  
nge ekewe aramasangau repwe fetal ngeni ewe  
lenien feiengau.

## 2

### *Än ewe mi kepit me ren Kot nemenem*

#### *2.1-12*

- <sup>1</sup> Pwota chon ekewe mwü ra rawangau,  
nge ekewe aramas ra ekingau won mine a lomo-  
tongau?
- <sup>2</sup> Ekewe king won fanüfan ra ütä,  
ekewe sounemenem ra pwüngüpwüngfengen usun  
ar repwe ü ngeni ewe Samol mi Lapalap,  
pwal ngeni nöün we mi kepit.
- <sup>3</sup> Iwe, ra apasa, “Ousipwe mwütala fööfööch me rer  
o pöütala senikich ar kei riri.” ✧
- <sup>4</sup> Nge Kot ewe mi mot won an lenien motun king  
lon läng a takir,  
ewe Samol a ämängaueer.

✧ 1:3: Jer 17.8 ✧ 2:3: Föf 4.25-26

- 5 Mürin epwe kapas ngeniir fän an song  
o fokun eniwokusuur fän an lingeringer.
- 6 Iwe, a apasa, “Üa seikätä ai king lon wisan  
me won Sion chuki we mi pin.”
- 7 Ngang üpwe pwärätä mine a pwüngüla me ren  
ewe Samol mi Lapalap.
- Iwe, a üreniei, “En nei mwän, ikenai üa nounuk. ✧
- 8 Kopwe tüngorei, nge ngang üpwe ngonuk ekewe  
mwü pwe kopwe mwüni,  
üpwe pwal ngonuk unusen fanüfan pwe kopwe  
fanüeni.
- 9 Kopwe atarela ren efoch wokomächä,  
kopwe amökkükisiretiu usun eu sepi mi för seni  
pwül.” ✧
- 10 Iei mine ämi kana king, oupwe tipachemela,  
ämi sounemenem won fanüfan, oupwe miritila.
- 11 Oupwe angang ngeni ewe Samol mi Lapalap fän  
niuokus,  
oupwe pwapwa fän chechech.
- 12 Oupwe mitiri ewe nau pwe esap song, nge ämi  
ousap mäfeiengau.
- Pun a müttir fis an song.  
Ra feiöch ir meinisin mi eäni i lenien op.

### 3

#### *Iotekin lesosor pwe Kot epwe alilis*

##### *3.1-8*

Echö än Tafit köl lupwen an sü seni Apsalom nöün  
we.

- 1 Ai Samol mi Lapalap, ekewe mi oputaei ra kon  
chomong!

---

✧ 2:7: Föf 13.33; Ipr 1.5; 5.5 ✧ 2:9: Pwär 2.26-27; 12.5; 19.15

Chomong ra ü ngeniei. ☆

<sup>2</sup> Chomong ra kapas usi,  
“Esap wor an alilis me ren Kot.”

<sup>3</sup> Nge en, ai Samol mi Lapalap, ka epeti seniei  
feiangau,  
en ai ling,  
ka achimwäeitä.

<sup>4</sup> Üa leüömong le siö ngeni ewe Samol mi Lapalap,  
nge i a pälueniei seni chukun mi pin.

<sup>5</sup> Üa konola o möür. Üa pwal nenela,  
pun ewe Samol mi Lapalap a tümwünüei.

<sup>6</sup> Üsap niukusiti engol ngeröün aramas  
mi pwelifeilliei o ü ngeniei.

<sup>7</sup> Kopwe feito, ai Samol mi Lapalap. Kopwe an-  
gasaei, ai Kot.

Pun ka apwüngü ekewe chon oputaei meinsin,  
ka angei seniir ar pöchökül pwe resap tongeni  
afeiangauaei.

<sup>8</sup> Ewe Samol mi Lapalap a angasala aramas mi  
nom lon weires.

Om feiöch epwe nom won noum aramas.

## 4

### *Iotekin lekuniol pwe Kot epwe alilis*

#### *4.1-8*

Ngeni ewe mi emweni chon köl: Won pisekin ettik  
mi wor saitenin. Echö än Tafit köl.

<sup>1</sup> Ai Kot, en mi pwüng, kopwe pälueniei, lupwen üa  
kökö.

---

☆ **3:1:** 2.Sam 15.13-17.22

Ka fen angasaeila, lupwen üa nom lon riaföü.  
Kopwe ümöümöch ngeniei o aüselinga ai iotek.

<sup>2</sup> Ämi aramas, ifa ükükün fansoun ämi oupwe  
chüen aitengauaei?

Ifa ükükün fansoun ämi oupwe aücheani mine a  
lomotongau  
o tipeni mine a mwäl?

<sup>3</sup> Nge oupwe silei pwe ewe Samol mi Lapalap a  
aimwüela chokewe mi pwüng fän püsin itan.  
Ewe Samol mi Lapalap a rongorong, lupwen üa  
kökköri.

<sup>4</sup> Are oua song, oupwe afälikemi pwe ousap tipis  
ren.  
Oupwe ekieki ei lon lelukemi,  
lupwen ämi konola lon kiemi fän mosonoson. ✧

<sup>5</sup> Oupwe eäni sokun asor mi pwüng ngeni ewe  
Samol mi Lapalap  
o anomu ämi apilükülük won.

<sup>6</sup> Chomong aramas ra apasa,  
“Iö a tongeni fang ngenikich feiöch?”  
Ai Samol mi Lapalap, kopwe netiu wom o  
kirikiröch ngenikem.

<sup>7</sup> Ka fen ngeniei pwapwa mi lap seni än chokewe  
pwapwa  
ren kinier wiich me ünümer wain mi somwola.

<sup>8</sup> Üpwe konola o möür fän kinamwe,  
pun en echök, ai Samol mi Lapalap, ka  
tümwünüöchüei.

---

✧ 4:4: Ef 4.26

## 5

*Eu iotek pwe Kot epwe tümwünükich**5.1-12*

Ngeni ewe mi emweni chon köl: Won ekewe aangün. Echö än Tafit köl.

<sup>1</sup> Ai Samol mi Lapalap, kopwe aüselinga ai kei kapas,

kopwe ekieki ai ngüngü fän weires.

<sup>2</sup> Kopwe rongorong ai siö,

ai king me ai Kot,

pun üa iotek ngonuk.

<sup>3</sup> Ai Samol mi Lapalap, ka rongorong mweliei lesosor,

lesosorusich üa iotek ngonuk o witiwiti om kopwe pälüeniei.

<sup>4</sup> Pun en sap eman Kot mi sani mine a ngau,

eman chon föföringau esap tongeni nonom reöm.

<sup>5</sup> Ekewe mi sikesik resap tongeni ü fän mesom,

ka oput chokewe meinisin mi föföringau.

<sup>6</sup> Ka arosala chokewe meinisin mi kapas chofana.

Ka oput chon niela aramas me chon atupu aramas.

<sup>7</sup> Nge ngang üpwe tolong lon imwom pokiten om we tong ellet mi lap o somwola.

Üpwe fel ngonuk lon imwom we mi pin

o chapetiu mwom fän menin.

<sup>8</sup> Ai Samol mi Lapalap, kopwe atufichiei pwe üpwe föri letipom,

pun mi wor chon oputaei mi nenengeniei,

kopwe aiti ngeniei mine üpwe föri.

<sup>9</sup> Chon oputaei ra apasa mine a chofana,  
lelucker a chök ekiekin kata,  
ar kapas a motoutou,  
nge ra uren atuputup mi afeiengau. ✧

<sup>10</sup> Ai Kot, kopwe ngeniir liwinin ar tipis.  
Repwe feiengau ren püsin ar raw.  
Kopwe pöütirela pokiten a chomong ar pupungau,  
pun ra ü gonuk.

<sup>11</sup> Nge chokewe meinisin mi anomu ar apilükülük  
womw repwe meseik,  
repwe köl fän pwapwa fansoun meinisin.  
Kopwe peni chokewe mi echenuk,  
pwe repwe ingemwareituk.

<sup>12</sup> Pun en, ai Samol mi Lapalap, ka afeiöchü ekewe  
chon pwüng,  
ka pwölürela ren om ümöümöch usun chök eu tittin  
maun.

## 6

### *Eu iotekin tüngr ümöümöch lon fansoun riaföü 6.1-10*

Ngeni ewe mi emweni chon köl: Won pisekin ettik  
mi wor walufoch saitenin. Echö än Tafit köl.

<sup>1</sup> Ai Samol mi Lapalap, kosap amiritiei lon om  
song,

kosap pwal apwüngüei lon om lingeringer. ✧

<sup>2</sup> Kopwe ümöümöch ngeniei, ai Samol mi Lapalap,  
pun üa fokun pekus.

Ai Samol mi Lapalap, kopwe apöchökülaei, pun üa  
fokun apwangapwang.

<sup>3</sup> Ngüni a pwal fokun riaföü.



Ai Samol mi Lapalap, ifa ükükün fansoun om kopwe akachopwa ngeniei?

<sup>4</sup> Ai Samol mi Lapalap, kopwe feito o amanauaei, kopwe angasaei seni mäla ren om we tong ellet.

<sup>5</sup> Pun chon mäla resap chechemenuk.

Esap wor eman epwe mwareituk lon lenien sotup.

<sup>6</sup> Üa malülü ren ai ngüngü, iteiten pwin kiei a nüküchöchön ren chönün mesei, ai peet a chöchön ren chönün mesei, lupwen üa kechü.

<sup>7</sup> Mesei a tton ren ai letipeta, a toputopula ren ai kechü pokiten chon oputaei ra ariaföüei.

<sup>8</sup> Oupwe sü seniei, ämi meinsin mi föri föför mi ngau.

Ewe Samol mi Lapalap a rongorong ai leüömong le kechü. ✧

<sup>9</sup> Ewe Samol mi Lapalap a rongorong ai tüngörün alilis,

ewe Samol mi Lapalap a etiwa ai iotek.

<sup>10</sup> Ekewe chon oputaei meinsin repwe säw o rükö. Repwe kulsefäl o müttir mefi ar itengau.

## 7

### *Eu iotekin tüngör aleleten pwüing*

#### *7.1-17*

Echö än Tafit Sikaion, a köl ngeni ewe Samol mi Lapalap usun Kus ewe re Peniamin.

<sup>1</sup> Ai Samol mi Lapalap ai Kot, üa feito pwe üpwe op reöm,

---

✧ **6:8:** Mat 7.23; Luk 13.27

kopwe amanauaei seni chokewe meinisin mi tap-  
weriei. Kopwe angasaeila,  
<sup>2</sup> pwe resap etekinieila o atatakisi fitukei  
usun chök mine eman laion a föri,  
nge esap wor eman a chimanüei.

<sup>3</sup> Ai Samol mi Lapalap, ai Kot,  
are üa föri eu lein ekei föföör,  
are üa föri och mi mwäl ngeni eman,  
<sup>4</sup> are üa liwini än chienei kirikiröch ngeni mi ngau,  
ika angei och fän pöchökül seni chon oputaei, nge  
esap wor pöpun,  
<sup>5</sup> mürin, ekewe chon oputaei repwe tapweriei o  
liapeniei,  
repwe atatakisiei, repwe nieila  
o likitieila lepwül.

<sup>6</sup> Ai Samol mi Lapalap, kopwe ütä lon om song,  
kopwe awenokota o ü ngeni än ekewe chon op-  
utaei lingeringeritiei.  
Kopwe pwätä o alisie, ai Kot en mi allük pwe epwe  
fis pwüng.

<sup>7</sup> Kopwe amwichato chon ekewe mwü ünükum,  
nge en kopwe nom aser o nemeniir.  
<sup>8</sup> En ka apwüngü chon ekewe mwü meinisin.  
Ai Samol mi Lapalap, lon om kapwüng kopwe  
pwäätä pwe üa pwüng,  
pun ka silei pwe esap wor ai tipis.  
<sup>9</sup> En ewe Kot mi pwüng, ka etittina ekiekin me  
tipen aramas.  
Kopwe aükätü än ekewe aramasangau föföör mi  
ngau,

nge kopwe anüküchara ekewe chon pwüng. ☆

<sup>10</sup> Kot a tümwünüei,

a amanaua chokewe mi aleasochisi i.

<sup>11</sup> Kot eman soukapwüng mi pwüng,  
eman Kot mi apwüngü ekewe aramasangau fan-  
soun meinisin.

<sup>12</sup> Are eman aramas esap mochen ekiexefäl,  
Kot epwe seimi nöün ketilas,  
epwe emeia an likapich o äнна ngeni.

<sup>13</sup> A amolätä an pisekin maun mi afeiengau,  
pwal wokun föün esefich mi ngetenget.

<sup>14</sup> Nengeni, ekewe aramasangau ra chök ekiexietä  
mine a ngau,

ra chök föri föför esepwüng o eäni kapas chofana.

<sup>15</sup> Iwe, ra tuw pwang pwe aramas repwe tup lon,  
nge ra püsin turulong lon.

<sup>16</sup> Ar föför esepwüng epwe püsin ukur chök,  
nge liwinin ar föförün mwäneson epwe püsin küür.

<sup>17</sup> Üpwe kilisou ngeni ewe Samol mi Lapalap  
pokiten an pwüng,  
üpwe pwal kölün mwareiti ewe Samol mi Lapalap,  
Ewe mi Unusen Tekia.

## 8

### *Lingen Kot me iteüöchün aramas*

#### *8.1-9*

Ngeni ewe mi emweni chon köl: Won ewe pisekin  
ettik itan kitit. Echö än Tafit köl.

<sup>1</sup> Äm Samol mi Lapalap, äm Samol,  
a fokun pwäla iteüöchum won unusen fanüfan!

Kölün mwareiti lingom a tori läng.

<sup>2</sup> Ekewe semirit me ekewe mönükol ra kölün mwareituk.

Ekewe chon oputom resap tongeni afeiengauok.  
Ka afanafanaloi chon oputom me chon ü ngonuk.

☆

<sup>3</sup> Lupwen üa netä läng förien poum  
o nengeni ewe maram me ekewe fü ka anomuur  
lon lenier,

<sup>4</sup> met aüchean aramas pwe ka ekieki usun,  
nge met aüchean nöün aramas pwe ka tümwünü? ☆

<sup>5</sup> Nge ka föri i pwe epwe ekis kis fomw en ai Kot,  
ka ämwäramwära ngeni ling me iteüöch.

<sup>6</sup> Ka awisa ngeni pwe epwe nemeni mettoch mein-  
isin ka föri.

Ka anomu fän nemenian föriom kewe meinisin, ☆

<sup>7</sup> ekewe sip me ekewe kow meinisin, pwal ekewe  
manmwachon lemäl,

<sup>8</sup> ekewe mansüsü me ekewe ikenen leset  
me sokopaten mönün leset.

<sup>9</sup> Äm Samol mi Lapalap, äm Samol,  
a fokun pwäla iteüöchum won unusen fanüfan!

## 9

### *Kilisou ren än Kot eäni pwüng le kapwüng*

#### *9.1-20*

Ngeni ewe mi emweni chon köl: Ei köl usun ngin-  
gin ewe köl itan 'Mälan ewe Nau'. Echö än Tafit köl.

<sup>1</sup> Üpwe kilisou ngonuk, ai Samol mi Lapalap, ren  
unusen lelukei,

---

☆ **8:2:** Mat 21.16 ☆ **8:4:** Hiop 7.17-18; Kölf 144.3; Ipr 2.6-8 ☆ **8:6:**  
1.Kor 15.27; Ef 1.22; Ipr 2.8

üpwe apworausä usun om kewe föföör meinisin mi  
amwarar.

<sup>2</sup> Üpwe pwapwa o ingemwareituk,  
üpwe kölün mwareituk, En ewe mi Unusen Tekia.

<sup>3</sup> Ekewe chon oputaei ra kulsefäl, lupwen ka  
waroto,  
ra turula o mäla.

<sup>4</sup> Ka apwüngala pwe üa pwüng,  
en ka mot won om lenien mot o eäni kapwüng fän  
pwüng.

<sup>5</sup> Ka apwüngü chon ekewe mwü,  
ka arosala ekewe aramasangau,  
esap wor eman epwe chüen chechemeniir tori  
feilfeilachök.

<sup>6</sup> Ekewe chon oputem ra feiengau o rosola.  
Ka ataela ar kewe telinimw  
pwe esap wor eman epwe chüen chechemeniir.

<sup>7</sup> Nge ewe Samol mi Lapalap a king tori feil-  
feilachök,  
a anüküchara an lenien motun king pwe epwe eäni  
kapwüng.

<sup>8</sup> Iwe, a apwüngü chon fanüfan fän pwüng,  
a apwüngü chon ekewe mwü fän wenechar.

<sup>9</sup> Ewe Samol mi Lapalap eu lenien op mi pöchökül  
fän iten ekewe mi riaföü,  
eu lenien manau lon fansoun riaföü.

<sup>10</sup> Chokewe mi silei en ra anomu ar apilükülük  
womw,  
pun en, ai Samol mi Lapalap, kosap kul seni  
chokewe mi feito reöm.

11 Oupwe kölün mwareiti ewe Samol mi Lapalap  
mi imweimw lon Sion,  
oupwe apworausä an kewe föför ngeni chon  
ekewe mwü.

12 Kot a chechemeni chokewe mi riaföü,  
esap manlükala ar siö,  
nge epwe ngeni ekewe chon föföringau chappen ar  
föför.

13 Ai Samol mi Lapalap, kopwe ümöümöch ngeniei!  
Kopwe nenengeni ai riaföü ren chokewe mi op-  
utaei.

Ai Samol mi Lapalap, kopwe angasaeila seni mäla,

14 pwe üpwe tufichin pwärätä mwen ekewe ara-  
masen Jerusalem

ekewe metoch meinisin üa mwareituk ren.

Üpwe pwal pwapwa pun ka angasaei.

15 Iwe, chon ekewe mwü ra turulong lon ewe  
pwang ra püsin tuw,  
ra tup lon ewe sär ra püsin aopala.

16 Ewe Samol mi Lapalap a pwärala püsin i ren an  
eäni kapwüing fän pwüing.

Ekewe aramasangau ra tup lon püsin ar föför.

17 Iwe, ekewe aramasangau repwe fokun feil  
ngeni mäla,

pwal chon ekewe mwü meinisin mi pöütala Kot.

18 Kot esap manlükala ekewe chon mwelele tori  
feilfeilachök,

pwal än chon wöüingau apilükülüköch esap tala tori  
feilfeilachök.

19 Ai Samol mi Lapalap, kopwe feito! Kosap  
mwütätä pwe aramas repwe ü ngonuk.

Chon ekewe mwü repwe kapwüing fän mesom.

<sup>20</sup> Ai Samol mi Lapalap, kopwe eniweer.

Kopwe asile ngeniir pwe ir aramas echök repwe mäla.

## 10

*Eu iotek pwe aramasangau repwe kuf*

*10.1-18*

<sup>1</sup> Ai Samol mi Lapalap, pwota ka chök ütä me toau?

Pwota ka okopola lupwen äm nom lon riaföü?

<sup>2</sup> Ekewe aramasangau ra ariaföüü ekewe chon wöüingau fän lamalamtekia.

Kopwe föri pwe repwe oo lon ekewe ekiekingau ra püsin ekiekitä.

<sup>3</sup> Ewe aramasangau a sikäsini mochenin lelukan, nge ewe aramas mi mochenian win a otteki o pöütala ewe Samol mi Lapalap.

<sup>4</sup> Ewe aramasangau esap kütta Kot.

Lon an lamalamtekia a chök ekieki pwe esap wor Kot.

<sup>5</sup> Än ewe aramasangau kewe föföör meinisin ra chök fisiöch fansoun meinisin.

Esap weweiti om kewe allük, nge a chök esita chon oputan.

<sup>6</sup> Iwe, a ekieki lon lelukan, “Üsap tongeni mwökütütüküt.

Üpwe pwapwa fansoun meinisin, nge üsap tolong lon osupwang.”

<sup>7</sup> An kapas a uren ottek, atuputup me eniweniw,

a müttir le apasawu kapasen oput me kapas mi ngau. ☆

8 A op lon ekewe sop  
o awiti ekewe aramas esap wor ar tipis pwe epwe nirela.

Iwe, a aköürü ekewe chon mwelele,

9 a witiwit lon an lenien op usun eman laion.

A öüröürela pwe epwe turufi ekewe chon wöüngau.

A liapeniir me lon an we sär o etekinirela.

10 Iwe, ewe chon mwelele a kawet,

a mwörürütiu o turula ren pöchökülen ewe aramasangau.

11 Nge ewe aramasangau a ekieki lon lelukan,

“Kot esap ekieki usun, a aopala mesan pwe esap fokun künaei.”

12 Ai Samol mi Lapalap, kopwe apwüngü ekei aramasangau.

Kosap manlükala chokewe mi nom lon riaföü.

13 Pwota ewe aramasangau a turunufasei Kot o ekieki lon lelukan,

“Kot esap apwüngüei.”

14 Nge en ka küna, ewer, ka silei ewe osupwang me riaföü,

ka pwal amolätä om kopwe alilis.

Ewe chon mwelele a atolonga püsin i lepoum,

en ewe ka alisi ekewe mi mäsen fansoun meinisin.

15 Kopwe kupi pöchökülen ewe aramasangau me ewe chon föföringau.

Kopwe aunusa ngeniir liwinin ar föföringau

---

☆ 10:7: Rom 3.14



tori resap chüen försefäli.

<sup>16</sup> Ewe Samol mi Lapalap i king tori feilfeilachök.  
Chon ekewe mwü repwe rosola seni fanüan.

<sup>17</sup> Ai Samol mi Lapalap, kopwe rong än ekewe mi  
riafüü tüngor,  
kopwe apöchöküla leluker  
o aü selingom ngeni ar siö.

<sup>18</sup> Kopwe peni ekewe mi mäsen me ekewe mi ri-  
aföü,  
pwe aramas mi pop seni fanüfan resap chüen eni-  
wokusu eman.

## 11

### *Än chon wenechar lenien op* *11.1-7*

Ngeni ewe mi emweni chon köl: Echö än Tafit köl.

<sup>1</sup> Üa anomu ai apilükülük won ewe Samol mi La-  
palap pwe epwe tümwünüei.

Pwota oua üreniei,  
“Kopwe sü ngeni ekewe chuk usun eman  
machang?”

<sup>2</sup> Pun ngeni, ekewe aramasangau ra emeia ar  
likapich  
o pachetä wokur föün esefich ngeni selin,  
pwe repwe likapichi ekewe mi wenechar leluker  
seni ewe leni mi kiroch.

<sup>3</sup> Are ekewe longolongun pwüng ra tala,  
met eman chon pwüng a chüen tongeni föri?”

<sup>4</sup> Ewe Samol mi Lapalap a nom lon imwan mi pin,

än ewe Samol mi Lapalap lenien motun king a  
nom lon läng.

A netiu won fanüfan o ouwasacha aramas mein-  
isin,

a pwal silei mine ra föri.

<sup>5</sup> Ewe Samol mi Lapalap a sotuni ekewe aramas mi  
pwüing me ekewe aramasangau,

a oput ätewe mi föri föförün mwäneson.

<sup>6</sup> A apüngätüu molien ekkei me primston won  
ekewe aramasangau.

A apwüingüür ren asepwäl mi pwichikar.

<sup>7</sup> Pun ewe Samol mi Lapalap a pwüing,

a pwapwaäsini föför mi pwüing.

Ekewe aramas mi wenechar repwe küna i.

## 12

*Iotekin tüngor alilisin ngas seni ekewe ara-  
masangau*

*12.1-8*

Ngeni ewe mi emweni chon köl: Won pisekin ettik  
mi wor walufoch saitenin. Echö än Tafit köl.

<sup>1</sup> Äm Samol mi Lapalap, kopwe alisikem,

pun esap chüen wor eman chon pin,

nge ekewe chon allükülük ra rosola seni lein ara-  
mas.

<sup>2</sup> Iteiten eman me eman a chofana ngeni chon  
arun.

Ra chök eäni kapas atuputup lefiler.

<sup>3</sup> Amwo ewe Samol mi Lapalap epwe aükätüu ar  
kapas atuputup

o pineela awen ekewe aramas mi tunesikesike-  
mong.

<sup>4</sup> Ir chokewe mi apasa, "Sa win ren ach kapas,

nge kapasen awach a alisikich.  
Iô epwe tongeni nemenikich?”

<sup>5</sup> Nge ewe Samol mi Lapalap a üra, “Tei ngang üpwe  
feito,  
pokiten ekewe chon wöüngau ra osupwang,  
pwal ekewe chon mwelele ra ngüngü.  
Ngang üpwe alenier lon ewe lenien kinamwe ra  
älälei.”

<sup>6</sup> Än ewe Samol mi Lapalap kewe pwon ra  
allükülük o fatafatöch,  
usun silifer a kurufat me lon ewe lenien um  
lepwül,  
lupwen a ketel fän fisu pwe epwe limöch.

<sup>7</sup> Äm Samol mi Lapalap, kopwe amwöchükem,  
kopwe tümwünükem fansoun meininis seni ei  
täppin aramas mi ngau.

<sup>8</sup> Pun ekewe aramasangau ra nom ekis meininis,  
nge aramas meininis ra pwapwaiti mine a ngau.

## 13

### *Iotekin tüngr alilis lon riaföü*

#### *13.1-6*

Ngeni ewe mi emweni chon köl: Echö än Tafit köl.

<sup>1</sup> Ai Samol mi Lapalap, ifa ükükün fansoun om  
kopwe manlükieila?

Ifa usun, kopwe manlükieila tori feilfeilachök?  
Ifa ükükün fansoun om kopwe aopala mesom se-  
niei?

<sup>2</sup> Ifa ükükün fansoun ai üpwe engila fän ai weires?  
Ifa ükükün fansoun lelukei epwe riaföü lerän me  
lepwin?

Ifa ükükün fansoun än chon oputaei repwe neme-  
nieila?

<sup>3</sup> Ai Samol mi Lapalap, kopwe nenengeniei o  
pälüeniei.

Kopwe apöchökülaei, kosap mwütätä ai üpwe mäla.

<sup>4</sup> Kosap mwüt ngeni ekewe chon oputaei pwe  
repwe apasa, “Aia akufu ätewe.”

Kosap mwüt ngeni ekewe chon pälüeniei repwe  
takiriei ren ai tumwula.

<sup>5</sup> Nge üa anomu ai apilükülük won om tong ellet,  
üpwe pwapwa ren om amanauaei.

<sup>6</sup> Ngang üpwe köl ngonuk, ai Samol mi Lapalap,  
pun ka fokun eäni kirikiröch ngenie.

## 14

*Än ekewe aramas umwes me föföringau*

*14.1-7*

*(Kölf53)*

Ngeni ewe mi emweni chon köl: Echö än Tafit köl.

<sup>1</sup> Ekewe mi umwes ra ekieki lon leluiker, “Esap wor  
Kot.” Ir ra fokun ngau,  
ra föri sokun föföri mi anioput,  
esap wor eman a föri mine a pwüng.

<sup>2</sup> Ewe Samol mi Lapalap a nenetiu seni läng won  
aramas meinisin,

pwe epwe küna ika a wor eman mi mirit,  
ika eman mi kütta Kot.

<sup>3</sup> Nge ir meinisin ra tokola, ir ra ingaueppök.  
Esap wor eman a föri mine a pwüng,  
esap fokun wor eman. ☆

---

☆ **14:3:** Rom 3.10-12

<sup>4</sup> Ewe Samol mi Lapalap a ais, “Ifa usun, esap wor  
än ekewe chon föföringau mirit?  
Ir chokewe mi manau seni mine ra soläni seni nei  
aramas,  
nge resap iotek ngeniei.”

<sup>5</sup> Nge mürin repwe nom lon niuokus watte,  
pun Kot a nom ren ekewe aramas mi pwüing.

<sup>6</sup> Ekewe chon föföringau ra pinei än ewe chon  
wöüingau akot,  
nge ewe Samol mi Lapalap an lenien op.

<sup>7</sup> Amwo eman epwe feito seni Sion o amanaua  
chon Israel.  
Ekewe chon Israel repwe fokun pwapwa,  
lupwen ewe Samol mi Lapalap epwe aliwini  
ngeniir wöür.

## 15

### *Ekewe chon nonom won ewe chukun Kot 15.1-5*

Echö än Tafit köl.

<sup>1</sup> Ai Samol mi Lapalap, iö epwe tongeni tolong lon  
imwom mi pin?

Iö epwe tongeni nonom won chukum mi pin?

<sup>2</sup> Ätewe mi aleasochisi Kot  
o föri mine a pwüing fansoun meinisin,  
a eäni kapas wenechar seni lon lelukan.

<sup>3</sup> Esap aitengaua eman,  
esap föri mine a ngau ngeni chienan,  
esap pwal ngününgünüfetalei chon arun.

<sup>4</sup> A oput eman mi manauangau,

nge a asamolu chokewe mi meniniti ewe Samol mi  
Lapalap,  
a apwönüetä an pwon a eäni fän akapel, inamwo  
are a weires ren.

<sup>5</sup> A mwütawu nöün moni, nge esap angei winnan,  
esap pwal angei lifangen amichimich pwe epwe  
aturu eman esap wor an tipis.

Ätewe mi föri ekei mettoch epwe nomopos won  
chukum mi pin.

## 16

### *Iotekin apilükülük*

#### *16.1-11*

Echö än Tafit köl.

<sup>1</sup> Ai Kot, kopwe tümwünüei,  
pun üa anomu ai apilükülük womw pwe kopwe ti  
seniei feiengau.

<sup>2</sup> Üa kapas ngeni ewe Samol mi Lapalap, “En chök  
ai Samol.

Esap wor ai feiöch lükün en.”

<sup>3</sup> Ekewe chon pin mi nom won fanüfan ra iteföüla.  
Üa fokun pwapwaäsini ai üpwe nom rer.

<sup>4</sup> Ekewe aramas mi filätä pwal ekoch kot ra  
achomonga ar riaföü.

Üsap fokun etiir, lupwen ra asor,  
üsap pwal fel ngeni ar kewe kot.

<sup>5</sup> Ai Samol mi Lapalap, en ai, ka fokun aüchea  
ngeniei.

En ewe mi fang ngeniei meinsin mine üpwe eäni.

<sup>6</sup> Ineti we a nom lon eu fanü mi fokun öch.

Ewer, ineti we a mürina.

7 Üa mwareiti ewe Samol mi Lapalap, pun a  
öüröüraei,  
nge lepwin lelukei a pwal fönöüei.

8 Iteiten fansoun üa mefi pwe ewe Samol mi La-  
palap a nom rei.

Pokiten i a arap ngeniei, üsap tongeni  
mwökütüküt.

9 Iei mine lelukei a pwapwa o mwänek,  
inisi a mefi kinamwe.

10 Pun en ka tümwünüei seni manamanen mäla,  
kosap pwal mwüt ngeni noum we mi pin pwe  
epwe mwöch lon peias. ✧

11 En ka aiti ngeniei ewe alen manau.

Om nom rei a afisätä ai pwapwa mi somwosom  
o awarato ai mwänek tori feilfeilachök. ✧

## 17

*Iotekin tünigor pwe Kot epwe tümwünü nöün seni  
chon ariaföüü*

*17.1-15*

Eu än Tafit iotek.

1 Ai Samol mi Lapalap, kopwe aüselinga ai tünigor  
mi pwüing

o afäli ai siö.

Kopwe aü selingom ngeni ai iotek mi wenechar.

2 Alelletin ai pwüing epwe feito senuk.

Pun en ka silei mine a pwüing.

3 En ka atittina lelukei,  
ka äämwaiei lepwin,

ka sotunieï, nge kosap küna och ekiëk mi ngau rei.  
 Üsap apasa och mi ngau.

<sup>4</sup> Pokiten än ekewe aramas föföör,  
 üa afälïei seni föföörün ekewe chon mwäneson  
 ren ai aleasochisi alom.

<sup>5</sup> Üa chök fetal lon om kewe al,  
 nge üsap rik seni.

<sup>6</sup> Ai Kot, üa kökköruk, pun en kopwe pälüenieï,  
 kopwe aü selingom ngenieï o rongorong ai kapas.

<sup>7</sup> Kopwe pwäräla om tong ellet mi amwarar.  
 Ren om manaman ka amanaua chokewe mi feito  
 reöm pwe kopwe tümwünüür seni chon ü  
 ngeniir.

<sup>8</sup> Kopwe tümwünüei usun chök fituken lon mesom,  
 kopwe aopaei fän nürün poum,

<sup>9</sup> seni ekewe aramasangau mi fiu ngenieï,  
 seni ekewe chon oputaei mi pwelifeilïei o mochen  
 nieila.

<sup>10</sup> Ra pineela leluker pwe resap eäni tong,  
 ra eäni kapasen tunesikesik.

<sup>11</sup> Ra eipwa ipwei, iei ra pwelifeilïei,  
 ra chök änenaei pwe repwe aturueitiu lepwül.

<sup>12</sup> Ra wewe ngeni eman laion mi achocho le kütta  
 liapan,  
 ika wewe ngeni eman nienifön laion mi öüröürela  
 lon an lenien op.

<sup>13</sup> Ai Samol mi Lapalap, kopwe feito. Kopwe ü  
 ngeni chon oputaei o akufuur.  
 Kopwe angasaei seni ekewe aramasangau ren  
 noum ketilas.



14 Ai Samol mi Lapalap, kopwe angasaei seni ekewe aramas mi chök angei ar feiöch me lon ei fanüfan.

Kopwe apwüngüür ren ekewe riaföü ka amolätä fän iter,  
amwo epwe naf ngeni nöür me nöün nöür.

15 Nge me rei, ngang üpwe nenengeni mesom, pun üsap föri och mi mwäl.

Lupwen üpwe nenela, üpwe fokun pwapwa ren ai nenengonuk.

## 18

*Än Tafit kölün kilisou ren an ngasala*

*18.1-50*

*(2.Sam 22.1-51)*

Ngeni ewe mi emweni chon köl: Echö köl än Tafit nöün ewe Samol mi Lapalap we chon angang. A apasa kapasen ei köl ngeni ewe Samol mi Lapalap lon ewe rän, lupwen ewe Samol mi Lapalap a angasa i seni lepöün ekewe chon oputa meinisin, pwal seni lepöün Saul. Iwe, a apasa:

<sup>1</sup> Ai Samol mi Lapalap,  
üa echenuk, en ai pöchökül.

<sup>2</sup> Ewe Samol mi Lapalap ai achau,  
i imwei imwen maun, pwal i chon angasaei,  
ai Kot, ai achau ewe ia üa op ie.

A epeti seniei feiengau usun eu tittin maun,  
a peniei o tümwünüei.

<sup>3</sup> Üa kökköri ewe Samol mi Lapalap,  
ewe mi fich ngeni ach sipwe mwareiti.  
A amanauaei seni ekewe chon oputaei.

<sup>4</sup> Ekewe feingauen mäla ra pwelifeiliei,  
ekewe öütöüten feingau ra puitiei.

<sup>5</sup> Ekewe feingauen lenien sotup ra pwelifeiliei,  
ekewe likatupun mäla ra mochen säreei.

<sup>6</sup> Üa kökköri ewe Samol mi Lapalap lon ai riaföü,  
üa siö ngeni ai Kot pwe epwe alisiei.  
A rongorong mweliei seni lon imwan imwenfel,  
a aüselinga ai siö ngeni.

<sup>7</sup> Iwe, fanüfan a chechech o mwöükük,  
nge longolongun ekewe chuk ra pwal chechech o  
chüngüchüng pokiten än Kot song.

<sup>8</sup> Ötüöt a ötüwu seni lon pwötün,  
nge ekkei lapalap a ngetewu seni lon awan, pwal  
mooch mi sarara a küwu seni.

<sup>9</sup> A tinenifeseni läng o feitiu.  
Kuchuchol ra nom fän pechen.

<sup>10</sup> A wawa eman kerop o äs,  
a müttir feito won pöükässin asepwäl.

<sup>11</sup> A pwölüela ngeni inisin rochopwak,  
kuchu mi malul o uren koluk ra pwelifeili.

<sup>12</sup> Seni lon ewe saramaram mi nom mwan  
ütten fau me moochen ekkei ra towu o tinenifeseni  
ewe kuchuchol.

<sup>13</sup> Ewe Samol mi Lapalap a pwal apüngü chopulap  
lon läng,

Ewe mi Unusen Tekia a aronga mwelian.

<sup>14</sup> A esefichala wokun kewe föün esefich o  
atoropasachon oputan,  
a efifi ngeniir inefi o asürela.

<sup>15</sup> Mürin, epin matau a pwä,

longolongun fanüfan a lingetä, lupwen ka  
apwüngü chon oputom  
o leüömong ngeniir fän om song, ai Samol mi La-  
palap.

<sup>16</sup> Iwe, ewe Samol mi Lapalap a angetiu seni won  
ewe leni mi tekia

o anwöchüei,

a efeitä seni lon ekewe koluk mi alolol.

<sup>17</sup> A angasaei seni ekewe chon pälüeniei mi  
pöchökül,

seni chokewe mi oputaei,

pun ra kon pöchökül ngeniei.

<sup>18</sup> Iwe, ra münitiei lon ränin ai feiengau,

nge ewe Samol mi Lapalap a tümwünüei.

<sup>19</sup> A alisiei lon ai feiengau

o angasaei, pun a pwapwa rei.

<sup>20</sup> Ewe Samol mi Lapalap a liwiniöchüei, pun üa  
föri mine a pwüng,

a afeiöchüei, pun esap wor ai tipis.

<sup>21</sup> Üa aleasochisi än ewe Samol mi Lapalap kewe  
allük,

nge üsap rik seni ai Kot ren och föföör mi ngau.

<sup>22</sup> Üa apwönüetä an kewe allük meinisin,

nge üsap aleasolap ngeni an kewe pwüüng.

<sup>23</sup> A silei pwe esap wor ai mwäl,

pwe üa püsin tümwünüei seni tipis.

<sup>24</sup> Iei mine ewe Samol mi Lapalap a liwiniöchüei,  
pun üa föri mine a pwüng,

pun a silei pwe esap wor ai tipis.

25 Ai Samol mi Lapalap, ka allükülük ngeniir mi allükülük,  
ka pwal pwärätä om unusen pwüng ngeniir mi unusen pwüng.

26 Ka pwärätä om limelimöch ngeni ir mi lime-  
limöch,  
nge ekewe mi pwor manauer ka pwärätä om pöchökül ngeniir.

27 Ka angasa aramas mi tipetekison,  
nge chokewe mi lamalamtekia ka atekisoneretiu.

28 Ai Samol mi Lapalap, ka asarama manaei,  
en ai Kot ka awili ai rochopwak ngeni saram.

29 Ewer, ren om alisie i üa tongeni fiu ngeni ekewe  
chon oputaei,  
ren en ai Kot üa tongeni mwet won eu tit.

30 Än Kot kewe föföör ra unusen pwüng,  
än ewe Samol mi Lapalap kapasen pwon a let.  
I a usun chök tittin maun fän iten chokewe mein-  
isin mi op ren.

31 Ewe Samol mi Lapalap i chök Kot.  
Kot echök ach achau.

32 I ewe Kot mi apöchökülaei  
o anükünüköchü ai al.

33 A amüttiriei usun müttirin chia,  
a pwal aleniöchüei won ekewe leni mi tekia. ☆

34 A asipa pei ngeni maun  
pwe üa tongeni pworefengeni efoch esefich seni  
piras.

35 Ka epeti seniei feiengau o amanauaei,  
poum a amwöchüei,  
nge om alilis a atekiaeitä.

---

☆ 18:33: Ipr 3.19

36 Ka achölapa ewe al üa fetal won,  
pwe pechei esap mit.

37 Üa tapweri chon oputaei o liapeniir.

Üsap kulsefäl seniir tori ra rosola.

38 Üa aturrela pwe resap chüen tongeni ütā.

Ra turula arun pechei.

39 Ka ngeniei pöchökül pwe üa tongeni maun,  
ka pwal akufu me mwei ekewe chon ü ngeniei.

40 Ka föri pwe ekewe chon pälüeniei ra sü seniei,  
üa arosala chokewe mi oputaei.

41 Ra siö pwe eman epwe alisiir, nge esap wor  
eman a amanaueer.

Ra siö ngeni ewe Samol mi Lapalap, nge esap  
pälüeniir.

42 Üa üsiir pwe ra usun chök pipisüsü  
asepwäl a ässala.

Üa puriretiu usun pwakaken lon ekewe al.

43 En ka angasaei seni ekewe aramas mi ü ngeniei,  
ka seikieitä pwe üpwe samolun ekewe mwü.

Ekewe aramas üsap sileer me mwan ra nom fän  
nemeniei.

44 Ra aleasochisiei lon ewe otun ra rong mweliei.  
Chon ekis ra feito o chapetiu mwei.

45 Iwe, ra apilükingau,  
ra towu seni ar kewe lenien maun mi pöchökül fän  
chechech.

46 Ewe Samol mi Lapalap a manau. Üa mwareiti ai  
achau,

üa ingeiti ai Kot mi amanauaei.

47 Kot a atufichiei pwe üpwe ngeni chon oputaei  
chappen ar föfö,

a anomu fai aramasen ekewe mwü.  
A amanauaei seni ekewe chon pälueniei.

48 En ai Samol mi Lapalap ka atekiaeitä asen chon  
ü ngeniei

o angasaei seni ekewe aramas mi mwäneson.

49 Iei mine üpwe ingemwareituk me lein chon  
ekewe mwü.

Ai Samol mi Lapalap, üpwe kölün mwareituk. ☆

50 Kot a ngeni nöün we king win mi lapalap  
o pwäri an tong ellet ngeni nöün we mi kepit,  
ngeni Tafit me mwirimwirin kewe tori  
feilfeilachök.

## 19

*Än Kot föför me an kewe allük*

*19.1-14*

Ngeni ewe mi emweni chon köl: Echö än Tafit köl.

<sup>1</sup> Ekewe läng ra pwärätä lingen Kot,  
nge fän läng a arongafeili usun angangen pöün.

<sup>2</sup> Rän a kapas ngeni pwal eu rän usun,  
nge pwin a asile ngeni pwal eu pwin usun.

<sup>3</sup> Esap wor ar fos, esap pwal wor ar kapas,  
esap wor eman a tongeni rong mwelier.

<sup>4</sup> Nge mwelier a chöfetal lemenen unusen fanüfan,  
ar kapas a tori lesopun fanüfan.

Kot a föri eu imw fän läng fän iten akkar. ☆

<sup>5</sup> Akkar a tötä usun eman mwän apwüpwülü söfö a  
towu seni lon rumwan,  
a pwal sä won alan usun eman mwän mi pöchökül  
a pwapwa lon an kitir.

<sup>6</sup> Akkar a tötä seni epek läng

o fetal ngeni ewe epek,  
nge esap wor och mettoch a tongeni op seni  
pwichikaran.

<sup>7</sup> Än ewe Samol mi Lapalap allük a fokun mürina, a  
apöchökülasefäli letipach.

Än ewe Samol mi Lapalap kait a let,  
a atipachema ir mi wewemang.

<sup>8</sup> Än ewe Samol mi Lapalap öüröür ra pwüing,  
ra apwapwai lelukach.

Än ewe Samol mi Lapalap kewe allük ra fat,  
ra awora mirit.

<sup>9</sup> Ach niuokusiti ewe Samol mi Lapalap a mürina,  
epwe nonom tori feilfeilachök.

Än ewe Samol mi Lapalap pwüing ra let,  
ir meinisin ra pwüing.

<sup>10</sup> Ra aüchea lap seni kolt, ewer, lap seni chomong  
kolt mi mürina.  
Ra pwal arar seni chönün chunen, pwal seni sürün  
ewe fasen chunen.

<sup>11</sup> Ren ekei allük ngang noum chon angang üa  
angei ai fön seniir.

Eman mi apwönüetä epwe angei liwinin mi la-  
palap.

<sup>12</sup> Nge iö a tongeni mefi iteiten an föför mi mwäl?  
Kopwe amusa seniei ekewe tipis mi monomon.

<sup>13</sup> Kopwe pwal tümwünüei pwe ngang noum chon  
angang üsap föri tipis ren mochenin letipei.

Kosap mwüt ngeniir pwe repwe nemeniei.

Mürin üpwe unusöch lon manauei o ngas seni  
pupungau mi watte.

14 Amwo kapasen awei me ekiekin lelukei epwe  
mürina me fän mesom,  
ai Samol mi Lapalap, ai achau me ai chon amanau.

## 20

### *Eu iotekin tüngor win*

#### *20.1-9*

Ngeni ewe mi emweni chon köl: Echö än Tafit köl.

<sup>1</sup> Amwo ewe Samol mi Lapalap epwe pälüeni om  
tüngor lon ränin om riaföü.

Amwo än Jakop we Kot epwe tümwünuk.

<sup>2</sup> Amwo epwe tinato reöm alilisum seni lon ewe  
leni mi pin

o apöchökülok seni Sion.

<sup>3</sup> Amwo epwe etiya om kewe asor meinisín  
o pwapwaäsini om kewe asoren kek.

<sup>4</sup> Amwo Kot epwe ngonuk mochenin letipom  
o apwönüetä om kewe ekiek meinisín.

<sup>5</sup> Mürin sipwe mweir fän pwapwa ren om win,  
sipwe pwal aürätä ach filaik fän iten ach Kot.

Amwo ewe Samol mi Lapalap epwe apwönüetä  
om kewe tüngor meinisín.

<sup>6</sup> Iei üa silei pwe ewe Samol mi Lapalap a alisi nöün  
we king mi kepit,

a pälüeni an tüngor seni an we läng mi pin  
o awinna ren win mi lapalap ren an manaman.

<sup>7</sup> Ekoch aramas ra anomu ar apilükülük won war  
wokenin maun,

ekoch ra anomu won nöür oris,  
nge kich sia anomu ach apilükülük won manama-  
nen ewe Samol mi Lapalap ach we Kot.



<sup>8</sup> Ir repwe mwaroro o turula,  
nge kich sipwe ütä o üwenewenetä.

<sup>9</sup> Äm Samol mi Lapalap, kopwe awinna ewe king,  
kopwe pälüenikem, lupwen aia kökkörük.

## 21

*Kölün mwareiti Kot pokiten ngasala seni ekewe  
chon oput*

### *21.1-13*

Ngeni ewe mi emweni chon köl: Echö än Tafit köl.

<sup>1</sup> Äm Samol mi Lapalap, ewe king a pwapwa ren  
om manamän,

a fokun ingeiti om alilis ngeni pwe a win.

<sup>2</sup> Ka fang ngeni mochenin letipan,  
nge kosap amwöchü seni mine a tüngor.

<sup>3</sup> Pun ka etiwa i ren feiöch mi chomong,  
ka pwal isetä won möküran epa mwärämwär seni  
kolt mi mürina.

<sup>4</sup> A tüngor manau me reöm, nge en ka fang ngeni,  
ka alangatama ränin manauan tori feilfeilachök.

<sup>5</sup> An ling a lapalap, pun ka alisi pwe a win.  
Ka awora ngeni iteüöch me iteföüla.

<sup>6</sup> Ewer, ka fokun afeiöchü ren feiöch esemüch,  
ka apwapwai ren om nonom ren.

<sup>7</sup> Pun ewe king a anomu an apilükülük won ewe  
Samol mi Lapalap,

nge ren än Ewe mi Unusen Tekia tong ellet  
esap tongeni mwökütüküt.

<sup>8</sup> Ewe king epwe liapeni chon pälüeni meinisin,  
epwe liapeni chokewe mi oput i.

<sup>9</sup> Lupwen epwe wareto,

epwe aroserala usun eu ekkei a kenala mettoch.  
Ewe Samol mi Lapalap epwe ärirela lon an linderinger,  
nge ekkei epwe fisirela.

<sup>10</sup> Epwe arosala mwirimwirir seni won fanüfan,  
pwe esap wor eman epwe chüen manau.

<sup>11</sup> Ra ekiekietä ar repwe föri mi ngau ngeni o rawangauei,  
nge esap fokun tongeni pwönüetä.

<sup>12</sup> Epwe emeia an likapich o äнна ngeniir  
pwe repwe kul o süla.

<sup>13</sup> Äm Samol mi Lapalap, aipwe ingemwareiti om pöchökül mi watte.

Äm aipwe kölü o mwareiti om manaman.

## 22

### *Siön lon riaföü me kölün mwareiti Kot*

#### *22.1-31*

Ngeni ewe mi emweni chon köl: Ei köl usun ngin-  
gin ewe köl itan 'Ewe chian wünümweerän.' Echö  
än Tafit köl.

<sup>1</sup> Ai Kot, ai Kot, pwota ka likitieila?

Pwota ka fokun toau seniei fän om alilis,  
pwal seni ai siöngau? ☆

<sup>2</sup> Ai Kot, üa siö ngonuk lerän, nge kosap pälüeniei,  
üa siö ngonuk lepwin,  
nge üsap tongeni asösö.

<sup>3</sup> Nge en ka pin. Ka mot won om lenien motun  
king,  
en ewe chon Israel ra kölün mwareiti.

☆ **22:1:** Mat 27.46; Mark 15.34

<sup>4</sup> Äm kewe lewo ra anomu ar apilükülük womw.  
Ra apilükülükuk, nge en ka angaserela.

<sup>5</sup> Ra siö ngonuk, nge en ka amanaueer,  
ra apilükülükuk, nge resap lichipüng.

<sup>6</sup> Nge ngang eman moso, sap eman aramas,  
üa küna esit me koput me ren aramas.

<sup>7</sup> Meinsin mi künaei ra turunufaseei,  
ra akopea awer o alifechefechei möküerer ngeniei. ✧

<sup>8</sup> Ra apasa, “A anomu an apilükülük won ewe  
Samol mi Lapalap,

i epwe angasa,

i epwe amanaua, pun a pwapwa ren.” ✧

<sup>9</sup> Nge en ewe mi atoeiwu seni lon letipen inei,  
ka tümwünüchüei, lupwen üa eman mönükol.

<sup>10</sup> Seni leuputiuei üa apilükülükuk,  
seni ewe fansoun inei a nöünieitiu en ai Kot.

<sup>11</sup> Kosap toau seniei, pun osukosuk a arap ngeniei,  
nge esap wor eman a alisie.

<sup>12</sup> Chomong chon oputaei ra pwelifeiliei usun  
epwi pwin ätemwänin kow,

ra nom ünüki usun ätemwänin kow  
mi pöchökül seni Pasan.

<sup>13</sup> Ra amassaw ngeniei usun eman laion mi mwa-  
cho a wörüwör  
o atatakisi liapan.

<sup>14</sup> Üa usun chök koluk mi niitiu,  
lekeilen chüi meinsin ra ruwofesen,  
lelukei a usun kiris,  
a telila me leupwei.

15 Lon awei a pwasapwas usun pwül moromor,  
nge chönawei a pacheetä fän fongochi.  
Ka likitieila lon pwül moromor  
usun eman mi mäla.

16 Eu mwichen aramasangau a pwelifeiliei,  
ra rongeeila usun epwi pwiin kolak.  
Ra posu pei me pechei.

17 Üa tongeni aleani chüi meinisin.  
Chon oputaei ra änefotaei o takiriei.

18 Ra üttüt won üfei kewe  
o ineti lefiler. ☆

19 Nge en, ai Samol mi Lapalap, kosap toau seniei!  
En ai chon alilis, kopwe müttir feito o alisie.

20 Kopwe angasaei seni afeiengauen ketilas,  
kopwe angasa manaei seni ekei kolak mi  
pöchökül.

21 Kopwe amanauaei seni ekewe laion,  
kopwe amanaua inisi seni mächän ekewe  
ätemwänin kow mi mwacho.

22 Üpwe apworausau ngeni pwii kewe mine ka föri,  
üpwe mwareituk lein ewe mwichen aramas. ☆

23 Ämi mi niuokusiti ewe Samol mi Lapalap,  
oupwe mwareiti i,  
ämi mwirimwirin Jakob meinisin oupwe alinga i,  
ämi chon Israel meinisin oupwe fokun meniniti i.

24 Pun Kot esap aliwini eman mi mwelele ika oput  
eman mi nom loṅ riaföü.  
Esap amona mesan seni,  
nge a pälüeni, lupwen a siö ngeni.

---

☆ **22:18:** Mat 27.35; Mark 15.24; Luk 23.34; Joh 19.24    ☆ **22:22:**  
Ipr 2.12

25 En popun ai mwareituk me lon ewe mwich mi lap.

Üpwe eäni ekewe asor me fän mesen chokewe mi niuokusituk,  
ekewe asor üa pwon ngonuk.

26 Chokewe mi wöüngau repwe mongö o möt.  
Chokewe mi feito ren ewe Samol mi Lapalap  
repwe mwareiti i.  
Amwo repwe feiöch tori feilfeilachök.

27 Chon fanüfan meinsin repwe chechemeni ewe  
Samol mi Lapalap  
o kuliti i.  
Chon ekewe ainang seni ekewe mwü meinsin  
repwe fel ngeni.

28 Pun ewe Samol mi Lapalap i king,  
i a nemeni ekewe mwü.

29 Ewer, ekewe chon lamalamtekia meinsin me  
won fanüfan repwe chapetiu mwan,  
chokewe meinsin mi feil ngeni mäla repwe fo-  
topwäsuk me mwan, pwal chokewe resap  
tongeni püsin amwöchü manauer.

30 Mwirimwirich repwe angang ngeni i.  
Aramas repwe apworausä ngeni ewe täppin ara-  
mas epwe feito usun ewe Samol,

31 repwe asilefeili ngeni ekewe aramas resamwo  
uputiu,  
“Ewe Samol mi Lapalap a amanaua nöün aramas.”

## 23

### *Kot ai chon mas*

#### *23.1-6*

Echö än Tafit köl.

<sup>1</sup> Ewe Samol mi Lapalap ai chon mas,  
üsap osupwang ren och mettoch.

<sup>2</sup> A mwüt ngeniei pwe üpwe konola lon eu maasies  
ia a mär fetil ie.

A emwenieila ünükün ekewe koluk mi kurufat. ✧

<sup>3</sup> A apöchöküla lelukei,  
a emweniei won ekewe al mi pwüing usun a pwon.

<sup>4</sup> Pwal are üa feila lemolun nürün mäla,  
üsap niueiti och feiengau,  
pun en ka etiei,  
öürom me wokum ra tümwünüei.

<sup>5</sup> Ka amolätä eu chepelin mongö fän itei  
me fän mesen ekewe chon oputaei,  
ka epiti ngeni mökürei lö,  
ka alölöü ai kap tori a urela.

<sup>6</sup> Ewer, kirikiröch chök me tong repwe nom rei lon  
ränin manaei meinsin,  
nge üpwe nonom lon imwen ewe Samol mi La-  
palap tori feilfeilachök.

## 24

### *Ewe king mi ling*

#### *24.1-10*

Echö än Tafit köl.

<sup>1</sup> Fanüfan me masouan meinsin än ewe Samol mi  
Lapalap,

pwal meinsin mi nonom won ir nöün. ✧

---

✧ 23:2: Pwär 7.17 ✧ 24:1: 1.Kor 10.26

<sup>2</sup> Pun i a anomu fanüfan won ekewe matau  
o anükücharätü won ekewe koluk.

<sup>3</sup> Iö epwe tongeni feitä won chukun ewe Samol mi  
Lapalap?

Nge iö epwe tongeni nom lon lenian mi pin?

<sup>4</sup> Chokewe mi limöch ar föför me ar ekiek,  
resap fel ngeni uluulun anümwäl, resap pwal  
chofana le akapel. ☆

<sup>5</sup> Ewe Samol mi Lapalap epwe afeiöchüür.  
Kot epwe pwärätä pwe ra pwüing o amanaueer.

<sup>6</sup> Iei usun ekewe aramas mi kütta Kot,  
chokewe mi feito fän mesen än Jakob we Kot.

<sup>7</sup> Oupwe sukala ekewe asam,  
oupwe sukchöchöla ekewe asamen lom,  
pwe ewe king mi ling epwe tolong lon.

<sup>8</sup> Iö ewe king mi ling?

Ewe Samol mi Lapalap mi pöchökül o pwora,  
ewe Samol mi Lapalap mi win lon maun.

<sup>9</sup> Oupwe sukala ekewe asam,  
oupwe sukchöchöla ekewe asamen lom,  
pwe ewe king mi ling epwe tolong lon.

<sup>10</sup> Iö ei king mi ling?

Ewe Samol mi Unusen Manaman, i ewe king mi  
ling.

## 25

*Eu iotekin tüngr pwe Kot epwe emweni o  
tümwünü nöün aramas*

*25.1-22*

Echö än Tafit köl.

<sup>1</sup> Ai Samol mi Lapalap, üa suki ngonuk lelukei.

---

☆ 24:4: Mat 5.8

<sup>2</sup> Ai Kot, üa anomu ai apilükülük womw.  
 Kosap mwüt ngeniei pwe üpwe säw ren chon op-  
 utaei,  
 kosap pwal mwüt ngeniir pwe repwe ätäiwetiei  
 ren ai kuf.

<sup>3</sup> Ewer, esap wor eman mi apilükülükuk epwe säw.  
 Nge chokewe mi ü ngonuk repwe säw.

<sup>4</sup> Ai Samol mi Lapalap, kopwe aiti ngeniei om  
 kewe al  
 o aitöchüür ngeniei.

<sup>5</sup> Kopwe emweniei lon om let o aiöüei,  
 pun en ewe Kot mi amanauaei,  
 üa apilükülükuk fansoun meinisin.

<sup>6</sup> Ai Samol mi Lapalap, kopwe chechemeni om  
 ümöümöch me om tong ellet,  
 ka pwärätä seni chök lomlom.

<sup>7</sup> Kopwe amusala ai kewe tipis me ai kewe pupun-  
 gau üa föri lesäräföi.

Ai Samol mi Lapalap, kopwe chechemeniei  
 lon om tong me om kirikiröch.

<sup>8</sup> Ewe Samol mi Lapalap a pwüng o kirikiröch.  
 Iei mine a aiti ngeni ekewe chon tipis ewe al repwe  
 fetal won.

<sup>9</sup> A emweni chon tipetekison lon mine a pwüng  
 o aiti ngeniir letipan.

<sup>10</sup> Ewe Samol mi Lapalap a eäni tong me allükülük  
 ngeni chokewe mi apwönüetä an we pwon o  
 aleasochisi an kewe allük.

<sup>11</sup> Ai Samol mi Lapalap, kopwe amusala ai tipis  
 usun ka pwon,  
 pun ai tipis a kon chomong.



12 Iö ewe aramas a niuokusiti ewe Samol mi Lapalap?

Kot epwe aiti ngeni ewe al epwe fetal won.

13 I püsin epwe wöümong,

nge nöün kana repwe fanüeni ewe fanü.

14 Ewe Samol mi Lapalap a chiechifengen me chokewe mi niuokusiti i.

A asile ngeniir an we pwon.

15 Üa sachtä ngeni ewe Samol mi Lapalap fansoun meinisin,

pun i epwe angasaei seni feiengau.

16 Kopwe kul ngeniei o ümöümöch ngeniei,

pun ngang üa metip o osupwang.

17 Kopwe akisikisala weiresin letipei

o angasaeila seni ai kewe riaföü.

18 Kopwe ekieki usun ai riaföü me ai weires

o amusala ai kewe tipis meinisin.

19 Kopwe nenengeni chomongun ekewe chon pälüeniei,

pwal usun ar oputangauaei.

20 Kopwe tümwünü manauai o angasaei.

Kosap mwüt ngeniei pwe üpwe säw,

pun üa feito reöm pwe kopwe tümwünüei.

21 Let me wenechar repwe tümwünüei,

pun üa apilükülükuk.

22 Ai Kot, kopwe angasa chon Israel

seni ar kewe weires meinisin.

## 26

*Än eman aramas mi pwüing iotek*

*26.1-12*

Echö än Tafit köl.

- 1 Ai Samol mi Lapalap, kopwe aletätä ai pwüing,  
pun üa föri mine a pwüing,  
üa apilükülükuk, nge üsap mwökütüküt.
- 2 Kopwe atitinaei, ai Samol mi Lapalap, o sotunieï,  
kopwe sotuni mochenin lelukei me ai ekiek.
- 3 Pun om tong ellet a nom mwei,  
om allükülük a emwenieï.
- 4 Üsap nom ren aramas mi chofana,  
üsap pwal chiechi ngeni chon likatuputup.
- 5 Üa oput ewe mwichen chon föföringau,  
nge üsap nom ren ekewe aramasangau.
- 6 Ai Samol mi Lapalap, üa talü pei pwe asisilen ai  
limelimöch  
o pwelifeili om rongen asor,
- 7 Üa eäni echö kölün kilisou fän leüömong  
o apworausä om kewe föföer meinisin mi amwarar.
- 8 Ai Samol mi Lapalap, üa echeni imwom ewe ia ka  
nonom ie,  
ewe leni ia lingom a nonom ie.
- 9 Kosap nieila fitifengen me ekewe chon tipis,  
kosap angei manaei fitifengen me chon ni-  
manaei aramas,
- 10 ätekewe mi föri föföer mi ngau fansoun meinisin,  
ra pwal pwapwa le angei lifangen amichimich.
- 11 Nge ngang won inisi üa föri mine a pwüing,  
kopwe ümöümöch ngenieï o amanauaei.
- 12 Üa nom won sonomaw.  
Üpwe mwareiti ewe Samol mi Lapalap  
lon ewe mwich mi lap.

## 27

*Kot ai saram me ai manau**27.1-14*

Echö än Tafit köl.

<sup>1</sup> Ewe Samol mi Lapalap i ai saram me ai Chon Amanau.

Üsap niueiti eman.

Ewe Samol mi Lapalap a tümwünüei seni feiengau, üsap fokun niuokus.

<sup>2</sup> Lupwen aramasangau ra rangetiei pwe repwe nieila,

lupwen chon ü ngeniei ra fiu ngeniei, repwe chök chepetek o turula.

<sup>3</sup> Inamwo are eu mwichen sounfiu repwe pwelifeiliei,

ngang üsap niuokus.

Inamwo are ra maun ngeniei,

nge ai lükü Kot epwe chök nüküchar.

<sup>4</sup> Eu mettoch üa tüngorei ewe Samol mi Lapalap,

eu mettoch chök üa mochen:

Pwe üpwe nonom lon imwen ewe Samol mi Lapalap lon ränin manau ei meinisin,

pwe üpwe ingeiti an kirikiröch

o kütta ööröürei me ren me lon imwan imwenfel.

<sup>5</sup> Pun lon fansoun weires i epwe aopaei.

I epwe tümwünüei me lon imwan imwenfel,

epwe pwal atekiaeitä won eu achau.

<sup>6</sup> Mürin üpwe chimwetä o nom asen ekewe chon oputaei mi pwelifeilei,

üpwe asor lon imwan fän mweireiren pwapwa.  
 Üpwe köl o ettiki pisekin ettik ngeni ewe Samol mi  
 Lapalap.

<sup>7</sup> Ai Samol mi Lapalap, kopwe aüselinga ai siö  
 ngonuk.

Kosap ümömöch ngeniei o pälüeniei.

<sup>8</sup> En ka apasa, “Oupwe küttaei.”

Nge ngang üa pälüeni, “Üa küttoke, ai Samol mi  
 Lapalap.”

<sup>9</sup> Kosap aopa mesom seniei.

Kosap aliwini noum ei chon angang lon om song,  
 pun en ai chon alilis.

Kosap pöütieila, kosap pwal likitieila,

Ai Kot, ai Chon Amanau.

<sup>10</sup> Inamwo ika semei me inei ra likitieila,  
 nge ewe Samol mi Lapalap epwe tümwünüei.

<sup>11</sup> Ai Samol mi Lapalap, kopwe aiti ngeniei mine  
 üpwe föri

o emweniei won efoch al mi wenechar  
 pokiten chon oputaei.

<sup>12</sup> Kosap asechieilong lepöün chon pälüeniei.

Pun chon pwärätä chofana ra ü ngeniei,  
 ra tiliken le föri föförun mwäneson ngeniei.

<sup>13</sup> Nge ngang üa lükü pwe ewe Samol mi Lapalap  
 epwe kirikiröch ngeniei

lon fansoun ai manau won fanüfan.

<sup>14</sup> Kopwe apilükülükü ewe Samol mi Lapalap,  
 kopwe pöchökül o tipepworda.

Ewer, kopwe apilükülükü ewe Samol mi Lapalap.

## 28

*Eu iotekin tüngor alilis me iotekin kilisou*

*28.1-9*

Echö än Tafit köl.

<sup>1</sup> Ai Samol mi Lapalap, en ai achau, üa kökkörük.

Kopwe aüselinga ai siö ngonuk.

Pun are kosap pälüeniei,

üpwe wewe ngeni chokewe mi tolong lon peias.

<sup>2</sup> Kopwe rongorong kapasen ai tüngor, lupwen üa siö ngonuk.

Kopwe alisiei, lupwen üa aitietä pei ngeni imwom mi unusen pin.

<sup>3</sup> Kosap apwüngüei fitifengen me ekewe aramasängau,

pwal fiti chokewe mi föri föföör mi ngau,

ir mi eäni kapas pwetete ngeni chon arur,

nge ra ekiekingau lon leluker.

<sup>4</sup> Kopwe ngeniir chappen ar föföör

me ükükün liwinin ar föfööringau.

Kopwe ngeniir chappen angangen pöör

o liwini ngeniir mine a fichitiir. ☆

<sup>5</sup> Pokiten ir resap afäli än ewe Samol mi Lapalap föföör

ika angangen pöün, iei mine i epwe apwüngüür

o aroserela.

<sup>6</sup> Üpwe mwareiti ewe Samol mi Lapalap,

pun a rongorong ai tüngorun alilis.

<sup>7</sup> Ewe Samol mi Lapalap a tümwünüei o epeti seniei feiengau,

üa apilükülükü i, nge i a alisiei.

---

☆ 28:4: Pwär 22.12

Iei mine üa fokun pwapwa.  
 Üpwe kilisou ngeni o kölün mwareiti.

<sup>8</sup> Ewe Samol mi Lapalap i än nöün aramas  
 pöchökül.

I ewe lenien op mi allükülük fän iten nöün we mi  
 kepit ewe king.

<sup>9</sup> Kopwe amanaua noum kewe aramas  
 o afeiöchü noum kana.  
 Kopwe ar chon mas  
 o tümwünüür tori feilfeilachök.

## 29

### *Möngüngün Kot me lon mölümöl*

#### *29.1-11*

Echö än Tafit köl.

<sup>1</sup> Ami chon läng kana, oupwe mwareiti ewe Samol  
 mi Lapalap,

oupwe mwareiti an ling me manaman.

<sup>2</sup> Oupwe mwareiti lingen iten ewe Samol mi La-  
 palap.

Oupwe fel ngeni i fän üf mi pin. ☆

<sup>3</sup> Aramas ra rongorong möngüngün ewe Samol mi  
 Lapalap won ekewe matau.

Ewe Kot mi ling a apüngü chopulap.

Möngüngün ewe Samol mi Lapalap a tittiriis me  
 won ekewe matau.

<sup>4</sup> Möngüngün ewe Samol mi Lapalap a manaman.  
 Möngüngün ewe Samol mi Lapalap a fokun  
 amwarar.

<sup>5</sup> Möngüngün ewe Samol mi Lapalap a kupi ekewe  
 irä setar,

---

☆ 29:2: Kölf 96.7-9

a kupi ekewe irä setar mi nom won Lapanon.

<sup>6</sup> A föri pwe ewe chuk Lapanon a mwetemwet  
usun eman nienifön kow,  
nge ewe chuk Hermon a mwetemwet usun eman  
nienifön ätemwänin kow.

<sup>7</sup> Möngüngün ewe Samol mi Lapalap a afifi inefi.

<sup>8</sup> Möngüngün ewe Samol mi Lapalap a achechecha  
ewe fanüapö,  
a achechecha ewe fanüapön Kates.

<sup>9</sup> Möngüngün ewe Samol mi Lapalap a amäräkulu  
ekewe irä ook  
o wichikätiu chön irän ewe wöllap.  
Nge lon imwan imwenfel meinisin ra kökkö, “Kot  
a ling.”

<sup>10</sup> Ewe Samol mi Lapalap a nemenem won ekewe  
lölö.

A nemenem, pun i a king tori feilfeilachök.

<sup>11</sup> Ewe Samol mi Lapalap a ngeni nöün kewe ara-  
mas pöchökül,  
a afeiöchü nöün kewe aramas ren kinamwe.

## 30

### *Kölün kilisou fän iten ngasala seni mäla*

#### *30.1-12*

Echö än Tafit köl. Echö köl fän iten apinipinin ewe  
imwenfel.

<sup>1</sup> Ai Samol mi Lapalap, üpwe ingeituk, pun ka  
amanauaei,  
nge kosap mwüt ngeni ekewe chon pälüeniei pwe  
repwe ämängauaei.

<sup>2</sup> Ai Samol mi Lapalap, ai Kot,

üa siö ngonuk pwe kopwe alisiei.

Iwe, ka apöchökülaei.

<sup>3</sup> Ai Samol mi Lapalap, ka angeeitä seni peias.

Üa fetal ngeni ewe lenien sotup,  
nge en ka amanauaei.

<sup>4</sup> Oupwe kölün mwareiti ewe Samol mi Lapalap,  
ämi nöün kewe chon pin.

Oupwe chechemeni Ewe mi Pin o kilisou ngeni.

<sup>5</sup> Pun a mochomoch fansoun an song,  
nge an kirikiröch a wor lon unusen fansoun man-  
auen eman aramas.

Lepwin a fis kechü,  
nge lesosor a fis pwapwa.

<sup>6</sup> Lupwen üa nom lon nükünüköch, üa apasa,  
“Üsap fokun mwökütüküt.”

<sup>7</sup> Ren om kirikiröch, ai Samol mi Lapalap,  
ka anükücharaei usun eu chuk mi pöchökül.  
Nge lupwen ka amona mesom seniei,  
üa fokun niuokus.

<sup>8</sup> Ai Samol mi Lapalap, üa siö ngonuk.

Üa tüngor ngonuk pwe kopwe alisiei.

<sup>9</sup> “Met sokun win kopwe angei, are üpwe mäla  
o tolong lon peias?

Ifa usun, chon mäla repwe tongeni mwareituk?

Ifa usun, repwe tongeni apworausä usun om  
allükülük?

<sup>10</sup> Ai Samol mi Lapalap, kopwe aüselingaei o  
ümöümöch ngeniei.

Ai Samol mi Lapalap, kopwe alisiei.”



<sup>11</sup> Iwe, ka awili ai ngüngüres ngeni pwörük,  
ka pwiliti seniei üfei üföüfen letipeta  
o aüföüfa ngeniei pwapwa.

<sup>12</sup> Üpwe fokun mwareituk,  
nge üsap fanafanala.  
Ai Samol mi Lapalap, ai Kot,  
üpwe kilisou ngonuk tori feilfeilachök.

## 31

### *Kapasen pwärätä lükülük*

#### *31.1-24*

Ngeni ewe mi emweni chon köl: Echö än Tafit köl.

<sup>1</sup> Ai Samol mi Lapalap, üa feito reöm pwe kopwe  
tümwünüei,

kosap mwüt ngeniei pwe üpwe kuf.

Kopwe angasaei, en ewe Kot mi pwüng.

<sup>2</sup> Kopwe aü selingom ngeniei, kopwe müttir  
amanauaei.

En kopwe ai lenien op usun eu föimw mi pöchökül,  
pwe kopwe amanauaei.

<sup>3</sup> Ewer, en ai achau, pwal imwei imwen maun.

Kopwe emweniei o aiti ngeniei ewe al usun ka  
pwon.

<sup>4</sup> Kopwe tümwünüei seni ewe sär mi molotä fän itei,  
kopwe ti seniei feiengau.

<sup>5</sup> Üa atolonga manaei lepoum,  
kopwe amanauaei, ai Samol mi Lapalap,  
ewe Kot mi allükülük. ✧

<sup>6</sup> Ka oput chokewe mi fel ngeni anümwäl mi lomo-  
tongau,

nge ngang üa anomu ai apilükülük womw.

---

✧ 31:5: Luk 23.46

7 Üpwe mwänek o pwapwa  
ren om tong ellet,  
pun ka küna ai riaföü  
o silei ai kewe weires.

8 Kosap atolongaei lepöün chon oputaei,  
nge ka mwüt ngeniei pwe üpwe feila ia üa mochen  
feila ie.

9 Ai Samol mi Lapalap, kopwe ümöümöch ngeniei,  
pun ngang üa nom lon riaföü.  
Mesei ra toputopula ren ai kechü,  
nge inisi a apwangapwangala.

10 Manauei a mochomochola ren riaföün letipei,  
nge ierin manauei ren ai ngüngü.  
Ai pöchökül a kisikisila pokiten ai riaföü,  
pwal chüi mwo nge ra apwangapwangala.

11 Üa sachowun me ren ekewe chon oputaei mein-  
isin o koput me ren chon ari.

Üa och pisekin eniw me ren chon sileei,  
nge chokewe mi künaei me lon al ra sü seniei.

12 Üa manlüküla me ren aramas usun eman mi  
mäla,  
üa usun eu sepi mi mök.

13 Ewer, üa rongorong pwe chomong ra  
möngününgün.

Lupwen ra raweei usun ar repwe angei manauei,  
niuokus watte a nom pwelin ünüki.

14 Nge ngang üa apilükuk, ai Samol mi Lapalap,  
üa apasa, “En ai Kot.”

15 Fansoun manauei a nom lepoum.

Kopwe angasaeila seni ekewe chon oputaei

me ekewe chon ariaföüei.

16 Kopwe netiu won noum chon angang fän  
kirikiröch  
o amanauaei lon om tong ellet.

17 Kosap mwütätä pwe üpwe itengau, ai Samol mi  
Lapalap,  
pun üa kökkörük.  
Nge kopwe mwütätä pwe ekewe aramasangau  
repwe itengau,  
repwe fanafanala le feitiu lon lenien sotup.

18 Kopwe afanafanalai ekewe chon chofana  
ra fos sikesik usun chon pwüing  
lon ar lamalamtekia me oput.

19 Om kirikiröch a fokun somwola,  
ka eäni ngeni chokewe mi niuokusituk.  
Ka pwal kirikiröch ngeni chokewe mi eänuk lenien  
op  
me fän mesen aramas meinisin.

20 Ka nonom rer o aopeer seni än ekewe aramas  
rawangau.  
Ka tümwünüöchüür me lon leniom  
seni än ekewe chon oputeer kapasen efitikoko.

21 Üpwe mwareiti ewe Samol mi Lapalap,  
pun a eäni tong ellet mi amwarar ngeniei,  
lupwen üa osupwang usun chon eu telinimw ra  
osupwang,  
lupwen sounfiu ra pwelifeili fän pisekin maun.

22 Üa ekieki lon ai niuokus  
pwe a asüeila seni fän mesan.  
Nge i a rongorong ai tüngor,  
lupwen üa siö ngeni pwe epwe alisie.

<sup>23</sup> Ämi nöün ewe Samol mi Lapalap chon pin meinisin, oupwe echeni i.

Ewe Samol mi Lapalap a tümwünü chokewe mi allükülük,

nge a liwiningau ngeni ekewe chon lamalamtekia won en me ükükün liwinin an föför.

<sup>24</sup> Oupwe pöchökül o tipepwora, ämi meinisin mi apilükülükü ewe Samol mi Lapalap.

## 32

### *Feiöchün musalan tipis*

#### *32.1-11*

Echö än Tafit köl. Echö kölün kait.

<sup>1</sup> Feiöchün ätewe an pupungau a musala, nge an tipis a möla.

<sup>2</sup> Feiöchün ewe aramas ewe Samol mi Lapalap esap tip ngeni och pwüngingau, ewe aramas ese wor chofana lon lelukan. ✧

<sup>3</sup> Lupwen üsap pwärätä ai tipis, inisi a apwangapwangala ren ai kechü lon unusen rän me rän.

<sup>4</sup> Pun lerän me lepwin ka apwüngüei.

Pöchökülen inisi a morotä usun koluk a morotä lupwen fansoun pwichikar.

<sup>5</sup> Mürin üa pwärätä ai tipis ngonuk, nge üsap aopala ai pwüngingau.

Üa apasa, “Üpwe pwärätä ngeni ewe Samol mi Lapalap ai pupungau.”

Iwe, ka amusala ai tipis meinisin.

---

✧ **32:2:** Rom 4.7-8

6 Iei mine ekewe chon allükülük repwe iotek  
ngonuk lon fansoun riaföü.

Lupwen feiengauen apwüŋ a war usun eu noter,  
esap toriir.

7 En eu lenien op fän itei,  
ka tümwünüei seni weires.  
Üa leüömong le köl  
usun om angasaeila.

8 Ewe Samol mi Lapalap a apasa,  
“Üpwe aiti ngonuk ewe al kopwe fetal won o  
emwenuk,  
üpwe öüröürok o mamasok.

9 Kosap wewe ngeni eman oris ika eman aas esap  
mirit,  
nge eman a chök tongeni nemeniir, are efoch  
mächä a nom lon awer fiti efoch säl,  
pwe repwe aleasochis ngeni.”

10 A wor chomong än ekewe aramasangau riaföü,  
nge ewe Samol mi Lapalap a tongei o tümwünü  
chokewe mi anomu ar apilükülük won.

11 Ämi chon pwüŋ, oupwe pwapwa o meseik  
ren mine ewe Samol mi Lapalap a föri.  
Oupwe mweireir fän pwapwa, ämi meininis mi  
wenechar lelukemi.

## 33

*Köln mwareiti ewe mi föri o tümwünü läng me  
fanüfan*

33.1-22

1 Ämi chon pwüŋ,

oupwe köl fän pwapwa ngeni ewe Samol mi Lapalap,

A fich ngeni chon wenechar pwe repwe mwareiti i.

<sup>2</sup> Oupwe mwareiti ewe Samol mi Lapalap ren ükülele,

oupwe ettik ngeni won kitar mi wor engol sait-enin.

<sup>3</sup> Oupwe köl ngeni echö köl mi fö,

oupwe ettikiöchü won ekewe pisekin ettik fiti mweireir mi

leüömong.

<sup>4</sup> Pun än ewe Samol mi Lapalap kapas a wenechar, an kewe föföör ra fis fän allükülük.

<sup>5</sup> Ewe Samol mi Lapalap a sani pwüing me let, fanüfan a ur ren an tong ellet.

<sup>6</sup> Ewe Samol mi Lapalap a afisi ekewe läng ren an kapas,

nge akkar, maram me fü kana ra fisitä ren mine a apasa.

<sup>7</sup> A achufengeni ekewe setin lematau lon eu leni usun lon eu rume,

a anomu ekewe matau mi alolol lon lenier usun lon eu imwen iseis.

<sup>8</sup> Unusen fanüfan epwe niuokusiti ewe Samol mi Lapalap,

nge chon fanüfan meinisin repwe meniniti.

<sup>9</sup> Pun mine a apasa a fisitä,

nge mine a allük a pwönüetä.

10 Ewe Samol mi Lapalap a ataela än chon ekewe  
mwü akot  
o pinei än ekewe aramas ekiem.

11 Nge än ewe Samol mi Lapalap akot a nonom tori  
feilfeilachök,  
ekiekin lelukan a nonom seni eu täppin aramas  
tori eu täppin.

12 Feiöchün ewe mwü mi eäni Kot ewe Samol mi  
Lapalap,  
feiöchün ekewe aramas i a filiretä pwe epwe  
nöüniir.

13 Ewe Samol mi Lapalap a nennetiü seni läng,  
a küna chon fanüfan meinisin.

14 A nennewu seni an we lenien nemenem  
o küna aramas meinisin mi nonom won fanüfan.

15 I ewe mi afisi ekiem leluker  
o silei ar kewe föföör meinisin.

16 Eman king esap manau ren watten an mwichen  
sounfiu,  
nge eman sounfiu esap ngasala ren an pöchökül  
mi lapalap.

17 A solap an eäni apilükülük orisin maun pwe  
epwe win,  
pun resap tongeni amanaua eman ren ar  
pöchökül.

18 Ewe Samol mi Lapalap a mamasa chokewe mi  
niuokusiti,

pwal chokewe mi apilükülüküni an tong ellet,

19 pwe epwe angaseer seni mäla o tümwünüür,  
pwe repwe tongeni manau lupwen fansoun len-  
gita.

20 Sa eäni apilükülük ewe Samol mi Lapalap,

pun i ewe chon alisikich a epeti senikich feiengau.

<sup>21</sup> Ewer, lelukach a pwapwa ren Kot,  
pun sa lükü itan mi pin.

<sup>22</sup> Ai Samol mi Lapalap, om tong ellet epwe nonom  
wom,  
usun äm apilükülük a nom womw.

## 34

*Kölün mwareiti Kot ren an angasakichela seni  
riaföü*

*34.1-22*

*(1.Sam 21.13-15)*

Echö än Tafit köl, lupwen a pomweni pomwen  
eman chon umwes me fän mesen Apimelek, pwe  
ätewe a asüela, nge Tafit a feila seni.

<sup>1</sup> Üpwe ingemwareiti ewe Samol mi Lapalap fan-  
soun meinisin,

üpwe chök mwamwareiti i.

<sup>2</sup> Ngang üpwe aingaing won ewe Samol mi La-  
palap.

Chokewe mi nom lon riaföü repwe rongorong o  
pwapwa ren.

<sup>3</sup> Oupwe etiei le asilefeili än ewe Samol mi Lapalap  
manaman,  
ousipwe mwareitifengeni itan.

<sup>4</sup> Üa iotek ngeni ewe Samol mi Lapalap, nge i a  
pälüeniei

o angasaei seni ai kewe niuokus meinisin.

<sup>5</sup> Oupwe sachetä ngeni i pwe oupwe pwapwa,  
nge ousap säw.

<sup>6</sup> Ewe chon mwelele a siö, nge ewe Samol mi  
Lapalap a aüselinga



o amanaua i seni an weires meinisin.

<sup>7</sup> Nöün ewe Samol mi Lapalap chon läng a nom  
pwelin ünükün chokewe mi niueiti i  
o angaseer seni feiengau.

<sup>8</sup> Oupwe neni o nengeni pwe ewe Samol mi La-  
palap a kirikiröch.

Ra feiöch ätekewe mi eäni i lenien op. ☆

<sup>9</sup> Ämi nöün ewe Samol mi Lapalap kewe chon pin,  
oupwe meniniti i,

pun chokewe mi meniniti i resap osupwang.

<sup>10</sup> Ekewe laion ra echik, pun esap wor ener.

Nge chokewe mi aleasochis ngeni ewe Samol mi  
Lapalap resap osun och mettoch mi mürina.

<sup>11</sup> Oupwe feito, ämi nei mwän o aüselingaei,  
üpwe aiti ngenikemi usun ämi oupwe meniniti ewe  
Samol mi Lapalap.

<sup>12</sup> Iö me leimi a pwapwaiti manau o mochen man-  
auatam  
pwe epwe alomota ekewe feiöch meinisin?

<sup>13</sup> Oupwe tümwünükemi pwe ousap eäni kapas mi  
ngau,

ousap pwal kapas chofana.

<sup>14</sup> Oupwe kul seni mine a ngau o föri mine a  
mürina,

oupwe kütta kinamwe ren unusen lelukemi.

<sup>15</sup> Ewe Samol mi Lapalap a mamasa ekewe chon  
pwüng,

selingan a rongorong ngeni ar siö.

<sup>16</sup> Nge a ü ngeni chokewe mi föri mine a ngau,

a föri pwe mürin ar mäla aramas repwe müttir  
manlükirela. ✧

17 Lupwen ekewe chon pwüng ra siön alilis, ewe  
Samol mi Lapalap a rongorong  
o angaserela seni ar weires meinisin.

18 Ewe Samol mi Lapalap a kan ngeni chokewe mi  
luketatakis,  
a amanaua chokewe mi apilükingau.

19 Chomong riaföü ra tori ewe chon pwüng,  
nge ewe Samol mi Lapalap a angasala i seniir  
meinisin.

20 A fokun tümwünü ewe chon pwüng,  
pwe esap mwo nge kup efoch chün. ✧

21 Föför mi ngau epwe afeiengaua ekewe ara-  
masangau,  
nge chokewe mi oput ekewe chon pwüng repwe  
küna liwiningau.

22 Ewe Samol mi Lapalap a amanaua nöün kewe  
chon angang.

Esap wor eman lein chokewe mi eäni Kot lenien op  
epwe küna liwiningau.

## 35

### *Iotekin ngasala seni chon oput*

#### *35.1-28*

Echö än Tafit köl.

1 Ai Samol mi Lapalap, kopwe ü ngeni chokewe mi  
ü ngeniei,

kopwe fiu ngeni chokewe mi fiu ngeniei.

2 Kopwe angei om kewe tittin maun,  
ewe mi watte me ewe mi kükün,

---

✧ **34:16:** 1.Pet 3.10-12 ✧ **34:20:** Joh 19.36

kopwe feito pwe kopwe alisie.

<sup>3</sup> Kopwe öüröürela fän wokum siles me noum  
kouken maun  
o ü ngeni ekewe chon tapweriei.  
Kopwe üreniei, “Ngang om Chon Amanau.”

<sup>4</sup> Amwo chokewe mi mochen nieila  
repwe kuf o itengau.  
Amwo chokewe mi rawangauaei  
repwe kulsefäl o rükö.

<sup>5</sup> Amwo repwe usun chök pön wiich asepwäl a  
ässala,  
nge nöün ewe Samol mi Lapalap chon läng epwe  
asürela.

<sup>6</sup> Amwo aler epwe ro chopwak o amitimit,  
nge nöün ewe Samol mi Lapalap chon läng epwe  
tapweriir.

<sup>7</sup> Pun ra aopala ar sär pwe repwe liapeniei,  
ra pwal tuw eu pwang pwe üpwe turulong lon,  
nge esap wor popun.

<sup>8</sup> Amwo feiengau mi lapalap epwe toriir mwen ar  
silei.  
Amwo repwe püsin tup lon ewe sär ra aopala.  
Amwo repwe turulong lon ewe pwang o fokun  
feiengau.

<sup>9</sup> Mürin ngang üpwe meseik ren ewe Samol mi  
Lapalap,  
üpwe ingemwareiti i pokiten an angasaei.

<sup>10</sup> Ngang üpwe apasa ngeni ewe Samol mi Lapalap  
ren unusen lelukei,  
“Tö a wewe ngonuk?”

En ka angasala ewe mi apwangapwang seni  
 ätekewe mi pöchökül seni,  
 ka angasala ewe mi apwangapwang o mwelele  
 seni ätekewe mi eliapa pisekin.”

11 Chon pwärätä chofana ra ü ngeniei,  
 ra atipisieï won föföör üsap silei.

12 Ra liwini ngeniei ingau fän iten ai föföör mürina.  
 Iwe, üa fokun apilükingau.

13 Nge lupwen ir ra samau, ngang üa üföüf üf seni  
 tuk,

üa ariaföüüei ren ai öchüün,  
 üa pworetü o iotek,

14 üa pwal letipeta usur usun üa letipeta fän iten  
 chienei ika pwii.

Üa pworetü fän ai lolilen o fetalfeil  
 usun eman mi kechüeiti inan.

15 Nge lupwen üa nom lon weires, ra mwicheto rei  
 o takiriei,

ra mwichefengen pwe repwe ü ngeniei.

Chon ekis üsap sileer me mwan ra kapasingau usi,  
 nge resap ükütü.

16 Ra chök alapala ar kapasen turunufas,  
 ra afochofoch ngeniei ren ar oputaei.

17 Ai Samol, ifa ükükün fansoun om kopwe chök  
 nenengeni ei lapalap?

Kopwe angasaei seni ar afeiengauaei,  
 kopwe amanauaei seni ekei laion.

18 Mürin üpwe kilisou ngonuk lon ewe  
 mwichelapen noum aramas,

üpwe mwareituk me lein ewe mwicheichen aramas.

<sup>19</sup> Kosap mwüt ngeni chon palüeniei, nge esap wor popun,

pwe repwe takirin ämängauaei,  
kosap pwal mwüt ngeni chokewe mi oputafatei  
pwe repwe takiriei ren ai letipeta. ☆

<sup>20</sup> Iwe, resap eäni kapas pwetete,  
nge ra eäni kapasen tipitipmwäl ngeni chokewe  
mi mosonoson lon ewe fanü.

<sup>21</sup> Ra atipisieï fän leüömong o apasa,  
“Aha, aha, mesem ra küna mine ka föri.”

<sup>22</sup> Nge en, ai Samol mi Lapalap, ka küna ei lapalap,  
kosap fanafanala.

Ai Samol, kosap toau seniei.

<sup>23</sup> Ai Samol, kopwe amwökütuk o ütä pwe kopwe  
pwärawu ai pwüng.

Kopwe peniei, ai Kot.

<sup>24</sup> Ai Samol mi Lapalap ai Kot, en ka pwüng, kopwe  
aletätä ai pwüng,  
nge kosap mwüt ngeni ekewe chon oputaei pwe  
repwe takirin ämängauaei.

<sup>25</sup> Kosap mwüt ngeniir pwe repwe apasa lefiler,  
“Aha, a torikich mochenin letipach.  
Sa awesi manauan.”

<sup>26</sup> Amwo chokewe meinisin mi pwapwaäsini ai  
feiengau  
repwe säw o osukosuk.  
Amwo chokewe meinisin mi lamalamtekia ngeniei

---

☆ **35:19:** Kölf 69.4; Joh 15.25

repwe küna säw me itengau.

<sup>27</sup> Amwo chokewe mi mochen pwe epwe pwä ai  
pwüng  
repwe meseik o mweireiren pwapwa, repwe pwal  
apasafochei,  
“Ewe Samol mi Lapalap a tekia,  
a pwapwa ren feiöchün nöün chon angang.”  
<sup>28</sup> Mürin üpwe apworausafeili om pwüng  
o köläm mwareituk fansoun meinisin.

## 36

### *Än Kot tong ellet*

#### *36.1-12*

Ngeni ewe mi emweni chon köl: Echö köl än Tafit  
nöün ewe Samol mi Lapalap chon angang.

<sup>1</sup> Tipis a nom lon leluken eman aramasangau o  
kapas ngeni.

Esap wor an meniniti Kot. ☆

<sup>2</sup> A lamalamtekia won inisin o ekieki  
pwe Kot esap tongeni küna o oput an tipis.

<sup>3</sup> An kewe kapas ra mwäl me chofana.

Esap chüen föri föföör mi mirit me mürina.

<sup>4</sup> Lupwen a kon won an peet, a ekiekietä mine a  
ngau.

Esap mwo nge föri mine a mürina,  
esap pwal oput mine a ngau.

<sup>5</sup> Ai Samol mi Lapalap, om tong ellet a tori ekewe  
läng,

om allükülük a tori ekewe kuchu.

<sup>6</sup> Om pwüng a tekia usun chök ekewe chuk,

---

☆ **36:1:** Rom 3.18

nge om kapwüŋ a usun chök matau mi alolol.  
Ai Samol mi Lapalap, ka tümwünü aramas me  
man.

<sup>7</sup> Ai Kot, om tong ellet a fokun aüchea.  
Aramas meininis ra op fän nürün poum.

<sup>8</sup> Ra kametip won somwen mongö lon imwom.  
Ka aünüür koluk seni ewe chanpupun om  
pwapwa.

<sup>9</sup> Pun en ewe lepopun manau meininis,  
nge ren om saram äm aia küna saram.

<sup>10</sup> Kose mochen kopwe sopwela om tong ellet  
ngeni chokewe mi sileek,  
kopwe pwal sopwela om amanaua chokewe mi  
wenechar leluher.

<sup>11</sup> Kosap mwüt ngeni ekewe chon lamalamtekia  
pwe repwe afeiengauaei.  
Kosap pwal mwüt ngeni ekewe aramasangau pwe  
repwe asüeila.

<sup>12</sup> Nengeni ia ekewe chon föföringau ra turutiu ie.  
Ikenan ra konola, nge resap chüen tongeni  
pwätäsefäl.

## 37

### *Nonomongauen ekewe aramasangau*

#### *37.1-40*

Echö än Tafit köl.

<sup>1</sup> Kosap achouuk pokiten ekewe aramasangau,  
nge kosap lolowö ngeni chokewe mi föri mine a  
ngäu.

<sup>2</sup> Pun repwe pwasekai usun fetil,  
repwe pwal mäla usun pötöwöl mi pwasala.

<sup>3</sup> Kopwe apilükülükü ewe Samol mi Lapalap o föri  
mine a mürina,  
pwe kopwe nonom lon ewe fanü fän kinamwe.

<sup>4</sup> Ewe Samol mi Lapalap i chök epwe om pwapwa,  
nge i epwe ngonuk mochenin lelukom.

<sup>5</sup> Kopwe lükü ngeni ewe Samol mi Lapalap man-  
auom  
o apilükülük ngeni, nge i epwe alisuk.

<sup>6</sup> Epwe pwärawu om pwüngüöch pwe epwe usun  
saram,  
nge om pwüng pwe epwe usun tinen akkaren  
leoloas.

<sup>7</sup> Kopwe fanafanala me fän mesen ewe Samol mi  
Lapalap o likitü le witiwiti i.  
Kosap achouuk ren ekewe aramas mi pisekisekila,  
pwal ren chokewe mi afisätä ar rawangau.

<sup>8</sup> Kopwe ükütiu seni song o likitala lingeringer.  
Kosap achouuk, pun a chök emwenukelong lon  
mine a ngau.

<sup>9</sup> Pun ekewe aramasangau repwe käriwu,  
nge chokewe mi apilükülükü ewe Samol mi La-  
palap repwe fanüeni ewe fanü.

<sup>10</sup> Lon fansoun mochomoch echök ekewe ara-  
masangau resap chüen nom.  
Inamwo are kopwe küttafichiir lon lenier,  
nge resap nom ikenan.

<sup>11</sup> Nge ekewe chon tipetekison repwe fanüeni ewe  
fanü



o pwapwaäsini ar feiöch me kinamwe mi somwola. ✧

12 Ekewe aramasangau ra rawangauei ewe chon pwüng  
o afochofoch ngeni.

13 Nge ewe Samol a takiri ekewe aramasangau,  
pun a silei pwe a arap ränin ar mäla.

14 Ekewe aramasangau ra üttawu nöür ketilas o emeia nöür likapich,  
pwe repwe afeiengaua ekewe mi wöüngau me mwelele,  
repwe pwal niela chokewe mi föri mine a pwüng.

15 Nge repwe mäla ren püsin nöür ketilas,  
nge ar likapich epwe kup.

16 Än eman chon pwüng pisek mi chokükün  
a mürina seni wöün ekewe aramasangau meinisin.

17 Pun pöchökülen ekewe aramasangau epwe wesila,  
nge ewe Samol mi Lapalap epwe alisi ekewe chon pwüng.

18 Ewe Samol mi Lapalap a tümwünü ekewe aramas esap wor ar tipis,  
repwe chök fafanü fanüer tori feilfeilachök.

19 Lon fansoun feiengau resap küna säw,  
nge lon ränin lengita epwe somwola ener mongö.

20 Nge ekewe aramasangau repwe rosola.  
Ekewe chon oputa ewe Samol mi Lapalap ra usun chök lingen ekewe pön ira mi morola lon ekewe mälämäl,

---

✧ 37:11: Mat 5.5

repwe moropöküla usun och ötütöt.

<sup>21</sup> Ewe aramasangau a liwinimang, nge esap tongeni amusasefäli.

Nge ewe chon pwüng a kirikiröch o fangafangöch.

<sup>22</sup> Pun chokewe mi feiöch me ren ewe Samol mi Lapalap repwe fanüeni ewe fanü,  
nge chokewe mi anümamau me ren Kot repwe kärila.

<sup>23</sup> Ewe Samol mi Lapalap a emweni eman aramas won ewe al epwe fetal won,  
a pwal anüküchara i, pun a pwapwa ren.

<sup>24</sup> Are epwe tur, esap turuchapala,  
pun ewe Samol mi Lapalap a kamwöch pöün.

<sup>25</sup> Seni me lom, lupwen ngang üa eman alüal, tori iei üa chinlap,  
üsap küna mwo eman chon pwüng epwe sachawun,  
ika nöün kana repwe tütüngorfetal ener mongö.

<sup>26</sup> Ewe chon pwüng a fangafangöch o mwütätä pisekin ngeni aramas,  
nge nöün kana ra wään feiöch ngeni aramas.

<sup>27</sup> Kopwe sü seni mine a ngau o föri mine a mürina, mürin kopwe nonomöch lon ewe fanü fän kinamwe.

<sup>28</sup> Pun ewe Samol mi Lapalap a efich mine a pwüng,  
esap likitala nöün kewe mi allükülük.  
Ewe Samol mi Lapalap a tümwünü ekewe chon pwüng tori feilfeilachök,

nge mwirimwirin ekewe aramasangau repwe  
kärila.

29 Ekewe chon pwüing repwe fanüeni ewe fanü o  
nonom won tori feilfeilachök.

30 Ewe chon pwüing a eäni fos mirit,  
a chök apasa mine a pwüing.

31 Än Kot kewe allük ra nom lon lelukan,  
nge esap tokola seniir.

32 Eman aramasangau a ooperi ewe chon pwüing  
o kütta an epwe niela.

33 Nge ewe Samol mi Lapalap esap asechala ewe  
chon pwüing fän nemenien ewe chon oputa,  
esap pwal mwüt ngeni pwe epwe etipisi lon  
kapwüing.

34 Kopwe anomu om apilükülük won ewe Samol  
mi Lapalap o aleasochisi an kewe allük.  
I epwe atekioketä pwe kopwe fanüeni ewe fanü,  
nge en kopwe nenengeni, lupwen ekewe ara-  
masangau repwe kasüla.

35 Üa küna eman aramasangau a nemenem fän  
pöchökül,  
a fokun tekiatä won aramas meinisin usun efoch  
irä setar won Lapanon.

36 Mürin üa pwal pweresefälila ren, nge esap chüen  
nom.

Üa kütta i, nge üsap chüen küna.

37 Kopwe afota ewe aramas esap wor an tipis o  
nenengeni ätewe mi wenechar.

A wor mwirimwirin ätewe mi afisätä kinamwe,

38 nge ekewe chon tipis repwe rosola meinisin,

pwal mwirimwirin ekewe aramasangau repwe  
kärila.

<sup>39</sup> Ewe Samol mi Lapalap a amanaua ekewe chon  
pwüing,  
i ar lenien op lon fansoun riaföü.

<sup>40</sup> Ewe Samol mi Lapalap a alisiir o angaseer.  
A angaserela seni ekewe aramasangau o  
amanaueer,  
pun ra eäni i lenien op.

## 38

### *Än eman chon aier iotek* *38.1-22*

Echö än Tafit köl fän iten asoren achechem.

<sup>1</sup> Ai Samol mi Lapalap, kosap apwüingüei lon om  
song,

kosap pwal ninniei lon om lingeringer.

<sup>2</sup> Pun ka akinasaei ren wokum kewe föün esefich,  
ka pwal amiritiei.

<sup>3</sup> Esap wor pöchökülen inisi pokiten om song,  
esap pwal wor pöchökülen lechüi pokiten ai tipis.

<sup>4</sup> Üa pwölüla fän ai kewe föför mi ngau,  
ra chou usun och mettoch mi kon chou ngeniei.

<sup>5</sup> Kinasei kewe ra pwongau o not  
pokiten ai umwesila lon tipis.

<sup>6</sup> Üa wesewesen pworetieu o chapala,  
fansoun meinisin üa lolilen.

<sup>7</sup> Üa samaun pwichikar,  
esap fokun wor pöchökülen inisi.

<sup>8</sup> Üa aiemalü o fokun apwangapwang,  
üa ngüngü pokiten riaföün lelukei.

<sup>9</sup> Ai Samol, en ka silei mochenin letipei meinisin,  
ka rongorong ai ngüngü meinisin.

<sup>10</sup> Lelukei a chechech, ai pöchökül a sü seniei,  
pwal mesei esap chüen neneöch.

<sup>11</sup> Pwii kewe me chiechiei resap kaneto rei  
pokiten ai samau,  
pwal mwo nge aramasei ra ütä me toau.

<sup>12</sup> Chokewe mi mochen nieila ra amolätä ar kewe  
sär,  
nge chokewe mi mochen ariaföüüei ra kapas usun  
ar repwe afeiengauaei,  
ra chök ekiengin rawangauaei fansoun meinisin.

<sup>13</sup> Nge ngang üa usun eman aramas mi selingap-  
was esap tongeni rongorong.  
Üa usun eman aramas mi awemwöch esap tongeni  
fos.

<sup>14</sup> Ewer, ngang üa usun eman aramas esap tongeni  
rongorong,  
esap pwal wor an kapasen pälüeni.

<sup>15</sup> Nge ngang üa apilükülükuk, ai Samol mi La-  
palap.

Ai Samol me ai Kot, en ätewe mi pälüeniei.

<sup>16</sup> Pun üa iotek, pwe kosap fokun mwüt ngeni  
ekewe chon oputaei pwe repwe takirin  
ämängauaei

o esitaei, lupwen üa mit.

<sup>17</sup> Pun üa arap ngeni ai üpwe turula,  
üa chök memetek fansoun meinisin.

<sup>18</sup> Üa pwärätä ai kewe föför mi ngau,  
üa pwal lolilen ren ai tipis.

19 Chokewe mi oputaei ra fokun pöchökül,  
nge chokewe mi oputafateei ra chomong.

20 Chokewe mi liwini ngeniei ingau fän iten ai föföör  
mürina,  
ir chon ü ngeniei, pun üa föri mine a pwüng.

21 Ai Samol mi Lapalap, kosap likitieila,  
ai Kot, kosap toau seniei.

22 Kopwe kaito pwe kopwe alisie, ai Samol, ai  
Chon Amanau.

## 39

### *Manauen aramas a mochomoch*

#### *39.1-13*

Ngeni ewe mi emweni chon köl: ngeni Jetutun.  
Echö än Tafit köl.

1 Üa apasa, “Üpwe püsin tümwünüei ren mine üa  
föri,  
üsap pwal mwüt ngeni chönawei pwe epwe apasa  
och mine üa tipis ren.

Üpwe pinei awei  
lon ükükün fansoun än ekewe aramasangau nom  
rei.”

2 Üa mosonoson o fanafanala,  
üsap mwo nge apasa och mi mürina.  
Nge ai riaföü a chök wattela.

3 Üa fokun lolilen.  
Iwe, lupwen üa ekinlon,  
ai riaföü a chök lapala.  
Mürin, üa kapas.

4 “Ai Samol mi Lapalap, kopwe asile ngeniei  
sopolan manaei,  
pwal ükükün langatamen ränin manaei.

Kopwe asile ngeniei müttirin än manaei sü seniei.

<sup>5</sup> Nengeni, ka föri pwe tamen ränin manaei ra  
chök usun tamen  
ekoch chöchön lon pau.

Fansoun manaei a usun chök nge esor me fän  
mesom.

Ellet, iteiten aramas mi nom won ei fanüfan ra  
usun chök eu enienin asepwäl.

<sup>6</sup> Ellet, aramas ra usun chök ngünüen mettoch.

Meinisin mine ra anganga esap wor lomotan.

Aramas ra achukuchukätä wöür, nge resap silei iö  
epwe angei me mürin.

<sup>7</sup> Ai Samol, met üpwe tongeni ösüküsükü iei?

Ai apilükülük a nom womw.

<sup>8</sup> Kopwe amanauaei seni ai tipis meinisin.

Kosap mwüt ngeni ekewe chon umwes pwe repwe  
turunufaseei.

<sup>9</sup> Üa fanafanala, üsap tongeni kapas,

pun en ewe mi atolongaei lon ei riaföü.

<sup>10</sup> Kose mochen kosap chüen ninniei.

Üa arap ngeni mäla ren om wichiei.

<sup>11</sup> Lupwen ka apwüngü eman aramas ren om  
fönöü pokiten an tipis,

ka ataela mettochun meinisin mi aüchea ngeni,  
usun pwötür ra enala mettoch.

Ellet, iteiten aramas ra usun chök eu enienin  
asepwäl.

<sup>12</sup> Ai Samol mi Lapalap, kopwe aüselinga ai iotek,

kopwe aü selingom ngeni ai siö.

Kosap fanafanala, lupwen üa kechü.

Pun gang üa chök eman wasöla reöm,

üa eman chon siamü usun ai kewe lewo meinisin.  
 13 Kopwe nenne seniei pwe üpwe tongeni pwapwa  
 me mwen ai üpwe mäla, nge üsap chüen nom.”

## 40

### *Kölün mwareiti Kot fän iten ngasala* 40.1-17

Ngeni ewe mi emweni chon köl: Echö än Tafit köl.

<sup>1</sup> Üa likitü le witiwiti än ewe Samol mi Lapalap  
 epwe alisiei.

I a aüselingaei o rongorong ai siö.

<sup>2</sup> A efeitä seni lon ewe pwang mi afeiengau,  
 seni lon ewe pwakak,

a anomuei won eu achau o anüküchara pechei  
 pwe üsap mit.

<sup>3</sup> A aiti ngeniei echö köl mi fö,  
 echö kölün mwareiti ach Kot.

Chomong repwe küna ei o niuokus,

repwe anomu ar apilükülük won ewe Samol mi  
 Lapalap.

<sup>4</sup> A feiöch eman aramas a anomu an apilükülük  
 won ewe Samol mi Lapalap,

ätewe esap kul ngeni chon lamalamtekia,

ika eti chokewe mi fel ngeni ekewe uluulun  
 anümwäl.

<sup>5</sup> Ai Samol mi Lapalap ai Kot, ka föri chomong föföör  
 mi amwarar me om akot ngenikem,

esap wor eman a wewe ngonuk.

Are üpwe asilefeiliir o apworausausur,

repwe chomong seni ai üpwe tongeni aleaniir.

<sup>6</sup> Kosap mochen ekewe asor me lifang,



nge ka ngeniei selingei pwe üpwe rongorong  
ngonuk.

Kosap allük pwe üpwe eäni asoren kek  
me asoren tipis.

<sup>7</sup> Mürin üa apasa, “Ngang iei, üa feito.

Lon ewe puken allük a mak usi.

<sup>8</sup> Üa pwapwa le föri letipom, ai Kot,  
om allük a nom lon lelukei.” ☆

<sup>9</sup> Üa apworaus a ewe pworaus mi mürina usun om  
amanauakem

me lon ewe mwichen noum aramas meinisin.

Üsap fokun ükütiu le apworaus a usun, ka fen silei,  
ai Samol mi Lapalap.

<sup>10</sup> Üsap aopala ewe pworaus a usun om amanauakem.

Üa kapas usun om allükülük me om alisikem.

Üsap tukumala seni ewe mwichen noum aramas  
meinisin

om tong ellet me om allükülük.

<sup>11</sup> Ai Samol mi Lapalap, kosap amwöchü seniei om  
ümöümöch.

Om tong ellet me om allükülük repwe tümwünüei.

<sup>12</sup> Chomong osukosuk ra pwelifeilei,

esap wor eman a tongeni aleaniir.

Ai kewe tipis ra rongeeila pwe üsap chüen künaei,

ra kon chomong lap seni meten mökürei,

nge lelukei a kisikisila.

<sup>13</sup> Ai Samol mi Lapalap, kose mochen kopwe  
amanauaei.

Ai Samol mi Lapalap, kopwe kaito pwe kopwe  
alisiei.

---

☆ 40:8: Ipr 10.5-7

14 Amwo meinisin mi mochen nieila  
repwe säw o tolong lon fitikoko.  
Amwo chokewe mi tipeni ai üpwe feiengau  
repwe kulsefäl o itengau.

15 Amwo chokewe mi ämängauaei  
repwe fokun rükö ren ar kuf.

16 Nge meinisin mi feito reöm  
repwe meseik o pwapwa.  
Chokewe mi aüchani om amanaueer repwe  
apasafochei,  
“Ewe Samol mi Lapalap a tekia.”

17 Nge ngang üa wöüngau o osupwang,  
nge en ai Samol, ka ekiekiei.  
En ai chon alilis me ai Chon Amanau.  
Ai Kot, kosap mang le alisiei.

## 41

### *Eu iotekin tüngr chikarsefäl*

#### *41.1-13*

Ngeni ewe mi emweni chon köl: Echö än Tafit köl.

<sup>1</sup> Ra feiöch chokewe mi ekieki ekewe mi apwang-  
gapwang o wöüngau.

Ewe Samol mi Lapalap epwe angaserela  
lon ränin ar riaföü.

<sup>2</sup> Ewe Samol mi Lapalap epwe tümwünüür o  
amwöchü manauer,  
nge ir repwe iteni chokewe mi feiöch me lon ewe  
fanü.

Iwe, esap atolongeer lepöün ekewe chon oputeer.

<sup>3</sup> Ewe Samol mi Lapalap epwe tümwünüür won ar  
kiekien samau,  
nge lupwen ra apwangapwang, epwe  
apöchöküleer seni ar samau meinisin.

4 Nge ngang üa apasa, “Ai Samol mi Lapalap, kopwe ümöümöch ngeniei o apöchökülaei, pun üa tipis ngonuk.”

5 Chon oputaei ra kapas usi lon ar ekingau, “Inet ätei epwe mäla pwe itan epwe mola?”

6 Lupwen eman a feito pwe epwe churiei, a chök eäni kapas pön.

Nge lon lelukan a ioi ekiekingau usi.

Mürin a towu lükün o apworausafetalei.

7 Meininis mi oputaei ra mwöngününgünfengen usi,

ra ekiekietä mine a fokun ngau ngeniei.

8 Iwe, ra apasa, “A üri och samaungau, esap chüen tongeni pwätä seni an kiekien samau.”

9 Pwal chiechiei mi fokun kan ngeniei, üa pwal fokun lükü,

ätewe mi mongö rei,

a ü ngeniei. ✧

10 Nge en, ai Samol mi Lapalap, kopwe ümöümöch ngeniei o apöchökülaei,

pwe üpwe tongeni liwini ngeni ekewe chon oputaei ükükün ar föfö.

11 Üa silei pwe en ka pwapwaitiei,

pun ekewe chon oputaei resap tongeni akufuei.

12 En ka alisie, pun üa föri mine a pwüng,

ka pwal anomuei fän mesom tori feilfeilachök.

13 Oupwe mwareiti ewe Samol mi Lapalap ewe Koten Israel

seni lomlom tori feilfeilachök.

---

✧ 41:9: Mat 26.23; Mark 14.18; Luk 22.21; Joh 13.18

Amen, Amen. ☆

## ARUEN PUK

### 42

#### *Positi Kot* 42.1-11

Ngeni ewe mi emweni chon köl: Echö än nöün  
Kora kewe mwän kölün kait.

<sup>1</sup> Usun eman chia a positi lölon chanpupu,  
iei usun ngang üa posituk, ai Kot.

<sup>2</sup> Üa fokun posituk, en ai Kot mi manau.

Inet üpwe tongeni feila o nenengeni mesom?

<sup>3</sup> Chönün mesei a fisitiu pwe enei mongö lerän me  
lepwin,

pun aramas ra aispat ngeniei, “Ifa i om we Kot?”

<sup>4</sup> Lelukei a tatakis, lupwen üa chechemeni ekei  
mettoch:

Usun üa eti ewe mwicheichen aramas  
o emweniir lon och tettel le feila ngeni ewe imwen  
Kot,

eu mwichemongun aramas mi mweireiren  
pwapwa me kölün kilisou.

<sup>5</sup> Ngüni, pwota ka letipengau,  
pwota ka ngüngü me loi?

Üpwe apilükülükü Kot,  
pun üpwe mwareitisefäli i,  
ai Chon Amanau me ai Kot.

<sup>6</sup> Ngüni a letipengau me loi. Iei mine üa  
chechemenuk

seni ewe fanü pekilan ewe chanpupu Jortan,  
seni ewe chuk Hermon me ewe chuk Misar.

---

☆ 41:13: Kölf 106.48

<sup>7</sup> Eu lenien alolol a kökkörato pwal eu lenien alolol,  
lupwen om kewe koluk mi putiu ra püngümong.  
Om kewe no meinisin me om kewe nolapalap ra  
pwölüeila.

<sup>8</sup> Lerän ewe Samol mi Lapalap a pwärawu an tong  
ellet,  
nge lepwin üa eäni echö an köl,  
üa iotek ngeni ewe Kot mi ngeniei manau.

<sup>9</sup> Üa kapas ngeni Kot ai achau,  
“Pwota ka manlükieila?  
Pwota üa chök ngüngüres  
pokiten ai riaföü ren chon oputaei?”

<sup>10</sup> Usun chök nge chüi ra kup,  
lupwen chon ü ngeniei ra ämängauaei ren ar aispat  
ngeniei,

“Ifa i om we Kot?”

<sup>11</sup> Ngüni, pwota ka letipengau,  
pwota ka ngüngü me loi?  
Üpwe apilükülükü Kot,  
pun üpwe mwareitisefäli i  
ai Chon Amanau me ai Kot.

## 43

### *Iotekin tüngor ngas*

#### *43.1-5*

<sup>1</sup> Ai Kot, kopwe aletätä ai pwüng  
o peniei seni ekewe aramas resap aleasochis  
ngonuk.

Kopwe angasaei seni ekewe aramas mi atuputup  
o pwüngingau.

<sup>2</sup> Pun en ewe Kot üa eänuk lenien op.  
Pwota ka pöütieila?

Pwota üa chök ngüngüres  
pokiten ai riaföü ren chon oputaei?

<sup>3</sup> Kopwe tinato om saram me om let  
pwe repwe emweniei,  
repwe emwenieila ngeni chukum mi pin,  
pwal ngeni imwom ia ka nom ie.

<sup>4</sup> Mürin üpwe feila ren om rongen asor,  
ai Kot en popun ai pwapwa mi fokun lapalap.  
üpwe kölün mwareituk won ükülele,  
en ai Kot.

<sup>5</sup> Ngüni, pwota ka letipengau,  
pwota ka ngüngü me loi?  
Üpwe apilükülükü Kot,  
pun üpwe mwareitisefäli  
ai Chon Amanau me ai Kot.

## 44

*Eman mi ngasala me lom, nge iei a nom lon  
riaföü*

### 44.1-26

Ngeni ewe mi emweni chon köl: Echö än nöün  
Kora kewe mwän kölün kait.

<sup>1</sup> Ai Kot, äm aia rongorong ren püsin selingem,  
pun äm kewe lewo ra apworausau ngenikem  
usun om kewe föföör ka föriir lon ränin manauer,  
lon ekewe fansoun lom.

<sup>2</sup> Ka püsin asüela chon ekewe mwü,  
nge ka fotukätü äm kewe lewo lon ewe fanü.  
Ka ariaföüü ekewe aramas,  
nge ka angasa äm kewe lewo.

<sup>3</sup> Pun resap liapeni ewe fanü ren püsin nöür keti-  
las,

resap pwal win ren püsin ar pöchökül,  
ngei ren om pöchökül me manaman,  
pwal ren om nonom rer, pun ka tongeer.

<sup>4</sup> En ai king me ai Kot,

ka akota pwe noum kewe aramas repwe win.

<sup>5</sup> Ren om manaman aia akufätü ekewe chon op-  
utakem.

Pokiten itom aia purätü ekewe chon fiu  
ngenikem.

<sup>6</sup> Pun üsap lükü ai likapich,

nei ketilas esap pwal tongeni amanauaei.

<sup>7</sup> Nge en ka amanauakem seni ekewe chon ü  
ngenikem

o akufu chokewe mi oputakem.

<sup>8</sup> Äm aia chök aingaing womw en äm Kot fansoun  
meinisín

o kilisou ngonuk tori feilfeilachök.

<sup>9</sup> Nge iei ka pütikeemila o föri pwe aipwe kuf,

kosap pwal chüen eti äm mwichen sounfiu le feila  
ngeni maun.

<sup>10</sup> En ka föri pwe äm aipwe timär me mwen ekewe  
chon ü ngenikem,

nge ekewe chon oputakem ra angei liaper  
senikem fän pöchökül.

<sup>11</sup> Ka asechikeemilong lepöür pwe repwe niikem  
usun sip mi amol ngeni ar repwe ninnila,

ka pwal atoropasafeilikem lein chon ekewe mwü.

<sup>12</sup> Ka amömöla noum kewe aramas ren liwin mi  
kisikis,

nge kosap angei och win ren om amömörela.

13 Ka föri pwe äm aia uren takir me ren chon arüm,  
ir ra ämängauakem o esitakem.

14 Ka föri pwe chon ekewe mwü ra leawenikem lon  
ar kapasen turunufas,  
ra elifechefe ch ren ar ämängauakem.

15 Fansoun meinsin üa itengau,  
üa pwölüla ren ai säw

16 pokiten än ekewe chon ämängau me chon turun-  
ufas kapas,  
pwal pokiten än ekewe chon oputaei liwiningau  
ngeniei.

17 Ekei mettoch meinsin ra fis ngenikem,  
nge äm aisap manlükukala  
ika atai om we pwon.

18 Äm aisap kul senuk,  
äm aisap pwal aleasolap ngeni om kewe allük.

19 Nge en ka atatakisikem me lon lenien ekewe  
kolak mi mwacho  
o pwölükeemila ren rochokichin mäla.

20 Are äm aipwe manlükala iten äm we Kot  
ika iotek ngeni pwal eman koten ekis,

21 ifa usun, Kot esap küna ei föföör?

Ewer, pun Kot a silei mine a monomon me lon  
lelukem.

22 Nge fansoun meinsin aia küna ninni pokitom,  
äm aia wewe ngeni sip mi amol ngeni ar repwe  
ninnila. ☆

23 Ai Samol, kopwe pwök! Pwota ka annut?  
Kopwe nennela! Kosap pöütifochekeemila.

24 Pwota ka amona mesom senikem?

---

☆ 44:22: Rom 8.36



Kosap manlükala äm riaföü me weires.

<sup>25</sup> Pun äm aia turula lon pwülümoromor,  
inisim ra pacheri pwül.

<sup>26</sup> Kopwe ütä o feito pwe kopwe alisikem.  
Kopwe angasakem pokiten om tong ellet.

## 45

*Echö köl fän iten apwüpwülüen ewe king*

*45.1-17*

Ngeni ewe mi emweni chon köl: Ei köl usun ngingin ewe köl itan Kiop. Echö än nöün Kora kewe mwän kölün kait. Echö kölün tong.

<sup>1</sup> Lelukei a säsewu ren pworaus mi mürina.

Üpwe apasa ekewe wokisin lon ai we köl fän iten ewe king.

Chönawei a usun nöün eman soumak pen mi molotä.

<sup>2</sup> En ka äteöch seni mwän meinsin,  
kapasen awom ra pwetete,

iei mine Kot a afeiöchuk fansoun meinsin.

<sup>3</sup> En ewe mi pwora, kopwe rietä noum ketilas won  
wänükum,

ka ling o manaman.

<sup>4</sup> Fän om manaman kopwe fetal ngeni win  
pwe kopwe peni let, tipefesir me pwüng.

Ren om pöchökül kopwe föri föför mi amwarar.

<sup>5</sup> Wokum kewe föün esefich ra ken,  
ra fotolong lon luken ekewe chon oputom.

Chon ekewe mwü ra kuf fomw.

<sup>6</sup> Om lenien motun king a usun chök än Kot lenien  
mot,

a nom tori feilfeilachök.

Ka nemeni noum kewe aramas fän pwüing.

<sup>7</sup> Ka efich pwüing, nge ka oput mi ngau.

Iei mine Kot, om we Kot a filuketä,

a fang ngonuk pwapwa

lap seni an fang ngeni chienom kewe. ✧

<sup>8</sup> Ufom kewe meinisín ra pwokus ren pwonnen lö  
seni ekewe irä mör, aloes me kasia.

Chon ettiki pisekin ettik mi wor saitenir ra ap-  
wapwook me lon imwen king mi fout ngeni  
ngiin äläfant.

<sup>9</sup> Nöün ekewe king föpwül ra nom lein ekewe fefin  
mi nom lon imwom,  
nge ewe kiwiin mi ütä lepelifichum  
a fout ngeni kolt seni Ofaia.

<sup>10</sup> Nei föpwül, kopwe rongorong ai kapas o ekieki  
usur.

Kopwe manlükala aramasom me chon leimwen  
semom,

<sup>11</sup> mürin, ewe king epwe fokun sani liöchum.

Kopwe tütiu me mwan, pun i om samol.

<sup>12</sup> Ekewe aramasen Tirus repwe uwato ar lifang  
ngonuk,

ekewe aramas mi fokun pisekisek repwe kütta  
chenir me reöm.

<sup>13</sup> Nöün ewe king föpwül a unusen ling me lon  
rumwan,

üfan kewe ra tür seni terech kolt.

<sup>14</sup> Ra emwenala i ren ewe king fän üfan mi sokopat  
önüan,

ra pwal emwenala chienan kewe föpwül

---

✧ 45:7: Ipr 1.8-9

mi tapwela mürin.

<sup>15</sup> Ra feito o tolong lon imwen ewe king  
fän pwapwa o mweireir.

<sup>16</sup> Noum kewe mwän repwe akasiwili  
om kewe lewo lon wisen king.

Ka awiseer pwe repwe nemenem won unusen  
fanüfan.

<sup>17</sup> Üpwe pwärala om iteföüla seni eu täppin aramas  
tori pwal eu täppin.

Iei mine chon ekewe mwü repwe mwareituk tori  
feilfeilachök.

## 46

### *Kot ach lenien op me ach pöchökül*

#### *46.1-11*

Ngeni ewe mi emweni chon köl: Echö köl än nöün  
Kora kewe mwän. Ei köl usun ngingin sopran.

<sup>1</sup> Kot ach lenien op me ach pöchökül,  
a sip le alilis lon fansoun riaföü.

<sup>2</sup> Iei mine sisap niuokus are fanüfan epwe wilila,  
nge chuk kana repwe kokotiu lealololun matau,

<sup>3</sup> are nonon lematau epwe püng o purapur,  
nge ekewe chuk repwe chechek ren  
püngüpüngün.

<sup>4</sup> Mi wor eu chanpupu mi awarato pwapwa ngeni  
ewe telinimwen Kot,  
ewe leni mi pin än Ewe mi Unusen Tekia.

<sup>5</sup> Kot a nonom lon ewe telinimw pwe esap fokun  
tala.

Lesosorusich Kot epwe alisi ewe telinimw.

<sup>6</sup> Chon ekewe mwü ra fokun niuokus, nge mwün ekewe king ra taroporop.

Iwe, lupwen Kot a akkapwas, fanüfan a telila.

<sup>7</sup> Ewe Samol mi Unusen Manaman a etikich, än Jakob we Kot i ach lenien op mi pöchökül.

<sup>8</sup> Oupwe feito o nenengeni än ewe Samol mi Lapalap föför,

usun an ataela fanüfan.

<sup>9</sup> A aükätü maun won unusen fanüfan, a kupi ekewe likapich o pwülü ekewe siles, a fisi ngeni ekkei ekewe wokenin maun.

<sup>10</sup> A apasa, “Oupwe emwen le maun, oupwe silei pwe ngang echök Kot.

Ngang üa tekia seni chon ekewe mwü, ngang üa tekia won fanüfan.”

<sup>11</sup> Ewe Samol mi Unusen Manaman a etikich, än Jakob we Kot i ach lenien op mi pöchökül.

## 47

### *Kot i king won unusen fanüfan*

#### *47.1-9*

Ngeni ewe mi emweni chon köl: Echö köl än nöün Kora kewe mwän.

<sup>1</sup> Oupwe aloplop ämi chon ekewe mwü meinisin. Oupwe mweireir fän leüömong ren kölün pwapwa.

<sup>2</sup> Sipwe niuokusiti ewe Samol mi Lapalap, Ewe mi Unusen Tekia,

i eman king mi lap a nemeni unusen fanüfan.

<sup>3</sup> A asapwilätü chon ekewe mwü fach o atolonga ekewe mwü fän nemeniach.

<sup>4</sup> A filätä fän itach ewe fanü sa fanüeni, ewe fanü nöün aramas ra aücheani, ir chokewe Kot a tongeer.

5 Kot a feitä ren an lenien motun king fän  
mweireiren pwapwa,  
ewe Samol mi Lapalap a feitä  
fän tikin rappwa.

6 Oupwe kölün mwareiti Kot, oupwe kölün mware-  
iti.  
Oupwe kölün mwareiti ach king, oupwe kölün  
mwareiti.

7 Pun Kot i kingen unusen fanüfan,  
oupwe mwareiti i ren echö köl mi pin.

8 Kot a nemeni ekewe mwü,  
Kot a mot won an lenien motun king mi pin.

9 Ekewe samolun ekewe mwü ra mwichefengen,  
ir ewe mwichen aramas nöün än Apraham we Kot.  
Pun ekewe kingen fanüfan nöün Kot,  
i a fokun tekia mwer meinisin.

## 48

### *Öchün me lingen Sion*

#### *48.1-14*

Echö köl än nöün Kora kewe mwän.

1 Ewe Samol mi Lapalap a tekia, nge aramas mein-  
isin repwe fokun mwareiti i  
me lon ewe telinimwen ach Kot,  
me won chukun mi pin.

2 Ewe chuk Sion a tekia o fokun lingöch,  
chon fanüfan meinisin ra pwapwaiti.  
Lepekin ewe chuk kükü ngeni efeng a nom telin-  
imwen ewe king mi lap. ☆

3 Kot a nom lon ekewe imwen king.  
A pwärätä pwe i ewe lenien op mi pöchökül.

---

☆ 48:2: Mat 5.35

<sup>4</sup> Ekewe king ra mwichefengen,  
ra mwinepöküto le feito pwe repwe maun ngeni  
ewe telinimw.

<sup>5</sup> Nge lon ewe otun, lupwen ra küna ewe telinimw,  
ra weitifengeniir,  
ra niuokus o süla.

<sup>6</sup> Ikenan niuokus a toriir, cheuch a cheriir  
usun eman fefin a tori an cheuchen famw.

<sup>7</sup> Ka aroserela usun asepwälin ötiu a ataela ekewe  
sipen Tarsis.

<sup>8</sup> Usun mine sa rongorong,  
iei usun sa pwal küna me lon ewe telinimwen ewe  
Samol mi Unusen Manaman,  
me lon ewe telinimwen ach Kot.  
I a anüküchara ewe telinimw tori feilfeilachök.

<sup>9</sup> Ai Kot, äm aia ekieki usun om we tong ellet  
me lon ewe imwenfel.

<sup>10</sup> Ai Kot, usun aramas won unusen fanüfan ra silei  
itom,

iei usun ra pwal mwareituk.  
Ka nemenem fän pwüng.

<sup>11</sup> Ekewe aramasen Sion repwe pwapwa.  
Ekewe telinimwen Juta repwe mweireir  
pokiten ka eäni kapwüng fän pwüng.

<sup>12</sup> Ämi aramasen Kot, oupwe fetalfeil lon Sion o  
pwelifeili,  
oupwe aleani ekewe imw tekia lon.

<sup>13</sup> Oupwe nenengenöchü tittin mi pöchökül o ka-  
tolfeil ekewe imwen king,  
pwe oupwe tongeni apworausä ngeni ekewe pilon  
aramas repwe feito,

<sup>14</sup> “Iei i Kot, ach Kot tori feilfeilachök.

I epwe emwenikich tori feilfeilachök.”

## 49

*Ach apilükülükü pisekin fanüfan och ekiék  
umwes*

*49.1-20*

Ngeni ewe mi emweni chon köl: Echö köl än nöün  
Kora kewe mwän.

<sup>1</sup> Ämi chon ekewe mwü meinsin, oupwe ron-  
gorong ekei kapas,  
oupwe aü selingemi, ämi meinsin mi nom won  
fanüfan,

<sup>2</sup> ämi aramas tekia me aramas tekison,  
ämi aramas pisekisek me aramas wöüngau.

<sup>3</sup> Üpwe apasätä kapas tipachem,  
nge ekiékin lelukei epwe awora weweöch.

<sup>4</sup> Üpwe aü selingei ngeni eu kapasen amirit,  
üpwe awewei ai asisil,  
lupwen üa ettiki nei ükülele.

<sup>5</sup> Pwota üpwe niuokus lupwen fansoun riaföü,  
lupwen chon ariaföüüei ra pwelifeiliei?

<sup>6</sup> Ir ekewe aramas mi apilükülükü wöür  
o sikäsini pisekir mi somwola.

<sup>7</sup> Ellet esap wor eman a tongeni isetiu pen-  
manauen pwin  
ika ngeni Kot liwinin manauan.

<sup>8</sup> Pun liwinin manauen eman aramas a men  
mömong.

Esap fokun naf an epwe möni manauan,

<sup>9</sup> pwe epwe tongeni manau tori feilfeilachök,  
nge esap tolong lon peias.

10 Ewer, aramas ra küna pwe pwal ekewe chon  
tipachem ra mäla

usun chök ekewe mi umwes me tiparoch.  
Ra likiti wöür ngeni pwal ekoch.

11 Ar lenien peias iei imwer tori feilfeilachök,  
iei lenier repwe nom lon fansoun meinisin.  
Inamwo ika mi wor püsin fanüer me lom.

12 Aramas resap tongeni nonomotiu won fanüfan  
lon ar wöümong,  
nge repwe mäla usun chök man.

13 Iei usun mine epwe fis ngeni chokewe mi püsin  
lükü ir,

iei sopolan chokewe mi pwapwaäsini wöür.

14 Ra fil pwe repwe ninnila usun chök ekewe sip.  
Mäla epwe nöür chon mas.

Ekewe chon pwüing repwe pwapwa ren ar aku-  
fuur lesosor,

nge ir repwe pwomachala

lon ewe lenien sotup toau seni imwer mi ling.

15 Nge Kot epwe angasaeila seni ewe lenien sotup,  
pun i epwe etiwaei.

16 Kosap weitifengeniik are eman a pisekisekila,  
are wöün a chök lapalapala,

17 pun lupwen epwe mäla, esap uweela och,  
nge wöün esap tapwela mürin.

18 Inamwo are a ekieki pwe a feiöch lupwen an  
manau,

pwal inamwo are aramas ra mwareiti i pokiten an  
pisekisekila,

19 epwe chök eti an kewe lewo le mäla,  
chokewe resap fokun chüen küna saram.



20 Aramas resap tongeni nonomotiu won fanüfan  
lon ar wöümong,  
nge repwe mäla usun chök man.

## 50

### *Kot ewe soukapwüng*

#### *50.1-23*

Echö än Asaf köl.

<sup>1</sup> Kot ewe Samol mi Lapalap, Ewe mi Unusen  
Manaman, a kapas  
o körifengeni chon fanüfan seni meserän tori  
apiläng.

<sup>2</sup> Kot a saramawu seni Sion,  
ewe telinimw mi unusen ling.

<sup>3</sup> Ach Kot a feito, nge esap fanafanala.

Ekkei mi kümau a nom mwan,  
nge eu mölümöl mi watte a pwelifeili ünükün.

<sup>4</sup> A kökkötä ngeni ekewe läng, a pwal kökkö ngeni  
fanüfan pwe repwe küna,  
lupwen epwe apwüngü nöün kewe aramas.

<sup>5</sup> A apasa, “Oupwe amwichato rei nei kewe mi  
allükülük,  
chokewe mi eäni eu pwon ngeniei ren ar eäni eu  
asor.”

<sup>6</sup> Ekewe läng ra pwärätä pwe Kot a pwüng,  
pwe püsün i ewe soukapwüng.

<sup>7</sup> “Ämi nei aramas, oupwe rongorong, ngang üpwe  
kapas.

Ämi chon Israel, üpwe ü ngenikemi ren ai pwärätä  
usumi.

Ngang Kot, ämi we Kot.

8 Üsap fönökemi pokiten ämi asor  
me ämi asoren kek oua uwato rei fansoun mein-  
isin.

9 Nge üsap osun eman ätemwänin kow seni ämi  
imwen man,  
ika eman kuuch seni ämi lenien man.

10 Pun iteiten man mi nom lein wöllap nei,  
pwal ekewe kow mi nom won ekewe engeröü  
chuk nei.

11 Üa silei ekewe machang won ekewe chuk mein-  
isin,  
nge meininis mine a mwökütüküt me lon ewe  
lemäl nei.

12 Ika üpwe echik, üsap ürenikemi,  
pun fanüfan me masouan meininis ai.

13 Ifa usun, üa ochei fituken ekewe ätemwänin kow,  
ika ünümi chan ekewe kuuch?

14 Ämi kilisou epwe ina ämi asor ngeni Kot.  
Oupwe apwönüetä ämi kewe pwon oua eäni ngeni  
Ewe mi Unusen Manaman.

15 Oupwe köriei lon ränin ämi riaföü,  
pun ngang üpwe angasakemi,  
nge ämi oupwe mwareitiei.”

16 Nge Kot a apasa ngeni ewe aramasangau,  
“Pwota ka tongeni leaweni ai kewe allük  
ika kapasen ai we pwon?

17 Pun ka oput ai amirituk  
o pöütala ai kewe kapas.

18 Are ka küna eman chon solä, ka chiechi ngeni,  
ka pwal nom ren ekewe chon lisowu.

19 Ka chök akapasa kapasingau,

nge kosap aposa awom seni kapasen atuputup.

<sup>20</sup> Ka chök tipitipimwäl ngeni pwiüm  
o aitengaua püsin nöün inom.

<sup>21</sup> Ekei mettoch en ka föri, nge ngang üa  
fanafanala.

Ka ekieki pwe ngang usun chök en.

Nge iei üpwe apwünguk  
o atipsisuk.

<sup>22</sup> Oupwe ekieki usun ei, ämi mi manlükieila.

Nge are ousap, üpwe arosakemiila,  
nge esap wor eman epwe amanauakemi.

<sup>23</sup> Eman mi kilisou ngeniei ina an asor ngeniei.

Ren ei a asamoluei,  
nge eman mi aleasochisiei üpwe fokun amanaua.”

## 51

*Eu iotekin tüngr amusamusen tipis*

*51.1-19*

*(2.Sam 12.1-15)*

Ngeni ewe mi emweni chon köl: Echö än Tafit köl,  
lupwen ewe soufos Natan a feito ren mürin än  
Tafit kon ren Patsipa.

<sup>1</sup> Ai Kot, kopwe kirikiröch ngeniei lon om tong  
ellet,

kopwe amoela ai pupungau  
lon om ümömöch mi lapalap.

<sup>2</sup> Kopwe fokun talü seniei ai föföringau  
o limetiei seni ai tipis.

<sup>3</sup> Pun üa mefi ai pupungau,  
nge ai tipis a nonom fochofoch fän mesei.

<sup>4</sup> Üa tipis ngonuk, fokun ngonuk echök,

o föri mine a ngau me fän mesom.  
Iei mine a pwüing om kopwe apwüingüei,  
esap pwal wor om mwäl, lupwen ka eäni kapwüing.

☆

<sup>5</sup> Ellet ngang eman chon tipis seni ai uputiu.  
Ngang üa uren tipis seni ewe fansoun inei a  
nöünieitü.

<sup>6</sup> Ellet, ka pwapwaäsini letip wenechar.  
Kopwe aiti ngeniei ewe tipachem mi monomon.

<sup>7</sup> Kopwe limetiei ren ülün ewe irä isop pwe üpwe  
limöch,  
kopwe talü seniei ai tipis pwe üpwe pwech seni  
snow.

<sup>8</sup> Kopwe mwüt ngeniei pwe üpwe rongorong  
mweireiren pwapwa me meseik.  
Kopwe pwal mwüt ngeniei ai üpwe pwapwa,  
inamwo ika ka kupi chüi.

<sup>9</sup> Kosap nenengeni ai kewe tipis, nge kopwe  
amoela ai föföringau meinisin.

<sup>10</sup> Ai Kot, kopwe föri loi eu leluk mi limöch  
o fangelong loi eu ngün mi fö o pos.

<sup>11</sup> Kosap asüeila seni fän mesom,  
kosap pwal angei seniei Ngünum mi pin.

<sup>12</sup> Kopwe aliwinisefäli ngeniei ewe pwapwa mi  
nom rei, lupwen ka amanauaei,  
kopwe atufichiei pwe üpwe aleasochis ngonuk.

<sup>13</sup> Mürin üpwe aiti ngeni ekewe chon tipis om kewe  
allük.

Iwe, ir repwe kulituk.

<sup>14</sup> Ai Kot, kopwe angasaeila seni mäla,  
en Kot ai Chon Amanau.

☆ **51:4:** Rom 3.4

Üpwe pwapwa le köl usun om pwüng.

<sup>15</sup> Ai Samol, kopwe amwelieliaei  
pwe üpwe mwareituk.

<sup>16</sup> Pun en kosap efich asor, ika ngang üpwe uwato  
reöm.

En kosap pwapwa ren asoren kek.

<sup>17</sup> Ai Kot, üa asor ngonuk eu letip mi tipetekison,  
eu leluk mi tipetekison o liamam, en kosap oput.

<sup>18</sup> Ai Kot, kopwe kirikiröch ngeni Sion fän pwap-  
wan letipom.

Kopwe aüsefälietä tittin Jerusalem.

<sup>19</sup> Mürin kopwe pwapwa ren ekewe asor mi fis fän  
pwüng,

pwal ren äm kewe asoren kek.

Mürin, ekewe ätemwänin kow repwe kekila won  
om rongen asor.

## 52

*Lomotongauen ach sikäsini föföringau*

*52.1-9*

*(1.Sam 22.9-10)*

Ngeni ewe mi emweni chon köl: Echö än Tafit  
kölün kait, lupwen Toek ewe re Etom a feila ren  
Saul o üreni pwe Tafit a feila lon imwen Ahimelek.

<sup>1</sup> En mwän mi pwora, pwota ka sikäsini om  
föföringau?

Än Kot tong a nom tori feilfeilachök.

<sup>2</sup> Ka ekiiekietä usun om kopwe afeiengaua aramas.  
Chönawom a usun chök echö räisö mi ken,  
en eman chon föri angangen atuputup.

<sup>3</sup> Ka efich mine a ngau lap seni mine a mürina,

ka pwal efich kapas chofana lap seni kapas mi let.

<sup>4</sup> Ka efich om kopwe afeiengaua aramas ren om kapas, en chon atuputup.

<sup>5</sup> Nge Kot epwe afeiengauok tori feilfeilachök, epwe turufuk o urusukowu seni imwom.

Epwe üttukowu seni fanüen chon manau.

<sup>6</sup> Ekewe chon pwüing repwe küna mine epwe fis ngonuk o niuokus,

mürin repwe takiriik o üra,

<sup>7</sup> “Nengeni, iei i ewe mwän esap mochen eäni Kot apilükülük,

nge a apilükülükü wöün mi somwola

o pöchökülela lon an föföringau.”

<sup>8</sup> Nge ngang üa usun efoch irä olif mi märöch me lon imwen Kot.

Üa lükü än Kot tong ellet tori feilfeilachök.

<sup>9</sup> Ai Kot, üpwe kilisou ngonuk tori feilfeilachök ren mine ka föri.

Üpwe asilefeili ngeni noum kewe aramas pwe en ka kirikiröch.

Ei üpwe föri me fän meser.

## 53

*Än ekewe aramas umwes me föföringau*

*53.1-6*

*(Kölf 14)*

Ngeni ewe mi emweni chon köl: Ei köl usun ngingin ewe sokun köl mi mang. Echö än Tafit kölün kait.

<sup>1</sup> Ekewe mi umwes ra ekieki lon leluiker, “Esap wor Kot.”

Ir ra fokun ngau,

ra föri sokun föför mi anioput,  
esap wor eman a föri mine a pwüng.

<sup>2</sup> Kot a nenneti seni läng won aramas meinsin,  
pwe epwe küna ika a wor eman mi mirit,  
ika eman mi kütta Kot.

<sup>3</sup> Nge ir meinsin ra tokola,  
ir meinsin ra ingauepök.  
Esap wor eman a föri mine a pwüng,  
esap fokun wor eman. ☆

<sup>4</sup> Ewe Samol mi Lapalap a ais,  
“Ifa usun, esap wor än ekewe chon föföringau  
mirit?  
Ir chokewe mi manau seni mine ra soläni seni nei  
aramas,  
nge resap iotek ngeniei.”

<sup>5</sup> Mürin a toriir niuokus watte,  
eu niuokus watte esamwo toriir me mwan.  
Pun Kot epwe atoropasafeili chün chokewe mi  
oput nöün aramas.  
Chon Israel repwe fokun akufuur,  
pun Kot a fen pöütirela.

<sup>6</sup> Amwo eman epwe feito seni Sion  
o amanaua chon Israel.  
Ekewe chon Israel repwe fokun pwapwa,  
lupwen Kot epwe aliwini ngeniir wöür.

---

☆ 53:3: Rom 3.10-12

## 54

*Eu iotekin tūngor pwe Kot epwe tümwünü nöün  
aramas seni ekewe chon oputer*

*54.1-7*

*(1.Sam 23.19; 26.1)*

Ngeni ewe mi emweni chon köl: Won pisekin ettik mi wor saitenin. Echö än Tafit kölün kait, lupwen ekewe chon Sif ra feila ren Saul o üreni pwe Tafit a op lefiler.

<sup>1</sup> Ai Kot, kopwe amanauaei ren manamanen itom, kopwe aletätä ai pwüng ren om pöchökül.

<sup>2</sup> Ai Kot, kopwe aüselinga ai iotek, kopwe aü selingom ngeni ai kewe kapas.

<sup>3</sup> Pun chon lamalamtekia ra ü ngeniei, ekewe chon mwäneson ra mochen nieila. Ir chokewe resap ekieki Kot.

<sup>4</sup> Nge Kot ai chon alilis, ewe Samol i chon amwöchü manauai.

<sup>5</sup> Kot epwe ukun ngeni chon oputaei ar föföör mi ŋgau.

Epwe aroserela fän an allükülük.

<sup>6</sup> Ngang üpwe eäni eu asor ngonuk seni mochenin letipei.

Üpwe kilisou ngonuk, ai Samol mi Lapalap, pun en ka kirikiröch.

<sup>7</sup> En ka angasaei seni ai riaföü meininis, nge üa pwapwa, lupwen üa küna pwe chon oputaei ra kuf.



## 55

*Eu iotekin tüngor feiengauen chon atuputup**55.1-23*

Ngeni ewe mi emweni chon köl: Won pisekin ettik mi wor saitenin. Echö än Tafit kölün kait.

<sup>1</sup> Ai Kot, kopwe aüselinga ai iotek,

kosap asorongorongola seni ai tüngor.

<sup>2</sup> Kopwe rongorong ngeniei o palüeniei.

Ai osukosuk a fokun aweiresiei.

<sup>3</sup> Üa fokun niuokus ren än chon oputaei eniwaei, pwal ren än ekewe aramasangau ariaföüiei.

Ra aweiresiei,

nge lon ar song ra fokun oputaei.

<sup>4</sup> Lelukei a fokun riaföü, niuokusun mäla a toriei.

<sup>5</sup> Niuokus me chechek ra feitiu woi, nge niuokus watte a pwölüeia.

<sup>6</sup> Iwe, üa apasa, “Amwo epwe wor pöükässi usun pöükässin eman lisom.

Üpwe ässila o kütta ai lenien asösö.

<sup>7</sup> Ewer, üpwe ässila toau o nonom lon ewe fanüapö.

<sup>8</sup> Üpwe müttir le kütta ana ie üpwe op ie seni ewe asepwäl watte me ewe mölümöl.”

<sup>9</sup> Ai Samol, kopwe afitikokoi än ekewe aramasangau kapas.

Pun üa küna ar föförün mwäneson me ar aninifengen lon ewe telinimw.

<sup>10</sup> Lerän me lepwin ra pwelifetalei me won tittin ewe telinimw.

Pwüngingau me weires ra nonom lon,

<sup>11</sup> feiengau a nom ekis meinsin,

nge angangen ariaföü me atuputup ra chök fifis  
lon ekewe al.

12 Are eman chon oputaei epwe ämängauaei,  
üpwe tongeni engila fan.

Are eman chon ü ngeniei epwe turunufaseei,  
üpwe tongeni op seni.

13 Nge en, chienei, pwal pwii mi achengicheng,  
en ätewe mi föri iei usun ngeniei.

14 Kich sa pwapwa le akapworausfengen,  
sa pwal fetalepök ngeni imwen Kot pwe sipwe fel  
ngeni.

15 Amwo mäla epwe müttir tori ekewe chon op-  
utaei,  
amwo repwe feilmanauetiu lon lenien sotup.  
Pun ngau a nom lon lenier pwal lon leluiker.

16 Nge ngang üa siö ngeni Kot.

Iwe, ewe Samol mi Lapalap epwe amanauaei.

17 Lekuniol me lesosor pwal leoloas  
üa apasätä ai kewe weires o ngüngü.

Iwe, Kot epwe rongorong mweliei.

18 Epwe angasa manaei,

pwe üpwe tongeni liwiniti fän kinamwe seni ewe  
maun üa eäni,

inamwo ika chomong aramas ra ü ngeniei.

19 Kot ewe mi mot won an lenien motun king seni  
me lomlom

epwe aüselingaei o akufuur,

pun resap mochen siwili ar föföör,

resap pwal niuokusiti Kot.

20 Chienei we me lom a fiu ngeni chiechian

o ataela an we pwon.

<sup>21</sup> An fos a mwotoutou seni pwötö,  
nge ekiëkin maun a nom lon lelukan.  
An kewe kapas ra pwetete seni lö,  
nge ra ken usun chök kenin ekewe ketilas.

<sup>22</sup> Kopwe monätä won ewe Samol mi Lapalap om  
weires,  
pwe i epwe tümwünuk.  
Esap fokun mwütätä pwe ewe chon pwüing epwe  
kuf.

<sup>23</sup> Nge en, ai Kot, kopwe aturätü lon ewe lenien  
sotup ekewe chon nimanauei aramas me  
ekewe chon atuputup  
mwën esamwo tori esopun manauer.  
Nge ngang üpwe anomu ai apilükülük womw.

## 56

*Eu iotek fän apilükülük*

*56.1-13*

*(1.Sam 21.13-15)*

Ngeni ewe mi emweni chon köl: Ei köl usun ngingin ewe köl itan “Ewe lisom won ekewe irä terepin mi toau”. Echö än Tafit köl, lupwen ekewe chon Filistia ra turufi me lon Kat.

<sup>1</sup> Ai Kot, kopwe ümöümöch ngeniei,  
pun aramas ra chök tatapweriei.  
Ekewe chon optaei ra ariaföüüei fansoun meinisin.

<sup>2</sup> Chon ü ngeniei ra tapweriei iteiten rän.  
Chomong ra fiu ngeniei fän ar lamalamtekia.

<sup>3</sup> Lupwen üa niuokus,  
üa chök isetä ai apilükülük womw.

<sup>4</sup>Üa mwareiti än Kot kapas,  
 üa apilükülükü Kot, nge üsap niuokus.  
 Met aramas repwe tongeni föri ngeniei?

<sup>5</sup>Chon oputaei ra sorei mine üa apasa fansoun  
 meinisin,  
 ra chök ekiekietä met repwe afeiengauaei ren.

<sup>6</sup>Ra amwichafengeniir,  
 ra operiei  
 o mamasafetaleei  
 pwe repwe nieila.

<sup>7</sup>Iei mine kopwe liwini ngeniir ar föföringau.  
 Ai Kot, kopwe akufu ekei aramas fän om lin-  
 geringer.

<sup>8</sup>En ka küna ai süsüfeil.  
 Kopwe osupwalong chönün mesei lon om rume.  
 Ifa usun, kosap aleaniir?

<sup>9</sup>Lon ewe rän, lupwen üpwe köruk pwe kopwe  
 alisie,  
 ekewe chon oputaei repwe kul seniei.  
 Ren ei üa silei pwe Kot a peniei.

<sup>10</sup>Üa mwareiti än Kot kapas,  
 üa mwareiti än ewe Samol mi Lapalap kapas.

<sup>11</sup>Üa apilükülükü Kot, nge üsap niuokus.  
 Met aramas repwe tongeni föri ngeniei?

<sup>12</sup>Ai Kot, üpwe apwönüetä ai kewe pwon ngonuk.  
 Üpwe eäni asoren kilisou ngonuk,

<sup>13</sup>pun ka angasa manaei seni mäla.  
 Ewer, ka amwöchü pechei pwe üsap mit,  
 pwe üpwe fetal fän mesen Kot lon ewe saram mi  
 atoto manau.

## 57

*Eu iotekin tūngor alilis*

*57.1-11*

*(1.Sam 22.1; 24.3)*

Ngeni ewe mi emweni chon köl: Ei köl usun ngingin ewe köl itan “Kosap ataela”. Echö än Tafit köl, lupwen a sü seni Saul o sülong lon ewe föimw.

<sup>1</sup> Kopwe ümöömöch ngeniei, ai Kot, kopwe  
ümöömöch ngeniei,  
pun üa eänuk lenien op.

Üa op fän nürün poum,  
tori ewe mölümölün feiengau a feil seniei.

<sup>2</sup> Üa siö ngeni Kot, Ewe mi Unusen Tekia,  
ewe Kot mi alisie lon mettoch meinisin.

<sup>3</sup> I epwe tinato an alilis seni läng o amanauaei,  
i epwe akufu chokewe mi chök tatapweriei.

Kot epwe tinato an we tong ellet me an allükülük  
ngeniei.

<sup>4</sup> Chon oputaei mi wewe ngeni laion mi mwäräräiti  
le ochei aramas ra pwelifeiliei,  
ngir ra usun chök siles me föün esefich,  
nge chönawer ra usun chök ketilas mi ken.

<sup>5</sup> Ai Kot, kopwe pwäri om tekia asen ekewe läng.  
Om ling epwe pwä won unusen fanüfan.

<sup>6</sup> Chon oputaei ra anomu eu sär fän itei.  
Ai osukosuk a chouitiei.  
Ra tuw eu pwang lon alei,  
nge ra püsin turulong lon.

<sup>7</sup> Üa apilükülükuk, ai Kot, üa apilükülükuk,

üpwe köl o mwareituk.

<sup>8</sup> Ngüni, kopwe pwök,  
ekewe kitar me ükülele repwe pwök.

Üpwe apwökü mallen rän.

<sup>9</sup> Ai Samol, üpwe kilisou ngonuk me lein ekewe  
mwichen aramas,  
üpwe kölün mwareituk me lein chon ekewe mwü.

<sup>10</sup> Pun om tong ellet a tekia seni ekewe läng,  
om allükülük a tori ekewe kuchu.

<sup>11</sup> Ai Kot, kopwe pwäri om tekia asen ekewe läng.  
Om ling epwe pwäla won unusen fanüfan.

## 58

*Eu iotek pwe Kot epwe apwüngü ekewe aramasangau*

*58.1-11*

Ngeni ewe mi emweni chon köl: Ei köl usun ngin-  
gin ewe köl itan “Kosap ataela”. Echö än Tafit köl.

<sup>1</sup> Ämi sounemenem, ifa usun, oua wesewesen  
apwüngala mine a pwüng?

Ifa usun, oua apwüngü ekewe aramas fän  
wenechar?

<sup>2</sup> Apwi, oua chök ekiekietä mine a ngau lon  
lelukemi,  
nge pöümi ra föri föförün mwäneson won fanüfan.

<sup>3</sup> Ekewe aramasangau ra tokola lon unusen man-  
auer,

ra chök kapas chofana seni ewe fansoun ra uputiu.

<sup>4</sup> Ra urela ren poison usun chök ekewe serepenit  
mi poison.

Ra pineela selinger usun eman serepenit a pineela  
selingan,

<sup>5</sup> pwe esap tongeni rongorong ngingin ätewe mi afesira serepenit, ika än eman sourong förüör.

<sup>6</sup> Ai Kot, kopwe kupi ngir, kopwe tülü ngin ekewe laion mi langatam.

<sup>7</sup> Amwo repwe morola usun koluk mi pula, repwe pachachala usun fetil aramas ra purätü.

<sup>8</sup> Amwo repwe wewe ngeni eföü pweechar, a telila o wiliti mongomong, repwe wewe ngeni eman mönükol esap küna saram, pun a uputiu, nge esap manau.

<sup>9</sup> Mwen ämi kewe nape ra mefi pwichikaren ewe ekkei seni iräfölüföf, ese lifilifil ika ir irä mi manau ika mi pwas. Kot epwe ässala ekewe aramasangau ren eu ewiniär.

<sup>10</sup> Ekewe chon pwüing repwe pwapwa, lupwen repwe küna pwe Kot a apwüingü ekewe chon tipis, repwe talü pecher lon chan ekewe aramasangau.

<sup>11</sup> Iwe, aramas repwe apasa, “Ellet, ekewe chon pwüing ra angei liwinir. Ellet, mi wor eman Kot mi eäni kapwüing won fanüfan.”

## 59

*Eu iotekin tüngor ngasala seni chon oput*

*59.1-17*

*(1.Sam 19.11)*

Ngeni ewe mi emweni chon köl: Ei köl usun ngingin ewe köl itan “Kosap ataela”. Echö än Tafit

köl, lupwen Saul a tinala ekoch mwän pwe repwe operi imwan, pwe repwe niela.

<sup>1</sup> Ai Kot, kopwe angasaeila seni ekewe chon op-utaei,

kopwe tümwünüei seni chokewe mi ü ngeniei,

<sup>2</sup> kopwe angasaeila seni ekewe chon föföringau o amanauaei seni ekewe aramas mi chök mochen nimanauei aramas.

<sup>3</sup> Nengeni, ra operiei pwe repwe nieila, aramas mi fokun ngau ra mwichfengen o ü ngeniei.

Ei a fis ngeniei sap pokiten ai pupungau ika tipis, ai Samol mi Lapalap.

<sup>4</sup> Üsap föri och mi mwäl,

nge ra chök amoleretä pwe repwe fiu ngeniei.

Kopwe ütä o alisie, kopwe nenengeni ai osukosuk.

<sup>5</sup> En Samol mi Unusen Manaman, en Koten Israel, kopwe pwätä pwe kopwe apwüngü chon ekewe mwü meinsin.

Kosap eäni ümömöch ngeni chokewe mi rawangauei aramas.

<sup>6</sup> Iteiten lekuniol ra liwinito, ra wörüwör usun ekewe kolak, lupwen ra aniffetal lon ewe telinimw.

<sup>7</sup> Kapasen turunufas me kapasen eniweniw ra towu seni awer,

chönawer ra usun chök ketilas,

nge ra ekieki pwe esap wor eman a rongorong ar kapas.

<sup>8</sup> Nge en, ai Samol mi Lapalap, ka takiriir,



ka ämängaua chon ekewe mwü meinisin.

<sup>9</sup> En ai pöchökül, üa osukusukuk,  
pun en ai Kot imwei imwen maun.

<sup>10</sup> Ai Kot epwe feito rei fän an tong ellet,  
ai Kot epwe föri pwe üpwe nenengeni än chon  
oputaei kuf.

<sup>11</sup> Kosap nirela, pwe nei aramas resap manlükala  
mine ka föri ngeniir.

Kopwe atoropaseer ren om manaman o akufuur.  
Ai Samol, en ka epeti senikem feiengau.

<sup>12</sup> Pokiten kapasen awer ra chök tipis, repwe tup  
lon ar lamalamtekia.

Pokiten ar ottek me chofana,

<sup>13</sup> kopwe aroserela lon om lingeringer,  
kopwe aroserela tori resap chüen nom.

Mürin, aramas meinisin repwe silei pwe Kot a  
nemenem lon Israel,  
pwal tori unusen fanüfan.

<sup>14</sup> Iteiten lekuniol chon oputaei ra liwinto,  
ra wörüwör usun ekewe kolak, lupwen ra aniffetal  
lon ewe telinimw.

<sup>15</sup> Ra küttafetal ener mongö  
o ngüngü, lupwen resap möt.

<sup>16</sup> Nge ngang üpwe köl usun om manaman.

Iteiten lesosor üpwe köl fän leüömong usun om  
tong ellet.

Pun en ka wewe ngeni eu imwen maun me rei,  
pwal eu lenien op lon ränin ai riaföü.

<sup>17</sup> En ai pöchökül, üpwe kölün mwareituk,  
pun en ai Kot imwei imwen maun.

En ewe Kot mi tongeei.

## 60

*Eu iotekin tūngor alilis pokiten chon oput*

*60.1-12*

*(2.Sam 8.13; 1.Kron 18.12)*

Ngeni ewe mi emweni chon köl: Ei köl usun ngingin ewe köl itan “Kiopun pwärätä”. Echö än Tafit köl fän iten kait ngeni aramas, lupwen a maun ngeni chon Aram seni Naharaim me Sopa, pwal lupwen Joap a liwinsefäl o niela engol me ruungeröü chon Étom me lon ewe Lemolun Salt.

<sup>1</sup> Ai Kot, ka pöütikeemila o akufukem, ka pwal song ngenikem.

Kose mochen kopwe apöchökülasefälikem.

<sup>2</sup> Ka achecha ewe fanü, ka pwal asangafeseni.

Kopwe aöchüsefäli mine a ta, pun ewe fanü a mökküfesen.

<sup>3</sup> Ka ariaföüü noum aramas ren riaföü mi chou, ka aünü ngenikem wain pwe äm aia taroporopfetal ren.

<sup>4</sup> Ka aürätä efoch fläik fän iten chokewe mi meninituk, pwe repwe chufengen fan o sü seni ekewe föün esefich.

<sup>5</sup> Kopwe awinakem ren om manaman o pälüeni äm iotek, pwe noum kewe ka echeniir repwe ngasala.

<sup>6</sup> Kot a kapas seni lon imwan mi pin, “Lon ai meseik üpwe ineti Sikem o aineti ewe lemolun Sukot ngeni nei aramas.

<sup>7</sup> Kiliat fanüei, Manasa pwal fanüei,

Efraim imwei akkaw, Juta woki wokun king.

<sup>8</sup> Moap sepiei seprien tötöl,  
 üpwe moneela ipwei sus won Etom,  
 asisilan pwe fanüei,  
 nge won ewe fanü Filistia üpwe arükak fän ai win.”

<sup>9</sup> Iö epwe emweneilong lon ewe telinimw mi  
 pöchökül tittin?

Iö epwe emwenei ngeni Etom?

<sup>10</sup> Ai Kot, ifa usun, ka wesewesen pöütikeemila?  
 Ifa usun, kosap chüen eti äm mwichen sounfiu le  
 feila maun?

<sup>11</sup> Kopwe alisikem pwe aipwe tongeni maun ngeni  
 ekewe chon oputakem,  
 pun än aramas alilis a lomotongau.

<sup>12</sup> Are Kot a etikich, kich sipwe win,  
 i epwe akufu chon oputakich.

## 61

### *Apilükülük ren än Kot tümwün*

#### *61.1-8*

Ngeni ewe mi emwenei chon köl: Won pisekin ettik  
 mi wor saitenin. Echö än Tafit köl.

<sup>1</sup> Ai Kot, kopwe rongorong ai siö,  
 kopwe aüselinga ai iotek.

<sup>2</sup> Üa kökkörük seni lesopun fanüfan,  
 lupwen üa apilükingau.

Kopwe emwenei ngeni ewe achau mi tekia seniei.

<sup>3</sup> Pun en ai lenien op,  
 ka tümwünüöchüei seni ekewe chon oputaei.

<sup>4</sup> Kopwe mwüt ngeniei pwe üpwe nom lon imwom  
 mi pin lon unusen manaei,

pwe üpwe kinamwe le op fän poum.

<sup>5</sup> Pun en ai Kot, ka rongorong ai kewe pwon,  
ka ngeniei wisen chokewe mi meninituk.

<sup>6</sup> Kopwe alangatamala ränin manauen ewe king.  
Amwo ierin manauan repwe tori ekewe täppin  
aramas meinsin.

<sup>7</sup> Amwo epwe nemenem fän mesom tori feil-  
feilachök.  
Ai Kot, kopwe tümwünü ewe king ren om tong ellet  
me om allükülük.

<sup>8</sup> Mürin üpwe kölün mwareiti itom fansoun mein-  
isin,  
lupwen üa apwönüetä ai kewe pwon iteiten rän.

## 62

### *Kot echök ach lenien op*

#### *62.1-12*

Ngeni ewe mi emweni chon köl: Ei köl usun ngin-  
gin förrien Jetutun köl. Echö än Tafit köl.

<sup>1</sup> Üa likitü le witiwiti Kot pwe epwe amanauaei,  
üa anomu ai apilükülük won i chök.

<sup>2</sup> I chök a tümwünüei o amanauaei,  
i a peniei pwe üsap fokun kuf.

<sup>3</sup> Ifa ükükün fansoun ämi meinsin oupwe fiu ngeni  
eman chök aramas,  
pwe oupwe aturala usun eu oror mi söön ika eu tit  
mi päpäifetal.

<sup>4</sup> Oua chök ekiekin asapwilätiau i seni wisan mi  
tekia,  
oua pwapwaäsini kapas chofana.  
Oua eäni kapasen afeiöch,  
nge oua otteki me lon lelukemi.

<sup>5</sup> Üa likitü le witiwiti Kot echök,  
pun üa anomu ai apilükülük won.

<sup>6</sup> I chök a tümwünüei o amanauaei,  
i a peniei pwe üsap fokun kuf.

<sup>7</sup> Ai küna manau me ai ling ra longolong won Kot.  
Kot ai achau mi pöchökül  
me ai lenien op.

<sup>8</sup> Ämi aramas, oupwe lükü Kot fansoun meinisin.  
Oupwe pwäri ngeni ämi weires meinisin,  
pun i ach lenien op.

<sup>9</sup> Aramas tekison ra usun chök enienin asepwäl,  
nge aramas tekia ra usun chök och minen  
chofana.

Are ra kilo, esap wor chour,  
ra pän seni enienin asepwäl.

<sup>10</sup> Ousap anomu ämi apilükülük won pisek oua  
angemwäli fän pöchökül,

ousap pwal eäni apilükülük pisek oua soläni.

Inamwo ika oua pisekisekila, ousap apilükülükü.

<sup>11</sup> Eu mettoch Kot a kapas usun. Ruu mettoch üa  
rongorong usun,

pwe en Kot echök ka manaman.

<sup>12</sup> Pwal en chök, ai Samol, ka eäni tong ellet.

Ellet ka liwini ngeni aramas ükükün ar föför. ☆

---

☆ **62:12:** Hiop 34.11; Jer 17.10; Mat 16.27; Rom 2.6; Pwär 2.23

## 63

*Kot a amenemenöchü manauen aramas*

*63.1-11*

*(1.Sam 23.14)*

Echö än Tafit köl, lupwen a nom lon ewe fanüapön Juta.

<sup>1</sup> Ai Kot, en ai Kot üa tiliken le küttok.  
Inisi a apwangapwangala ren ai posituk,  
nge ngüni a kakaituk usun eu fanü mi pwasapwas  
o pön,  
esap wor koluk lon.

<sup>2</sup> Üa mochen künok lon imwom mi pin  
pwe üpwe nengeni om manaman me om ling.

<sup>3</sup> Pun om tong ellet a mürina seni manau,  
ngang üpwe mwareituk.

<sup>4</sup> Iwe, üpwe kilisou ngonuk lon ränin manaei  
meinisin.

Üpwe aitieta pei lon ai iotek ngonuk.

<sup>5</sup> Ngüni a mötüla usun üa mötüla ren mongö mi  
annö.

Üpwe mwareituk fän pwapwa,

<sup>6</sup> üa chechemenuk, lupwen üa kon won ai peet  
o ekieki usum lepwin.

<sup>7</sup> Pun en ai soualilis,  
üa köl fän pwapwa me fän nürün poum.

<sup>8</sup> Üa fitipacheituk,  
pöüfichum a amwöchüeitä.

<sup>9</sup> Nge chokewe mi mochen nieila  
repwe feitiu epin fanüfan,

<sup>10</sup> repwe mäla lon maun,  
nge kolak mi mwacho repwe ochei fituker.

11 Nge ewe king epwe meseik ren Kot.  
 Meininis mi eäni iten Kot le pwon fän akapel  
 repwe mwänek,  
 nge awen ekewe chon chofana repwe pinela.

## 64

*Eu iotekin tüngor pwe Kot epwe angasala seni  
 ekewe chon oputa*

### *64.1-10*

Ngeni ewe mi emweni chon köl: Echö än Tafit köl.

<sup>1</sup> Ai Kot, kopwe aüselingaei, lupwen üa pwäri  
 ngonuk ai osukosuk.

Kopwe tümwünü manaei, pun üa niuokus ren  
 chon oputaei,

<sup>2</sup> kopwe aopaeila seni än ekewe aramasangau  
 rawangauaei,  
 seni ewe mwichen chon föföringau mi akürang.

<sup>3</sup> Ra seimi chönawer pwe ra ken usun chök ketilas,  
 ra awena ar kapas mi ngau usun chök föün esefich,

<sup>4</sup> pwe repwe pekki ätewe esap wor an tipis seni ar  
 lenien op,  
 ra müttir pekki i, nge resap niuokus.

<sup>5</sup> Ra apöchökülafengeniir lon ar ekiek mi ngau,  
 ra kapas usun ar repwe föri ekewe sär lemonomon  
 o apasa,

“Esap wor eman a tongeni künakich?”

<sup>6</sup> Ra rawangau won mine a pwüngingau o apasa,  
 “Sa ekiekietä eu akot mi unusöch.”

Ellet ekiek me leluken aramas ra men atuputup.

<sup>7</sup> Nge Kot epwe esefichi ngeniir wokun föün es-  
 efich  
 pwe repwe müttir kinas.

<sup>8</sup> Epwe atoto wor feiengau pokiten kapasen awer,  
nge meinsin mi küneer repwe nünüti möküer.

<sup>9</sup> Mürin, aramas meinsin repwe niuokus.  
Repwe ekieki mine Kot a föri  
o apworausä usun.

<sup>10</sup> Ekewe chon pwüing repwe pwapwa  
ren mine ewe Samol mi Lapalap a föri,  
repwe pwal op ren.  
Nge ekewe mi wenechar leluker repwe mwareiti.

## 65

### *Kölün mwareiti Kot ren eu räs mi watte* 65.1-13

Ngeni ewe mi emweni chon köl: Echö än Tafit köl.

<sup>1</sup> Ai Kot, a fich ngonuk pwe aramas repwe mware-  
ituk lon Sion,

repwe pwal apwönüetä ar pwon ngonuk,

<sup>2</sup> pun en ka aüselinga iotek.

Aramas meinsin repwe feito reöm

<sup>3</sup> pokiten ar tipis.

Lupwen äm pupungau ra chouitikem,

en ka amuseer senikem.

<sup>4</sup> Feiöchün chokewe ka filiretä

o emwenireto pwe repwe nom lon leniom mi pin.

Äm aipwe üren feiöch ren ekewe mettoch mi  
mürina

me lon imwom we mi pin.

<sup>5</sup> Ai Kot äm Chon Amanau, ka pälüenikem fän  
pwüing

ren föför mi amwarar.

En ewe chon fanüfan meinsin

pwal chon ekewe fanü toau mi nom lematau



ra eänuk apilükülük.

<sup>6</sup> Ren om pöchökül ka anüküchara ekewe chuk,  
pun ka pwärala om manaman.

<sup>7</sup> Ka aükätü ötötün ekewe matau,  
pwal püngüpüngün ekewe no  
me akürangen chon ekewe mwü,

<sup>8</sup> pwe chokewe mi nonom lesopun fanüfan repwe  
niuokus

ren om kewe manaman.

Ka föri pwe chon ekewe fanüen ötiu tori chon  
ekewe fanüen lotou

ra mweireir fän pwapwa ren om kewe föför.

<sup>9</sup> Ka tümwünü fanüfan o achöchönü,

ka föri pwe a pwülüöch o fanüeräs.

Ka aurala ekewe chanpupu ren koluk.

Ka ngeni chon fanüfan ener mongö.

Iei usun mine ka föri ngeni fanüfan:

<sup>10</sup> Ka fokun achöchönü ekewe warawar lon ekewe  
tanipi,

ka asosonöchü o apwetetei ewe pwül ren üt

o afeiöchü mine a märitä.

<sup>11</sup> Ka awora iteiten ier räs mi fokun somwola.

Ekis meinsin ia ka fetal ie a wor räsimong.

<sup>12</sup> Ekewe mälämäl lon fanüapö a märitä chomong  
fetil wor,

nge ekewe chuk ra pwölüla ren pwapwa.

<sup>13</sup> Ekewe maasies ra ur ren pwiin sip,

nge ekewe lemol ra ur ren wiich.

Aramas meinsin ra mweireir o kölfengen fän  
pwapwa.

## 66

*Kölün mwareiti Kot ren an kewe föför mi manaman*

66.1-20

Ngeni ewe mi emweni chon köl: Echö köl.

<sup>1</sup> Oupwe mweireir fän pwapwa ngeni Kot,  
ämi chon fanüfan meininis,

<sup>2</sup> oupwe kölü lingen itan

o fokun mwareiti i.

<sup>3</sup> Oupwe apasa ngeni Kot, “Om kewe föför ra fokun  
amwarar.

Om kewe manaman ra kon lapalap,  
pwe chon oputok ra chapetiu me mwom fän ni-  
uokus.

<sup>4</sup> Chon fanüfan meininis ra fel ngonuk,  
ra kölün mwareituk,  
ra kölün mwareiti itom.”

<sup>5</sup> Oupwe feito o nenengeni mine Kot a föri.

An kewe föför me lein aramas ra fokun amwarar.

<sup>6</sup> A awili matau ngeni fanüpwäs.

Äm kewe lewo ra fetal lon ewe chanpupu won  
pecher.

Ikenan äm aia pwapwa ren mine Kot a föri. ☆

<sup>7</sup> A nemenem ren an manaman tori feilfeilachök,  
mesan ra mamasa ekewe mwü.

Ekewe aramas mi ü ngeni Kot resap tongeni  
atekiaretä.

<sup>8</sup> Ämi chon ekewe mwü, oupwe mwareiti ach we  
Kot.

Aramas repwe rong ngingin ämi mwareiti i.

<sup>9</sup> I a amwöchü manauach,

☆ 66:6: Eks 14.21; Jos 3.14-17

nge esap mwüt ngenikich pwe sipwe turula.

10 Pun en äm Kot, ka sotunikem,  
ka limetikem

usun aramas ra limeti silifer.

11 Ka atolongakem lon fötek.

Ka anomu won sökürüm och wosochou,

12 ka mwüt ngeni aramas pwe repwe purikem.

Äm aia pwerelong lon ekkei me koluk,

nge en ka emwenikeemiwu o atolongakem lon eu  
leni mi mürina.

13 Üpwe feila lon imwom fän asoren kek  
o apwönüetä ai kewe pwon ngonuk.

14 Üpwe uwato reöm mine üa pwon ngonuk,  
lupwen üa nom lon weires.

15 Üpwe eäni asoren kek ngonuk seni man mi  
öümanau.

Üpwe eäni asor ätemwänin sip,  
pwal ätemwänin kow me kuuch,  
pwe ötütün ekewe asor epwe ötütä.

16 Oupwe feito o rongorong, ämi meinsin mi  
asamolu Kot,  
üpwe apworausä ngenikemi mine Kot a föri fän  
itei.

17 Üa siö ngeni fän leüömong,  
üa kölün mwareiti i.

18 Are üa ekiekietä och föför mi ngau lon lelukei,  
ewe Samol esap aüselingaei.

19 Nge Kot a fokun aüselingaei,  
a aü selingan ngeni ai iotek.

20 Üpwe mwareiti Kot,

pun i esap oput ai iotek,  
esap pwal amwöchü seniei an we tong ellet.

## 67

### *Echö kölün mwareiti Kot*

#### *67.1-7*

Ngeni ewe mi emweni chon köl: Ren pisekin ettik  
mi wor saitenin. Echö köl.

<sup>1</sup> Ai Kot, kopwe ümöümöch ngenikem o  
afeiöchükem,

kopwe netiu wom fän om kirikiröch,

<sup>2</sup> pwe aramas won fanüfan repwe silei letipom,  
nge chon ekewe mwü meinsin repwe silei om we  
angangen amanaua aramaš.

<sup>3</sup> Chon ekewe mwü repwe mwareituk, ai Kot,  
chon ekewe mwü meinsin repwe mwareituk.

<sup>4</sup> Chon ekewe mwü repwe pwapwa o köl fän ar  
pwapwa,

pun en ka apwüngü chon fanüfan fän pwüng,  
ka pwal emweni chon ekewe mwü won fanüfan.

<sup>5</sup> Chon ekewe mwü repwe mwareituk, ai Kot,  
chon ekewe mwü repwe mwareituk.

<sup>6</sup> Fanüfan a awora räs,  
Kot ach Kot a afeiöchükich.

<sup>7</sup> Kot a afeiöchükich,  
Chon fanüfan meinsin repwe asamolu i.

## 68

### *Ewe Koten Sinai me an we mwichefel*

#### *68.1-35*

Ngeni ewe mi emweni chon köl: Echö än Tafit köl.

<sup>1</sup> Kot epwe ütä o atoropasafeili chon oputan,

chokewe mi oputa i repwe sü me mwan.

<sup>2</sup> Usun asepwäl a ässala ötütün ekkei, iei usun epwe ässirela.

Usun kiris a telila ren ekkei,  
iei usun ekewe aramasangau repwe rosola me fän mesen Kot.

<sup>3</sup> Nge ekewe chon pwüng repwe uren pwapwa,  
repwe mwänek me fän mesen Kot,  
repwe mweireir fän pwapwa.

<sup>4</sup> Oupwe köl ngeni Kot, oupwe kölün mwareiti itan.  
Oupwe chietä echö köl ngeni ewe mi wawa ekewe  
kuchu,  
itan ewe Samol mi Lapalap. Oupwe mwänek me  
fän mesan.

<sup>5</sup> Kot ewe mi nom lon imwan mi pin,  
i semen ekewe mi mäsen me chon tümwünün  
ekewe fefin mi mä pwülüer.

<sup>6</sup> Kot a ngeni ekewe mi akaleman ar famili,  
a emwenawu ekewe chon fötek pwe repwe  
ngasala fän pwapwa,  
nge ekewe chon ü ngeni Kot repwe nom lon eu  
fanü mi pwasapwas o pwichikar.

<sup>7</sup> Ai Kot, lupwen ka akom mwen noum aramas,  
lupwen ka pwerela lon ewe fanüapö,

<sup>8</sup> fanüfan a chechech, ekewe läng ra apüngätü üt  
me fän mesen Kot.

Ewe chuk Sinai a chechech me fän mesen Kot,  
ewe Koten Israel. ☆

<sup>9</sup> Ai Kot, ka apüngätü ütomong ekis meinisin.  
Ka amürinala fanüom, lupwen a pwasala.

---

☆ **68:8:** Eks 19.18

10 Noum kewe aramas ra küna lenier me lon.  
Lon om kirikiröch, ai Kot, ka tümwünü ekewe chon  
wöüngau.

11 Ewe Samol a atowu ewe kapas.  
A fokun lapalap ewe mwichen fefin mi arongafeili  
ewe pworausen win,

12 “Ekewe king me nöür kewe mwichen sounfiu ra  
süla.”  
Ekewe fefin mi nom leimw ra inetifengeni mine  
ekewe sounfiu ra liapeni lon maun.

13 Uluulun lisom, pöükässir ra pwölüp wöl ngeni  
silifer,  
nge ülöüler ra molupolup ren kolt mi mürina.  
Pwota ekoch me leimi ra chök nonom lefilen  
ekewe lenien sip?

14 Lupwen Ewe mi Unusen Manaman a  
atoropasafeili ekewe king won ewe fanü,  
snow a püngütü won ewe chuk Salmon.

15 Ewe chuk Pasan eu chuk mi tekia.  
Eu chuk mi wor chomong chukun.

16 En chuk mi chukuchukutä, pwota ka nennetiü  
fän lolowo  
won ewe chuk Kot a filätä pwe epwe nonom won.  
Ewer, iei ewe leni ewe Samol mi Lapalap epwe  
nonom ie tori feilfeilachök.

17 Ewe Samol a feito seni ewe chuk Sinai ngeni ewe  
leni mi pin  
fiti ngeröün wan woken mi pöchökül.

18 A feitä won ewe chuk mi tekia  
o emwenätä chon oola lon an mwich mi tapwela  
mürin,

a pwal angei lifang seni aramas, fokun seni  
chokewe mi ü ngeni,

Kot ewe Samol mi Lapalap epwe nonom ikenan. ☆

19 Sipwe mwareiti ewe Samol

mi mwärei ach wosochou iteiten rän.

Kot ach Chon Amanau.

20 Ach Kot eman Kot mi amanauakich,

Kot ewe Samol

a angasakich seni mäla.

21 Nge Kot epwe amökkü möküren chon oputan,  
epwe amökkü mongosaponen ätewe mi chök föföri  
tipis.

22 Iwe, ewe Samol a apasa, “Üpwe aliwinato chon  
oputom seni Pasan.

Üpwe aliwinireto seni epin matau,

23 pwe pecheöm epwe fetal lon char,

nge noum kewe kolak repwe asomwa inetir  
seniir.”

24 Ai Kot, aramas ra küna om fetal fän win,  
ra küna än ai Kot me ai king fetalelong lon imwan  
mi pin.

25 Ekewe chon köl ra akom, ekewe chon ettik  
pisekin ettik ra nom mürin,  
nge ekewe föpwül mi ettik pisekin kaktai ra nom  
lukalaper,

26 “Oupwe mwareiti Kot lon ewe mwich mi lap.  
Oupwe mwareiti ewe Samol mi Lapalap, ämi  
mwirimwirin Jakob.”

27 Peniamin ewe ainang mi kükün me leir a akom  
mwer,

ekewe samolun Juta lon mwicheicher ra tapw  
 müriir,  
 nge ekewe samolun Sepulon me Naftali ra  
 kükümwir.

<sup>28</sup> Ai Kot, kopwe aworato om manaman.

Ai Kot, kopwe pwärawu ngenikem om pöchökül  
 usun ka fen föri me mwan.

<sup>29</sup> Pokiten om we imwenfel lon Jerusalem  
 ekewe king repwe uwato lifang ngonuk.

<sup>30</sup> Kopwe apwüngü Isip, ewe manmwacho mi nom  
 lein ekewe wowo.

Kopwe apwüngü ekewe mwü, ewe pwiin  
 ätemwänin kow me nöür kewe nienifön  
 kow,

tori repwe chapetiu me mwom o fang ngonuk ar  
 silifer.

Kopwe atoropasafeili chon ekewe mwü mi pwap-  
 waiti maun.

<sup>31</sup> Chon künö repwe feito seni Isip.

Chon Itiopia repwe aitetä pöür lon ar iotek ngeni  
 Kot.

<sup>32</sup> Oupwe köl ngeni Kot, ämi chon ekewe mwü won  
 fanüfan,

oupwe kölün mwareiti ewe Samol,

<sup>33</sup> ewe mi saifeil lon ekewe läng,

ekewe längin lomlom.

I ewe mi fos fän mwelian mi leüömong.

<sup>34</sup> Oupwe asilefeili än Kot manaman,

lingan a nom won Israel,

nge an manaman a nom lon ekewe läng.

<sup>35</sup> Kot a men eniwokus, lupwen a towu seni imwan  
 mi pin.



I ewe Koten Israel  
 mi ngeni nöün kewe aramas manaman me  
 pöchökül.  
 Sipwe mwareiti Kot!

## 69

### *Siö fän riaföü* 69.1-36

Ngeni ewe mi emweni chon köl: Ei köl usun ngingin ewe köl itan Kiop. Echö än Tafit köl.

<sup>1</sup> Ai Kot, kopwe amanauaei!

Pun ekewe koluk ra feitä tori fän üei.

<sup>2</sup> Üa kokotiu lon pwakak mi alolol,  
 esap wor ana ie üpwe ipwetiu ie.

Üa nonom lon koluk mi alolol,  
 nge ekewe no ra pwölüeila.

<sup>3</sup> Üa fokun malülü ren ai siö,  
 chiorei a pinela,  
 mesei ra toputopula  
 ren ai witiwiti om kopwe alisie.

<sup>4</sup> Chokewe mi oputaei, nge esap wor popun,  
 ra chomong seni iteiten meten mökürei.  
 Chokewe mi mochen nieila ra pöchökül,  
 ra kapas chofana usi.

Ra pöchökül ngeniei  
 pwe üpwe aliwinala mettoch üsap soläni. ☆

<sup>5</sup> Ai Kot, en ka silei ai kewe föför mi mwäl,  
 nge ai kewe tipis üa föriir resap mon senuk.

<sup>6</sup> Ai Kot, en ewe Samol mi Unusen Manaman,

☆ 69:4: Kölf 35.19; Joh 15.25

kosap mwütätä pwe chokewe mi eänuk apilükülük  
repwe säw pokitei.

En ewe Koten Israel,  
kosap mwütätä pwe chokewe mi fel ngonuk  
repwe itengau pokitei.

<sup>7</sup> Pun üa itengau fän itom,  
nge säw a pwölüeila.

<sup>8</sup> Üa usun chök eman wasöla ngeni pwii kewe,  
üa usun chök eman chon ekis ngeni nöün inei  
kewe.

<sup>9</sup> Pun ai ekipwichi imwom mi pin a küküri leüti  
usun ekkei,  
nge ekewe kapasen esit mi toruk ra pwal toriei. ✧

<sup>10</sup> Iwe, lupwen üa atekisonaeitiu ren ai echikefel,  
aramas ra asitaei.

<sup>11</sup> Lupwen üa üföüf üf seni tuk,  
ra chök takiriei.

<sup>12</sup> Ir mi mot lon asamalapen ewe telinimw ra  
kapasen ämängau usi,  
nge ekewe chon puch ra kölüei.

<sup>13</sup> Nge ngang üa chök iotek ngonuk, ai Samol mi  
Lapalap.

Kopwe pälüeniei, ai Kot, lon fansoun mi fich me  
reöm.

Kopwe pälüeniei lon om tong ellet,  
pun ka apwönüetä om we pwon pwe kopwe  
amanauaei.

<sup>14</sup> Kopwe amanauaei seni ai kokotiu lon ewe  
pwakak.

Kopwe angasaei seni ekewe chon oputaei,  
pwal seni ekewe koluk mi alolol.

✧ 69:9: Joh 2.17; Rom 15.3

15 Kosap mwütätä pwe ekewe no repwe pwölüeila,  
kosap pwal mwüt ngeniei pwe üpwe kokotiu lon  
ewe lenien alolol,  
ika mwocholong lon peias.

16 Ai Samol mi Lapalap, kopwe pälüeniei lon om  
tong ellet mi mürina.

Kopwe kul ngeniei lon om ümöümöch mi somwola.

17 Kosap amona mesom seni noum chon angang.  
Kopwe müttir pälüeniei, pun ngang üa nom lon  
riaföü.

18 Kopwe kaneto rei o amanauaei,  
kopwe angasaeila seni ekewe chon oputaei.

19 En ka silei usun ai küna turunufas,  
usun ai säw me ai itengau,  
ka pwal silei ekewe chon oputaei meinsin.

20 Ekewe kapasen turunufas ra atatakisi lelukei  
pwe üa nom lon apilükingau.

Üa kütta ika eman epwe tongeei, nge esap wor  
eman,  
üa pwal kütta ika eman epwe achipaei, nge esap  
wor eman.

21 Ra uwalong poison lon enei mongö,  
nge lupwen üa kaka, ra aünüei finikar. ✧

22 Amwo ar kewe kametip repwe wiliti eu likatup  
ngeniir,  
nge ar kewe chulapen mongö mi pin repwe wiliti  
eu sär mi awarato feiengau wor.

23 Amwo meser repwe toputup pwe resap tongeni  
küna mwer,

---

✧ 69:21: Mat 27.48; Mark 15.36; Luk 23.36; Joh 19.28-29

kopwe pwal föri pwe sökürür epwe pwor fansoun  
meinsin. ✧

24 Kopwe awarato om song wor,  
om lingeringer epwe toriir.

25 Amwo lenier epwe pönüla,  
amwo esap chüen wor eman epwe nonom lon  
imwer imw mangaku. ✧

26 Pun ir ra ariaföüü ätewe en ka wichi,  
ra pwal alapala ar ariaföüü ätewe en ka akinasa.

27 Kopwe achuetä liwiningau won ar liwiningau,  
nge kosap mwüt ngeniir pwe repwe küna manau.

28 Kopwe amoela iter seni ewe puken manau,  
nge kosap makelong iter lein chon pwüng. ✧

29 Nge ngang üa metek o nom lon apilükingau.  
Ai Kot, kopwe atekiaeitä o amanauaei.

30 Üpwe mwareiti Kot ren echö köl,  
üpwe ingeiti i ren ai kilisou.

31 Ei epwe apwapwai ewe Samol mi Lapalap lap  
seni ai üpwe eäni asor eman kow  
ika eman ätemwänin kow fiti mächän me pacha-  
pachan.

32 Ekewe mi nom lon riaföü repwe küna ei o  
pwapwa.

Ämi mi fel ngeni Kot oupwe apilüköch.

33 Pun ewe Samol mi Lapalap a aüseling ngeni  
ekewe chon osupwang,  
nge esap manlükala nöün aramas mi nom lon fötek.

34 Läng me fanüfan repwe mwareiti i,

---

✧ 69:23: Rom 11.9-10 ✧ 69:25: Föf 1.20 ✧ 69:28: Eks 32.32;  
Pwär 3.5; 13.8; 17.8

pwal ekewe matau me meinisin mine a manau lon.

<sup>35</sup> Pun Kot epwe amanaua Sion  
o aüsefälietä ekewe telinimwen Juta.  
Mürin, nöün chon angang repwe nonom ikenan o fanüeni ewe fanü.

<sup>36</sup> Mwirimwirin nöün kewe chon angang repwe fanüeni ewe fanü,  
nge chokewe mi echeni i repwe nonom won.

## 70

*Eu iotek pwe Kot epwe angasakich*

*70.1-5*

*(Kölf 40.13-17)*

Ngeni ewe mi emweni chon köl: Echö än Tafit köl fän iten ewe asoren achechem.

<sup>1</sup> Ai Kot, kose mochen kopwe angasaeila.

Ai Samol mi Lapalap, kopwe kaito pwe kopwe alisiei.

<sup>2</sup> Amwo meinisin mi mochen nieila repwe säw o tolong lon fitikoko.

Amwo chokewe meinisin mi tipeni ai üpwe feien-gau

repwe kulsefäl o itengau.

<sup>3</sup> Amwo chokewe mi ämängauaei

repwe fokun rükö ren ar kuf.

<sup>4</sup> Nge meinisin mi feito reöm repwe meseik o pwapwa.

Chokewe mi aücheani om amanaueer repwe apasafochei, "Kot a tekia."

<sup>5</sup> Nge ngang üa wöüngau o osupwang.

Ai Kot, kopwe kaito rei.

En ai chon alilis me Chon Amanau.

Ai Samol mi Lapalap, kosap mang le alisie.

## 71

*Än eman chinlap iotek*

*71.1-24*

- 1 Ai Samol mi Lapalap, en ai lenien op, kosap fokun mwüt ngeniei pwe üpwe kuf.
- 2 Pokiten ka pwüing, kopwe angasaei o alisie. Kopwe aü selingom ngeniei o amanauaei.
- 3 En kopwe ai lenien op usun eu föimw, ia üa tongeni op ie fansoun meinisin. En ewe mi pwon ngeniei pwe kopwe amanauaei, pun en ai achau me ai imwen maun.
- 4 Ai Kot, kopwe angasaei seni ekewe aramasangau, pwal seni ekewe mwän mi ngau o mwäneson.
- 5 Ai Samol mi Lapalap, en ai apilükülük, üa lükülükuk seni lesäräföi.
- 6 Lon unusen manaei üa unnenuk, en ewe mi tümwünüei seni ai uputiu. Üpwe chök mwareituk fansoun meinisin.
- 7 Üa usun chök eu asisil mi eniwokus ngeni chomong aramas, nge en ai lenien op mi pöchökül.
- 8 Üa mwareituk iteiten rän o pwärätä om ling.
- 9 Kosap pöütieila iei lon ai chinlap, nge kosap likitieila iei, lupwen üa apwangapwang.
- 10 Pun chon oputaei ra kapas usi, ra rawangauaei o mochen nieila.
- 11 Ra apasa, "Kot a likitala ätei.

Ousipwe tapweri o turufi,  
pun esap wor eman epwe angasa i.”

<sup>12</sup> Ai Kot, kosap toau seniei.

Ai Kot, kopwe kaito pwe kopwe alisiei.

<sup>13</sup> Amwo ekewe chon atipisiei repwe säw o rosola.  
Nge chokewe mi kütta ar repwe afeiengauaei  
repwe küna turunufas me itengau.

<sup>14</sup> Nge ngang üpwe apilükülükuk fansoun meinisin  
o alapala ai mwareituk.

<sup>15</sup> Iteiten rän üpwe apworausausun om föför mi  
pwüng,

pwal usun om amanauaei,  
inamwo ika üsap tongeni weweiti meinisin.

<sup>16</sup> Ai Kot, Samol mi Lapalap, üpwe feito o ap-  
worausafeili om kewe föför mi manaman,  
üpwe mwareiti om pwüng echök.

<sup>17</sup> Ai Kot, ka aiöüei seni lesäraföi,  
nge ngang üa chüen asilefeili om föför mi  
amwarar.

<sup>18</sup> Ai Kot, kosap likitieila iei,  
lupwen üa chinlap o pwech mökürei.  
Kopwe etiei, lupwen üpwe asilefeili om manaman  
me om tufich  
ngeni ekewe täppin aramas repwe up me mürin.

<sup>19</sup> Ai Kot, om pwüng a tori ekewe läng mi tekia.

En ka föri mettoch mi amwarar.

Ai Kot, iö a wewe ngonuk?

<sup>20</sup> En ewe mi öküna ngeniei chomong weires me  
riaföü,

kopwe pwal apöchökülasefäliei,  
kopwe uweesefälieitä seni epin fanüfan.

21 En kopwe alapala ai iteüöch  
o achipasefäliei.

22 Ai Kot, ngang üpwe fokun mwareituk ren kitar,  
pokiten om allükülük,  
üpwe kölün mwareituk ren ükülele,  
en Ewe mi Pin me lon Israel.

23 Üpwe mweir fän pwapwa, lupwen üpwe kölün  
mwareituk.

Üpwe mwareituk,  
pun ka amanauaei.

24 Iteiten rän üpwe kapas usun om pwüng,  
pun chokewe mi kütta ar repwe afeiengauaei  
ra säw o itengau.

## 72

### *Än ewe king mi pwüng nemenem*

#### *72.1-20*

Echö köl fän iten Salomon.

<sup>1</sup> Ai Kot, kopwe fang ngeni ewe king om  
pwüngüöch,

kopwe ngeni nöün ewe king we mwän om pwüng,

<sup>2</sup> pwe epwe eäni kapwüng won noum kewe ara-  
mas fän pwüng,

pwal won noum kewe mi riaföü fän pwüngüöch.

<sup>3</sup> Amwo ewe fanü epwe awora feiöch me kinamwe  
ngeni ekewe aramas,

amwo epwe fis pwüng lon.

<sup>4</sup> Amwo ewe king epwe peni ekewe mi riaföü me  
lein ekewe aramas,

amwo epwe alisi ekewe mi osupwang  
o akufu ekewe mi ariaföüür.



5 Amwo ewe king epwe manau ükükün fansoun  
akkar me maram ra nonom läng,  
seni eu täppin aramas tori pwal eu täppin.

6 Amwo epwe usun chök üt mi püngütü won fetil  
mi pwüküfö,  
pwal usun chök üt mi achöchönü fanüfan.

7 Amwo pwüng epwe fefeitä lon ränin manauan,  
nge feiöch me kinamwe epwe lapala, tori ewe  
maram esap chüen nom.

8 Iwe, ewe king epwe nemenem seni eu matau tori  
pwal eu,  
pwal seni ewe chanpupu Oifrat tori lesopun  
fanüfan. ✨

9 Ekewe aramas mi nonom lon ewe fanüapö repwe  
pworotiu me mwan,  
nge chon oputan repwe chapetiu lepwül fän  
mesan.

10 Ekewe kingen Tarsis pwal ekewe king seni  
ekewe fanü mi nom lematau repwe takises  
ngeni,  
nge ekewe kingen Shepa \* me Sepa † repwe uwato  
ar lifang ngeni.

11 Ekewe king meinisin repwe chapetiu me mwan,  
nge chon ekewe mwü meinisin repwe angang  
ngeni.

12 Pun a angasa ekewe chon osupwang, lupwen ra  
kökköri,  
pwal ekewe mi mwelele me chokewe esap wor ar  
chon alilis.

---

✨ 72:8: Sek 9.10 \* 72:10: Shepa eu fanü lon Arapia † 72:10:  
Sepa eu fanü lon Itiopia

13 Iwe, a tongei chokewe mi apwangapwang me  
wöüngau,  
a pwal amanaua ekewe mi osupwang.

14 A angaseer seni ar riaföü me ewe angangen  
mwāneson mi fis ngeniir,  
pun manauer a aüchea me ren.

15 Amwo ewe king epwe manauatam!  
Amwo aramas repwe uwato kolt ren seni Shepa.  
Amwo aramas repwe iotek fän itan fansoun mein-  
isin,  
repwe tüngor an feiöch rän meinsin.

16 Amwo epwe wor chomong wiich lon ewe fanü.  
Amwo epwe wor uän irä won ekewe chuk.  
Resin ewe fanü epwe usun chök resin Lapanon.  
Nge ekewe telinimw repwe ur ren aramas  
usun chök ewe lemäl a ur ren fetil.

17 Amwo iten ewe king epwe nonom tori feil-  
feilachök,  
nge iteüöchün epwe nonom ükükün fansoun akkar  
a nonom.  
Chon ekewe mwü meinsin repwe angei ar feiöch  
me ren,  
nge ir repwe apasa pwe i a feiöch.

18 Sipwe mwareiti ewe Samol mi Lapalap, ewe  
Koten Israel,  
i chök a föri mettoch mi amwarar.

19 Sipwe mwareiti itan mi ling tori feilfeilachök.  
An ling epwe aurala unusen fanüfan.  
Amen, amen.

20 Iei müchülan ekewe iotek än Tafit nöün Jesi we  
mwän.

## AÜLÜNGATIN PUK

### 73

*Sopolan ekewe aramasangau*  
73.1-28

*Echö än Asafköl.*

- 1 Ellet, Kot a kirikiröch ngeni chon Israel,  
ngeni chokewe mi limöch leluker.
- 2 Nge ngang a arapakan ngeni an epwe tur seniei  
ai apilükülük,  
a arapakan chök esap chüen wor ai lükülük.
- 3 Pun üa lolowo ngeni ekewe chon lamalamtekia,  
lupwen üa küna än ekewe aramasangau wöümong.
- 4 Esap wor ar metek,  
inisir a pöchökül o öümanau.
- 5 Ir resap weires usun pwal ekoch aramas, resap  
riaföü usun pwal ekoch.
- 6 Iei mine ra mwärini lamalamtekia fän üer usun  
chök epa mwärämwär,  
angangen mwäneson a pwölürela usun echö üf.
- 7 Seni lon leluker mi pöchökül a towu ekiek mi  
ngau,  
rawangau esap wor aükükün a chök nom lon ar  
ekiek.
- 8 Ra takirin ämängaua aramas o eäni kapasingau,  
ra eniwa aramas fän ar lamalamtekia pwe repwe  
ariaföüür.
- 9 Ra eäni kapasingau usun Kot lon läng  
o eäni fos sikesik ngeni chon fanüfan.
- 10 Iei mine nöür kewe aramas ra kul ngeniir  
o müttir lükü ar kewe kapas meinsin.

11 Iwe, ra apasa, “Kot esap sile.  
Ewe mi Unusen Tekia esap wor an silelap.”

12 Iei usun lapalapen ekewe aramasangau.

13 Ellet a solap pwe üa tümwünü lelukei pwe epwe  
limöch,

a solap ai üsap tipis.

14 Iteiten rän üa küna riaföü,  
nge iteiten lesosor ka apwüngüei.

15 Iwe, are üa pwal apasätä usun mine ir ra apasa,  
wewen nge üpwe afangamäi noum kewe aramas.

16 Üa sotuni le ekieki usun ai üpwe weweiti ei,  
nge a kon weires ngeniei,

17 tori üa tolong lon imwom imwenfel.

Ikenan a fateitiei usun sopolan ekewe aramasan-  
gau.

18 Ellet, ka anomuur won leni mi mitimit.  
Ka föri mine repwe turutiu ren lon feiengau.

19 Ra rosola lon eu chök otun,  
ra moropöküla ren niuokus.

20 Ra usun chök eu tan mi morokaila, lupwen  
eman a pwök.

Ai Samol, lupwen ka ütä, ra morokaila.

21 Lupwen üa chou,  
lupwen lelukei a kinas,

22 üsap weweiti och, üa umwes o usun chök eman  
man me mwom.

23 Nge ngang üa chök nonom reöm fansoun mein-  
isin,

pun en ka amwöchü pöüifichi.

24 Ka emweniei fän om öüröür,  
nge mürin kopwe etiwaei lon ling.

<sup>25</sup> Üsap eäni och me läng nge en chök.

Üsap pwal pwapwaiti och mettoch me won fanüfan  
lükün en.

<sup>26</sup> Inisi me lelukei ra tongeni apwangapwangala,  
nge Kot ai pöchökül pwal wisei tori feilfeilachök.

<sup>27</sup> Nge chokewe mi likitukela repwe feiengau.

Ka arosala chokewe resap allükülük ngonuk.

<sup>28</sup> Nge me rei, a mürina pwe üpwe kan ngeni Kot.

Üa filätä Kot ewe Samol mi Lapalap pwe epwe ai  
lenien op,

pwe üpwe apworausä an kewe föföör meinisin.

## 74

*Eu tüngör ngeni Kot pwe epwe ü ngeni chon oput  
nöün kana*

*74.1-23*

Echö än Asaf kölün kait.

<sup>1</sup> Ai Samol mi Lapalap, pwota ka pöütikeemila tori  
feilfeilachök?

Pwota ka chök sosong ngeni noum kewe aramas?

<sup>2</sup> Kopwe chechemeni noum we mwichen aramas,  
ka filiir me lomlom,

chokewe ka angaseer pwe repwe chon om ainang.

Kopwe pwal chechemeni ewe chuk Sion, ia ka  
nonom ie me lom.

<sup>3</sup> Kopwe fetal ngeni ekewe lemöl imw mi tala seni  
me lomlom.

Ekewe chon oputom ra ataela meinisin mine a  
nom lon ewe imwenfel.

<sup>4</sup> Chon palüenuk ra akürang lon leniom mi pin.

Ra aürätä ar filäik pwe asisilen ar win.

<sup>5</sup> Ra wewe ngeni chon pöküpök irä

mi pökü irä lein wöllap ren ar kouk.

<sup>6</sup> Ra äsätätü ellingen won ekewe ettip mi rup  
meinsin

ren kouk mi watte me kükün.

<sup>7</sup> Ra ataela imwom imwenfel o kenala,  
ra apingaua ewe leni ia aramas ra fel ngonuk ie.

<sup>8</sup> Ra kapasfengen lefiler, “Sipwe aroserela mein-  
isin.”

Iwe, ra kenala ekewe leni meinsin ia aramas ra  
fel ngeni Kot ie

me lon ewe fanü.

<sup>9</sup> Ach kewe asisil mi pin meinsin rese chüen nom,  
ese chüen wor eman soufos,

nge esap wor eman me leich a silei inet epwe  
ükütü ei lapalap.

<sup>10</sup> Ai Kot, ifa ükükün fansoun än ekewe chon op-  
utakem repwe esitok?

Ifa usun, repwe turunufasei itom tori  
feilfeilachök?

<sup>11</sup> Pwota kosap mochen alisikem?

Pwota ka uwala poum lükisökürum?

<sup>12</sup> Nge ai Kot, en ai king seni me lomlom,

ka amanaua aramas won unusen fanüfan.

<sup>13</sup> En ka kinifeseni ewe matau ren om manaman,  
ka amökkü möküren ekewe trakon mi nom  
lematau. ☆

<sup>14</sup> Ka atatakisi ekewe möküren ewe man itan Lefi-  
atan\*,

ka pwal aochocha fitukan ngeni ekewe mönün lon  
fanüapö. ☆

---

☆ **74:13:** Eks 14.21      \* **74:14:** Lefiatan eman man mi fokun  
mwacho, a aliosunätä mine a ngau      ☆ **74:14:** Hiop 41.1; Kölf  
104.26; Ais 27.1

- 15 Ka amichätä puächen koluk me öüwö.  
Nge ka apwasatä ekewe chanpupu mi pufochofoch.
- 16 En ka föri rän me pwin.  
Ka anomu lon lenier maram me akkar.
- 17 Ka föri kiännin fanüfan,  
ka pwal föri fansoun pwichikar me fansoun patapat.
- 18 Ai Samol mi Lapalap, kopwe chechemeni usun ekewe chon oputom ra esitok,  
usun ekewe aramas mi umwes ra turunufasei itom.
- 19 Kosap likitala noum kewe aramas mi apwangapwang ngeni ekewe chon oputer mi fokun ingau,  
kosap pwal manlükala noum aramas mi nom lon riaföü tori feilfeilachök.
- 20 Kopwe chechemeni om we pwon ka eäni ngenikem.  
Pun föförün mwäneson a chök fifis lon ekewe leni mi kiroch me lon ewe fanü.
- 21 Kosap mwütätä pwe ekewe mi riaföü repwe säw.  
Nge ekewe mi wöüngau me osupwang repwe mwareituk.
- 22 Ai Kot, kopwe ütä, kopwe püsin kapas fän itom,  
kopwe chechemeni än ekewe aramas mi umwes esitok iteiten rän.
- 23 Kosap manlükala pupuchörün ekewe chon oputom  
me akürangen ekewe chon ü ngonuk mi chök fifis ngonuk.

## 75

*Kot a atekisona ekewe aramasangau o atekiatä ekewe chon pwüng*

*75.1-10*

Ngeni ewe mi emweni chon köl: Ei köl usun ngin-  
gin ewe köl itan 'Kosap ataela'. Echö än Asaf köl.

<sup>1</sup> Äm aia kilisou ngonuk, äm Kot, äm aia kilisou  
ngonuk,

lupwen aia köri itom.

Aramas ra apworausa om kewe föföör mi amwarar.

<sup>2</sup> Iwe, Kot a apasa, "Üa filätä eu fansoun  
pwe üpwe eäni kapwüng fän wenechar.

<sup>3</sup> Lupwen fanüfan a mwaroro fiti chon meinisin,  
ngang ewe mi anüküchara longolongun we.

<sup>4</sup> Üa üreni chokewe mi aingaing, 'Ousap aingaing.'  
Nge üa üreni ekewe aramasangau, 'Ousap üranang.'

<sup>5</sup> Ousap üranang ika fos fän lamalamtekia."

<sup>6</sup> Pun esap wor eman seni ötiu ika lotou,  
ika seni ewe fanüapö a tongeni atekiatäi eman  
aramas.

<sup>7</sup> Nge i Kot ewe mi eäni kapwüng,  
a asapwilätü eman, nge a pwal seikätä eman.

<sup>8</sup> Ewe Samol mi Lapalap a amwöchü eu kap  
lepöün,

a ur ren wain mi pwichikar, iei än Kot song.

A ninätü, nge ekewe aramasangau meinisin won  
fanüfan ra ünümi.

Ra ünümala meinisin tori amüchülan sosoön.

<sup>9</sup> Nge ngang üpwe asilefeili usun Kot tori feil-  
feilachök.

Üpwe kölün mwareiti än Jakob we Kot.



<sup>10</sup> I epwe ataela pöchökülen ekewe aramasangau,  
nge epwe awateela pöchökülen ekewe chon  
pwüing.

## 76

### *Kot a win o eäni kapwüing*

#### *76.1-12*

Ngeni ewe mi emweni chon köl: Won pisekin ettik  
mi wor saitenin. Echö än Asaf köl.

<sup>1</sup> Ekewe aramas ra silei Kot me lon Juta,  
itan a föüla me lon Israel.

<sup>2</sup> A förätä lenian me lon Jerusalem,  
a nonom won ewe chuk Sion.

<sup>3</sup> Ikenan a kupi än chon oputan kewe föün esefich  
mi meriwewiw,  
ekewe tittin maun, ekewe ketilas me ekewe  
pisekin maun.

<sup>4</sup> En ka fokun ling o tekia,  
lupwen ka liwinto seni ekewe chuk,  
ia ka akufu chon oputom me ie.

<sup>5</sup> Ekewe sounfu mi pwora a oo seniir liaper,  
ra turula o möürüfoch.  
Ekewe chon maun meinisin esap wor ar pöchökül.

<sup>6</sup> Ai Kot än Jakop we Kot,  
ren om apwüingü ekewe chon wawa oris me  
ekewe oris ra turula o mäla.

<sup>7</sup> Nge en echök, ai Samol mi Lapalap, aramas  
repwe niuokusituk.

Iö a tongeni ü me mwom, lupwen ka song?

<sup>8</sup> Ka eäni kapwüing seni won läng.  
Iwe, fanüfan a niuokus o fanafanala,

9 lupwen ka ütā pwe kopwe atowu pwüngün  
kapwüng  
o amanaua ekewe mi nom lon riaföü meinsin  
won fanüfan.

10 Ellet, än ekewe aramas lingeringer iei fen om  
ling.  
Nge lusun ewe lingeringer kopwe chök efitti  
ngonuk.

11 Kopwe eäni om kewe pwon ngeni ewe Samol mi  
Lapalap om we Kot o apwönüretä.  
Chon ekewe fanü mi nom ünükün repwe uwato  
lifang ngeni Kot, ewe Kot aramas ra ni-  
uokusiti.

12 I a atekisona ekewe samol mi lamalamtekia,  
ekewe kingen fanüfan ra niuokusiti.

## 77

*Ach chip a fis ren ach chechemeni än Kot kewe  
manaman*

*77.1-20*

Ngeni ewe mi emweni chon köl: Ei köl usun ngin-  
gin förien Jetutun köl. Echö än Asaf köl.

<sup>1</sup> Üa siö ngeni Kot fän leüömong,  
üa siö ngeni Kot fän leüömong pwe epwe  
aüselingaei.

<sup>2</sup> Lon ränin ai riaföü üa kütta ewe Samol.  
Lepwin üa aitietä pei lupwen ai iotek,  
nge üsap chipwang.  
Nge letipei esap tongeni chip.

<sup>3</sup> Lupwen üa ekieki usun Kot, üa ngüngü,  
nge lupwen üa ekinlon, üa tipemösök.

4 A föri pwe üsap tongeni möür lepwin,  
 üa nom lon weires pwe üsap tongeni kapas.

5 Üa ekieki usun ekewe fansoun lom  
 o chechemeni ekewe ier ra la.

6 Üa ekiiek lon lelukei lepwin,  
 üa ekinlon o akais ngeniei,

7 “Ifa usun, ewe Samol epwe pöütikichela tori feil-  
 feilachök,

nge esap ümöümöchsefäl ngenikich?

8 Ifa usun, an we tong ellet a wesewesen müchüla?  
 Ifa usun, an kewe pwon ra ükütiu fansoun mein-  
 isin?

9 Ifa usun, Kot a manlükala an epwe kirikiröch?  
 Ifa usun, an song a aükätü an tong?”

10 Mürin üa üra, “Iei ai weires,  
 pwe manamanen Ewe mi Unusen Tekia esap  
 chüen usun me lom.”

11 Ai Samol mi Lapalap, üpwe achemato om kewe  
 föför.

Ewer, üpwe chechemeni om kewe manaman ka  
 föri me lom.

12 Üpwe ekieki usun om kewe föför meinsin  
 o ekiiek won om kewe föför mi amwarar.

13 Ai Kot, meinsin mine ka föri a pin.

Esap wor eman kot a tekia seni en.

14 En ewe Kot mi föri föför mi amwarar.

Ka pwäri om manaman lein chon ekewe mwü.

15 Ren om manaman ka angasa noum aramas,  
 ir ekewe mwirimwirin Jakob me Josef.

16 Ai Kot, lupwen ekewe koluk ra künok, ra ni-  
 uokus,

nge epin ewe matau a chechech.

17 Ekewe kuchu ra ninätü koluk,  
ekewe chopulap ra püng me läng.  
Om kewe inefi ra fila ekis meinisin.

18 Püngün om chopulap a nom lon ewe ewiniär.

Om kewe inefi ra asarama fanüfan.  
Fanüfan a chechek o mwöökük.

19 En ka pwerela won matau,  
ka fetal won ekewe koluk mi watte,  
nge esap wor eman a küna rasen ipwom.

20 Ka emweni noum aramas ren Moses me Aaron  
usun eman chon mas a emweni eu pwiin sip.

## 78

*Usun än Kot allükülük ngeni nöün aramas resap  
allükülük*

*78.1-72*

Echö än Asaf kölün kait.

1 Ami nei aramas, oupwe aüselinga mine üpwe aiti  
ngenikemi.

Oupwe aüeto selingemi ngeni mine üpwe apasa.

2 Üpwe apasatä eu kapasen awewe.

Üpwe apasawu kapas monomon mi fis me lom, ☆

3 usun ekewe mettoch sa rongorong o silei,  
semalapach kewe ra apworausä ngenikich.

4 Sisap aopa ekewe kapas seni nöüch,  
nge sipwe apworausä ngeni ewe täppin aramas  
epwe feito me mürich

usun än ewe Samol mi Lapalap föför mi amwarar,  
usun an kewe manaman me an kewe asisil a föriir.

5 A awora ekewe pwüüng fän iten ekewe  
mwirimwirin Jakob

o föri ekewe allük fän iten chon Israel.

☆ 78:2: Mat 13.35

A allük ngeni ach kewe lewo  
 pwe repwe aiti ngeni nöür kewe an kewe allük,  
 6 pwe ekewe täppin aramas me müriir repwe silei  
 ekewe allük,  
 pwal ekewe mönükol resamwo uputiü,  
 mürin, pwal ir repwe apworausä ngeni nöür.  
 7 Ren ei repwe anomu ar apilükülük won Kot,  
 nge resap manlükala än Kot kewe föför.  
 Repwe pwal aleasochisi an kewe allük,  
 8 pwe resap wewe ngeni ar kewe lewo,  
 ewe täppin aramas mi ülöförea me lükümach,  
 ewe täppin aramas leluiker esap pos,  
 resap pwal allükülük ngeni Kot.

9 Ekewe mwän seni ewe ainangen Efraim mi uwei  
 nöür likapich  
 ra kulsefäl o sü lon ewe rän a fis maun.  
 10 Resap tümwünü än Kot pwon,  
 resap pwal mochen aleasochisi an kewe allük.  
 11 Ra manlükala mine a föri,  
 ekewe manaman a pwäri ngeniir.  
 12 Kot a föri föför mi amwarar fän mesen ar kewe  
 lewo  
 lon ewe fanü Isip me lon ewe maasiesin Soan. ☆  
 13 A kinifeseni ewe matau o emwenirela tori epek,  
 a föri pwe ekewe koluk ra ütä usun chök eu tit. ☆  
 14 Lerän a emweniir ren eu kuchu,  
 nge lepwin a emweniir ren ekkei mi saramaram.  
 ☆  
 15 A asangafeseni achau lon ewe fanüapö  
 o aünü ngeniir chomong koluk seni ekewe leni mi  
 alolol.

---

☆ **78:12:** Eks 7.8-12.32    ☆ **78:13:** Eks 14.21-22    ☆ **78:14:** Eks 13.21-22

- 16 A föri pwe öüwö a towu seni ewe achau,  
nge koluk a puputiu usun chanpupu. ✨
- 17 Nge ra chök sopwela le tipis ngeni Kot,  
ra ü ngeni Ewe mi Unusen Tekia me lon ewe  
fanüapö.
- 18 Ra sotuni Kot seni mochenin letiper  
ren ar tüngormau ener mongö ra mwäräräiti. ✨
- 19 Ra ü ngeni Kot ren ar kapas o apasa,  
“Ifa usun, Kot a tongeni ngenikich mongö lon ewe  
fanüapö?”
- 20 A wichi ewe achau pwe koluk a towu,  
nge ekewe öüwö ra urourela.  
Nge ifa usun, a pwal tongeni fangeto pilawa  
ika amolätä fituk fän iten nöün aramas?”
- 21 Iei mine, lupwen ewe Samol mi Lapalap a ron-  
gorong ar kewe kapas, a fokun song.  
A tinala ekkei pwe a keni chon Israel,  
nge an song a wattela ngeniir,  
22 pun esap wor ar lükülük won Kot,  
resap pwal lükü an manaman pwe a tongeni  
amanaueer.
- 23 Nge Kot a chök allük ngeni ekewe läng  
o sukala ekewe asamen läng.
- 24 A apüngätü wor mana, ekewe föün wiichen  
läng,  
pwe repwe tongeni mongö, ✨
- 25 Aramas ra mongö enen ekewe chon läng.  
A tinala rer chomong mongö.
- 26 A pwal föri pwe asepwälin ötiu a enien fän läng,

✨ **78:16:** Eks 17.1-7; Num 20.2-13  
11.4-23; 31.35 ✨ **78:24:** Joh 6.31

✨ **78:18:** Eks 16.2-15; Num

nge ren an manaman a emwenawu ewe asepwälin  
ör.

27 A apüngätü wor fituk usun chök pwül moromor,  
ekewe machang ra chomong usun chök  
chomongun föün pien arosot.

28 A apüngüretü lukalapen lenier  
pwelín ünükün imwer.

29 Iwe, ekewe aramas ra mongö o fokun mötüla,  
pun Kot a ngeniir mine ra fokun mwäräräiti.

30 Nge mwen an esamwo wesöchüla ar mwärä,  
lupwen ra chüen mongö ewe mongö,

31 Kot a song ngeniir, pwe a niela ekewe mi fokun  
pöchökül me leir  
me ekewe alüal me lon Israel.

32 Iwe, ekei mettoch meinisin ra fis, nge ekewe  
aramas ra chök sopwela le tipis.

Kot a föri an kewe manaman, nge resap fokun  
lükü.

33 Iei mine Kot a föri pwe ränin manauer a wesila  
usun chök enienin asepwäl,  
nge ierin manauer a chök sopolong lon niuokus  
watte.

34 Nge lupwen Kot a niela ekoch me leir,  
ekewe mi chüen manau ra kütta i.  
Ra ekiexefäl o tiliken le iotek ngeni.

35 Ra chechemeni pwe Kot ar achau,  
pwe ewe Kot mi Unusen Tekia ar Chon Amanau.

36 Nge ar kewe kapas resap pwüing,  
meinisin mine ra apasa a chök mwakel.

37 Leluker esap wenechar ngeni,  
resap pwal allükülük won an we pwon. ☆

38 Nge Kot a tongeer,

---

☆ 78:37: Föf 8.21

a amusala ar tipis,  
 esap pwal aroserela,  
 Fän chomong a amwöchü an song,  
 nge esap amüchawu an lingeringer ngeniir.  
<sup>39</sup> A chechemeni pwe ir aramas echök,  
 ra usun chök asepwäl mi enila, nge esap chüen  
 enito.

<sup>40</sup> Fän chomong ra ü ngeni i me lon ewe fanüapö  
 o achouu me lon ewe fanüpwäs.  
<sup>41</sup> Ra sotuni Kot fän chomong  
 o asonga Ewe mi Pin me lon Israel.  
<sup>42</sup> Resap chechemeni an manaman ika ewe rän,  
 lupwen a amanaueer seni chon oputeer,  
<sup>43</sup> resap pwal chechemeni an kewe föför mi  
 amwarar  
 me an kewe manaman a föri lon Isip me lon ewe  
 maasiesin Soan.  
<sup>44</sup> Iwe, Kot a awili lölon ekewe chanpupu ngeni  
 cha,  
 pwe ekewe chon Isip resap tongeni ün seniir. ✧  
<sup>45</sup> Kot a tinato pwiin nikken leir pwe repwe küür,  
 pwal kairü mi ataela irän fanüer. ✧  
<sup>46</sup> A amongöu ngeni ekewe müün fotar irä,  
 nge ekewe lifichimas ra eni uän ar tanipi. ✧  
<sup>47</sup> A ataela ar tanipin wain ren ütten fau  
 me ar irä sikamor ren patapat.  
<sup>48</sup> A niela nöür pwiin kow ren ütten fau,  
 pwal nöür pwiin sip ren inefi. ✧  
<sup>49</sup> Ren an song mi fokun watte ngeniir,  
 ren an lingeringer me an koput a esen ngeniir

---

✧ **78:44:** Eks 7.17-21   ✧ **78:45:** Eks 8.20-24; Eks 8.1-6   ✧ **78:46:**  
 Eks 10.12-15   ✧ **78:48:** Eks 9.22-25



pwe repwe tolong lon riaföü.

Ei a usun chök eu mwichen chon läng mi feito o afeingaeuer.

<sup>50</sup> Esap chüen engila lon an song,  
esap pwal achika manauer seni mäla,  
nge a asechirela pwe repwe mäla ren mätter.

<sup>51</sup> A niela ekewe mwänichi meinsin lon Isip,  
ir mwen pöchökülen mwirimwirin Ham me lon  
ewe fanü. ✧

<sup>52</sup> Mürin, Kot a emwenawu nöün aramas usun  
eman chon mas a emweni nöün pwiin sip,  
o emweniir lon ewe fanüapö. ✧

<sup>53</sup> A emwenirela fän kinamwe pwe resap niuokus,  
nge ewe matau a pwölüela ekewe chon oputeer. ✧

<sup>54</sup> Iwe, a emwenirela ngeni fanüan we mi pin,  
ngeni ewe chuk püsin i a liapeni. ✧

<sup>55</sup> A asüela chon ekewe mwü me mwer.  
A aineti ngeni ekewe ainangen Israel fanüer pwe  
repwe fanüeni

o ngeniir imwer. ✧

<sup>56</sup> Nge ir ra sotuni ewe Kot mi Unusen Tekia  
o ü ngeni.

Resap aleasochisi an kewe allük, ✧

<sup>57</sup> nge ra tokola seni Kot o kirikiringau usun chök  
semelaper kewe,  
ra lomotongau usun chök efoch esefich mi pwor.

<sup>58</sup> Pun ra asonga Kot ren ar lenien fel won ekewe  
leni tekia,  
ra pwal föri pwe a lingerseritiir ren ar kewe  
uluulun anü mi fal.

✧ **78:51:** Eks 12.29 ✧ **78:52:** Eks 13.17-22 ✧ **78:53:** Eks 14.26-28

✧ **78:54:** Eks 15.17; Jos 3.14-17 ✧ **78:55:** Jos 11.16-23 ✧ **78:56:**

Souk 2.11-15

- 59 Iwe, lupwen Kot a küna ei, a fokun song  
o wesewesen pöütala chon Israel.
- 60 A likitala lenian me lon Silo,  
ewe imw mangaku ia Kot a nom ie me lein ekewe  
aramas. ☆
- 61 A föri pwe ewe pworofel, asisilen an manaman  
me ling,  
epwe oolong lepöün chon oputeer. ☆
- 62 A lingersingeriti nöün aramas  
o mwüt ngeni chon oputeer pwe repwe nirela ren  
ketilas.
- 63 Nöür alüal ra mäla lon maun.  
Esap chüen wor alüal repwe pwüpwülü ngeni nöür  
föpwül.
- 64 Nöür souasor ra mäla ren ketilas,  
nge nöür fefin mi mä pwülüer resap tongeni  
ngüngüres.
- 65 Mürin, ewe Samol a pwök usun eman a pwök me  
annut.  
A usun eman mwän mi pöchökül a akkapwas  
pokiten an ün wain.
- 66 Iwe, a akufu chon oputan pwe ra sü  
o asäweer ren säw esemüch.
- 67 Mürin, Kot a pöütala ekewe mwirimwirin Josef,  
esap filätä ewe ainangen Efraim.
- 68 Nge a filätä ewe ainangen Juta,  
pwal ewe chuk Sion a efich.
- 69 Ikenan a aüetä imwan mi pin o tekia usun tekian  
ekewe läng,  
a pwal anüküchara usun fanüfan

---

☆ **78:60:** Jos 18.1; Jer 7.12-14; 26.6    ☆ **78:61:** 1.Sam 4.4-22

pwe epwe nom tori feilfeilachök.

<sup>70</sup> Kot a filätä nöün chon angang Tafit  
o angei i seni ekewe lenien sip.

<sup>71</sup> A emwenato Tafit seni an tümwünü ekewe pwiin  
sip

pwe epwe chon masen nöün aramas,  
ekewe chon Israel. ✧

<sup>72</sup> Iwe, Tafit a tümwünüür ren wenecharen  
lelukan,  
a fokun angangöch lon an emweniir.

## 79

*Eu iotekin tüngr alilis, lupwen Jerusalem a tala*  
*79.1-13*

Echö än Asaf köl.

<sup>1</sup> Ai Kot, chon ekewe mwü ra tolong lon fanüom.

Ra apiningaua pinin imwom we mi pin  
o atatakisi Jerusalem. ✧

<sup>2</sup> Ra ngeni ekewe machang mi mwacho somän  
noum kewe chon angang pwe ochar,  
ra ngeni ekewe manmwacho fituken noum kewe  
chon pin.

<sup>3</sup> Ra ninätüu char usun koluk pwelin ünükün  
Jerusalem,  
nge esap wor eman a peiaseni ekewe somä.

<sup>4</sup> Äm aia uren takir me ren chon ekewe mwü mi  
nom ünüküm,  
ra turunufasekem o esitakem.

---

✧ **78:71:** 1.Sam 16.11-12; 2.Sam 7.8; 1.Kron 17.7 ✧ **79:1:** 2.King  
25.8-10; 2.Kron 36.17-19; Jer 52.12-14

<sup>5</sup> Ai Samol mi Lapalap, ifa ükükün fansoun om kopwe song ngenikem? Epwe tori feil-feilachök?

Ifa usun, om lingeringeritikem epwe chök ngetenget usun ekkei?

<sup>6</sup> Kopwe song ngeni chon ekewe mwü resap sileek, pwal ngeni chokewe resap iotek ngonuk.

<sup>7</sup> Pun ra niela noum aramas o ataela fanüer.

<sup>8</sup> Kosap ukun ngenikem tipisin äm kewe lewo. Kopwe amüttirato om ümömöch ngenikem, pun äm aia apilükingau.

<sup>9</sup> Kopwe alisikem, ai Kot äm Chon Amanau, pwe itom epwe ling.

Kopwe angasakem o amusala äm tipis pokiten itom.

<sup>10</sup> Pwota chon ekewe mwü repwe ais, “Ifa i chök ar we Kot?”

Kopwe öküna ngenikem usun om kopwe ngeni chon ekewe mwü chappen ar nimanauei noum kewe chon angang.

<sup>11</sup> Kopwe aüselinga ngüngün ekewe chon fötek. Fän om manaman mi lapalap kopwe angasala ir mi feil ngeni mäla.

<sup>12</sup> Ai Samol, kopwe liwini ngeni chon ekewe mwü fän fisu

ar kewe kapasen turunufas ra turunufaseek ren.

<sup>13</sup> Mürin, äm noum aramas, ewe mwichen sipen om mälämäl,

äm aipwe kilisou ngonuk tori feilfeilachök.

Seni eu täppin aramas tori eu täppin äm aipwe mwareituk.

## 80

*Eu iotek pwe chon Israel repwe liwinsefäl**80.1-19*

Ngeni ewe mi emweni chon köl: Ei köl usun ngingin ewe köl itan 'Kiop'. Eu än Asaf kapasen pwäätä. Echö köl.

<sup>1</sup> Kopwe aüselingakem, en än Israel chon mas, en mi emweni ekewe mwirimwirin Josef usun eu pwiin sip.

En mi mot won om lenien motun king asen ekewe kerop, ✧

<sup>2</sup> Kopwe pwärukela ngeni chon ekewe ainangen Efraim me Peniamin me Manasa. Kopwe pwäri ngenikem om manaman, kopwe feito o amanauakem.

<sup>3</sup> Ai Kot, kopwe aliwinisefälükem, kopwe netiu wom fän om kirikiröch pwe aipwe küna manau.

<sup>4</sup> Ai Samol mi Lapalap, en ewe Kot mi unusen manaman, ifa ükükün fansoun om kopwe song ren än noum kewe aramas iotek?

<sup>5</sup> Ka amongöü ngenikem riaföü pwe enem mongö, ka pwal aünü ngenikem chönün mesem fän aükük watte.

<sup>6</sup> Ka föri pwe chon ekewe mwü mi nom aruum ra aninifengen won fanüem, nge chon oputakem ra takirin ämängauakem.

<sup>7</sup> Ai Kot mi Unusen Manaman, kopwe aliwinisefälükem,

---

✧ **80:1:** Eks 25.22

kopwe netiu wom fän om kirikiröch pwe aipwe  
küna manau.

<sup>8</sup> En ka uwato efoch irän wain seni Isip,  
ka asüela chon ekewe mwü o fotukätü ewe irä lon  
fanüer.

<sup>9</sup> Ka limeti eu leni fän iten ewe irä pwe epwe  
tongeni märitä.

A tötiu waran fän pwül lealolol, a pwal amasoua  
ewe fanü.

<sup>10</sup> Ekewe chuk ra pwölüla ren nürün,  
nge palan kewe ra usun chök palen ekewe irä setar  
mi fokun watte.

<sup>11</sup> Palen ewe irän wain ra meresiwu tori ewe  
matau watte,  
nge fasaran kewe ra tori ewe chanpupu Oifrat.

<sup>12</sup> Pwota ka ataetiu tittin kewe,  
pwe meinsin mi pwerela won ewe al ra kini uan?

<sup>13</sup> Pik mi mwacho seni ewe wöllap ra tipwei ewe  
irä,  
nge ekewe manmwacho ra mongö seni.

<sup>14</sup> Ai Kot mi Unusen Manaman, kopwe kul  
ngenikem,

kopwe netiu seni läng o nenengenikem.

Kopwe ekieki ei irän wain.

<sup>15</sup> Kopwe tümwünü, pun en ewe ka püsin fotukätü.  
Kopwe tümwünü palan we ka ämärätä o  
apöchöküla fän itom.

<sup>16</sup> Ra pöküetiu om we irän wain o kenala.

Kopwe netiu wor fän om song o aroserela.

<sup>17</sup> Nge kopwe fokun tümwünü noum aramas ka  
filätä,  
ewe mwü ka fokun apöchöküla fän itom.

18 Mürin, äm aisap fokun chüen kul senuk.  
Kopwe fang ngenikem manau, nge äm aipwe  
mwareituk.

19 Ai Samol mi Lapalap, en ewe Kot mi Unusen  
Manaman, kopwe aliwinisefälikem,  
kopwe netiu wom fän om kirikiröch pwe aipwe  
küna manau.

## 81

### *Än Kot kirikiröch me än chon Israel tokola* 81.1-16

Ngeni ewe mi emweni chon köl: Won pisekin ettik  
itan Kitit. Echö än Asaf köl.

<sup>1</sup> Oupwe leüömong le köl ngeni Kot i ach pöchökül.  
Oupwe mweireir fän pwapwa ngeni än Jakob we  
Kot.

<sup>2</sup> Oupwe chietä echö köl, oupwe ettiki pisekin  
kaktai,  
oupwe ettiki ükülele me kitar.

<sup>3</sup> Oupwe ettiki rappwa lelingen maram me le-  
unusen maram,  
pwal lupwen ach ränin chulap. ✧

<sup>4</sup> Pun iei eu allük lon Israel,  
eu pwüüng seni än Jakob we Kot.

<sup>5</sup> Kot a anükücharala ei allük ngeni chon Israel,  
lupwen a feila pwe epwe maun ngeni Isip.

Üa rongorong eu möngüngü üsamwo rong me  
mwan:

<sup>6</sup> “Üa angei seni afaremi ewe mettoch mi chou,  
üa atowu me lepöümi ewe chüük mi chou ren  
pilak.

---

✧ 81:3: Num 10.10

7 Oua köriei lon ämi riaföü, nge ngang üa an-gasakemi.

Üa pälüenikemi seni ewe kuchuen chopulap, nge ousap künaei,

üa sotunikemi arun ekewe kolukun Meripa. ☆

8 Ämi nei aramas, oupwe rongorong ngeni ai ka-pasen fön.

Ämi chon Israel, amwo oupwe aüselingaei.

9 Esap tufich pwe oupwe eäni eman kot än chon ekewe mwü,

ousap fel ngeni eman koten ekis. ☆

10 Ngang ewe Samol mi Lapalap ämi we Kot,

üa emwenikemiiwu seni ewe fanü Isip.

Oupwe fokun amassaw, nge ngang üpwe amongökemi.

11 Nge nei aramas resap mochen aüselinga aloi, chon Israel resap mochen aleasochisiei.

12 Iei mine üa asechirela lon ar tipeförea pwe repwe chök föri mine ra mochen.

13 Amwo nei aramas repwe aüselinga aloi, amwo chon Israel repwe aleasochisiei.

14 Are epwe iei usun, üpwe müttir akufu chon oputeer

o fiu ngeni chokewe mi ü ngeniir.

15 Iwe, chokewe mi oputaei repwe chapetiu me mwei fän niuokus,

nge ar feiengau esap müchüla tori feilfeilachök.

16 Nge üpwe amongöü ngenikemi wiich mi fokun mürina

---

☆ **81:7:** Eks 17.7; Num 20.13    ☆ **81:9:** Eks 20.2-3; Tut 5.6-7



o aünü ngenikemi chönün chunen seni ewe achau,  
pwe oupwe mötüla.”

## 82

*Kot a apwüngü ekewe soukapwüng mi  
pwüngingau*

*82.1-8*

Echö än Asaf köl.

<sup>1</sup> Kot ewe meilapen ewe mwichen lon läng,  
a eäni kapwüng me lein ekewe kot:

<sup>2</sup> “Ifa ükükün fansoun ämi oupwe eäni kapwüng fän  
pwüngingau  
o peni ekewe aramasangau?”

<sup>3</sup> Oupwe eäni kapwüng fän pwüng ngeni ekewe mi  
mwelele me ekewe mi mäsen.  
Oupwe eäni pwüng ngeni ekewe mi riaföü me  
wöüngau.

<sup>4</sup> Oupwe amanaua ekewe mi mwelele me ekewe  
mi osupwang o angaserela seni lepöün  
ekewe aramasangau.”

<sup>5</sup> Iwe, esap wor ar sile ika mirit,  
ra chök fetal lon ro chopwak.

Ra ataela ekewe pwüüng ekewe mwün fanüfan ra  
longolong won.

<sup>6</sup> Üa apasa, “Ämi oua kot,  
ämi meinisin nöün Ewe mi Unusen Tekia. ✧

<sup>7</sup> Nge ämi oupwe chök mäla usun aramas,  
oupwe mäfeiengau usun chök ekewe samol.”

<sup>8</sup> Ai Kot, kopwe feito o apwüngü fanüfan,  
pun noum chök chon ekewe mwü meinisin.

---

✧ 82:6: Joh 10.34

## 83

*Eu iotek pwe Kot epwe afeiengaua chokewe mi oputa Israel*

## 83.1-18

Echö än Asaf köl.

<sup>1</sup> Ai Kot, kosap fanafanala,  
ai Kot, kosap mosonoson ika asösö.

<sup>2</sup> Pun nengeni, chon ü ngonuk ra akürang,  
nge chokewe mi oputok ra achimwätä mökürer.

<sup>3</sup> Ra rawangauei noum aramas fän atuputup.  
Ra ekiekietä mine a ngau ngeni noum kewe ka  
tümwünüür.

<sup>4</sup> Ra apasa, “Ou etto, ousipwe aroserela pwe resap  
chüen eu mwü,  
esap pwal wor eman epwe chüen chechemeni  
Israel.”

<sup>5</sup> Ewer, ra tipeeufengen le rawangau.  
Ra föri eu pwonen atipeeufengen pwe repwe ü  
ngonuk.

<sup>6</sup> Ekewe chon Etom me ekewe mwirimwirin Is-  
mael,

ekewe chon Moap me ekewe mwirimwirin Hakar,

<sup>7</sup> ekewe chon Kepal, chon Amon me chon Amalek,  
ekewe chon Filistia me chokewe mi imweimw lon  
ewe telinimw Tirus,

<sup>8</sup> pwal ekewe chon Asiria ra choniir.  
Ir meinisin ra alisi ekewe mwirimwirin Lot.

<sup>9</sup> Kopwe föri ngeniir usun mine ka föri ngeni chon  
Mitian,  
usun mine ka föri ngeni Sisera me Japin arun ewe  
chanpupu Kison. ✧

---

✧ 83:9: Souk 7.1-23; Souk 4.6-22

- 10 Ir ra ninnila me Entor,  
inisir a usun chök kiten mongö won pwül.
- 11 Kopwe föri ngeni ar kewe aramas tekia pwe  
repwe usun chök Orep me Seep,  
nge ar kewe samol meinisin repwe usun chök  
Sepa me Salmuna, ☆
- 12 ir chokewe mi apasa, “Ousipwe angei fän itach  
ekewe fanüen Kot pwe sipwe fanüeni.”
- 13 Ai Kot, kopwe föri pwe repwe usun chök pip-  
isüsü,  
pwal usun chök fetilipwas asepwäl a ässala.
- 14 Usun ekkei a kenala ewe wöllap,  
usun ngetengeten ekkei a akkara ekewe chuk,
- 15 iei usun kopwe tapweriir ren om asepwäl mi  
pöchökül  
o eniwokusuur ren om mölümöl.
- 16 Kopwe atoto wor säw,  
pwe repwe küttok, ai Samol mi Lapalap.
- 17 Amwo repwe säw o nom lon niuokus watte tori  
feilfeilachök.  
Amwo repwe mäla lon itengau.
- 18 Iwe, repwe silei pwe en ewe mi iteni Samol mi  
Lapalap,  
en chök Ewe mi Unusen Tekia won unusen  
fanüfan.

## 84

### *Positi imwen Kot* 84.1-12

Ngeni ewe mi emweni chon köl: Won pisekin ettik  
itan Kitit. Echö köl än nöün Kora kewe mwän.

☆ **83:11:** Souk 7.25; Souk 8.12

1 Ai Samol mi Unusen Manaman, üa fokun efich imwom.

2 Üa fokun positi ai üpwe nom lon imwen ewe Samol mi Lapalap,

ewer, üa aiengau ren.

Lelukei me inisi ra kölün pwapwa ngeni ewe Kot mi manau.

3 Iwe, ewe nichok a küna lenian, nge ewe ekiék a wor fasan

ia a tongeni anomu ie apanan,

ina usun üa küna leniei ünükün om kewe rongen asor,

ai Samol mi Unusen Manaman, ai king me ai Kot.

4 Ra feiöch ir mi nonom lon imwom,

ir mi kölün mwareituk fansoun meinisin.

5 Ra feiöch ekewe aramas mi angei ar pöchökül senuk.

Ra chök ekiéki lon leluker ar repwe fetal won ekewe al ngeni Sion.

6 Lupwen ra pwerela lon ewe lemolun kechü mi pwasapwas,

ra awili ngeni eu lenien puächen koluk.

Pwal ewe ütten leefen a pwölüela ewe lemol ren feiöch.

7 Ra fetal o pöpöchökülela

tori repwe küna ewe Kot mi lap seni ekewe kot meinisin me lon Sion.

8 Ai Samol mi Lapalap, en ewe Kot mi Unusen Manaman,

kopwe aüselinga ai iotek, kopwe aü selingom, Maing än Jakob we Kot.

9 Ai Kot, kopwe afeiöchü äm king,

kopwe netiu won noum we mi kepit.

<sup>10</sup> Pun ai nonom lon imwom lon ükükün eu chök  
rän

a mürina seni ai nonom ekis lon ükükün engeröü  
rän.

Üa efich ai üpwe nom lon asalapen imwen ai  
Kot,

lap seni ai üpwe nonom lon imwen ekewe ara-  
masangau.

<sup>11</sup> Pun Kot ewe Samol mi Lapalap i ai saram, a  
apetiei seni ei feiengau.

A fangela ngenikich ümöümöch me iteüöch.

Ewe Samol mi Lapalap esap amwöchü och mi  
mürina

seni chokewe mi föri mine a pwüing.

<sup>12</sup> Ai Samol mi Unusen Manaman, a feiöch ewe  
aramas mi lükü en.

## 85

*Eu iotek pwe Kot epwe ümöümöch ngeni chon  
Israel*

### *85.1-13*

Ngeni ewe mi emweni chon köl: Echö köl än nöün  
Kora kewe mwän.

<sup>1</sup> Ai Samol mi Lapalap, ka fen efich fanüom me  
lom,

ka aliwinisefäli ekewe chon Israel seni ar oola o  
awöüür.

<sup>2</sup> Ka amusala pwüingingauen noum aramas,  
ka amusala ar tipis meinisin.

<sup>3</sup> Ka aükätü om lingeringer ngeniir  
o wes seni om song mi fokun lapalap.

<sup>4</sup> Ai Kot, äm Chon Amanau, kopwe aliwinisefälidem  
o aükätü om song ngenikem.

<sup>5</sup> Ifa usun, kopwe song ngenikem tori  
feilfeilachök?

Ifa usun, kopwe chök sopwela le song ngeni ekewe  
täppin aramas meinisin?

<sup>6</sup> Kose mochen kopwe amanauasefälidem,  
pwe äm noum kewe aramas aipwe mwareituk.

<sup>7</sup> Ai Samol mi Lapalap, kopwe pwäri ngenikem om  
we tong ellet

o fang ngenikem om manau.

<sup>8</sup> Üpwe rongorong ngeni mine Kot a apasa.

A pwon pwe epwe awora kinamwe ngeni nöün  
kewe aramas, ngeni nöün kewe mi pin,  
are resap chüen liwinsefäl ngeni ar kewe föför mi  
mwäl.

<sup>9</sup> Ellet, a kaneto pwe epwe amanaua chokewe mi  
niuokusiti i,

pwe an ling epwe nonom lon fanüach.

<sup>10</sup> Tong ellet me allükülük repwe chufengen,  
pwüng me kinamwe repwe mitirifengeniir.

<sup>11</sup> Än aramas allükülük epwe feitä seni fanüfan,  
nge än Kot pwüng epwe netiu seni läng.

<sup>12</sup> Ewer, ewe Samol mi Lapalap epwe fangeto met-  
toch mi mürina,

nge fanüach epwe awora räsimong.

<sup>13</sup> Pwüng epwe akomwola mwen ewe Samol mi  
Lapalap,

pwe epwe föri efoch al fän itan.

## 86

*Eu iotek pwe Kot epwe sopwela an ümöümöch*

*86.1-17*

Eu än Tafit iotek.

<sup>1</sup> Ai Samol mi Lapalap, kopwe aüselingaei o pälüeniei,

pun ngang eman aramas mi wöüngau o osupwang.

<sup>2</sup> Kopwe amwöchü manaei, pun ngang üa föri letipom.

Kopwe amanauaei, ngang noum chon angang mi apilükülükuk, pun en ai Kot.

<sup>3</sup> Ai Samol, kopwe ümöümöch ngeniei, pun ngang üa siö ngonuk iteiten rän.

<sup>4</sup> Kopwe apwapwai leluken noum ei chon angang, ai Samol, pun üa suki ngonuk lelukei.

<sup>5</sup> Pun en, ai Samol, ka kirikiröch o amusala tipis, om tong ellet a somwosom ngeni meinsin mi iotek ngonuk.

<sup>6</sup> Ai Samol mi Lapalap kopwe aü selingom ngeni ai iotek,

kopwe aüseling ngeni ai tüngor.

<sup>7</sup> Lon ränin ai riaföü üpwe kökkörük, pun en kopwe pälüeniei.

<sup>8</sup> Esap fokun wor eman me lein ekewe kot usun en, ai Samol,

esap pwal wor och föför mi wewe ngeni om kewe föför.

<sup>9</sup> Chon ekewe mwü meinsin ka föriir repwe feito o fel ngonuk,

ai Samol mi Lapalap, repwe pwal alinga itom. ☆

- 10 Pun en ka tekia, ka föri mettoch mi amwarar,  
en echök Kot.
- 11 Ai Samol mi Lapalap, kopwe aiti ngeniei mine  
ka mochen pwe üpwe föri.  
Iwe, üpwe aleasochis ngonuk fän allükülük.  
Kopwe fang ngeniei eu leluk esap tipekinikin, pwe  
üpwe niuokusiti itom.
- 12 Ai Samol me ai Kot, üpwe kilisou ngonuk ren  
unusen lelukei,  
üpwe alinga itom tori feilfeilachök.
- 13 Pun om we tong ellet a fokun lapalap ngeniei,  
ka amanauaei seni epin lenien sotup.
- 14 Ai Kot, aramas mi lamalamtekia ra ü ngeniei,  
eu mwichen mwänewüs ra mochen nieila,  
ir chokewe resap ekieki en.
- 15 Nge en, ai Samol, eman Kot mi ümöümöch o  
kirikiröch,  
ka songomang o wöün tong ellet me allükülük.
- 16 Kopwe sap ngeniei o tongeei,  
kopwe ngeni noum ei chon angang pöchökül  
o amanaua nöün noum we chon angang fefin  
mwän.
- 17 Kopwe pwäri ngeniei eu asisil pwe ka kirikiröch  
ngeniei,  
pwe chokewe mi oputaei repwe säw,  
lupwen repwe küna pwe en ai Samol mi Lapalap  
ka alisie i o achipaei.

## 87

*Feiöchün chokewe mi nonom lon Sion*

*87.1-7*

Echö köl än nöün Kora kewe mwän.



<sup>1</sup> Kot a aüetä an we telinimw won ewe chuk mi pin.

<sup>2</sup> Ewe Samol mi Lapalap a aücheani Sion  
lap seni ekewe leni meinsin lon Israel.

<sup>3</sup> A eäni pworaus mi amwarar usum,  
en telinimwen Kot.

<sup>4</sup> Üpwe makei iten Isip me Papiilon  
lon tettelin ekewe mwü mi aleasochisie,  
pwal ekewe chon Filistia me Tirus me Itiopia  
üpwe alearelong lein chokewe mi imweimw lon  
Jerusalem.

<sup>5</sup> Nge usun Sion aramas repwe apasa  
pwe chon ekewe mwü meinsin repwe nonom lon.  
Iwe, Ewe mi Unusen Tekia epwe püsin anüküchara  
ewe telinimw.

<sup>6</sup> Ewe Samol mi Lapalap epwe angei iteiten ekewe  
aramas,  
epwe alearelong meinsin lon iteiten chon ewe  
telinimw Jerusalem.

<sup>7</sup> Iwe, ekewe chon köl me chon pworuk ra apasa,  
“Äm kewe puächen kolukun manau ra nonom  
lomw.”

## 88

*Eu iotekin tüngor ngasala seni mäla*

*88.1-18*

Echö köl än nöün Kora kewe mwän. Ngeni ewe mi  
emweni chon köl Ei köl usun ngingin ewe sokun  
köl mi mang. Echö kölün kait än Heman eman  
mwirimwirin Esra.

<sup>1</sup> Ai Samol mi Lapalap, ai Kot mi amanauaei lerän  
me lepwin,  
üa siö ngonuk pwe kopwe alisie.

<sup>2</sup> Amwo kopwe etiwa ai iotek,  
kopwe aüselinga ngeni ai siö.

<sup>3</sup> Pun chomong riaföü ra toriei,  
pwe üa arap ngeni ai üpwe mäla.

<sup>4</sup> Üa alealong lein chokewe mi tolong lon peias.  
Ngang eman mwän esap wor ai pöchökül.

<sup>5</sup> Üa usun eman mi pöütüla me lein ekewe somä,  
usun ekewe mi ninnila ra kon lon peias,  
pwal usun chokewe en kosap chüen chechemeniir,  
pun ka ärirewu seni om tütümwün.

<sup>6</sup> Ka aturueilong epin ewe peias,  
lon ewe leni mi rochopwak o alolol.

<sup>7</sup> Om lingeringer a choutiei,  
üa pwölüla fan usun chök ai pwölüla fän no.

<sup>8</sup> Ka föri pwe chiechiei kewe ra likitieila.  
Ka föri pwe ngang och mettoch mi anioput me rer,  
üa mwöchülong lon fötek pwe üsap tongeni süla.

<sup>9</sup> Mesei ra toputopula ren ai riaföü.  
Iteiten rän üa kökkörük, ai Samol mi Lapalap,  
üa aitietä pei ngonuk lon ai iotek.

<sup>10</sup> Ifa usun, en ka föri manaman fän iten sotup?  
Ifa usun, ir repwe tongeni ütä o mwareituk?

<sup>11</sup> Ifa usun, repwe apworausä om we tong ellet me  
lon peias,

ika om allükülük me lon ewe leni mi ta?

<sup>12</sup> Ifa usun, ra silei usun om kewe manaman me  
lon lenien rochopwak,  
ika usun om kewe föförün pwüng me lon fanüen  
chokewe mi manlüküla?

13 Nge ngang, ai Samol mi Lapalap, üa siö ngonuk, iteiten lesosor üa iotek ngonuk.

14 Ai Samol mi Lapalap, pwota ka pöütieila, pwota ka aopa mesom seniei?

15 Üa apwangapwang o kan ngeni mäla seni lesäräföi, üa riaföü ren om kewe eniweniw o apilükingau.

16 Om lingeringer a pwölüeila, om kewe eniweniw ra afeiengauwaei.

17 Ra pwelifeiliei usun no iteiten rän, ra pweliei o rongeila.

18 Ka föri pwe atongeei me chienei ra likitieila, nge rochopwak chiechiei we mi fokun kan ngeniei.

## 89

### *Än Kot pwon ngeni Tafit*

#### *89.1-52*

Echö kölün kait än Etan eman mwirimwirin Esra.

<sup>1</sup> Ai Samol mi Lapalap, üpwe kölü om tong ellet tori feilfeilachök.

Üpwe arongafeili om allükülük ngeni ekewe täppin aramas meinisin.

<sup>2</sup> Üpwe pwärätä pwe om tong ellet a nomopos tori feilfeilachök,

pwe om allükülük a nüküchar usun ekewe läng.

<sup>3</sup> En ka apasa, “Üa eäni eu pwon ngeni ätewe üa filätä,

üa pwon fän akapel ngeni Tafit nei we chon an-gang:

<sup>4</sup> Üpwe föri pwe mwirimwirum kana repwe king tori feilfeilachök

o anüküchara mwum tori ekewe täppin aramas  
meinisin.” ✧

<sup>5</sup> Ai Samol mi Lapalap, ekewe läng repwe mwareiti  
om kewe manaman,  
nge ewe mwichen chon pin kana repwe ingeiti om  
allükülük.

<sup>6</sup> Pun esap wor eman lon läng mi wewe ngonuk en  
Samol mi Lapalap.

Esap wor eman me lein ekewe chon läng a usun  
chök en.

<sup>7</sup> En ewe Kot ewe mwichen chon pin a niwe-  
lapeituk.

Ka kon eniwokus lap seni meinisin mi nom  
ünükumw.

<sup>8</sup> Ai Samol mi Lapalap, en ewe Kot mi Unusen  
Manaman, iö a manaman usun en?

Ai Samol mi Lapalap, ka allükülük lon mettoch  
meinisin.

<sup>9</sup> En ka nemeni ewe matau mi nono.  
Lupwen ekewe no ra pwotä, en ka alüaar.

<sup>10</sup> Ka atatakisi Rahap \* pwe a usun chök eman mi  
ninnila,

ka atoropasa ekewe chon oputom ren poum mi  
manaman.

<sup>11</sup> Ekewe läng om, ewe fanüfan pwal om.

En ka föri fanüfan me masouan meinisin.

<sup>12</sup> En ka förätä efeng me ör.

Ekewe chuk Tapor me Hermon ra mwareituk fän  
pwapwa.

<sup>13</sup> En ka fokun manaman.

Poum a pöchökül, pöüifichum a ititä.

<sup>14</sup> Pwüng me apwüng longolongun mumw,

✧ **89:4:** 2.Sam 7.12-16; 1.Kron 17.11-14; Kölf 132.11; Föf 2.30

\* **89:10:** Rahap a aliosunätä Isip

tong ellet me allükülük a pwä lon meinsin mine  
ka föri.

15 Ra feiöch ekewe aramas mi silei ewe kölün  
mwareituk,  
ir mi fetal lon saramen won mesom, ai Samol mi  
Lapalap.

16 Repwe mwareituk iteiten rän  
o ingeiti om pwüng.

17 En ar ling me ar pöchökül.

Ren om kirikiröch mökürem a chimwetä.

18 Pun ewe mi tümwünükich nöün ewe Samol mi  
Lapalap,  
ach king nöün Ewe mi Pin lon Israel.

19 Me lom en ka kapas ngeni noum we chon an-  
gang mi allükülük lon künan o apasa,

“Üa alisi eman sounfu mi pwora.

Üa seikätä eman alüal seni lein ekewe aramas.

20 Üa awisa nei we chon angang Tafit pwe epwe  
king.

Üa epiti ren ai lö mi pin. ☆

21 Üpwe alisi i fansoun meinsin,  
ai manaman epwe apöchöküla.

22 Ekewe chon oputan resap tongeni pwora ngeni,  
nge ekewe aramasangau resap tongeni akufu.

23 Üpwe atatakisi chokewe mi ü ngeni,  
üpwe pwal niela chokewe mi oputa.

24 Ai allükülük me tong ellet epwe nom ren,  
nge i epwe chimwätä möküran pokiten itei.

25 Ngang üpwe awisa pwe epwe nemeni ewe  
mataü watte,

---

☆ **89:20:** 1.Sam 13.14; Föf 13.22; 1.Sam 16.12

epwe pwal fokun nemeni ekewe chanpupu.

<sup>26</sup> Iwe, epwe apasa ngeniei, ‘En semei me ai Kot, en ewe chon tümwünüei me ai Chon Amanau.’

<sup>27</sup> Üpwe filätä i pwe epwe nei mwänichi, epwe tekia me lein ekewe kingen fanüfan. ☆

<sup>28</sup> Üpwe chök eäni ai tong ellet ngeni tori feil-feilachök, nge ai pwon ngeni epwe nükünüük.

<sup>29</sup> Üpwe föri pwe mwirimwirin kana repwe king tori feilfeilachök, nge mwün epwe nonom ükükün fansoun än ekewe läng nonom.

<sup>30</sup> Nge are nöün kana resap aleasochis ngeni ai kewe allük, resap pwal apwönüetä ai kewe pwüüng,

<sup>31</sup> are repwe puri ai kewe allük pwe resap tümwünüür,

<sup>32</sup> mürin üpwe apwüngüür pokiten ar pupungau, üpwe pwal ariaföüür pokiten ar tipis.

<sup>33</sup> Nge üsap ükütiu le tongei Tafit, üsap pwal föri pwe ai allükülük ngeni epwe mwäl.

<sup>34</sup> Üsap atai ai pwon ngeni ika siwili eu ai kewe kapas üa apasa ngeni.

<sup>35</sup> Fän eu chök üa pwon fän akapel ren ai pin, nge üsap pwal apinisefäli.

Üsap chofana ngeni Tafit.

<sup>36</sup> Epwe wor mwirimwirin Tafit tori feilfeilachök, nge mwün epwe nonom mwei usun chök akkar a nom mwei.

---

☆ **89:27:** Pwär 1.5

37 Epwe chök nonom tori feilfeilachök usun ewe maram a nonom, iei ewe pisekin pwärätä mi allükülük fän läng.”

38 Nge iei ka fokun song ngeni noum we mi kepit, ka likitala o pöütala.

39 Ka atai om we pwon ngeni noum we chon angang,

ka asapwilätü seni wisan wisen king.

40 Ka ataetiu tittin an telinimw meinisín o atatakisi an kewe leni mi pöchökül.

41 Meinisín mi pwerela lükün ra soläni pisekin.

A küna turunufas me ren chon arun.

42 Ka fokun awinna chon ü ngeni,

ka föri pwe ekewe chon oputan meinisín ra pwapwa ren ar akufu.

43 Ewer, ka föri pwe nöün ketilas esap wor nian, kosap pwal alisi lon maun.

44 Ka angei seni lepöün wokun wokun king,

ka pwal aturätü lepwül an lenien motun king.

45 Ka föri pwe a chinlapala, lupwen a chüen alüal, o pwölüla ren säw.

46 Ai Samol mi Lapalap, ifa usun, kopwe aopok tori feilfeilachök?

Ifa ükükün fansoun om lingeringer epwe kü usun ekkei?

47 Ai Samol mi Lapalap, kopwe chechemeni pwe ränin manaei a mochomoch,

pun ka föri aramas meinisín pwe repwe chök mäla.

48 Ifa usun, meni aramas a tongeni manau, nge esap fokun mäla?

Iö a tongeni angasa manauan seni manamanen  
ewe lenien sotup?

49 Ai Samol, ia a nom ie om tong ellet ka eäni me  
lom,  
ewe tong ka pwon fän akapel ngeni Tafit ren om  
allükülük?

50 Ai Samol, kopwe chechemeni usun ngang noum  
ei chon angang üa küna turunufas,  
usun üa weires lon lelukei ren än chon ekewe  
mwü kapasen esit.

51 Ai Samol mi Lapalap, ekewe chon oputok ra  
turunufasei noum we king mi kepit,  
ra turunufasei i ekis meininis ia a fetal ie.

52 Ousipwe mwareiti ewe Samol mi Lapalap tori  
feilfeilachök!  
Amen, Amen.

## ARÜANÜN PUK

### 90

*Kot a nom tori feilfeilachök, nge manauen ara-  
mas a chök mochomoch*  
90.1-17

Eu iotek än Moses ewe aramasen Kot.

<sup>1</sup> Ai Samol en äm lenien op seni eu täppin aramas  
tori eu täppin.

<sup>2</sup> Mwen ekewe chuk resamwo fis,  
pwal mwen kosamwo föri unusen fanüfan  
en chök Kot seni fansoun esepop  
tori fansoun esemüch.

<sup>3</sup> Ka awili aramas ngeni pwül o üra,  
“Ämi nöün aramas, oupwe liwinsefäliti pwül.”



<sup>4</sup> Pun engeröü ier ra usun chök eu rän me reöm,  
ra usun chök ewe rän näneu a fen la,  
ika usun chök eu leülüngatin eu pwin. ✧

<sup>5</sup> En ka angekaiela manauen aramas usun müttirin  
puun eu chanpupu.

Ra usun chök eu tan mi müttir manlüküla,  
ra pwal usun chök fetil mi märifötä lesosor.

<sup>6</sup> Lesosor ewe fetil a aümanau o märifötä,  
nge lekuniol a aümämä o pwasala.

<sup>7</sup> Pun äm aia rosola ren om song,  
äm aia fokun niuokus ren om lingersinger.

<sup>8</sup> Ka anomu äm pwüngingau me mwom,  
äm tipis mi monola ka särifätä pwe ka tongeni  
küneer.

<sup>9</sup> Pun ränin manauem meinisin ra la senikem ren  
om lingersinger,  
nge ierin manauem kewe ra müchüla usun eu  
ngasangas.

<sup>10</sup> Iwe, ierin manauem ra tori fik,  
nge are eman a pöchökül, a tori walik ier.  
Nge lon ekewe ier a chök masou ren angang me  
weires.  
Ra müttir wesila usun chök aia ässila.

<sup>11</sup> Nge iö a mefi manamanen om song,  
nge iö a silei an epwe niuokusiti om lingersinger?

<sup>12</sup> Kopwe aiti ngenikem pwe aipwe eiteita ränin  
manauem mi mochomoch,  
pwe aipwe tipachemela.

13 Ai Samol mi Lapalap, kopwe kul ngenikem. Ifa  
ükükün fansoun kopwe song ngenikem?  
Kopwe tongei nousom kewe chon angang.

14 Kopwe aurakem ren om tong ellet iteiten  
lesosor,  
pwe aipwe köl o pwapwa lon ränin manauem  
meininis.

15 Kopwe apwapwakem lon aükükün ekewe rän ka  
ariaföökem lon,  
pwal lon aükükün ekewe ier aia küna weires lon.

16 Kopwe pwäri ngeni nousom kewe chon angang  
om kewe föföör,  
pwal om manaman mi ling ngeni nöür kewe.

17 Äm Kot Samol mi Lapalap, om ümömöch epwe  
nom wom.  
Kopwe afisätä angangen pöüm.

## 91

### *Nonom fän nürün Ewe mi Unusen Tufich*

#### *91.1-16*

1 Eman mi nom ren Ewe mi Unusen Tekia pwe  
epwe op ren  
o nonom fän än Ewe mi Unusen Manaman  
tümwün,

2 epwe kapas ngeni ewe Samol mi Lapalap,  
“En ai lenien op me imwei imwen maun,  
en ai Kot üa apilükülükük.”

3 Pun i epwe tümwünük seni ekewe feiengau mein-  
isin mi monola senuk  
o amanauk seni ewe mätter mi afeiengau,

4 epwe pwölü ngonuk pöün kewe pwe kopwe op  
fan.

An allükülük epwe tümwünük o epeti senuk feien-  
gau.

<sup>5</sup> Kosap niueiti eniweniwen lepwin  
ika ekewe föön esefich mi äkkäs lerän lupwen  
maun,

<sup>6</sup> ika ewe mätter mi akanif lerochopwak,  
ika ewe samau mi akafeiengau leoloas.

<sup>7</sup> Engeröü repwe turula lepekum,  
nge engol ngeröü lepelifichum,  
nge en kosap feiengau.

<sup>8</sup> Kopwe chök nengeni ren mesom  
o küna usun än ekewe aramasangau angei li-  
winingau.

<sup>9</sup> Pokiten ka eäni ewe Samol mi Lapalap lenien op,  
ka pwal fili Ewe mi Unusen Tekia pwe om chon  
tümwün,

<sup>10</sup> iei mine esap wor och feiengau epwe toruk,  
esap pwal wor och riaföü epwe arap ngeni im-  
wom.

<sup>11</sup> Pun i epwe akünöü nöün chon läng kana pwe  
repwe tümwünuk,  
repwe emwenuk won ekewe al meinisin ia kopwe  
feila ie. ✧

<sup>12</sup> Repwe pwisuk lepöür kana  
pwe pecheöm esap chepeti fau. ✧

<sup>13</sup> Kopwe ipwetiu won laion me serepenit,  
kopwe purätiau fän pecheöm ekewe nienifön laion  
me ekewe serepenit mi poison. ✧

<sup>14</sup> Ewe Samol mi Lapalap a apasa, “Pokiten a eche-  
niei, ngang üpwe amanaua,  
üpwe tümwünü i, pun a silei itei.

---

✧ **91:11:** Mat 4.6; Luk 4.10 ✧ **91:12:** Mat 4.6; Luk 4.11 ✧ **91:13:**  
Luk 10.19

15 Are epwe köriei, üpwe pälüeni.

Üpwe nom ren lon an riaföü,  
üpwe angasa o aitöchü.

16 Üpwe alangatama ränin manuan pwe epwe  
menemen ren,  
üpwe fokun amanau.”

## 92

### *Sipwe mwareiti än Kot kirikiröch*

#### *92.1-15*

Echö köl fän iten ewe ränin sapat.

<sup>1</sup> A mürina äm aipwe kilisou ngonuk, äm Samol mi  
Lapalap,

aipwe kölün mwareiti itom,  
en Ewe mi Unusen Tekia.

<sup>2</sup> Iteiten lesosor aipwe arongafeili om tong ellet,  
nge iteiten lepwin om allükülük,

<sup>3</sup> fiti tikin pisekin ettik mi wor engol saitenin,  
pwal fiti ngingin kitar.

<sup>4</sup> Pun en, ai Samol mi Lapalap, ka apwapwaei ren  
om föfö.

Üa köl fän pwapwa ren mine en ka föri.

<sup>5</sup> Ai Samol mi Lapalap, om kewe föfö ra fokun  
tekia,

om kewe ekiék ra fokun alolol.

<sup>6</sup> Aramas mi tipate resap tongeni silei,  
nge ir mi tiparoch resap tongeni wewe ren:

<sup>7</sup> Inamwo are ekewe aramasangau ra mämäritä  
usun fetil,

nge ekewe chon föföringau meinsin ra aümanau,  
repwe chök fetal ngeni feiengau esemüch.

<sup>8</sup> Nge en ai Samol mi Lapalap, ka tekia tori feil-feilachök.

<sup>9</sup> Ai Samol mi Lapalap, ellet ekewe chon oputom repwe rosola,  
nge ekewe chon föföringau meinisin repwe toropasfeil.

<sup>10</sup> En ka ngeniei pöchökül usun pöchökülen eman kow mi mwacho,  
ka epiti ngeniei lö mi fö.

<sup>11</sup> Mesei ra küna usun än chon oputaei kuf,  
selingei ra rongorong usun feiengauen ekewe aramasangau mi ü ngeniei.

<sup>12</sup> Ekewe chon pwüing repwe aümanau usun ewe irä palm,  
repwe mämäritä usun efoch irä setar won Lepanon.

<sup>13</sup> Ra usun chök irä mi fotetiu lon imwen ewe Samol mi Lapalap,  
repwe aümanauatä me lon än ach we Kot we imwenfel.

<sup>14</sup> Ra chüen ua lon ar chinlap,  
ra uren pöchökül o wowoöch fansoun meinisin,

<sup>15</sup> pwe repwe arongafeili pwe ewe Samol mi Lapalap a wenechar.

I ai achau, esap wor och pwüingau a nom ren.

## 93

### *Kot a ling o manaman*

#### *93.1-5*

<sup>1</sup> Ewe Samol mi Lapalap a nemenem,  
a üföüf ngeni ling me manaman.

Ewer, fanüfan a nükünük,  
esap fokun tongeni mwöküt seni lenian.

<sup>2</sup> Om lenien motun king a nüküchar seni me lom-lom,  
en ka nom seni fansoun esepop.

<sup>3</sup> Ai Samol mi Lapalap, ekewe noon lematau ra tekiatä,  
ekewe no ra atekiatä ngüngür, ekewe no ra atekiatä püngüpüngür.

<sup>4</sup> Ewe Samol mi Lapalap mi nom pekitä a fokun manaman,  
a pöchökül seni püngümongun chomong koluk,  
a pöchökül seni nonon lematau.

<sup>5</sup> Ai Samol mi Lapalap, om kewe allük ra fokun let,  
imwom a fokun pin tori feilfeilachök.

## 94

*Eu iotek pwe Kot epwe liwini ngeni ekewe aramasangau chappen ar föföringau*

### *94.1-23*

<sup>1</sup> Ai Samol mi Lapalap, en ewe Kot mi ngeni aramas chappen ar föföringau,  
en ewe Kot mi ngeni aramas chappen ar föföringau, kopwe pwärukela.

<sup>2</sup> En soukapwüngün fanüfan,  
kopwe ütä o liwini ngeni ekewe chon lamalamtekia ükükün ar föfö.

<sup>3</sup> Ai Samol mi Lapalap, ifa ükükün fansoun än ekewe aramasangau repwe tunosikesik?

<sup>4</sup> Ekewe chon föföringau meinisín ra atowu kapasen lamalamtekia,  
ra aingaing won ar föfö mi ngau.

<sup>5</sup> Ai Samol mi Lapalap, ra atatakisi noum kewe aramas

o ariafööü noum kana.

<sup>6</sup> Ra niela ekewe fefin mi mä pwülüer me ekewe  
chon ekis

o nimanauei ekewe mi mäsen.

<sup>7</sup> Iwe, ra apasa, “Ewe Samol mi Lapalap esap küna,  
ewe Kote Israel esap silei.”

<sup>8</sup> Ämi mi fokun tipate me lein ekewe aramas,  
oupwe weweöch.

Ämi mi tiparoch, inet oupwe tipachemela?

<sup>9</sup> Ifa usun, ewe mi förätä seling, esap püsin ron-  
gorong?

Ifa usun, ewe mi föri mas, esap püsin küna?

<sup>10</sup> Ifa usun, ewe mi apwüngüchon ekewe mwü  
esap pwal apwüngüür?

Ifa usun, ewechon kait ngeni aramas esap silelap?

<sup>11</sup> Ewe Samol mi Lapalap a silei ekiekin aramas,  
a silei pwe ra pön chök. ✧

<sup>12</sup> Ai Samol mi Lapalap, a feiöch ewe mwän en ka  
amiriti,

ätewe ka aiti ngeni om allük.

<sup>13</sup> Kopwe angasa seni an kewe riaföü,

tori eu pwang a tu fän iten ekewe aramasangau.

<sup>14</sup> Iwe, ewe Samol mi Lapalap esap likitala nöün  
aramas,

esap pwal pöütala chokewe a nöüniir.

<sup>15</sup> Angangen kapwüng epwe longolongsefäl won  
pwüng,

nge meinisin mi wenechar lon leluker repwe  
tipeeu ngeni.

---

✧ **94:11:** 1.Kor 3.20

16 Iö epwe ütä fän itei o ü ngeni ekewe aramasan-  
gau?

Iö epwe nom won peki o ü ngeni ekewe chon  
föföringau?

17 Are ewe Samol mi Lapalap esap alisie,  
ngang üpwe müttir feila lon lenien sotup.

18 Lupwen üa apasa, “Üpwe turula,”  
om tong ellet a amwöchüei, ai Samol mi Lapalap.

19 Lupwen a wor chomong ai öürek,  
en ka achipaei o apwapwai lelukei.

20 En kosap fokun tipeeu ngeni ekewe  
soukapwüing mi ngau,  
chokewe mi föri mine a pwüingingau, nge ra aita  
ngeni pwe iei pwüingün allük.

21 Ra chufengen pwe repwe rawangauei ekewe  
chon pwüing  
o atipisi chokewe esap wor ar tipis, pwe repwe  
mäla.

22 Nge ewe Samol mi Lapalap i imwei imwen  
maun,  
i ai Kot, ewe achau üa op fan.

23 I epwe liwini ngeniir liwinin ar tipis  
o aroserela pokiten ar föföringau.

Ewe Samol mi Lapalap ach Kot epwe aroserela.

## 95

### *Echö kölün mwareiti Kot o fel ngeni*

#### *95.1-11*

1 Ou etto, ousipwe köl ngeni ewe Samol mi La-  
palap.

Ousipwe mweireir fän pwapwa ngeni Kot ewe mi  
tümwünükich.

2 Ousipwe feito fän mesan fän kilisou,



ousipwe mweireir fän pwapwa ngeni Kot ren  
kölün mwareiti i.

<sup>3</sup> Pun ewe Samol mi Lapalap eman Kot mi tekia,  
eman king mi tekia seni ekewe kot meinisin.

<sup>4</sup> Ekewe leni mi alolol won fanüfan ra nom lepöün,  
pwal ungen ekewe chuk an.

<sup>5</sup> An ewe matau, pun förian,  
pwal an ewe fanüpwäs, pun afisian.

<sup>6</sup> Ou etto, ousipwe chapetiu o fel ngeni,  
ousipwe fotopwäsuk fän mesen ewe Samol mi La-  
palap ewe chon förikich.

<sup>7</sup> Pun i ach Kot,  
nge kich nöün aramas i a tümwünü,  
kich nöün mwichen sip i a foleni. ✧

Ikenai, are oupwe aüselinga alon,

<sup>8</sup> ousap apöchöküla lelukemi usun a fis me lon  
Meripa,  
usun a fis lon ewe rän me lon ewe fanüapö lon  
Masa, ✧

<sup>9</sup> lupwen ämi kewe lewo ra sotunieï, ra aleletaeï,  
nge ra fen küna ai kewe föföör üa föri fän iter. ✧

<sup>10</sup> Lon ükükün faik ier üa song ngeni ei täppin  
aramas o üra,

“Ir eu mwichen aramas mi tokola leluker.  
Resap fokun mochen aleasochisi ai kewe allük.”

<sup>11</sup> Iei mine üa pwon fän akapel lon ai song  
pwe resap tongeni tolong lon ewe fanü  
ia üpwe asösöör ie. ✧

---

✧ 95:7: Ipr 3.7-11 ✧ 95:8: Ipr 3.15; 4.7 ✧ 95:9: Eks 17.1-7; Num  
20.2-13 ✧ 95:11: Num 14.20-23; Tut 1.34-36; Ipr 4.3,5; Tut 12.9-10

## 96

*Echö kölün mwareiti Kot*  
*96.1-13*  
*(1.Kron 16.23-33)*

- <sup>1</sup> Oupwe eäni echö köl mi fö ngeni ewe Samol mi Lapalap, oupwe köl ngeni ewe Samol mi Lapalap, ämi chon fanüfan meinisin.
- <sup>2</sup> Oupwe köl ngeni ewe Samol mi Lapalap, oupwe mwareiti i. Oupwe arongafeili iteiten rän usun an amanaua aramas.
- <sup>3</sup> Oupwe asilefeili an ling me lein chon ekewe mwü, pwal an föföör mi amwarar me lein ekewe aramas meinisin.
- <sup>4</sup> Pun ewe Samol mi Lapalap a tekia. Sipwe alapala ach mwareiti i, sipwe pwal niuokusiti i lap seni ekewe kot meinisin.
- <sup>5</sup> Pun än chon ekewe mwü kewe kot ra chök uluulun anümwäl. Nge ewe Samol mi Lapalap a föri ekewe läng.
- <sup>6</sup> Iteüöch me manaman ra nonom mwan, pöchökül me ling ra nonom lon imwan mi pin.
- <sup>7</sup> Oupwe mwareiti ewe Samol mi Lapalap, ämi chon ekewe mwü meinisin, oupwe mwareiti än ewe Samol mi Lapalap ling me manaman.
- <sup>8</sup> Oupwe mwareiti lingen iten ewe Samol mi Lapalap. Oupwe uwato eu asor o feito lon imwan.

9 Oupwe fel ngeni ewe Samol mi Lapalap fän üf mi pin.

Ämi chon fanüfan meininis, oupwe chechech me mwan. ☆

10 Oupwe apasa me lein chon ekewe mwü, “Ewe Samol mi Lapalap a nemenem.

Ewer, fanüfan a fokun nükünük, esap tongeni mwöküt seni lenian.

Kot epwe apwüngü chon ekewe mwü fän wenechar.”

11 Ekewe läng repwe pwapwa, nge fanüfan epwe meseik.

Matau epwe ngüngü, pwal meininis mine a nonom lon.

12 Ekewe mälämäl repwe mweireir, pwal meininis mine a nom lor.

Mürin, ekewe irän lein wöllap meininis repwe köl fän pwapwa

13 fän mesen ewe Samol mi Lapalap, pun i epwe feito,

epwe feito pwe epwe apwüngü chon fanüfan.

Epwe apwüngü fanüfan fän pwüng, pwal ekewe aramas fän let.

## 97

### *Än Kot nemenem me manaman*

#### *97.1-12*

1 Ewe Samol mi Lapalap a nemenem, fanüfan epwe meseik,

ekewe fanüen lematou meininis repwe pwapwa.

2 Kuchu me rochokich ra pweli ünükün Kot, pwüng me apwüng longolongun an nemenem.

3 Ekkei a akomwola mwan

---

☆ 96:9: Kölf 29.1-2

o kenala chon oputan mi nom ünükün.

<sup>4</sup> An kewe fifi ra asarama fanüfan,  
chon fanüfan ra küna o chechch.

<sup>5</sup> Ekewe chuk ra telila usun kiris me fän mesen  
ewe Samol mi Lapalap,  
me fän mesen ewe Samol mi nemeni unusen  
fanüfan.

<sup>6</sup> Ekewe läng ra asilefeili an pwüng,  
nge chon ekewe mwü meinsin ra küna an ling.

<sup>7</sup> Aramas meinsin mi fel ngeni ekewe uluulun  
anümwäl repwe küna säw,  
pwal chokewe mi aingaing won ekewe anümwäl  
esap wor aüchear.

Ekewe kot meinsin ra chapetiu me mwen ewe  
Samol mi Lapalap.

<sup>8</sup> Sion a rongorong ei o pwapwa.  
Ekewe telinimwen Juta ra meseik  
pokiten om kewe apwüng, ai Kot.

<sup>9</sup> Pun en, ai Samol mi Lapalap, ka fokun tekia won  
unusen fanüfan,  
ka fokun tekia lap seni ekewe kot meinsin.

<sup>10</sup> Ewe Samol mi Lapalap a echeni chokewe mi  
oput mine a ngau.

A tümwünü manauen nöün kewe chon pin  
o angaseer seni ekewe aramasangau.

<sup>11</sup> Saram a tinetiu won ekewe chon pwüng,  
nge pwapwa a tori chokewe mi wenechar leluker.

<sup>12</sup> Oupwe kilisou ngeni o mwareiti itan mi pin.

## 98

*Mwareiti än Kot pwüng**98.1-9*

Echö köl.

<sup>1</sup> Oupwe eäni echö köl mi fö ngeni ewe Samol mi Lapalap,

pun a föri mettoch mi amwarar.

An manaman me an pöchökül mi pin ra afsätä an win.

<sup>2</sup> Ewe Samol mi Lapalap a asile ngeni aramas an win,

a pwärätä an pwüng me fän mesen chon ekewe mwü.

<sup>3</sup> A chechemeni an tong ellet me an allükülük ngeni chon Israel.

Aramasen fanüfan meininis ra küna usun än Kot amanau aramas.

<sup>4</sup> Oupwe eäni eu mweireiren pwapwa ngeni ewe Samol mi Lapalap, ämi chon fanüfan meininis.

Oupwe chietä echö kölün pwapwa me kölün mwareiti Kot.

<sup>5</sup> Oupwe kölün mwareiti ewe Samol mi Lapalap fän ükülele, pwal fän sokopaten pisekin ettik.

<sup>6</sup> Oupwe eäni eu mweireiren pwapwa fän rappwa me puun sewi

me fän mesen ewe King, ewe Samol mi Lapalap.

<sup>7</sup> Ewe matau epwe ngüngü, pwal mönümanau meininis mi nom lon.

Fanüfan epwe köl, pwal aramas meininis mi nom won.

<sup>8</sup> Ekewe koluk repwe alopolog,

ekewe chuk repwe kölfengen fän pwapwa.

<sup>9</sup> Repwe köl me fän mesen ewe Samol mi Lapalap,  
 pun epwe feito o apwüngü chon fanüfan.  
 Epwe apwüngü chon ekewe mwü fän pwüng me  
 wenechar.

## 99

### *Än Kot allükülük ngeni chon Israel*

#### *99.1-9*

<sup>1</sup> Ewe Samol mi Lapalap a nemenem. Chon ekewe  
 mwü ra chechêch.

A mot won an lenien motun king asen ekewe  
 kerop.

Fanüfan a chechêch. ✧

<sup>2</sup> Ewe Samol mi Lapalap a tekia me lon Sion,  
 a fokun tekia seni chon ekewe mwü meinisîn.

<sup>3</sup> Aramas meinisîn repwe mwareiti itan mi tekia o  
 eniwokus.

Kot a pin.

<sup>4</sup> En king mi manaman, ka efich pwüng.

Ka anüküchara mine a wenechar,  
 ka föri mine a pwüng me wenechar lon Israel.

<sup>5</sup> Oupwe ingeiti ewe Samol mi Lapalap ach Kot,  
 oupwe fel ngeni me mwen alongolongun pechen.

I a pin.

<sup>6</sup> Iwe, Moses me Aaron ra nom lein nöün kewe  
 souasor,

pwal Samuel a nom lein chokewe mi köri itan.

Ra iotek ngeni ewe Samol mi Lapalap, nge i a  
 pälüeniir.

<sup>7</sup> A kapas ngeniir seni lon ewe ürekuchu.

---

✧ **99:1:** Eks 25.22

Ra aleasochisi an kewe kapasen pwärätä me  
ekewe allük i a ngeniir. ☆

<sup>8</sup> Ai Samol mi Lapalap äm we Kot, en ka pälüeni än  
noum aramas iotek.

En eman Kot mi amusala ar tipis,  
inamwo ika ka apwüngüür ren ar föför mi mwäl.

<sup>9</sup> Oupwe ingeiti ewe Samol mi Lapalap ach we Kot  
o fel ngeni me arun chukun we mi pin,  
pun ewe Samol mi Lapalap ach Kot a pin.

## 100

### *Sipwe kilisou ngeni Kot*

#### *100.1-5*

Echö köl fän iten asoren kilisou.

<sup>1</sup> Oupwe eäni eu mweireiren pwapwa ngeni ewe  
Samol mi Lapalap, ämi chon fanüfan mein-  
isin.

<sup>2</sup> Oupwe angang ngeni ewe Samol mi Lapalap fän  
pwapwa,  
oupwe feito fän mesan ren kölün pwapwa.

<sup>3</sup> Oupwe silei pwe ewe Samol mi Lapalap i Kot.  
I ewe a förkich, nge kich sa nöün.  
Sa nöün aramas me nöün sip lon an we mälämäl.

<sup>4</sup> Oupwe tolong lon asamen imwan fän kilisou,  
oupwe tolong lon rumwen imwan kewe fän kölün  
mwareiti i.

Oupwe kilisou ngeni o mwareiti itan.

<sup>5</sup> Pun ewe Samol mi Lapalap a kirikiröch,  
an tong ellet a nonom tori feilfeilachök,

---

☆ 99:7: Eks 33.9

nge an allükülük a tori ekewe täppin aramas mein-  
isin. ☆

## 101

*Eu pwon usun manau fän pwüing*

*101.1-8*

Echö än Tafit Köl.

<sup>1</sup> Üpwe köl usun allükülük me pwüing.

Üpwe köl ngonuk, ai Samol mi Lapalap.

<sup>2</sup> Üpwe afäliei pwe üsap föri tipis.

Inet kopwe feito rei?

Üpwe manaueni eu manau mi limöch me lein chon  
leimwei.

<sup>3</sup> Üsap anomu ai ekiek won mettoch mi ngau.

Üa oput föförün ekewe chon tipis.

Ar föför esap fokun fitipacheitiei.

<sup>4</sup> Eman mi ulöförea lelukan epwe toau seniei.

Üsap fokun efich föför mi ngau.

<sup>5</sup> Eman mi aitengaua chon arun lemonomon  
üpwe niela.

Eman aramas mi wolamalamtekia o sikesik  
üsap etiwa.

<sup>6</sup> Üpwe flätä chokewe mi allükülük lon ewe fanü  
pwe repwe nom rei.

Chokewe mi fokun wenechar  
repwe angang ngeniei.

<sup>7</sup> Esap wor eman mi föri föförün atuputup epwe  
nom lon imwei,

---

☆ **100:5:** 1.Kron 16.34; 2.Kron 5.13; 7.3; Esr 3.11; Kölf 106.1; 107.1; 118.1; 136.1; Jer 33.11



nge eman mi kapas chofana esap tongeni nonom  
fän mesei.

<sup>8</sup>Iteiten lesosor üpwe niela  
ekewe aramasangau lon ewe fanü,  
üpwe ärala meinisin mi föri mine a ngau  
me lon telinimwen ewe Samol mi Lapalap.

## 102

### *Eu siön riaföü*

#### *102.1-28*

Eu iotek seni eman mi nom lon riaföü, lupwen a  
apwangapwang o apasätä an kewe riaföü me fän  
mesen ewe Samol mi Lapalap.

<sup>1</sup>Kopwe aüselinga ai iotek, ai Samol mi Lapalap,  
ai siö epwe toruk.

<sup>2</sup>Kosap aopala mesom seniei,  
lupwen üa nom lon riaföü.  
Kopwe aü selingom ngeniei  
o müttir pälüeniei, lupwen üa körük.

<sup>3</sup>Pun ränin manauei ra feil seniei usun och ötüöt,  
inisi a kar usun efoch wes mi kü.

<sup>4</sup>Lelukei a tatakis usun fetil mi pöküpök o pwasap-  
was.

Üsap chüen mwon mongö.

<sup>5</sup>Pokiten ai leüömong le ngüngü  
üa kichüchüla pwe chüi ra pwäwu.

<sup>6</sup>Üa usun eman fukuron fanüapö,  
pwal usun eman fukuro mi nom lon ekewe leni mi  
tatakis.

<sup>7</sup>Üa kon nge nennela,  
üa usun eman machang mi akaleman won ungen  
eu imw.

- 8 Iteiten fansoun chon oputaei ra takirin  
ämängauaei,  
chokewe mi kapasingau usi ra eäni itei le ottek.
- 9 Üa mongö falang usun üa mongö pilawa,  
ünümei koluk a nofit ngeni chönün mesei
- 10 pokiten watten om lingeringer.  
Pun en ka angeei o pöütieila.
- 11 Ränin manaei ra usun chök nürün och mettoch  
lekuniol,  
üa aiolol usun fetil.
- 12 Nge en, ai Samol mi Lapalap, ka nemenem tori  
feilfeilachök.  
Kopwe chem me ren ekewe täppin aramas mein-  
isin.
- 13 En kopwe ütä o eäni tong ngeni Sion.  
A tori fansoun om kopwe ümöümöch ngeni,  
ewe fansoun ka pwoneela a war.
- 14 Pun noum kewe chon angang ra aücheani föün  
Sion  
o tongei pwülün mi moromor.
- 15 Chon ekewe mwü repwe meniniti ewe Samol mi  
Lapalap,  
nge ekewe kingen fanüfan meinsin repwe ni-  
uokusiti an ling.
- 16 Pun ewe Samol mi Lapalap epwe aüsefälietä  
Sion,  
i epwe pwä lon lingan.
- 17 Epwe aüselinga än ekewe chon riaföü iotek,  
nge esap turunufasei ar tüngor.
- 18 Ei pworaus epwe mak fän iten ewe täppin ara-  
mas epwe uputiu,

pwe ekewe aramas resamwo uputiu repwe  
mwareiti ewe Samol mi Lapalap:

<sup>19</sup> Ewe Samol mi Lapalap a nennetiu seni lenian  
mi pin o tekia,

seni läng a nennetiu fanüfan,

<sup>20</sup> pwe epwe rongorong ngüngün ekewe chon fötek  
o apichi ririn chokewe mi fen pwüngüla pwe  
repwe ninnila.

<sup>21</sup> Iwe, aramas repwe pwärätä iten ewe Samol mi  
Lapalap me lon Sion,

nge me lon Jerusalem repwe mwareiti i,

<sup>22</sup> lupwen chon ekewe mwü repwe chufengen  
pwe repwe fel ngeni ewe Samol mi Lapalap.

<sup>23</sup> Iwe, Kot a akisikisätü ai pöchökül lupwen ai  
chüen alüal,

a amochomochala ränin manaei.

<sup>24</sup> Üa apasa, “Ai Kot, kosap angeeila me lukalapen  
ränin manaei,

en ewe mi manau tori feilfeilachök.”

<sup>25</sup> Me lomlom en ka föri longolongun fanüfan,  
nge ekewe läng förien poum kana.

<sup>26</sup> Ir repwe tala, nge en kopwe nonom fochofoch.

Ir repwe mesila usun echö üf.

Ka siwiliir usun eman a siwili üfan,

iwe, repwe morola.

<sup>27</sup> Nge en ka ususum we chök,

manuom esap müchüla. ☆

<sup>28</sup> Nöün noum kewe chon angang repwe nonom  
fän kinamwe,

nge mwirimwirir repwe nonomöch me mwom.

---

☆ **102:27:** Ipr 1.10-12

# 103

## *Mwareiti Kot ren an afeiöchü aramas*

### *103.1-22*

Echö än Tafit köl.

<sup>1</sup> Ngüni, kopwe mwareiti ewe Samol mi Lapalap, leuti meinsin, kopwe mwareiti itan mi pin.

<sup>2</sup> Ngüni, kopwe mwareiti ewe Samol mi Lapalap, kosap manlükala an kirikiröch ngonuk.

<sup>3</sup> A amusala ai tipis meinsin  
o amoela ai apwangapwang meinsin,

<sup>4</sup> a angasaei seni peias  
o ämwärämwära ngeniei tong ellet me ümöümöch,

<sup>5</sup> a amasoua manaei ren mettoch mi mürina,  
pwe üpwe liwiniti pöchökülen le säräfoi usun eman  
ikel.

<sup>6</sup> Ewe Samol mi Lapalap a pwüing lon an föför,  
a eäni kapwüing fän pwüing ngeni chokewe meinsin  
mi küna riaföü.

<sup>7</sup> A pwäri ngeni Moses an kewe akot  
o aküna ngeni ekewe aramasen Israel an kewe  
föför.

<sup>8</sup> Ewe Samol mi Lapalap a lukpwetete o kirikiröch,  
a songomang o wöün tong ellet. ☆

<sup>9</sup> Esap apwüingü aramas fansoun meinsin,  
esap pwal amwöchü an song tori feilfeilachök.

<sup>10</sup> Esap föri ngenikich ükükün ach tipis,  
esap pwal liwini ngenikich ükükün ach föföringau.

<sup>11</sup> Pun usun ekewe läng ra tekia seni fanüfan,  
iei usun an we tong ellet a tekia ngeni chokewe mi  
niuokusiti i.

<sup>12</sup> Pun usun meserän a toau seni epilen,

iei usun a atoauala ach pupungau senikich.

<sup>13</sup> Usun eman sam a tongei nöün kana,  
iei usun ewe Samol mi Lapalap a tongei chokewe  
mi niuokusiti i.

<sup>14</sup> Pun a silei sokosokuch,  
a chemeni pwe kich pwül echök.

<sup>15</sup> Iwe, ränin manauen aramas a wewe ngeni fetil,  
a sol usun epö pöön irän lemäl.

<sup>16</sup> Are asepwäl a eniti, a ässala,  
nge esap chüen wor eman epwe künasefäli.

<sup>17</sup> Nge än ewe Samol mi Lapalap tong ellet a  
nom seni me lomlom tori feilfeilachök won  
chokewe mi niuokusiti i,

nge an pwüing a tori nöür me nöün nöür,

<sup>18</sup> ir chokewe mi apwönüetä an we pwon  
o chechemeni ar repwe aleasochisi an kewe allük.

<sup>19</sup> Iwe, ewe Samol mi Lapalap a anüküchara an  
lenien motun king me lon ekewe läng,  
mwün a nemeni unusen fanüfan.

<sup>20</sup> Oupwe mwareiti ewe Samol mi Lapalap, ämi  
nöün chon läng kana,

ämi mi pwora o aleasochisi an kapas,  
ämi mi äüselinga alon.

<sup>21</sup> Oupwe mwareiti ewe Samol mi Lapalap, ämi  
chon an kewe mwich meinis in lon läng,  
ämi nöün kewe chon angang mi föri letipan.

<sup>22</sup> Oupwe mwareiti ewe Samol mi Lapalap, ämi  
förian kana meinis in  
lon ekewe leni meinis in mi nom fän nemenian.  
Ngüni, kopwe mwareiti ewe Samol mi Lapalap.

# 104

*Kot a tümwünü förian kana*

*104.1-35*

- <sup>1</sup> Ngüni, kopwe mwareiti ewe Samol mi Lapalap.  
Ai Samol mi Lapalap ai Kot, en ka fokun tekia.  
Ka üföüf ngeni iteüöch me manaman
- <sup>2</sup> o pwölü ngonuk saram usun echö üf.  
Ka ameresala ekewe läng usun eu imw mangaku
- <sup>3</sup> o aüetä imwom won ekewe koluk.  
Ka föri ekewe kuchu pwe woom woken,  
o sai won pöökässin asepwäl.
- <sup>4</sup> Ka akünöü ekewe asepwäl pwe noum chon künö,  
o nöüni chon angang ngetengeten ekkei. ✨
- <sup>5</sup> Ka anükätü fanüfan won longolongun kewe,  
pwe esap fokun mwökütüküt tori feilfeilachök.
- <sup>6</sup> Ka pwölüela fanüfan ren matau mi alolol usun  
ren echö üf,  
ekewe koluk ra nom asen ekewe chuk,
- <sup>7</sup> lupwen ka apwüngü ekewe koluk, ra süla.  
Ra müttir sü ren püngün om chopulap.
- <sup>8</sup> Ra pula won ekewe chuk o putiu lon ekewe lemol  
ngeni ewe leni en ka amolätä fän iter.
- <sup>9</sup> Ka föri eu kiä pwe ekewe koluk resap tongeni  
kusula,  
resap pwal chüen pwölüela fanüfan.
- <sup>10</sup> Ka ammichätä puächen koluk me lon ekewe  
lemol.  
Chanpupu ra pula lefilen ekewe chuk,
- <sup>11</sup> pwe ekewe manmwacho meinisín lon ekewe  
lemäl ra ün seni,

---

✨ 104:4: Ipr 1.7

ekewe aas mi mwacho ra ün seni pwe a mola ar  
kaka.

<sup>12</sup> Ekewe machang ra fas won ekewe irä mi mär  
ünükün ekewe koluk,  
ra tik me lein palen ekewe irä.

<sup>13</sup> Seni won leniom mi tekia ka achöchönü ekewe  
chuk.

Fanüfan a urela ren om kewe feiöch.

<sup>14</sup> En ka amärätä fetil fän iten ekewe kow,  
pwal irä fän iten aramas pwe repwe fotukätü,  
pwe epwe wor ener seni ewe fanü.

<sup>15</sup> Iwe, epwe wor wain pwe aramas repwe ün o  
pwapwa,  
epwe wor lö pwe repwe emmisi ngeni won meser,  
pwal pilawa pwe repwe mongö o pöchökül ren.

<sup>16</sup> Än ewe Samol mi Lapalap irä ra chöchön ren  
chomong üt,  
ekewe setar won Lapanon i a fotukätü.

<sup>17</sup> Ekewe machang ra senätä faser wor,  
ewe öröpwech a lenieni ewe irä itan pain.

<sup>18</sup> Ekewe kuuch mi mwacho ra lenieni ekewe chuk  
tekia,  
ekewe man iter pächer ra op fän ekewe achau.

<sup>19</sup> Ka föri ewe maram pwe epwe asisillätä ekewe  
fansoun,  
akkar a silei fansoun an epwe tupütü.

<sup>20</sup> Ka föri pwin pwe lon kirochan  
ekewe manmwacho lein wöllap meinisin ra towu  
seni lenier.

<sup>21</sup> Ekewe nienifön laion ra wörüwör, lupwen ra  
kütta liaper,

ra kütta ener me ren Kot.

<sup>22</sup> Lupwen akkar a tötä, ra liwiniti lenier  
o konola lon pwanger.

<sup>23</sup> Mürin, aramas ra feila ngeni ar angang,  
ra angang tori lekuniol.

<sup>24</sup> Ai Samol mi Lapalap, ra fokun chomong  
ekewe mettoch ka föri. Ka föriir meinsin lon om  
tipachem.

Fanüfan a ur ren föriom mönümanau meinsin.

<sup>25</sup> Ikenan a wor ewe matau mi lapalap o chölap,  
a masou ren chomong mönümanau  
mi watte me kükün rese lea.

<sup>26</sup> Ekewe sip ra saifetal won, pwal ewe man itan  
Lefiatan,  
en ka föri, a kukulou lon. ☆

<sup>27</sup> Ekei mönümanau meinsin ra lükülükuk  
pwe kopwe ngeniir ener mongö lon fansoun fich.

<sup>28</sup> Lupwen ka ngeniir ener mongö, ra ionifengeni,  
lupwen ka suki poum, ra mongö o möt ren.

<sup>29</sup> Nge lupwen ka aopa mesom seniir, ra niuokus,  
lupwen ka angei seniir ngasangaseer,  
ra mäla o liwiniti pwül moromor.

<sup>30</sup> Lupwen ka tinato Ngünum, ra fisitä.  
En ka försefäli fanüfan.

<sup>31</sup> Amwo lingen ewe Samol mi Lapalap epwe nom  
tori feilfeilachök,  
amwo ewe Samol mi Lapalap epwe meseikeiti an  
föför.

<sup>32</sup> Lupwen a netiu won fanüfan, fanüfan a  
chechech.

Lupwen a atapa ekewe chuk, ra ötütöt.

---

☆ **104:26:** Hiop 41.1; Kölf 74.14; Ais 27.1



<sup>33</sup> Üpwe köl ngeni ewe Samol mi Lapalap lon ränin  
manaei meinsin.

Üpwe kölün mwareiti ai Kot lupwen ai manau.

<sup>34</sup> Amwo ai ekinlon epwe apwapwai letipen ewe  
Samol mi Lapalap,

pun üa meseikeiti i.

<sup>35</sup> Ekewe chon tipis repwe rosola seni won  
fanüfan,

nge ekewe aramasangau repwe mochola.

Ngüni, kopwe mwareiti ewe Samol mi Lapalap.

Ousipwe mwareiti ewe Samol mi Lapalap.

## 105

*An Kot kewe manaman a föri fän iten chon Israel  
105.1-45  
(1.Kron 16.8-22)*

<sup>1</sup> Oupwe kilisou ngeni ewe Samol mi Lapalap,  
oupwe köri itan.

Oupwe asilefeili an kewe föför lein chon ekewe  
mwü.

<sup>2</sup> Oupwe köl ngeni, oupwe kölün mwareiti i,  
oupwe apworausä an kewe föför meinsin mi  
amwarar.

<sup>3</sup> Oupwe fokun ingemwareiti itan mi pin.  
Chokewe mi kütta ewe Samol mi Lapalap repwe  
meseik.

<sup>4</sup> Oupwe kütta ämi alilis me ren ewe Samol mi  
Lalapap,

oupwe kütta i fansoun meinsin.

<sup>5</sup> Oupwe chechemeni ekewe föför mi amwarar a  
föriir.

Oupwe chechemeni an kewe manaman me an  
kewe kapwüing a eäni,

6 ämi mwirimwirin Apraham nöün Kot we chon  
 angang,  
 ämi mwirimwirin Jakop kewe, ätewe mi fil me ren.

7 Ewe Samol mi Lapalap i ach we Kot,  
 an kewe allük ra fän iten unusen fanüfan.

8 I a chechemeni an we pwon tori feilfeilachök,  
 an we kapas a anüküchara ngeni engeröü täppin  
 aramas.

9 A chechemeni ewe pwon a eäni ngeni Apraham,  
 ewe pwon a eäni fän akapel ngeni Isaak. ✧

10 A anüküchara ewe pwon ngeni Jakop pwe eu  
 allük,  
 pwal eu pwon esemüch.

11 Iwe, a apasa, “Üpwe ngonuk ewe fanü Kanaan  
 pwe fanüom.” ✧

12 Lupwen nöün Kot kewe aramas ra fokun  
 chokükün,

lupwen ra chon siamü lon ewe fanü Kanaan

13 o saifetal seni eu fanü tori pwal eu fanü,  
 seni eu mwü tori pwal eu mwü,

14 Kot esap mwüt ngeni eman pwe epwe ariaföüür.  
 A apwüngü ekewe king pokiter

15 o apasa, “Ousap atapa nei kewe mi fil,  
 ousap afeiangaua nei kewe soufos.” ✧

16 Lupwen ewe Samol mi Lapalap a awarato eu  
 lengita won ewe fanü

o angei seniir ener mongö meinsin, ✧

17 a tinala eman mwän itan Josef epwe akom  
 mwer,  
 ätewe ra amömöla pwe epwe eman amanau. ✧

✧ 105:9: Ken 12.7; 17.8; Ken 26.3      ✧ 105:11: Ken 28.13

✧ 105:15: Ken 20.7      ✧ 105:16: Ken 41.53-57      ✧ 105:17: Ken  
 37.28; 45.5

18 Pechen ra föfö ren selimächä,  
 nge üan a katolong lon efoch ring seni mächä,  
 19 tori a fis mine a fen apasa,  
 nge än ewe Samol mi Lapalap we kapas a alletätä  
 pwe a pwüng. ✧  
 20 Mürin, ewe kingen Isip a tinala eman pwe epwe  
 amusa Josef,  
 ewe mi nemeni ekewe mwü a angasala i. ✧  
 21 A seikätä i pwe epwe samol lon imwan  
 o nemeni mettochun meinisin. ✧  
 22 Epwe nemenem won nöün kewe samol  
 o aiti ngeni nöün kewe souakom tipachem.

23 Mürin, Jakop a feila Isip  
 o siamü lon ewe fanü. ✧  
 24 Nge ewe Samol mi Lapalap a fokun achomonga  
 nöün kewe aramas  
 o apöchöküleer lap seni chon oputeer.  
 25 A akulu leluken chon Isip, pwe ra oput nöün  
 kewe aramas  
 o eäni rawangau ngeni nöün kewe chon angang. ✧  
 26 Mürin, Kot a tinala Moses nöün we chon angang  
 me Aaron ätewe i a filätä. ✧  
 27 Ir ra föri an kewe asisil me manaman  
 me lein ekewe aramas me lon ewe fanü Isip.  
 28 Kot a tinala rochopwak o arochokichi ewe fanü,  
 nge ekewe chon Isip ra chök ü ngeni an kewe  
 kapas. ✧  
 29 Iwe, a awili ngeni cha ar kewe koluk,  
 pwe ekewe ikenen lor ra mäla. ✧

---

✧ **105:19:** Ken 39.20–40.23 ✧ **105:20:** Ken 41.14 ✧ **105:21:** Ken 41.39–41 ✧ **105:23:** Ken 46.6; Ken 47.11 ✧ **105:25:** Eks 1.7–14  
 ✧ **105:26:** Eks 3.1–4.17 ✧ **105:28:** Eks 10.21–23 ✧ **105:29:** Eks 7.17–21

- 30 Fanüer a ur ren kairü,  
ra mwo nge tolong lon imwen ar we king. ✧
- 31 Kot a kapas, nge ra war chomong pwiin loong,  
pwal nikken ra nom lemenen fanüer. ✧
- 32 A apüngätü wor ütten fau akasiwilin üt,  
pwal fifi a fi ekis meinsin won fanüer,
- 33 Kot a atai ar irän wain me ar irä fik  
o atatakisi irän fanüer meinsin. ✧
- 34 Iwe, a kapas, nge ekewe lifichimas ra war,  
pwal ekewe kükün lifichimas resap lea.
- 35 Ra eni meinsin mine a mär me won fanüer  
o eni uän fotar irä. ✧
- 36 Iwe, a niela ekewe mwänichi meinsin me lon  
fanüer,  
chokewe ra nöüniir lupwen ar pöchökül. ✧
- 37 Mürin, Kot a emwenawu chon Israel  
fän silifer me kolt.  
Esap wor eman me lein chon ar kewe ainang a  
apwangapwang.
- 38 Iwe, chon Isip ra pwapwa, lupwen chon Israel  
ra towu,  
pun ra fokun niuokusitiir. ✧
- 39 Kot a anomu eu kuchu wor pwe pwölüpwölür,  
pwal eu ekkei, pwe epwe asameer lepwin. ✧
- 40 Ra tüngor, nge i a awarato ekewe machang iter  
kweil,  
a ngeniir mongö mi chomong seni läng. ✧
- 41 A asangafeseni ewe achau pwe koluk a puwu  
seni,  
a pulong lon ewe fanüapö usun eu chapupu. ✧

---

✧ **105:30:** Eks 8.1-6      ✧ **105:31:** Eks 8.20-24; Eks 8.16-17  
 ✧ **105:33:** Eks 9.22-25      ✧ **105:35:** Eks 10.12-15      ✧ **105:36:**  
 Eks 12.29      ✧ **105:38:** Eks 12.33-36      ✧ **105:39:** Eks 13.21-22  
 ✧ **105:40:** Eks 16.2-15      ✧ **105:41:** Eks 17.1-7; Num 20.2-13

42 Pun Kot a chechemeni an we pwon mi pin  
a eäni ngeni nöün we chon angang Apraham.

43 Iei mine a emwenawu nöün kewe aramas mi fil  
fän pwapwa me mweireiren köl.

44 Iwe, a ngeniir fanüen chon ekewe mwü,  
nge ir ra fanüeni ewe fanü o feiöchüni än ekewe  
aramas angang. ☆

45 Ei a fis pwe nöün kewe aramas repwe  
aleasochisi an kewe pwüüng  
o apwönüetä an kewe allük.  
Ousipwe mwareiti ewe Samol mi Lapalap.

## 106

*Än Kot kirikiröch ngeni nöün aramas me ar ü  
ngeni*

### *106.1-48*

1 Ousipwe mwareiti ewe Samol mi Lapalap.  
Oupwe kilisou ngeni ewe Samol mi Lapalap, pun  
i a kirikiröch,  
an tong ellet a nonom tori feilfeilachök. ☆

2 Iö a tongeni apworausä än ewe Samol mi Lapalap  
föför mi manaman?

Iö a tongeni anafa an mwareiti i?

3 Ra feiöch chokewe mi aleasochisi an kewe allük  
o föri mine a pwüüng fansoun meinisin.

4 Ai Samol mi Lapalap, kopwe chechemeniei, lup-  
wen ka pwäri om kirikiröch ngeni noum  
aramas.

Kopwe pwal ochueilong, lupwen ka amanaueer,

---

☆ **105:44:** Jos 11.16-23 ☆ **106:1:** 1.Kron 16.34; 2.Kron 5.13; 7.3;  
Esr 3.11; Kölf 100.5; 107.1; 118.1; 136.1; Jer 33.11

5 pwe üpwe tongeni küna feiöchün noum kewe mi  
 fl  
 o eti chon mwum lon ar pwapwa,  
 üpwe pwal eti noum aramas kana le mwareituk.

6 Äm aia tipis usun chök äm kewe lewo.  
 Äm aia föri föför mi ngau o apwönüetä föför es-  
 epwüng.

7 Lupwen äm kewe lewo ra nom lon Isip, resap  
 ekieki än Kot kewe föför mi amwarar,  
 resap pwal chechemeni an tong ellet mi lapalap,  
 nge ra ü ngeni Ewe mi Unusen Tekia me arun ewe  
 Setipar. ☆

8 Nge Kot a amanaueer fän püsin itan  
 pwe epwe pwärätä an manaman mi pöchökül.

9 A allük ngeni ewe Setipar pwe a pwasatä,  
 a emwenirelong epin ewe matau usun lon eu  
 fanüpwas.

10 A amanaueer seni chon pälüeniir  
 o angaseer seni chon oputeer.

11 Ewe sät a pwölüela ekewe chon ü ngeniir,  
 pwe esap wor eman mi chüen manau.

12 Mürin, ra lükü an kewe kapasen pwon  
 o kölün mwareiti i. ☆

13 Nge chon Israel ra müttir manlükala an kewe  
 föför,  
 resap awiti an öüröür.

14 Ra fokun mwäräkich me lon ewe fanüapö  
 o sotuni Kot lon ewe fanüpwas.

15 Iei mine a ngeniir mine ra tüngor,  
 nge a pwal tinato eu mätter mi afeiengau leir. ☆

☆ **106:7:** Eks 14.10-12

☆ **106:12:** Eks 14.31; Eks 15.1-21

☆ **106:15:** Num 11.4-34

- 16 Ikenan lon ewe fanüapö ekoch me leir ra lolowo  
ngeni Moses  
me Aaron, ätewe ewe Samol mi Lapalap a apini.
- 17 Mürin, ewe pwül a sangfesen o oromala Tatan,  
a pwal pwölüela Apiram me an we mwich.
- 18 Ekkei a pwal ngetewu me lein chokewe mi etiir  
o kenala ekewe aramasangau. ☆
- 19 Iwe, ra föri eu uluulun nienifön kow me lon  
Horep  
o fel ngeni ewe uluulun anümwäl seni mächä.
- 20 Ra akasiwili ewe lingen Kot  
ngeni uluulun eman kow mi mongö fetil.
- 21 Ra manlükala Kot ar Chon Amanau  
mi föri föföör mi manaman me lon Isip.
- 22 A föri föföör mi amwarar me ikenan,  
pwal mettoch mi eniwokus me arun ewe Setipar.
- 23 Iei mine Kot a apasa pwe epwe aroserela.  
Nge Moses nöün we chon angang mi fil a ütä lefiler  
me Kot,  
pwe epwe asepa an lingeringer, pwe esap  
aroserela. ☆
- 24 Mürin, ra oput ewe fanü mi mürina,  
resap lükü an we pwon.
- 25 Ra ngününgün me lon imwer imw mangaku,  
nge resap aleasochis ngeni alon ewe Samol mi  
Lapalap.
- 26 Iei mine Kot a aitietä pöün o pwon fän akapel  
ngeniir  
pwe epwe nirela me lon ewe fanüapö, ☆
- 27 epwe atoropasafeili mwirimwirir lein chon  
ekewe mwü

---

☆ 106:18: Num 16.1-35    ☆ 106:23: Eks 32.1-14    ☆ 106:26: Num 14.1-35

pwe repwe mäla lon ewe fanüen chon ekis. ☆

28 Mürin, ra fiti ekewe aramas mi fel ngeni Paal me  
lon Peor  
o mongö ekewe föten anü ra eäni asor ngeni ekewe  
kot ese wor manau lor.

29 Ra asonga ewe Samol mi Lapalap ren ar kewe  
föför,

pwe eu mätter a terifetal leir.

30 Mürin, Pinehas a ütä o apwüngü ekewe mi tipis,  
pwe ewe mätter a ükütü.

31 Iwe, ren ei föför Pinehas a küna pwüng me ren  
Kot

seni eu täppin aramas tori eu täppin tori feil-  
feilachök. ☆

32 Iwe, chon Israel ra asonga Kot me arun ekewe  
kolukun Meripa.

Moses a küna riaföü watte pokiter,

33 pun ra achouu lelukan

pwe a ssela an fos.

34 Iwe, chon Israel resap pwal arosala chon ekewe  
mwü

usun ewe Samol mi Lapalap a allük ngeniir.

35 Nge ra pwüpwülüfengen me chon ekewe mwü

o föri sokun föför usun mine ir ra föri.

36 Ra fel ngeni ar kewe uluulun anümwäl,  
nge ekewe uluulun anümwäl ra wiliti eu likatup  
ngeniir.

37 Ra eäni asor nöür kewe ät me nengin

ngeni ekewe anün ro chopwak.

38 Ra niela nöür kewe ät me nengin esap wor ar  
tipis,



o eäniir asor ngeni ekewe uluulun anümwäl än  
chon Kanaan.

Iwe, ewe fanü a limengau ren ei sokun föför.

<sup>39</sup> Iei usun ra limengau ren ar föför

o kirikiringau ngeni Kot ren ar lapalap usun la-  
palapen eman fin lisowu.

<sup>40</sup> Iei mine ewe Samol mi Lapalap a fokun song  
ngeni nöün aramas,

pwe a fokun anioputäsiniir.

<sup>41</sup> A asechirela fän nemenien chon ekewe mwü,  
pwe chokewe mi oputeer ra nemeniir.

<sup>42</sup> Iwe, chon oputeer ra ariaföüür  
o atolongeer fän ar nemenem.

<sup>43</sup> Fän chomong Kot a angaserela,  
nge ra chök sopwela le ü ngeni.

Iwe, ra sapwilitiu pokiten ar tipis.

<sup>44</sup> Iei mwo nge Kot a chök ekieki ar riaföü,  
lupwen a rongorong ar siö.

<sup>45</sup> A chechemeni an pwon fän äsengesiiir,  
lon an tong ellet mi lapalap a liamamala ren mine  
a föri ngeniir.

<sup>46</sup> A föri pwe chokewe meinsin mi liapeniir  
o uweerela lon ekewe fanü mi toau repwe tongeer.

☆

<sup>47</sup> Ai Samol mi Lapalap äm Kot, kopwe  
amanauakem

o achufengenikem seni me lein chon ekewe mwü,  
pwe aipwe kilisou ngonuk  
o mwareiti itom mi pin.

48 Oupwe mwareiti ewe Samol mi Lapalap, ewe  
 Koten Israel  
 seni fansoun esepop tori fansoun esemüch.  
 Iwe, ekewe aramas meinisin repwe apasa,  
 “Amen.”  
 Ousipwe mwareiti ewe Samol mi Lapalap. ✧

## ALIMUEN PUK

### 107

*Kot a angasala chon riaföü*

*107.1-43*

- 1 Oupwe kilisou ngeni ewe Samol mi Lapalap,  
 pun i a kirikiröch,  
 an tong ellet a nonom tori feilfeilachök. ✧
- 2 Ekewe mi ngasala ren ewe Samol mi Lapalap  
 repwe apasa iei usun,  
 chokewe i a angaserela seni ekewe chon oputeer
- 3 o achufengeniir seni ekewe fanü,  
 seni ötiu me lotou,  
 seni ör me efeng.
- 4 Ekoch aramas ra fetalfeil lon fanüapö,  
 nge resap küna efoch al ngeni eu telinimw pwe  
 repwe imweimw lon.
- 5 Ra echik me kaka  
 o apilükingau lon leluiker.
- 6 Mürin, ra siö ngeni ewe Samol mi Lapalap lon ar  
 weires,  
 nge i a angaseer seni ar riaföü.
- 7 A emwenirela won efoch al mi wenechar  
 tori ra tori eu telinimw pwe repwe imweimw lon.

---

✧ **106:48:** 1.Kron 16.35-36    ✧ **107:1:** 1.Kron 16.34; 2.Kron 5.13;  
 7.3; Esr 3.11; Kölf 100.5; 106.1; 118.1; 136.1; Jer 33.11

8 Ir repwe kilisou ngeni ewe Samol mi Lapalap  
pokiten an tong ellet,  
pwal pokiten an kewe föföör mi amwarar ngeni  
chon fanüfan.

9 Pun a amötü chokewe mi kaka  
o amongöü chokewe mi echik ngeni mongö mi  
annö.

10 Ekoch aramas ra nom lon rochopwak me nürün  
mäla,

ra fötek ren selimächä o riaföü,

11 pun ra ü ngeni alon Kot

o oput än Ewe mi Unusen Tekia öüröür.

12 A atolongeer fän angang weires,

ra turula, nge esap wor eman mi alisiir.

13 Mürin ra siö ngeni ewe Samol mi Lapalap lon ar  
weires,

nge i a angaseer seni ar riaföü.

14 Iwe, a emwenirewu seni lon rochopwak me  
nürün mäla

o mwütifeseni föföör kewe selimächä.

15 Ir repwe kilisou ngeni ewe Samol mi Lapalap  
pokiten an tong ellet,

pwal pokiten an kewe föföör mi amwarar ngeni  
chon fanüfan.

16 Pun a atatakisi ekewe asam seni piras

o pöküsopwei ekewe ömwöch seni mächä.

17 Ekoch aramas ra samau ren ar föföörün tipis,

ra pwal riaföü pokiten ar föföör mi ngau.

18 Ra nou sokopaten mongö meininisn

o kan ngeni mäla.

19 Mürin ra siö ngeni ewe Samol mi Lapalap lon ar  
weires,

nge i a angaseer seni ar riaföü.

<sup>20</sup> A tinala an kapas o apöchöküleer,  
a amanaueer seni mäla.

<sup>21</sup> Ir repwe kilisou ngeni ewe Samol mi Lapalap  
pokiten an tong ellet,  
pwal pokiten an kewe föföör mi amwarar ngeni  
chon fanüfan.

<sup>22</sup> Repwe pwal eäni asoren kilisou ngeni  
o apworausä an kewe föföör lon kölün pwapwa.

<sup>23</sup> Ekoch aramas ra sai lematau won sip  
pwe repwe föri ar angangen amömö won ekewe  
mataulap.

<sup>24</sup> Ra küna än ewe Samol mi Lapalap föföör,  
an angang mi amwarar lon ekewe leni mi alolol.

<sup>25</sup> Iwe, Kot a kapas o awarato eu mölümöl  
mi apwota noon ewe matau.

<sup>26</sup> Ekewe sip ra kekitä fän läng,  
ra pwal feitiu tori lealololun matau,  
pwe chokewe mi nom won ra apilükingau pokiten  
ar feiengau.

<sup>27</sup> Ra mwaroro o rikirikfetal usun ir mi pulas,  
resap chüen silei mine repwe föri.

<sup>28</sup> Mürin ra siö ngeni ewe Samol mi Lapalap lon ar  
weires,

nge i a angaseer seni ar riaföü.

<sup>29</sup> A aükätiu ewe mölümöl,  
pwe nonon ewe matau a lüala.

<sup>30</sup> Mürin ra pwapwa pwe a lüa,  
nge i a emweniir ngeni ewe leni ia ra mochen  
ilelong ie.

<sup>31</sup> Iwe, ir repwe kilisou ngeni ewe Samol mi La-  
palap pokiten an tong ellet,

pwal pokiten an kewe föför mi amwarar ngeni  
chon fanüfan.

<sup>32</sup> Repwe ingeiti Kot lon ewe mwichen aramas  
o mwareiti i lon ewe mwichen souakom.

<sup>33</sup> Kot a awili ekewe chanpupu ngeni fanüpwas,  
a pwal awili ekewe fanüen puächen koluk ngeni  
pwül mi pwasapwas.

<sup>34</sup> A awili eu fanü mi pwülüöch ngeni eu fanüapö  
mi uren salt,  
punchon ewe fanü ra föföringau.

<sup>35</sup> Kot a pwal awili eu fanüpwas ngeni eu fanüen  
koluk,  
a pwal awili eu fanü mi pwasapwas ngeni eu  
fanüen puächen koluk.

<sup>36</sup> Iwe, a mwüt ngeni ekewechon echik pwe repwe  
nonom ikenan,  
repwe aüetä eu telinimw pwe repwe nonom lon.

<sup>37</sup> Iwe, ra amora pwükil lon ar kewe tanipi,  
ra fotuki irän wain o kini eu räs mi watte.

<sup>38</sup> Kot a afeiöchü nöün aramas pwe ra chomongola.  
Esap pwal mwütätä pwe nöür pwiin kow repwe  
chokükünüla.

<sup>39</sup> Mürin ra chokisikisila, ra küna tekison ren ri-  
aföü,  
weires me letipeta.

<sup>40</sup> Iwe, Kot a anomu itengau won ekewe aramas  
tekia  
o föri pwe ra fetalfeil lon fanüapö, ia esap wor  
efoch al ie.

<sup>41</sup> Nge a angasala ekewechon osupwang seni ar  
riaföü

o achomongala ar kewe famili pwe ra usun  
chomongun pwiin sip.

<sup>42</sup> Ekewe chon pwüng ra küna ei o pwapwa,  
nge ekewe aramasangau meininis ra fanafanala.

<sup>43</sup> Iön mi tipachem epwe iseis ekei mettoch lon  
lelukan  
o ekieki usun än ewe Samol mi Lapalap tong ellet.

## 108

*Eu iotekin tüngor alilis pokiten chon oput*

*108.1-13*

*(Kölf 57.7-11; 60.5-12)*

Echö än Tafit köl.

<sup>1</sup> Üa apilüköch, ai Kot,  
üa apilüköch.

Üpwe köl o mwareituk.

Ngüni, kopwe pwök.

<sup>2</sup> Ekewe kitar me ükülele repwe pwök.

Üpwe apwökü mallen rän.

<sup>3</sup> Ai Samol mi Lapalap, üpwe kilisou ngonuk me  
lein ekewe mwichen aramas,

üpwe kölün mwareituk me lein chon ekewe mwü.

<sup>4</sup> Pun om tong ellet a tekia seni ekewe läng,  
om allükülük a tori ekewe kuchu.

<sup>5</sup> Ai Kot, kopwe pwäri om tekia asen ekewe läng.

Om ling epwe pwäla won unusen fanüfan.

<sup>6</sup> Kopwe amanauakem ren om manaman o pälüeni  
ai iotek.

pwe chokewe ka tongeer repwe ngasala.

<sup>7</sup> Kot a kapas me lon imwan mi pin,

“Lon ai meseik üpwe ineti Sikem  
o aineti ewe lemolum Sukot ngeni nei aramas.

<sup>8</sup> Kiliat fanüei, Manasa pwal fanüei,  
Efraim imwei akkau,  
Juta woki wokun king.

<sup>9</sup> Moap sepiei seprien töttöl,  
üpwe moneela ipwei sus won Etom asisilan pwe  
fanüei,  
nge won ewe fanü Filistia üpwe arükak fän ai win.”

<sup>10</sup> Iö epwe emweneilong lon ewe telinimw mi  
pöchökül tittin?

Iö epwe emwenei ngeni Etom?

<sup>11</sup> Ai Kot, ifa usun, ka wesewesen pöütikeemila?  
Ifa usun, kosap chüen eti äm mwichen sounfiu le  
feila maun?

<sup>12</sup> Kopwe alisikem, pwe aipwe tongeni maun  
ngeni ekewe chon oputakem,  
pun än aramas alilis a lomotongau.

<sup>13</sup> Are Kot a etikich, kich sipwe win,  
i echök epwe akufu chon oputakich.

## 109

*Eu tüngror pwe Kot epwe ngeni ekewe aramasan-  
gau liwinin ar föfö*

### *109.1-31*

Ngeni ewe mi emweni chon köl: Echö än Tafit köl.

<sup>1</sup> Ai Kot, en ewe üa mwareiti, kosap fanafanala.

<sup>2</sup> Pun ekewe aramas mi ngau o atuputup ra apa-  
sawu kapasen ü ngeniei,  
ra aitengauaei ren ar kapas chofana.

<sup>3</sup> Ra kapasingau usi o fiu ngeniei,  
nge esap wor popun.

- <sup>4</sup> Liwinin ai tongeer, ra atipisie,  
nge ngang üa fen iotek fän iter.
- <sup>5</sup> Iei usun ra liwini ngeniei ngau fän iten ai föföör  
mürina ngeniir,  
nge oput fän iten ai tongeer.
- <sup>6</sup> Kopwe flätä eman aramasangau epwe ü ngeni  
ewe chon oputaei,  
eman chon atipisi epwe atolonga i lon kapwüng.
- <sup>7</sup> Are a wes le kapwüng, epwe pwä pwe a tipis.  
Pwal an iotek epwe wiliti tipis.
- <sup>8</sup> Amwo ränin manuan epwe chökükün,  
nge eman epwe siwili lon wisan. ☆
- <sup>9</sup> Amwo nöün kana repwe mäsen,  
nge pwülüan we epwe lipichsefäl.
- <sup>10</sup> Amwo nöün kana repwe nomofetal o tütüngor,  
eman epwe asürela seni imwer mi tala.
- <sup>11</sup> Amwo ewe chon angei liwinimang epwe angei  
meininis mine an,  
nge chon ekis repwe angei fän pöchökül uän an  
angang.
- <sup>12</sup> Amwo esap wor eman epwe eäni kirikiröch  
ngeni,  
esap pwal wor eman epwe tongei nöün kewe mi  
mäsen.
- <sup>13</sup> Amwo mwirimwirin kana repwe mäla,  
nge iter epwe töttölüwu me lon aruuen täppin ara-  
mas.
- <sup>14</sup> Amwo än an kewe lewo föföringau repwe chem  
me ren ewe Samol mi Lapalap,  
nge än inan tipis esap musala.

---

☆ **109:8:** Föf 1.20



15 Amwo ewe Samol mi Lapalap epwe chechemeni  
ar tipis fansoun meininisn,  
nge aramas repwe fokun manlükirela.

16 Pun ewe mwän esap ekiëkin eäni kirikiröch,  
nge a tapweri ekewe mi wöüngau o mwelele,  
pwal ekewe mi tatakis leluker, pwe epwe nirela.

17 A sani anümamaua aramas. Amwo ekewe  
anümamau repwe feitiu won.

Esap sani an epwe afeiöchü aramas. Amwo esap  
wor eman epwe afeiöchü.

18 A örüni kapasen anümamau usun an örüni üföüf  
üf.

Amwo an kewe kapasen anümamau repwe tolong  
lon inisin usun chök koluk,  
repwe pwal tolong lon chün usun chök kiris.

19 Amwo repwe usun chök echö üf a pwölü ngeni,  
pwal usun efoch pelit a ri ngeni lukalapan fan-  
soun meininisn.

20 Amwo epwe iei liwinin ekewe chon atipisiei me  
ren ewe Samol mi Lapalap,  
liwinin chokewe mi kapasingau usi.

21 Nge en, ai Kot, ai Samol mi Lapalap, kopwe  
peniei usun ka pwon ngeniei,  
kopwe angasaei pokiten om tong ellet mi mürina.

22 Pun ngang eman mi wöüngau o mwelele,  
lelukei a fokun tatakis.

23 Üpwe le morola usun nürün och mettoch a mo-  
rola lekuniol.

Aramas ra pönieila usun ra pöni eman lifichimas.

24 Pwäsuki ra apwangapwang ren ai öchüün,  
inisi a kichüchüla.

25 Ngang eman mi küna turunufas me ren chon atipisieï,

lupwen ra künaei, ra elifechifechi möküerer. ✧

26 Ai Samol mi Lapalap ai Kot, kopwe alisieï, kopwe amanauaeï lon om tong ellet.

27 Kopwe amefi ngeniir pwe en, ai Samol mi Lapalap, ka amanauaeï.

28 Ir ra tongeni eäni kapasen anüamamau ngenieï, nge en kopwe afeiöchüei.

Chokewe mi ü ngenieï repwe küna säw.

Nge ngang noum chon angang üpwe pwapwa.

29 Amwo ekewe chon atipisieï repwe pwölüla ren itengau,

repwe pwölüla ren püsin ar säw usun ra pwölüla fän echö üf.

30 Üpwe kilisou chapur ngeni ewe Samol mi Lapalap.

Üpwe mwareiti i me lein ewe mwicheichen aramas.

31 Pun i a peni ewe chon mwelele, pwe epwe amanaua seni chokewe mi atipisi pwe epwe mäla.

## 110

*Kot a ngeni ewe king an nemenem*

*110.1-7*

Echö än Tafit köl.

<sup>1</sup> Ewe Samol mi Lapalap a kapas ngeni ai samol ewe king,

“Kopwe mot lepelifichi

---

✧ **109:25:** Mat 27.39; Mark 15.29

tori üpwe anomu chon oputom pwe repwe lenien  
puun pecheöm.” ☆

<sup>2</sup> Ewe Samol mi Lapalap epwe alapala manen om  
nemenem lon wisom wisen king seni Sion.

A apasa, “Kopwe nemenem won chon oputom.”

<sup>3</sup> Lon ränin om kopwe maun ngeni chon oputom  
noum aramas repwe etuk fän püsin letiper  
o üföüf ekewe üf mi pin.

Usun amurenipwin mi nom lesosorusich,  
iei usun noum kewe alüal repwe feito reöm.

<sup>4</sup> Ewe Samol mi Lapalap a pwon fän akapel, nge  
esap siwili an ekiäk,

“En eman souasor tori feilfeilachök  
lon kotun Melkisetek.” ☆

<sup>5</sup> Ewe Samol a nom lepelifichum.

I epwe akufu ekewe king lon ewe rän a lingeringer.

<sup>6</sup> Epwe eäni kapwüing won chon ekewe mwü.

Epwe aura ewe lenien maun ren somä  
o akufu ekewe king won unusen fanüfan.

<sup>7</sup> Ewe king epwe ün seni ewe öwö mi nom ünükün  
ewe al,

epwe pöchökülela ren o sopwela le win.

## 111

### *Aramas repwe mwareiti Kot*

#### *111.1-10*

<sup>1</sup> Ousipwe mwareiti ewe Samol mi Lapalap.

Üpwe kilisou ngeni ewe Samol mi Lapalap ren  
unusen lelukei

---

☆ **110:1:** Mat 22.44; Mark 12.36; Luk 20.42-43; Föf 2.34-35; 1.Kor 15.25; Ef 1.20-22; Kol 3.1; Ipr 1.13; 8.1; 10.12-13    ☆ **110:4:** Ipr 5.6; 6.20; 7.17,21

lon ewe mwichen chon wenechar, pwal lein ewe  
mwichen aramas.

<sup>2</sup> Än ewe Samol mi Lapalap föför ra fokun  
amwarar,

chokewe meinsin mi pwapwaitiir ra ekinloneer.

<sup>3</sup> An kewe föför ra fokun ling me manaman,  
an pwüng a nonom tori feilfeilachök.

<sup>4</sup> Ewe Samol mi Lapalap a föri pwe aramas repwe  
chechemeni an kewe föför mi amwarar.

A eäni kirikiröch o ümöümöch.

<sup>5</sup> A ngeni chokewe mi niuokusiti i ener mongö.

A chechemeni an we pwon fansoun meinsin.

<sup>6</sup> A pwäri ngeni nöün kewe aramas manamanen  
an kewe föför,

lupwen a ngeniir fanüen chon ekewe mwü.

<sup>7</sup> A allükülük o pwüng lon mettoch meinsin a föri.

An kewe allük meinsin ra nükünük.

<sup>8</sup> Ra nonomopos tori feilfeilachök,

Kot a föriir fän allükülük me wenechar.

<sup>9</sup> A angasala nöün aramas

o föri eu pwon esemüch.

Itan a pin o eniweniu.

<sup>10</sup> Niuokusiti ewe Samol mi Lapalap, iei poputän  
tipachem.

Chokewe meinsin mi föri iei usun ra fefeitä lon ar  
silelap.

Sipwe mwareiti Kot tori feilfeilachök. ☆

## 112

*A feiöch eman mi niuokusiti Kot*

*112.1-10*

---

☆ **111:10:** Hiop 28.28; SalF 1.7; 9.10

- <sup>1</sup> Ousipwe mwareiti ewe Samol mi Lapalap.  
 A feiöch ewe aramas mi niuokusiti ewe Samol mi  
 Lapalap,  
 mi pwapwaiti an epwe aleasochisi an kewe allük.
- <sup>2</sup> Nöün kana repwe nemenem lon ewe fanü.  
 Mwirinwirin kana mi wenechar repwe feiöch.
- <sup>3</sup> Wöü me chomong pisek ra nom lon imwan,  
 nge an pwüng a nonom tori feilfeilachök.
- <sup>4</sup> Saram a tin lon rochopwak fän iten ewe mi  
 wenechar.  
 Pun ewe Samol mi Lapalap a kirikiröch, a pwal  
 ümöömöch o pwüng.
- <sup>5</sup> A feiöch eman mwän mi kichiöch o mwütätä  
 mettoch,  
 eman mi föri an angang fän pwüng.
- <sup>6</sup> Pun ewe chon pwüng epwe fokun tipepos.  
 Aramas repwe chechemeni i tori feilfeilachök.
- <sup>7</sup> Esap niuokusiti pworaus mi ngau,  
 lelukan a pos, a apilükülükü ewe Samol mi La-  
 palap.
- <sup>8</sup> Lelukan a kinamwe, esap niuokus.  
 Lesopolan epwe pwapwa le küna än chon oputan  
 kuf.
- <sup>9</sup> A fangafangöch ngeni ekewe chon wöüngau,  
 an pwüng epwe nonom tori feilfeilachök.  
 Epwe wor manan me meninin me ren aramas. ☆
- <sup>10</sup> Ekewe aramasangau ra küna ei o song ren,  
 ra attina meser, nge mürin resap chüen nom.  
 Än ekewe aramasangau mochen esap pwönüetä.

# 113

*Kölün mwareiti Kot pokiten an atekiatä ewe  
chon tipetekison*

*113.1-9*

<sup>1</sup> Ousipwe mwareiti ewe Samol mi Lapalap.

Ämi chon angang ngeni ewe Samol mi Lapalap  
oupwe mwareiti itan.

<sup>2</sup> Oupwe mwareiti iten ewe Samol mi Lapalap  
seni ei fansoun tori feilfeilachök.

<sup>3</sup> Seni tötän akkar tori a tuputiu  
aramas repwe mwareiti iten ewe Samol mi La-  
palap.

<sup>4</sup> Ewe Samol mi Lapalap a tekia seni chon ekewe  
mwü,  
an ling a nom asen ekewe läng.

<sup>5</sup> Ese wor eman a wewe ngeni ewe Samol mi  
Lapalap ach we Kot.

A mot won an lenien mot mi tekia,

<sup>6</sup> nge a nennetiu  
won ekewe läng, pwal won fanüfan.

<sup>7</sup> A apwätai ekewe chon wöüngau seni lepwül  
o atekiatäi ekewe chon mwelele seni ioien falang,

<sup>8</sup> a amoteer ren ekewe samol,  
ren ekewe samolun nöün aramas.

<sup>9</sup> A aleniöchü ewe fefin mi rit lon imwan  
o föri pwe epwe eman inelap mi pwapwa ren nöün  
kewe.

Ousipwe mwareiti ewe Samol mi Lapalap.

# 114

*Ekewe manaman mi fis, lupwen chon Israel ra towu seni Isip*

*114.1-8*

<sup>1</sup> Lupwen ekewe chon Israel ra towu seni Isip,  
ir ekewe mwirimwirin Jakop mi towu seni eu  
mwichen aramas mi sokola ar fos, ✧

<sup>2</sup> Juta a wiliti an leni mi pin,  
Israel a wiliti an lenien nemenem.

<sup>3</sup> Ewe matau a küna mine a fis o süla,  
ewe chanpupu Jortan a üla. ✧

<sup>4</sup> Ekewe chukutekia ra mwetewet usun ekewe  
ätewänin sip,  
ekewe chukutekison ra mwetewet usun ekewe  
nienifön sip.

<sup>5</sup> Met o sät, pwota ka sü?  
Met o chanpupu Jortan, pwota ka üla?

<sup>6</sup> Met o ämi kewe chukutekia, pwota oua  
mwetewet usun ekewe ätewänin sip?  
Nge ämi chukutekison, pwota oua mwetewet  
usun ekewe nienifön sip?

<sup>7</sup> En fanüfan, kopwe chech me fän mesen ewe  
Samol,  
me fän mesen än Jakop we Kot,

<sup>8</sup> i ewe mi awili ewe achau ngeni eu nomun koluk,  
nge ewe achau mi fokun pöchökül ngeni eu  
puächen koluk. ✧

---

✧ **114:1:** Eks 12.51 ✧ **114:3:** Eks 14.21; Jos 3.16 ✧ **114:8:** Eks 17.1-7; Num 20.2-13

# 115

## *Kot me ekewe uluulun anümwäl* *115.1-18*

<sup>1</sup> Ai Samol mi Lapalap, kopwe alingala itom,  
nge sap item,  
pokiten om tong ellet me om allükülük.

<sup>2</sup> Pwota chon ekewe mwü repwe aisinikem,  
“Ifa i ämi Kot?”

<sup>3</sup> Ach Kot a nom lon läng,  
i a chök föri mine a mochen.

<sup>4</sup> Nge ar kewe uluulun anümwäl seni silifer me kolt  
aramas chök ra föri.

<sup>5</sup> A wor awer, nge resap tongeni kapas,  
a wor meser, nge resap tongeni küneer.

<sup>6</sup> A wor selinger, nge resap tongeni rongorong,  
a wor pwötür,  
nge resap tongeni titin.

<sup>7</sup> A wor pöür, nge resap tongeni attap,  
a wor pecher, nge resap tongeni fetal,  
resap pwal tongeni möngüngü me lon chiorer.

<sup>8</sup> Chokewe mi föri ekewe uluulun anümwäl o  
lüküür  
repwe pwal wewe ngeni ekewe uluulun anümwäl.

☆

<sup>9</sup> Ämi chon Israel, oupwe apilükülükü ewe Samol  
mi Lapalap.

I epwe alisikemi o epeti senikemi feiengau.

<sup>10</sup> Ämi mwirimwirin Aaron, oupwe apilükülükü  
ewe Samol mi Lapalap.

I epwe alisikemi o epeti senikemi feiengau.

---

☆ **115:8:** Kölf 135.15-18; Pwär 9.20



11 Ämi mi niuokusiti ewe Samol mi Lapalap,  
oupwe apilükülükü i.

I epwe alisikemi o epeti senikemi feiengau.

12 Ewe Samol mi Lapalap a chechemenikich,  
i epwe afeiöchükich.

I epwe afeiöchü ekewe chon Israel me ekewe  
mwirimwirin Aaron.

13 Ewe Samol mi Lapalap epwe afeiöchü chokewe  
mi niuokusiti i,

ekewe aramas kis me ekewe aramas tekia. ☆

14 Amwo ewe Samol mi Lapalap epwe achomon-  
gakemiila

me mwirimwirimi kana.

15 Amwo oupwe feiöch me ren ewe Samol mi La-  
palap,

ewe mi föri läng me fanüfan.

16 Ekewe läng än ewe Samol mi Lapalap echök,  
nge fanüfan a ngeni aramas.

17 Ekewe somä resap mwareiti ewe Samol mi La-  
palap,

usun chök chokewe mi feitiu lon lenien sotup.

18 Nge kich mi manau sipwe mwareiti ewe Samol  
mi Lapalap

seni ei fansoun tori feilfeilachök.

Ousipwe mwareiti ewe Samol mi Lapalap.

## 116

*Kilisou ren ngasala seni feiengauen mäla*  
*116.1-19*

---

☆ 115:13: Pwär 11.18; 19.5

<sup>1</sup> Üa echeni ewe Samol mi Lapalap, pun a rongorong mweliei  
o aüselinga ai kewe tüngor pwe epwe ümömöch  
ngeniei.

<sup>2</sup> I a aü selingan ngeniei,  
iei mine üpwe kökköri i lon unusen ränin manauai.

<sup>3</sup> Ekewe likatupun mäla ra pwelieila,  
ekewe feiengauen lenien sotup ra toriei,  
üa uren riaföü me niuokus.

<sup>4</sup> Mürin üa köri iten ewe Samol mi Lapalap o apasa,  
“Ai Samol mi Lapalap, üa tüngor ngonuk, kopwe  
amanauaei.”

<sup>5</sup> Ewe Samol mi Lapalap a kirikiröch o pwüng,  
ach Kot a fokun eäni tong.

<sup>6</sup> Ewe Samol mi Lapalap a tümwünü ekewe chon  
lipwäkingau.

Lupwen üa nom lon feiengau, a amanauaei.

<sup>7</sup> Ngüni, kopwe apilükülüköch,  
pun ewe Samol mi Lapalap a kirikiröch ngeniei.

<sup>8</sup> Ewe Samol mi Lapalap a amanauaei seni mäla.

A aükätiau chönün mesei,  
a tümwünü pechei pwe üsap chepetek,

<sup>9</sup> pwe üpwe fetal fän mesan  
lon fanüen chon manau.

<sup>10</sup> Üa amwöchü ai lükülük pwal lupwen fansoun ai  
üra,

“Üa nom lon riaföü lapalap.” ✧

<sup>11</sup> Üa apasa lon ai niuokus,  
“Aramas meinisin ra chofana.”

12 Met üpwe liwini ngeni ewe Samol mi Lapalap ren ekewe feiöch meinisin a ngeniei?

13 Üpwe uwato ewe kapen wain pwe ai asoren ün o kilisou ngeni ewe Samol mi Lapalap.

14 Üpwe apwönüetä ai kewe pwon ngeni ewe Samol mi Lapalap me fän mesen nöün kewe aramas meinisin.

15 A aüchea me fän mesen ewe Samol mi Lapalap mälan nöün kewe chon pin.

16 Ai Samol mi Lapalap, ngang noum chon angang. Ngang noum chon angang, nöün noum chon angang fefin.

En ka apichala föföi kewe.

17 Üpwe eäni ngonuk ewe asoren kilisou o iotek ngonuk.

18 Üpwe apwönüetä ai kewe pwon ngeni en, ewe Samol mi Lapalap, me fän mesen noum kewe aramas meinisin

19 me lon imwom we imwenfel me lukalapen Jerusalem.

Ousipwe mwareiti ewe Samol mi Lapalap.

## 117

### *Kapasen mwareiti Kot fän iten an tong ellet*

#### *117.1-2*

1 Oupwe mwareiti ewe Samol mi Lapalap, ämi chon ekewe mwü meinisin.

Oupwe ingeiti i, ämi aramas meinisin. ☆

2 Pun an tong ellet ngenikich a fokun lapalap, än ewe Samol mi Lapalap allükülük a nonom tori feilfeilachök.

---

☆ **117:1:** Rom 15.11

Ousipwe mwareiti ewe Samol mi Lapalap.

## 118

*Kilisou ren än Kot amanaukich*  
118.1-29

<sup>1</sup> Oupwe kilisou ngeni ewe Samol mi Lapalap,  
pun i a kirikiröch,  
an tong ellet a nonom tori feilfeilachök. ✧

<sup>2</sup> Chon Israel repwe apasa,  
“An tong ellet a nonom tori feilfeilachök.”

<sup>3</sup> Ekewe mwirimwirin Aaron repwe apasa,  
“An tong ellet a nonom tori feilfeilachök.”

<sup>4</sup> Chokewe mi niuokusiti ewe Samol mi Lapalap  
repwe apasa,  
“An tong ellet a nonom tori feilfeilachök.”

<sup>5</sup> Üa kökköri ewe Samol mi Lapalap seni lon ai  
riafüü,  
nge i a pälüeniei o angasaeila.

<sup>6</sup> Üsap niuokus, pun ewe Samol mi Lapalap a nom  
rei.

Met aramas repwe tongeni föri ngeniei? ✧

<sup>7</sup> Ewe Samol mi Lapalap peniei me chon alisie.

Üpwe küna pwe ekewe chon oputaei ra kuf.

<sup>8</sup> A mürina ach sipwe anomu ach apilükülük won  
ewe Samol mi Lapalap,  
lap seni ach sipwe anomu ach apilükülük won  
aramas.

<sup>9</sup> A mürina ach sipwe anomu ach apilükülük won  
ewe Samol mi Lapalap,

---

✧ **118:1:** 1.Kron 16.34; 2.Kron 5.13; 7.3; Esr 3.11; Kölf 100.5; 106.1; 107.1; 136.1; Jer 33.11 ✧ **118:6:** Ipr 13.6

lap seni ach sipwe anomu ach apilükülük won  
ekewe samol.

10 Chon ekewe mwü meininis ra pwelieila,  
nge ngang üa ärirela fän iten ewe Samol mi La-  
palap.

11 Ra pweliela lepeki meininis,  
nge ngang üa ärirela fän iten ewe Samol mi La-  
palap.

12 Ra rangeitiei usun achi,  
nge ra karakai usun ekkei a kenala iräföföföf.  
Ngang üa ärirela fän iten ewe Samol mi Lapalap.

13 Ra tiinie fän pöchökül pwe üpwe turula,  
nge ewe Samol mi Lapalap a alisie.

14 Ewe Samol mi Lapalap ai pöchökül me ai köl.  
I ai Chon Amanau. ☆

15 Oupwe aüseling ngeni ekewe kölün pwapwan  
win lon imwen ekewe chon pwüing,  
“Pöüifichin ewe Samol mi Lapalap a föri föföföf  
pwora me win.

16 Pöüifichin ewe Samol mi Lapalap a aköüpöü,  
pöüifichin ewe Samol mi Lapalap a föri föföföf  
pwora me win.”

17 Üsap mäla, nge üpwe manau  
o asilefeili än ewe Samol mi Lapalap kewe föföf.

18 Ewe Samol mi Lapalap a fokun apwüingüei,  
nge esap atolongaei lon mäla.

19 Oupwe suki ngeniei ekewe asamen imwenfel  
pwe üpwe tolong lon o kilisou ngeni ewe Samol mi  
Lapalap.

20 Iei asamen ewe Samol mi Lapalap,

☆ 118:14: Eks 15.2; Ais 12.2

ekewe chon pwüing echök repwe tolong lon.

21 Üa kilisou ngonuk, pun ka pälueni ai iotek,  
ka pwal amanauaei.

22 Ewe fau ekewe chon kaü imw ra pöütala  
a wiliti ewe föün lepwokuku mi fokun aüchea. ✧

23 Iei än ewe Samol mi Lapalap we föför,  
a fokun amwarar me fän mesach. ✧

24 Iei ewe rän ewe Samol mi Lapalap a föri,  
ousipwe meseik o pwapwa lon.

25 Ai Samol mi Lapalap, äm aia tüngor ngonuk pwe  
kopwe amanauakem.

Ai Samol mi Lapalap, äm aia tüngor ngonuk pwe  
kopwe atufichikem. ✧

26 A feiöch ätewe mi feito fän iten ewe Samol mi  
Lapalap.

Äm aia afeiöchükemi seni lon imwen ewe Samol mi  
Lapalap. ✧

27 Ewe Samol mi Lapalap i Kot, a ngenikich saram.  
Oupwe fötätä ewe mönün asoren chulap ren säl  
ngeni ewe rongen asor tori mächän kewe.

28 En ai Kot, üpwe kilisou ngonuk.

En ai Kot, üpwe ingemwareituk.

29 Oupwe kilisou ngeni ewe Samol mi Lapalap,  
pun i a kirikiröch,  
an tong ellet a nonom tori feilfeilachök.

---

✧ **118:22:** Luk 20.17; Föf 4.11; 1.Pet 2.7    ✧ **118:23:** Mat 21.42;  
Mark 12.10-11    ✧ **118:25:** Mat 21.9; Mark 11.9; Joh 12.13

✧ **118:26:** Mat 21.9; 23.39; Mark 11.9; Luk 13.35; 19.38; Joh 12.13

# 119

## *An Kot kewe allük ra mürina*

### *119.1-176*

<sup>1</sup> Ra feiöch chokewe resap tipis lon manauer,  
chokewe mi aleasochisi än ewe Samol mi Lapalap  
kewe allük.

<sup>2</sup> Ra feiöch chokewe mi tümwünü an kewe allük.  
chokewe mi kütta i ren unusen leluker,

<sup>3</sup> chokewe resap föri mine a ngau,  
nge ra chök föri letipen Kot.

<sup>4</sup> Ai Kot, en ka asile ngenikem om öüröür,  
pwe aipwe tümwünüöchüür le apwönüetä.

<sup>5</sup> Amwo üpwe likitü le apwönüetä om kewe allük.

<sup>6</sup> Mürin üsap säw,  
lupwen üa ekiekifichi om kewe allük meinisin.

<sup>7</sup> Üpwe mwareituk fän wenecharen lelukei,  
lupwen üa kaiö pwüngün om kewe pwüüng.

<sup>8</sup> Üpwe aleasochisi om kewe allük.  
Kosap fokun likitieila.

<sup>9</sup> Epwe ifa usun än eman alüal tümwünü manauan  
pwe epwe limöch?

Ei a chök tongeni fis ren an aleasochisi om kapas.

<sup>10</sup> Üa küttoke ren unusen lelukei.

Kosap mwüt ngeniei pwe üpwe aleasolap ngeni  
om kewe allük.

<sup>11</sup> Üa iseis om kapas lon lelukei  
pwe üsap tipis ngonuk.

<sup>12</sup> Ai Samol mi Lapalap, üpwe mwareituk.  
Kopwe aiti ngeniei om kewe allük.

<sup>13</sup> Üpwe apasasefäli om kewe pwüüng meinisin  
ka ngenikem.

- 14 Üa pwapwaäsini le apwönüetä om kewe allük lap seni ai pwapwaäsini ekewe wöü meinsin.
- 15 Üpwe ekinloni om kewe öüröür o ekiékifichi mine ka aiti ngeniei.
- 16 Üpwe pwapwaäsini om kewe allük, nge üsap manlükala om kewe kapas.
- 17 Kopwe kirikiröch ngeniei ngang noum chon angang,  
pwe üpwe manau o aleasochisi om kapas.
- 18 Kopwe suki mesei pwe üpwe küna ekewe mettoch mi amwarar seni lon om kewe allük.
- 19 Ngang eman chon siamü won fanüfan, kosap aopala om kewe allük seniei.
- 20 Lelukei a tatakis ren ai positi om kewe pwüüng fansoun meinsin.
- 21 Ka apwüngü ekewe mi lamalamtekia, ra anümamau, chokewe mi aleasolap ngeni om kewe allük.
- 22 Kopwe angei seniei säw me itengau, pun ngang üa tümwünü om kewe allük.
- 23 Inamwo are samol kana ra mwichfengen o rawangauaei,  
nge ngang noum ei chon angang üpwe chök ekinloni om kewe allük.
- 24 Üa pwapwaäsini om kewe allük, ir chon öüröüraei.
- 25 Üa konola won pwül moromor, kopwe apöchökülaei usun ka pwon lon om kapas.
- 26 Üa pwärätä meinsin mine üa föri, nge en ka pälueniei.



Kopwe aiti ngeniei om kewe allük.

<sup>27</sup> Kopwe awewe ngeniei usun ai üpwe fetal fän om  
kewe öüröür,  
nge ngang üpwe ekinlonei om kewe föför mi  
amwarär.

<sup>28</sup> Üa fokun kechü ren ai letipeta.

Kopwe apöchökülaei usun ka pwon lon om kapas.

<sup>29</sup> Kopwe amwöchüei pwe üsap fetal won ekewe al  
rese pwüng.

Lon om ümömöch kopwe aiti ngeniei om we  
allük.

<sup>30</sup> Üa filätä ai üpwe fetal won ewe al mi let,  
üa anomu mwei om kewe pwüüng.

<sup>31</sup> Ai Samol mi Lapalap, üa kamwöchünük won om  
kewe allük,

kosap mwüt ngeniei pwe üpwe säw.

<sup>32</sup> Üpwe fokun aleasochisi om kewe allük,  
pun ka alapala ai sile.

<sup>33</sup> Ai Samol mi Lapalap, kopwe aiti ngeniei wewen  
om kewe allük,

nge ngang üpwe aleasochisiir fansoun meinisin.

<sup>34</sup> Kopwe fang ngeniei silelap, pwe ngang üpwe  
aleasochisi om kewe allük  
o apwönüretä ren unusen lelukei.

<sup>35</sup> Kopwe emweniei pwe üpwe tongeni aleasochisi  
om kewe allük,

pun ngang üa pwapwaäsiniir.

<sup>36</sup> Kopwe akulu lelukei ngeni om kewe allük,  
nge sap ngeni mochenian win.

<sup>37</sup> Kopwe akulu mesei seni mettoch mi lomoton-  
gau,

nge kopwe amanauaei ren om kapas.

38 Kopwe apwönüetä om pwon ngeniei ngang  
nouw chon angang,  
ewe pwon ka eäni ngeni chokewe mi niuokusituk.

39 Kopwe angei seniei ewe itengau üa niuokusiti,  
pun om kewe pwüüng ra mürina.

40 Üa fokun positi om kewe kapasen öüröür.  
Kopwe amanauaei, pun en ka pwüüng.

41 Ai Samol mi Lapalap, kopwe pwäri ngeniei om  
tong ellet,  
kopwe amanauaei usun ka fen pwon.

42 Mürin üpwe tongeni pälüeni chokewe mi  
ämängauaei,  
pun üa lükü om kapas.

43 Kopwe atufichiei pwe üpwe apasawu kapas mi  
let fansoun meinisin,  
pun ai apilükülük a nom won om kewe pwüüng.

44 Üpwe aleasochisi om kewe allük  
iteiten fansoun tori feilfeilachök.

45 Iwe, üpwe fetalchöchö fän ngasala,  
pun üa kütta om öüröür.

46 Üpwe pwal pwärätä om kewe allük me fän mesen  
ekewe king,  
nge üsap säw.

47 Üa fokun pwapwa le aleasochisi om kewe allük,  
pun üa aücheaniir.

48 Üa etiwa o aücheani om kewe allük,  
üpwe pwal ekinlonei om kewe pwüüng.

49 Kopwe chechemeni om kapas ngeniei ngang  
nouw we chon angang,  
ewe kapas mi ngeniei apilükülüköch.

50 Iei ai chip lon ai riaföü,

pwe om pwon a ngeniei manau.

51 Ekewe chon lamalamtekia ra fokun turun-  
ufaseei,

nge ngang üsap kul seni om allük.

52 Ai Samol mi Lapalap, lupwen üa ekieki usun om  
kewe pwüüng,

ra nonom seni me lomlom, üa chip.

53 Lingeringer watte a toriei,

lupwen üa küna ekewe aramasangau mi purätü  
om kewe allük.

54 Üa kökkölü om kewe allük ekis meinin  
ia üa siamü ie.

55 Ai Samol mi Lapalap, üa chechemenuk lepwin  
o ekieki usun om kewe allük.

56 Iei usun mine üa chök föföri:

Üa aleasochisi om kewe öüröür.

57 Ai Samol mi Lapalap, en chök ineti.

Üpwe pwon pwe üpwe aleasochisi om kewe kapas.

58 Üa tüngor seni unusen lelukei om kopwe  
kirikiröch ngeniei.

Kopwe ümöümöch ngeniei usun ka pwon.

59 Üa ekieki usun ai kewe föföri,  
mürin üa kul ngeni om kewe allük.

60 Üa amüttiriei pwe üpwe aleasochisi om kewe  
allük,

nge üsap mang.

61 Inamwo ika ekewe aramasangau ra anomu eu  
sär me mwei,

nge üsap manlükala om kewe allük.

62 Üa pwätä lukenipwin

pwe üpwe mwareituk pokiten om kewe allük mi  
pwüüng.

63 Ngang eman chienen chokewe meinisin mi niuokusituk,

chokewe mi aleasochisi om kewe öüröür.

64 Ai Samol mi Lapalap, fanüfan a ur ren om tong ellet.

Kopwe aiti ngeniei om kewe allük.

65 Ai Samol mi Lapalap, ka eäni kirikiröch ngeniei ngang noum chon angang usun ka pwon.

66 Kopwe aiti ngeniei mirit me silelap, pun üa lükü om kewe allük.

67 Mwen om atolongaei lon riaföü üa mwälechfeil, nge iei üa aleasochisi om kapas.

68 En ka kirikiröch o föri mine a mürina. Kopwe aiti ngeniei om kewe allük.

69 Ekewe mi lamalamtekia ra aitengauaei ren ar chofana, nge üa aleasochisi om kewe öüröür ren unusen lelukei.

70 Leluker esap wor memmef lon, nge ngang üa pwapwaäsini om allük.

71 A mürina ngeniei pwe üa riaföü, pun ren ei üa tongeni kaiö om kewe allük.

72 Ewe allük ka ngenikem a mürina ngeniei lap seni ngeröün föün kolt me silifer.

73 En ka föriei o tümwünüei.

Kopwe fang ngeniei mirit pwe üpwe tongeni kaiö om kewe allük.

74 Chokewe mi niuokusituk repwe pwapwa, lupwen repwe künaei,

pun üa apilükülükü om kewe kapas.

75 Ai Samol mi Lapalap, üa silei pwe om kewe apwüng ra pwüng,

fän om allükülük ka ariaföüüei.

<sup>76</sup> Om tong ellet epwe achipaei,  
usun ka pwon ngeniei ngang noum we chon an-  
gang.

<sup>77</sup> Om ümöümöch epwe toriei pwe üpwe tongeni  
manau,

pun üa pwapwaäsini om allük.

<sup>78</sup> Amwo ekewe chon lamalamtekia repwe säw,  
pun ra atipsisiei, nge ese wor popun.

Nge me rei, üpwe ekinlonei om kewe öüröür.

<sup>79</sup> Amwo chokewe mi niukusitik repwe feito rei,  
ir chokewe mi silei om kewe allük.

<sup>80</sup> Amwo üpwe fokun aleasochisi om kewe allük,  
pwe üsap säw.

<sup>81</sup> Üa fokun apwangapwangala ren ai positi om  
kopwe amanauaei,

nge üa apilükülükü om kapas.

<sup>82</sup> Mesei ra toputopula ren ai akköürü mine ka  
pwon.

Üa ais, “Inet kopwe achipaei?”

<sup>83</sup> Inamwo ika üa lomotongau usun chök eu ru-  
men wain seni silin man mi nürüfengen ren  
ötüöt,

nge üsap manlükala om kewe allük.

<sup>84</sup> Ifa ükükün fansoun ngang noum ei chon angang  
üpwe engila?

Inet kopwe apwüngü chokewe mi ariaföüüei?

<sup>85</sup> Ekewe chon lamalamtekia ra tuw pwang pwe  
üpwe turulong lon,

ir chokewe resap aleasochisi om allük.

<sup>86</sup> Om kewe allük meinisini ra let.

Nge aramas ra chök ariaföüüei ren ar kapas  
chofana. Kose mochen kopwe alisie.

87 Arapakan ar repwe ärieila me won fanüfan.  
Nge ngang üsap likitala om kewe öüröür.

88 Lon om tong ellet kopwe amwöchü manauai,  
pwe üpwe tongeni aleasochisi om kewe allük.

89 Ai Samol mi Lapalap, om kapas a nüküchar me  
lon läng,  
a nom tori feilfeilachök.

90 Om allükülük a nonom tori ekewe täppin aramas  
meininis.

En ka anomu fanüfan lon lenian, nge a nonomo-  
pos.

91 Om kewe allük ra nonom tori ikenai,  
pun mettoch meinisin ra ngang ngonuk.

92 Are üsap pwapwaiti om allük,  
üpwe mäla lon ai riaföü.

93 Üsap fokun manlükala om kewe öüröür,  
pun ka amanauai pokiter.

94 Ngang noum, kopwe amanauai,  
pun ngang üa kütta om öüröür.

95 Ekewe aramasangau ra okoperiei pwe repwe  
nieila,  
nge ngang üpwe ekinlonei om kewe allük.

96 Üa küna pwe mi wor öükükün mettoch meinisin,  
nge om allük esap wor öükükün.

97 Üa fokun aücheani om allük,  
üa ekinlonei fansoun meinisin.

98 Om allük a atipachemai pwe üa tipachem lap  
seni chon oputaei,

pun a nonom rei fansoun meinisin.

99 A wor ai sile lap seni än nei kewe sense sile,  
pun üa ekinlonei om kewe allük.

100 Üa mirit lap seni ekewe reikewe,  
pun üa aleasochisi om kewe öüröür.

101 Üsap föri sokun föför mi ngau,  
pun üa aleasochisi om kewe kapas.

102 Üsap tok seni om kewe pwüüng,  
pun püsin en ai chon kait.

103 Om kewe kapasen pwon ra fokun arar me rei,  
ra arar seni chönün chunen me lon awei.

104 Üa angei ai mirit seni om kewe öüröür,  
iei mine üa oput ekewe föför mi ngau meinisin.

105 Om kapas eu lamp a aiti ngeniei ia üpwe ipwela  
ie,  
a pwal asarama alei.

106 Üa pwon fän akapel o anükünükü  
pwe üpwe aleasochisi om kewe öüröür mi pwüüng.

107 Üa fokun riaföü. Ai Samol mi Lapalap,  
kopwe amanauaei, usun ka pwon lon om kapas.

108 Ai Samol mi Lapalap, kopwe aüselinga ai iotekin  
kilisou  
o aiti ngeniei om kewe pwüüng.

109 Üa fangala manauai pwe üpwe tolong lon feien-  
gauen mäla fansoun meinisin,  
nge üsap manlükala om kewe allük.

110 Ekewe aramasangau ra anomu eu sär fän itei,  
nge ngang üsap aleasolap ngeni om kewe öüröür.

111 Om kewe allük wöüi tori feilfeilachök.  
Ewer, ra apwapwai lelukei.

112 Üa filätä pwe üpwe apwönüetä om kewe allük  
fansoun meinisin  
tori sopolan manauai.

113 Üa oput ekewe aramas mi tiperuu,

nge üa aücheani om allük.

114 En ai lenien op me ai chon tümwün.

Üa anomu ai apilükülük won om kewe kapas.

115 Oupwe sü seniei, ämi chon föri mine a ngau,  
pwe üpwe aleasochisi än ai Kot kewe allük.

116 Kopwe alisie pwe üpwe tongeni manau, usun  
ka fen pwon,  
nge kosap mwütätä pwe üpwe lichipüng lon ai  
apilükülük.

117 Kopwe amwöchüeitä pwe üpwe manau,  
üpwe meniniti om kewe allük fansoun meininis.

118 Ka oput chokewe meininis mi aleasolap ngeni  
om kewe allük.

Ewer, ar tipachemsolä esap wor lomotan.

119 Ekewe aramasangau meininis won fanüfan ra  
usun chök mettoch mi limengau me fän  
mesom,

iei mine üa aücheani om kewe ööröür.

120 Inisi a chechek ren ai niueituk.

Üa niuokus ren om kewe kapwüng.

121 Üa fen föri mine a wenechar o pwüng,  
kosap likitiei ngeni chon ariaföüiei.

122 Kopwe pwon pwe kopwe alisie ngang noum  
chon angang,  
nge kosap mwüt ngeni ekewe chon lamalamtekie  
pwe repwe ariaföüiei.

123 Mesei ra toputopula ren ai aköürü om kopwe  
amanauaei,  
pwal ren ai aköürü om kopwe apwönüetä om  
kewe pwon mi pwüng.

124 Lon om föföör ngeniei ngang noum chon angang  
kopwe pwäri om tong ellet  
o aiti ngeniei om kewe allük.



125 Ngang noum chon angang, kopwe ngeniei  
mirit  
pwe üpwe tongeni silei om kewe allük.

126 Ai Samol mi Lapalap, a tori fansoun pwe kopwe  
föri om angang,  
pun aramas ra puri om allük.

127 Ellet, üa aücheani om kewe allük lap seni kolt  
me kolt mi mürina.

128 Iei mine üa apwönüetä om kewe öüröür mein-  
isin,  
nge üa oput ekewe föför mi mwäl.

129 Om kewe allük ra fokun amwarar,  
iei mine üa aleasochisiir ren unusen lelukei.  
130 Lupwen a suk ngenikem masouen om kewe  
kapas, a wor saram,  
a ngeni ekewe chon wewemang tipachem.

131 Lon ai positi om kewe allük  
üa amassaw o ngasepwich.

132 Kopwe kuluto o ümöümöch ngeniei,  
usun ka föri ngeni chokewe mi echenuk.

133 Kopwe anükücharaei pwe üsap tur, usun ka  
pwon,  
nge kosap mwüt ngeni tipis epwe nemenieila.

134 Kopwe angasaei seni ekewe aramas mi ari-  
aföüüei,  
pwe üpwe tongeni aleasochisi om kewe öüröür.

135 Kopwe netiu woi ngang noum chon angang fän  
om kirikiröch  
o aiti ngeniei om kewe allük.

136 Chönün mesei ra pupu usun chanpupu,  
pun aramas resap aleasochisi om kewe allük.

137 Ai Samol mi Lapalap, en ka pwüing,

nge om kewe kapwüŋ ra pwüŋ.

138 Om kewe allük ka ngenikem ra pwüŋ,  
ra pwal unusen allükülük.

139 Ai tiliken a apwangapwangaeila,  
pun chon oputaei ra tümwünüŋgaei om kewe ka-  
pas.

140 Om kewe pwon ra asosotöch,  
ngang noum chon angang üa aücheaniir.

141 Üa itengau o küna koput,  
nge üsap manlükala om kewe öüröür.

142 Om we pwüŋ a nom tori feilfeilachök,  
nge om allük a let.

143 Weires me eniweniw ra toriei,  
nge om kewe allük ra apwapwaei.

144 Om kewe allük ra pwüŋ tori feilfeilachök.  
Kopwe ngeniei mirit pwe üpwe manau.

145 Üa siö ngonuk ren unusen lelukei.  
Ai Samol mi Lapalap, kopwe pälueniei.  
Ngang üpwe aleasochisi om kewe allük.

146 Üa siö ngonuk.

Kopwe amanauaei pwe üpwe apwönüetä om kewe  
allük.

147 Üa pwätä wünümweerän o siö pwe kopwe al-  
isiei.

Üa apilükülükü om kewe kapas.

148 Üa nenela lon unusen pwin  
pwe üpwe ekinlonei om we pwon.

149 Kopwe aüselinga mweliei lon om tong ellet.  
Ai Samol mi Lapalap, kopwe amanauaei fän om  
pwüŋ.

150 Chokewe mi ariaföüüei ra kaneto fän ar  
ekingau,

nge resap fokun apwönüetä om kewe allük.

151 Nge en ka arap ngeniei, ai Samol mi Lapalap,  
om kewe allük meinisin ra let.

152 Seni me lomlom üa silei seni om kewe allük,  
pwe ka anüküchareer tori feilfeilachök.

153 Kopwe nengeni ai riaföü o angasaei,  
pun üsap manlükala om allük.

154 Kopwe peniei o angasaei,  
kopwe amanauaei, usun ka pwon.

155 En kosap amanaua ekewe aramasangau,  
pun resap aleasochisi om kewe allük.

156 Ai Samol mi Lapalap, om ümöümöch a lapalap,  
kopwe amanauaei fän om pwüng.

157 Ra men chomong chon ariaföüei me chon ü  
ngeniei,

nge ngang üsap tok seni om kewe allük.

158 Fän koput üa nenengeni ekewe aramas resap  
allükülük,

pun ir resap aleasochisi om kewe allük.

159 Kopwe ekieki usun ai aücheani om kewe öüröür.  
Kopwe tümwünü manauaei fän om tong ellet.

160 Masouen om kewe kapas meinisin a let.

Om kewe allük mi pwüng meinisin ra nonom tori  
feilfeilachök.

161 Ekewe samol ra ariaföüei nge esor popun,  
nge ngang üa meniniti om kewe kapas.

162 Üa pwapwa ren om kewe pwon  
usun eman mi angei chomong liapan.

163 Üa oput o anioputa chofana,  
nge üa aücheani om allük.

164 Üa mwareituk fän fisu lon eu rän

fän iten om kewe allük mi pwüng.

165 Chokewe mi aücheani om allük ra fokun kinamwe.

Esap wor och ra tongeni chepetek ren.

166 Ai Samol mi Lapalap, üa apilükülükü om kopwe amanauaei,

üa pwal apwönüetä om kewe allük.

167 Üa aleasochisi om kewe allük,

üa wesewesen aücheaniir.

168 Üa aleasochisi om kewe öüröür me om kewe allük,

pun en ka küna meinsin mine üa föri.

169 Ai Samol mi Lapalap, amwo ai siö epwe toruk.

Kopwe ngeniei mirit usun ka apasa.

170 Ai iotekin tüngor epwe toruk.

Kopwe angasaei usun ka pwon.

171 Üpwe fokun mwareituk

pwe ka aiti ngeniei om kewe allük.

172 Üpwe kölü om kapas,

pun om kewe allük meinsin ra pwüng.

173 Amwo kopwe molotä pwe kopwe alisie,

pun üa filätä om kewe öüröür pwe üpwe apwönüretä.

174 Ai Samol mi Lapalap, üa positi om kopwe amanauaei,

üa fokun pwapwaiti om allük.

175 Kopwe mwüt ngeniei pwe üpwe manau, pwe üpwe tongeni mwareituk,

nge om kewe pwüüng repwe alisie.

176 Üa mwälechfeil usun eman sip mi mwälechela,

kopwe küttaei ngang noum chon angang,

pun üsap manlükala om kewe allük.

## 120

*Eu iotekin tüngr ngasala seni chon atuputup  
120.1-7*

Echö kölün feitä \*.

<sup>1</sup>Üa siö ngeni ewe Samol mi Lapalap lon ai riaföü,  
nge i a pälüeniei,

<sup>2</sup>“Ai Samol mi Lapalap, kopwe angasaei  
seni ekewe chon chofana me chon atuputup.”

<sup>3</sup>Ämi chon atuputup, met Kot epwe liwini  
ngenikemi?

Met epwe pwal föri ngenikemi?

<sup>4</sup>Epwe apwüngükemi ren än eman sounfiu föün  
esefich mi ken,  
ren moochen chia mi sarara.

<sup>5</sup>Feiengaei pwe üa siamüfetal lon Mesek  
o nonom lon imwen ekewe chon Ketar.

<sup>6</sup>A fansoun langatam ai imweimw  
lein chokewe mi oput kinamwe.

<sup>7</sup>Üa tipeni kinamwe. Nge lupwen üa kapas usun,  
ir ra tipeni maun.

## 121

*Kot om chon tümwün  
121.1-8*

Echö kölün feitä.

<sup>1</sup>Üa anetai mesei ngeni ekewe chuk.

Ia alilisi epwe feito me ie?

<sup>2</sup>Alilisi epwe war me ren ewe Samol mi Lapalap  
mi förätä läng me fanüfan.

---

\* **120::** Ekei kölfel seni sopun 120 tori sopun 134 chon Israel ra sou  
eäniir lupwen ar feitä Jerusalem fansoun ar kewe chulap.

<sup>3</sup> I epwe amwöchuk pwe kosap mit,  
ewe mi tümwünuk esap aiesum.

<sup>4</sup> Nengeni, ewe mi tümwünü Israel  
esap aiesum, esap pwal möür.

<sup>5</sup> Ewe Samol mi Lapalap epwe tümwünuk,  
i epwe annüruk o nom pelifichum.

<sup>6</sup> Akkar esap afeiengauok lerän,  
nge maram esap afeiengauok lepwin.

<sup>7</sup> Ewe Samol mi Lapalap epwe tümwünuk seni  
feiangau meinisin,  
i epwe tümwünü manauom.

<sup>8</sup> Ewe Samol mi Lapalap epwe tümwünü om towu  
me om tolong  
seni ikenai tori feilfeilachök.

## 122

### *Eu iotekin kinamwe fän iten chon Jerusalem*

#### *122.1-9*

Echö kölün feitä än Tafit.

<sup>1</sup> Üa pwapwa, lupwen ra üreniei,  
“Ousipwe feila ren imwen ewe Samol mi La-  
palap.”

<sup>2</sup> Iei äm aia tolong lon asamalapom kewe  
o ütä lon, en Jerusalem.

<sup>3</sup> Jerusalem a kaüsefälitä  
usun eu telinimw mi nükünüköch.

<sup>4</sup> Chon ekewe ainang ra feitä ie,  
ekewe ainangen Israel,  
pwe repwe kilisou ngeni ewe Samol mi Lapalap,  
usun a fen allük ngeniir.

<sup>5</sup> Ikenan mi wor lenien mot fän iten chokewe mi  
eäni kapwüing,  
ekewe lenien motun king fän iten chon leimwen  
Tafit.

<sup>6</sup> Oupwe tünigor pwe epwe wor kinamwe lon  
Jerusalem,

“Amwo chokewe mi echenuk repwe feiöch.

<sup>7</sup> Epwe wor kinamwe lon tittum, Jerusalem,  
o imwom kewe imwen king repwe nükünük.”

<sup>8</sup> Pokiten pwi me chienei kewe üpwe apasa ngeni  
Jerusalem,

“Kinamwe epwe nonom lomw.”

<sup>9</sup> Pokiten imwen ewe Samol mi Lapalap ach we  
Kot

üpwe kütta om feiöch.

## 123

*Eu iotekin tünigor ümöümöch*

*123.1-4*

Echö kölün feitä.

<sup>1</sup> Üa netä reöm, ai Samol mi Lapalap,  
en ewe mi mot won ewe lenien motun king lon  
läng.

<sup>2</sup> Usun mesen ekewe chon angang mwän ra netä  
ren ar samol,

pwal usun mesen eman chon angang fefin a netä  
ren an samol fefin,

iei usun mesach ra netä ren ewe Samol mi Lapalap  
ach we Kot,

tori epwe ümöümöch ngenikich.

<sup>3</sup> Kopwe ümöümöch ngenikem, äm Samol mi La-  
palap, kopwe ümöümöch ngenikem.

Pun a kon watte än aramas aitengauakem.

<sup>4</sup> A kon langatam fansoun äm riaföü ren än ekewe  
mi wöümong esitakem,  
pwal ren än ekewe mi lamalamtekia  
aitengauakem.

## 124

*Kilisou ren ngasala seni chon oput*

*124.1-8*

Echö kölün feitä än Tafit.

<sup>1</sup> Chon Israel repwe apasa, “Are ewe Samol mi  
Lapalap esap nom rech,

<sup>2</sup> are ewe Samol mi Lapalap esap nom rech,  
lupwen aramas ra maun ngenikich,

<sup>3</sup> repwe oromanauekichela  
lon ar song mi watte ngenikich.

<sup>4</sup> Iwe, ewe lölö epwe pwölükichela,  
ewe öütöüt epwe purikichela,

<sup>5</sup> nge nonoon ekewe koluk repwe pwölükichela.

<sup>6</sup> Sipwe mwareiti ewe Samol mi Lapalap,  
pun esap mwüt ngeni chon oputakich pwe repwe  
arosakichela.

<sup>7</sup> Sa tiwela usun eman machang a tiwela seni ewe  
sär, ewe chon sär a soni.

Ewe sär a mwü, nge kich sa tiwela.

<sup>8</sup> Alilisich a feito seni ewe Samol mi Lapalap,  
ewe mi föri läng me fanüfan.

## 125

*Kot a nom pwelin ünükün nöün aramas*

*125.1-5*

Echö kölün feitä.



<sup>1</sup> Chokewe mi apilükülükü ewe Samol mi Lapalap  
ra usun chök ewe chuk Sion,  
esap tongeni mwökütüküt,  
nge epwe chök nonom tori feilfeilachök.

<sup>2</sup> Usun ekewe chuk ra nom pwelin ünükün  
Jerusalem,  
iei usun ewe Samol mi Lapalap a nom pwelin  
ünükün nöün aramas  
seni ei fansoun tori feilfeilachök.

<sup>3</sup> Än ekewe aramasangau nemenem esap  
nonomopos won ewe fanü mi inet ngeni  
ekewe chon pwüng,  
pun mürin, ekewe chon pwüng repwe pwal föri  
mine a ngau.

<sup>4</sup> Ai Samol mi Lapalap, kopwe föri mine a mürina  
ngeni chokewe mi föri mine a mürina,  
pwal ngeni chokewe mi wenechar lon leluker.

<sup>5</sup> Nge chokewe mi rikila ngeni ekewe al mi pwor  
kopwe asechirela fiti ekewe chon föföringau.  
Kinamwe epwe nom lon Israel.

## 126

*Kilisou fän iten än ekewe aramas liwinsefäl seni  
ar oola*

*126.1-6*

Echö kölün feitä.

<sup>1</sup> Lupwen ewe Samol mi Lapalap a  
aliwinisefälkich ngeni Sion seni ach oola,  
sa usun chök chon tan.

<sup>2</sup> Lon ena fansoun kich sa takirikir. Sa mweireir  
fän pwapwa.

Mürin, chon ekewe mwü ra apasa lefler,

“Ewe Samol mi Lapalap a föri föför mi amwarar fän iter.”

<sup>3</sup> Ellet, ewe Samol mi Lapalap a föri föför mi amwarar fän itach,iei popun sa pwapwa.

<sup>4</sup> Ai Samol mi Lapalap, kopwe aliwinisefälieto ekewe chon oola meinisin,usun chök ekewe chanpupu lon Nekep ra lölösefäl ren üt.

<sup>5</sup> Chokewe mi fofot fän kechü repwe kinikin fän mweireiren pwapwa.

<sup>6</sup> Eman mi feila fän kechü o uwei föün irä pwe epwe fotuki, epwe liwinto fän mweireiren pwapwa o uwato kinian ua.

## 127

### *Feiöch a feito seni Kot*

#### *127.1-5*

Echö kölün feitä än Salomon.

<sup>1</sup> Are ewe Samol mi Lapalap esap aüetä ewe imw, a solap än ekewe chon aüetä angang.

Are ewe Samol mi Lapalap esap mamasa ewe telinimw,

a solap än ekewe chon mas nenela le mamas.

<sup>2</sup> A solap ämi pwätäkai pwal ämi annutumang, pwe oupwe angang weires fän iten enemi mongö. Pun Kot a fang ngeni nöün kewe a echeniir met-toch meinisin mine ra osupwang ren, lupwen ra annut.

<sup>3</sup> Nau eu lifang seni ewe Samol mi Lapalap,

ir eu liwin mi öch.

<sup>4</sup> Ekewe ät eman a nöüni lupwen an alüal  
ra usun chök ekewe föün esefich lepöün eman  
sounfiu.

<sup>5</sup> A feiöch ewe mwän mi ur an lenien föün esefich  
ren ei sokun föün.

Ätewe esap säw, lupwen epwe kapas ngeni chon  
oputan lon lenien kapwüng.

## 128

### *A feiöch eman mi niuokusiti Kot*

#### *128.1-6*

Echö kölün feitä.

<sup>1</sup> Ra feiöch ir meininis mi niuokusiti ewe Samol mi  
Lapalap,  
chokewe mi aleasochisi an kewe allük.

<sup>2</sup> Kopwe mongö uän angangen poum,  
kopwe pwapwa o feiöch.

<sup>3</sup> Pwülüom epwe wewe ngeni efoch irän wain mi  
fokun ua me lon imwom.  
Noum kana repwe wewe ngeni fasaren ewe irä  
olif ünükün om chepel.

<sup>4</sup> Iei usun feiöchün ewe mwän  
mi niuokusiti ewe Samol mi Lapalap.

<sup>5</sup> Ewe Samol mi Lapalap epwe afeiöchuk seni Sion.  
Amwo kopwe küna feiöchün Jerusalem  
lon ränin manauom meininis.

<sup>6</sup> Amwo kopwe küna nöün noum kana.  
Kinamwe epwe nom won Israel.

## 129

*Eu iotek pwe chon oputen Sion repwe kuf*

*129.1-8*

Echö kölün feitä.

<sup>1</sup> Israel epwe apasa, “Chon oputaei ra fokun ari-aföüüei seni leküküni.

<sup>2</sup> Ewer, ra fokun ariaföüüei seni leküküni, nge resap tongeni akufuei.

<sup>3</sup> Ra akinasa söküri pwe a fokun watte kinasan, usun chök eman chon tuw pwül a tuw warawar mi langatam.

<sup>4</sup> Nge ewe Samol mi Lapalap a pwüing.

I a angasaei seni än ekewe aramasangau fötekiniei.

<sup>5</sup> Amwo meinisin mi oput Sion repwe timär fän säw.

<sup>6</sup> Amwo repwe wewe ngeni fetil won osun ekewe imw mi pwasala me mwen an märitä,

<sup>7</sup> ewe chon kinikin esap tongeni amasoua pöün ren,

nge ewe chon föri pilük esap tongeni pilükü o efiti.

<sup>8</sup> Nge chokewe mi pwerela resap apasa ngeniir, “Än ewe Samol mi Lapalap feiöch epwe nom womi.

Äm aia afeiöchükemi fän iten ewe Samol mi Lapalap.”

## 130

*Ach apilükülüküni än Kot amanauakich*

*130.1-8*

Echö kölün feitä.

<sup>1</sup> Ai Samol mi Lapalap, üa siö ngonuk seni lon ekewe leni mi alolol.

<sup>2</sup> Ai Samol, kopwe rongorong mweliei.

Kopwe aü selingom ngeni ai kewe tüngor pwe  
kopwe ümöümöch ngeniei.

<sup>3</sup> Are en, äm Samol mi Lapalap, kopwe maketiu äm  
kewe tipis,

iö epwe tongeni manau?

<sup>4</sup> Nge en ka amusala äm tipis,  
pwe aipwe niuokusituk.

<sup>5</sup> Üa fokun witiwiti ewe Samol mi Lapalap,  
üa apilükülükü an kapas.

<sup>6</sup> Üa witiwiti ewe Samol,  
lap seni än ekewe chon mas witiwiti an epwe  
ränila,  
lap seni än ekewe chon mas witiwiti an epwe  
ränila.

<sup>7</sup> Ämi chon Israel, oupwe apilükülükü ewe Samol  
mi Lapalap.

Pun tong ellet a nom ren ewe Samol mi Lapalap,  
a pwal watte an angangen amanaua aramas.

<sup>8</sup> I epwe amanaua chon Israel seni ar tipis mein-  
isin. ☆

## 131

### *Ach kinamwe lon Kot*

#### *131.1-3*

Echö kölün feitä än Tafit.

<sup>1</sup> Ai Samol mi Lapalap, üsap tipetekia lon lelukei,  
mesei esap wolamalamtekia.

Üsap aosukosukaei ren mettoch mi kon tekia me  
amwarar ngeniei.

<sup>2</sup> Nge üa amosonosonaei o akinamweeila,

---

☆ **130:8:** Mat 1.21; Tit 2.14

usun eman semirit a mosonosonola lepöün inan,  
lupwen a wes seni oupun.

Lelukei a mosonosonola usun eman semirit mi  
wes seni oupun inan.

<sup>3</sup> Ämi chon Israel, oupwe apilükülükü ewe  
Samol mi Lapalap seni ei fansoun tori  
feilfeilachök.

## 132

*Eu iotekin tüngor feiöch won ewe imwenfel*  
132.1-18

*Eu iotekin tüngor feiöch won ewe imwenfel*  
132.1-18

Echö kölün feitä.

<sup>1</sup> Ai Samol mi Lapalap, kopwe chechemeni Tafit  
me an kewe riaföü meinsin a eäni.

<sup>2</sup> Kopwe chechemeni usun an pwon fän akapel  
ngonuk

me an pwon ngonuk, en Ewe mi Unusen Tekia, än  
Jakop we Kot.

<sup>3</sup> “Üsap tolong lon imwei ika konola lon kiei.

<sup>4</sup> Üsap mochen aiesum ika annut

<sup>5</sup> tori ai üpwe küna eu leni fän iten ewe Samol mi  
Lapalap,

eu imw fän iten Ewe mi Unusen Tekia, än Jakop we  
Kot.”

<sup>6</sup> Sa rongorong usun ewe pworofel me lon  
Petleem,

sa küna me lon ekewe mälämälen Jearim.

<sup>7</sup> Sa apasa, “Ousipwe feila ren imwen ewe Samol  
mi Lapalap

o fel ngeni me arun lenien puun pechen.”

8 Ai Samol mi Lapalap, kopwe feito o tolong lon ewe imwenfel, en me ewe pworofel asisilen om manaman.

9 Noum kewe souasor repwe föri mine a pwüng fansoun meinisin, nge noum kewe chon pin repwe mweireir fän pwapwa.

10 Pokiten Tafit noum we chon angang kosap aliwini noum we mi kepit. ✧

11 Ewe Samol mi Lapalap a akapel ngeni Tafit eu pwon mi let, nge esap atai,

“Üpwe awisa eman me lein noum kewe mwän epwe siwiliik lon wisom wisen king. ✧

12 Are noum kewe mwän repwe tümwünü ai we pwon me ai kewe allük üa aiti ngeniir, nöür kewe mwän repwe pwal siwiliik lon wisom wisen king tori feilfeilachök.”

13 Pun ewe Samol mi Lapalap a fen filätä Sion. I a mochen pwe epwe lenien imwan,

14 “Iei ewe leni üpwe nonom lon tori feilfeilachök, iei ai we lenien nemenem, pun iei ai mochen.

15 Üpwe afeiöchü Sion ren chomong wöü, üpwe awora enen ekewe chon wöüngau.

16 Üpwe ngeni ekewe souasor seni Sion manau, nge nöün chon pin kana repwe mweireir fän pwapwa.

---

✧ **132:10:** 2.Kron 6.41-42

✧ **132:11:** 2.Sam 7.12-16; 1.Kron

17.11-14; Kölf 89.3-4; Föf 2.30

17 Ikenan üpwe awora eman mwirimwirin Tafit mi  
pöchökül epwe king,  
üpwe föri pwe nei we mi kepit epwe chök  
nemenem. ☆

18 Iwe, üpwe awora säw ngeni chon oputan,  
nge won möküren ewe mi kepit epwe wor epa  
mwärämwär mi ling.”

## 133

### *Feiöchün än pwipwi tipeufengen*

#### *133.1-3*

Echö kölün feitä.

<sup>1</sup> Nengeni usun mürinan me apwapwan,  
lupwen pwipwi ra nonomfengen fän tipeeu.

<sup>2</sup> Ei sokun a usun chök löön kepit mi aüchea a nitiu  
won möküren Aaron  
o suputiu won alüsan,  
a pwal suputiu won kalan üfan.

<sup>3</sup> A pwal usun chök amurenipwinin ewe chuk  
Hermon,  
a püngütü won ekewe chukun Sion.  
Pun ikenan ewe Samol mi Lapalap a anomu an  
feiöch,  
ewe manau esemüch.

## 134

### *Kapasen fön ngeni ekewe chon mas lepwin*

#### *134.1-3*

Echö kölün feitä.

<sup>1</sup> Oupwe feito, oupwe mwareiti ewe Samol mi  
Lapalap, ämi nöün chon angang meinisin,  
ämi mi angang ngeni lon imwan lepwin.

---

☆ 132:17: 1.King 11.36



<sup>2</sup> Oupwe aitetä pöümi lon ämi iotek ngeni ewe leni  
mi pin  
o mwareiti ewe Samol mi Lapalap.

<sup>3</sup> Ewe Samol mi Lapalap, ewe mi föri läng me  
fanüfan  
epwe afeiöchükemi seni Sion.

## 135

*Kot a tekia, nge ekewe uluulun anümwäl ra lomo-  
tongau*

*135.1-21*

<sup>1</sup> Ousipwe mwareiti ewe Samol mi Lapalap.  
Oupwe mwareiti iten ewe Samol mi Lapalap, ämi  
nöün kewe chon angang.

Oupwe mwareiti i,

<sup>2</sup> ämi mi angang lon imwen ewe Samol mi Lapalap,  
ämi mi nom lon ekewe leni ünükün imwen ach we  
Kot.

<sup>3</sup> Oupwe mwareiti ewe Samol mi Lapalap, pun a  
kirikiröch.

Oupwe kölün mwareiti itan, pun i a ümöümöch.

<sup>4</sup> Ewe Samol mi Lapalap a filätä Jakop fän püsin  
itan,  
a filätä ekewe chon Israel pwe epwe nöüniir.

<sup>5</sup> Üa silei pwe ewe Samol mi Lapalap a tekia,  
a nom asen ekewe kot meinisin.

<sup>6</sup> Ewe Samol mi Lapalap a föri meinisin  
mine a efich lon läng pwal won fanüfan,  
lon ekewe matau pwal lon ekewe leni mi alolol  
meinisin.

<sup>7</sup> I ewe mi atötäi ekewe kuchu me lesopun fanüfan,  
a förätä inefi fiti püngün üt,

a pwal atowu asepwäl seni an lenien iseis.

<sup>8</sup> I ewe mi niela ekewe mwänichi lon Isip,  
ekewe mwänichien aramas me ekewe mweinöün  
man,

<sup>9</sup> a föri ekewe asisil me manaman lefilen ekewe  
chon Isip,  
pwe epwe apwüngü Farao me nöün kewe nöüwis  
meinisin.

<sup>10</sup> I ewe mi ataela chomong mwü  
o niela ekewe king mi pwora.

<sup>11</sup> A niela Sihon ewe kingen chon Amor,  
pwal Ok ewe kingen Pasan  
me ekewe kingen Kanaan meinisin,

<sup>12</sup> nge fanüer a ngeni nöün kewe aramasen Israel  
pwe repwe fanüeni.

<sup>13</sup> Ai Samol mi Lapalap, itom a nonom tori feil-  
feilachök.

Ai Samol mi Lapalap, iteüöchum a nonom fansoun  
meinisin.

<sup>14</sup> Pun ewe Samol mi Lapalap epwe alletätä  
pwüngün nöün kewe aramas  
o eäni tong ngeni nöün kewe chon angang.

<sup>15</sup> Än chon ekewe mwü uluulun anümwäl seni  
silifer me kolt  
aramas chök ra föri.

<sup>16</sup> A wor awer, nge resap tongeni kapas,  
a wor meser, nge resap tongeni küneer.

<sup>17</sup> A wor selinger, nge resap tongeni rongorong,  
resap pwal tongeni ngasangas.

<sup>18</sup> Ewer, chokewe mi föri ekewe uluulun anümwäl  
o lüküür

repwe pwal wewe ngeni ekewe uluulun anümwäl.

✧

19 Ämi chon Israel, oupwe mwareiti ewe Samol mi Lapalap.

Ämi mwirimwirin Aaron, oupwe mwareiti ewe Samol mi Lapalap.

20 Ämi mwirimwirin Lefi, oupwe mwareiti ewe Samol mi Lapalap.

Ämi meinsin mi niuokusiti ewe Samol mi Lapalap, oupwe mwareiti i.

21 Oupwe mwareiti ewe Samol mi Lapalap seni lon Sion,

i ewe mi imweimw lon Jerusalem.

Ousipwe mwareiti ewe Samol mi Lapalap.

## 136

### *Mwareiti än Kot tong ellet*

#### *136.1-26*

1 Oupwe kilisou ngeni ewe Samol mi Lapalap, pun i a kirikiröch,

an tong ellet a nonom tori feilfeilachök. ✧

2 Oupwe kilisou ngeni ewe Kot mi tekia seni ekewe kot meinsin,

an tong ellet a nonom tori feilfeilachök.

3 Oupwe kilisou ngeni ewe Samol mi tekia seni ekewe samol meinsin,

an tong ellet a nonom tori feilfeilachök.

4 Ewe Samol mi Lapalap i chök ewe mi föri ekewe manaman mi amwarar,

an tong ellet a nonom tori feilfeilachök.

---

✧ **135:18:** Kölf 115.4-8; Pwär 9.20 ✧ **136:1:** 1.Kron 16.34; 2.Kron 5.13; Esr 3.11; Kölf 100.5; 106.1; 107.1; 118.1; Jer 33.11

- 5 I ewe mi föri ekewe läng ren an silelap,  
 an tong ellet a nonom tori feilfeilachök. ✧  
 6 A anomu fanüfan won ekewe koluk,  
 an tong ellet a nonom tori feilfeilachök. ✧  
 7 A föri ekewe saram mi watte,  
 an tong ellet a nonom tori feilfeilachök:  
 8 ewe akkar pwe epwe tin lerän,  
 an tong ellet a nonom tori feilfeilachök,  
 9 ewe maram me ekewe fü pwe repwe tin lepwin,  
 an tong ellet a nonom tori feilfeilachök. ✧  
 10 Iwe, i a niela ekewe mwänichien Isip,  
 an tong ellet a nonom tori feilfeilachök. ✧  
 11 A emwenawu chon Israel seni Isip,  
 an tong ellet a nonom tori feilfeilachök, ✧  
 12 ren pöün mi manaman o aköüpöü,  
 an tong ellet a nonom tori feilfeilachök.  
 13 A aimwüfeseni ewe Setipar lon ruu kinikin,  
 an tong ellet a nonom tori feilfeilachök,  
 14 pwe chon Israel repwe pwerela lukalapan,  
 an tong ellet a nonom tori feilfeilachök.  
 15 Nge a aturalong Faraο me nöün mwichen soun-  
 fiu lon ewe Setipar,  
 an tong ellet a nonom tori feilfeilachök. ✧  
 16 A emweni nöün kewe aramas lon ewe fanüapö,  
 an tong ellet a nonom tori feilfeilachök.  
 17 A niela ekewe king mi lap,  
 an tong ellet a nonom tori feilfeilachök.  
 18 A pwal niela ekewe king mi iteföüla,  
 an tong ellet a nonom tori feilfeilachök:  
 19 Sihon ewe kingen chon Amor,

---

✧ **136:5:** Ken 1.1    ✧ **136:6:** Ken 1.2    ✧ **136:9:** Ken 1.16  
 ✧ **136:10:** Eks 12.29    ✧ **136:11:** Eks 12.51    ✧ **136:15:** Eks  
 14.21-29

an tong ellet a nonom tori feilfeilachök, ✧  
<sup>20</sup> me Ok ewe kingen Pasan,  
 an tong ellet a nonom tori feilfeilachök. ✧  
<sup>21</sup> A ngeni chon Israel fanüer pwe repwe fanüeni,  
 an tong ellet a nonom tori feilfeilachök,  
<sup>22</sup> a ngeni Israel nöün we chon angang ekewe fanü  
 pwe epwe fanüeni,  
 an tong ellet a nonom tori feilfeilachök.

<sup>23</sup> I ewe mi chechemenikich lon ach tekison,  
 an tong ellet a nonom tori feilfeilachök,  
<sup>24</sup> o chimanükich seni chon oputach,  
 an tong ellet a nonom tori feilfeilachök.  
<sup>25</sup> A amongöni mönümanau meinisin,  
 an tong ellet a nonom tori feilfeilachök.

<sup>26</sup> Oupwe kilisou ngeni ewe Koten läng,  
 an tong ellet a nonom tori feilfeilachök.

## 137

### *Än ekewe chon oola Papilon kechü* 137.1-9

<sup>1</sup> Iwe, ünükün ekewe chanpupun Papilon aia mot-  
 tiu o kechü,  
 lupwen aia chechemeni Sion.  
<sup>2</sup> Ikenan aia asapätä nöüm kewe ükülele  
 won ekewe silifö.  
<sup>3</sup> Ikenan ekewe chon liapenikem ra ürenikem pwe  
 aipwe köl,  
 ekewe chon ariaföüükem ra ariänikem pwe aipwe  
 pwapwa,

---

✧ 136:19: Num 21.21-30 ✧ 136:20: Num 21.31-35

ra apasa, “Oupwe eäni ngenikem echö ekewe  
kölün Sion.”

<sup>4</sup> Epwe ifa usun, äm aipwe tongeni eäni Kölün ewe  
Samol mi Lapalap

lon fanüen ekis?

<sup>5</sup> Are üpwe manlükala en, Jerusalem,  
pöüfichi epwe pwasala.

<sup>6</sup> Chönawei epwe pachätä fän fongochi,  
are üsap chechemenuk,  
are üsap ekieki pwe en, Jerusalem,  
kopwe ai pwapwa lap seni mettoch meinsin.

<sup>7</sup> Ai Samol mi Lapalap, kopwe chechemeni mine  
ekewe chon Etom ra föri  
lon ewe ränin Jerusalem a tala.

Kopwe chechemeni usun ar apasa, “Ataela, ataela,  
aturätü tori longolongun fan.”

<sup>8</sup> En Pabilon kopwe tala.

Epwe pwapwa ätewe mi ngonuk  
chappen om föföör ngenikem. ☆

<sup>9</sup> Epwe pwapwa ätewe mi angei noum kewe  
semirit  
o monerela ngeni eu achau.

## 138

*Kilisou ren än Kot feiöch*

*138.1-8*

Echö än Tafit köl.

<sup>1</sup> Ai Samol mi Lapalap, üa kilisou ngonuk ren  
unusen lelukei.

Üa Kölün mwareituk me fän mesen ekewe kot.

---

☆ **137:8:** Pwär 18.6

<sup>2</sup> Üa chapetiu ngeni imwom mi pin  
o kilisou ngeni itom,  
pokiten om tong ellet me om allükülük.  
Pun en ka atekiatä itom me om kapas asen ekewe  
mettoch meinisin.

<sup>3</sup> Lupwen üa kökkö, ka pälüeniei,  
ka apworaie o apöchöküla lelukei.

<sup>4</sup> Ai Samol mi Lapalap, ekewe king won fanüfan  
meinisin repwe mwareituk,  
pun ra rongorong om kapas.

<sup>5</sup> Iwe, repwe kölü om kewe föfö,   
pun a tekia lingom.

<sup>6</sup> Inamwo ika ka fokun tekia,  
ka afäli ekewe chon tekison.  
Nge ka silleni ekewe chon lamalamtekia me toau.

<sup>7</sup> Nge are üa nom lon riaföü,  
en ka tümwünü manaei.  
Ka ü ngeni ekewe chon oputaei mi song ngeniei  
o amanauaei ren om manaman.

<sup>8</sup> Ai Samol mi Lapalap, kopwe apwönüetä ekiekin  
letipom ngeniei.

Ai Samol mi Lapalap, om tong ellet a nonom tori  
feilfeilachök.

Kosap likitala ewe angang ka popuetä.

## 139

*Kot a silei o tufich ngeni mettoch meinisin*

*139.1-24*

Ngeni ewe mi emweni chon köl: Echö än Tafit köl.

<sup>1</sup> Ai Samol mi Lapalap, en ka atittinaei, ka pwal  
sileei.

<sup>2</sup> Ka silei fansoun ai mottiu me ai ütä,

ka silei ai ekiék kana me toau.

<sup>3</sup> Ka nenengeniei, lupwen üa angang, pwal lupwen üa asösö,

ka silei ai kewe föföör meinisín.

<sup>4</sup> Nengeni, mwen ai üsamwo kapas, en, ai Samol mi Lapalap, ka fen unusen silei mine üpwe apasa.

<sup>5</sup> Ka pweliei me lükisöküri pwal fän mesei, ka pwal iseis poum woi.

<sup>6</sup> Ei sokun silelap a fokun amwarar nengeniei, a pwal tekia nengeniei pwe üsap tongeni to won.

<sup>7</sup> Ia üpwe feila ie seni Ngünum?

Nge ia üpwe süla ie seni fän mesom?

<sup>8</sup> Are üpwe feitä läng, en ka nom ikenan.

Nge are üpwe kon lon lenien sotup, en ka pwal nom ikenan.

<sup>9</sup> Are üpwe ässila ngeni ötiu ewe ia akkar a tötä me ie,

ika nonom lesopolan matau me lotou,

<sup>10</sup> en kopwe emweniei me ikenan,

nge pöüifichum epwe amwöchüei.

<sup>11</sup> Are üpwe apasa pwe rochopwak epwe pwölüeila, nge ewe saram ünüki epwe wiliti pwin,

<sup>12</sup> inamwo nge ewe rochopwak esap roch me reöm,

nge pwin a saram usun lerän,

pun rochopwak a usun chök saram me reöm.

<sup>13</sup> En ewe mi förätä masouen loi,

en ka achufengeniei me lon letipen inei.

<sup>14</sup> Üa mwareituk, pokiten a amairü o amwarar om föri ei.

Om kewe föföör ra amwarar.



Üa fokun sileöchü ei.

<sup>15</sup> Chün inisi resap mon senuk,  
lupwen üa för lemonomon o kachufengen  
lon ekewe leni mi alolol lon fanüfan.

<sup>16</sup> En ka fen künaei, lupwen esamwo wor uluuli.  
Iteiten ränin manaei meinsin, ka awora fän itei,  
ra fen mak lon noum puk

mwen ar resamwo fis.

<sup>17</sup> Ai Samol mi Lapalap, om kewe ekiek ra fokun  
aüchea ngeniei.

Ra kon fokun chomong.

<sup>18</sup> Ika ngang üpwe aleaniir, repwe chomong seni  
föün pi.

Lupwen üa pwök, üa chüen nom reöm.

<sup>19</sup> Ai Kot, amwo kopwe niela ekewe aramasangau.  
Amwo ekewe mwän mi nimanaei aramas repwe  
sü seniei.

<sup>20</sup> Ir ekewe mi kapasingau usum,  
ekewe chon oputom ra föünimwäli itom.

<sup>21</sup> Ai Samol mi Lapalap, üa fokun oput chokewe mi  
oputok.

Üa fokun nou chokewe mi ü ngonuk.

<sup>22</sup> Üa fokun oput ir  
o aleanirelong lein chon oputaei.

<sup>23</sup> Ai Kot, kopwe atittinaei o silei letipei.  
Kopwe sotuniei o silei ai ekiek.

<sup>24</sup> Kopwe pi ika mi wor och mi ingau lon manaei,  
nge kopwe emweniei won ewe al esemüch.

# 140

*Än Tafit iotekin tüngor pwe Kot epwe tümwünü  
seni chon ariaföüü*

*140.1-13*

Ngeni ewe mi emweni chon köl: Echö än Tafit köl.

<sup>1</sup> Ai Samol mi Lapalap, kopwe angasaei seni aramas mi ngau,

kopwe tümwünüei seni aramas mi mwäneson,

<sup>2</sup> chokewe mi ekiekietä föföör mi ngau lon leluker  
o popuetä maun iteiten fansoun.

<sup>3</sup> Ra akkeni chönawer pwe a ken usun chönawen  
eman serepenit,

nge ar kapas a usun chök poisonun serepenit. ✧

<sup>4</sup> Ai Samol mi Lapalap, kopwe epeti seniei ekewe  
aramasangau.

Kopwe tümwünüei seni aramas mi mwäneson,  
chokewe mi rawangauaei pwe üpwe chepetek.

<sup>5</sup> Aramas mi lamalamtekia ra aopala eu sär fän  
itei,

ra ameresala ar kewe chew

o soni ar kewe likatup aropen ewe al pwe repwe  
liapeniei.

<sup>6</sup> Üa kapas ngeni ewe Samol mi Lapalap, “En ai  
Kot.”

Ai Samol mi Lapalap, kopwe aüselinga ai kewe  
tüngor pwe kopwe ümöümöch ngeniei.

<sup>7</sup> Ai Samol mi Lapalap ai Kot, en chon angasaeila  
mi pöchökül,

ka epeti seniei feiengau lon maun.

<sup>8</sup> Ai Samol mi Lapalap, kosap mwütätä mochenin  
ekewe aramasangau,

---

✧ 140:3: Rom 3.13

kopwe atai ar kewe rawangau.

<sup>9</sup> Chokewe mi pwelifeiliei ra chimwetä mökürer.  
Amwo ar kapasen eniweniw ngeniei epwe püsin  
küür.

<sup>10</sup> Amwo molien ekkei mi sarara epwe turutiu wor.  
Repwe katurulong lon ekewe pwang, nge resap  
chüen tosefäliwu.

<sup>11</sup> Amwo ekewe chon etipisimwäli chon arur re-  
sap nonomotiu lon ewe fanü.  
Amwo feiengau epwe chekaiiti ewe aramas mi  
mwäneson.

<sup>12</sup> Üa silei pwe en ai Samol mi Lapalap ka peni  
ekewe mi wöüngau  
o eäni pwüng ngeni ekewe chon mwelele.

<sup>13</sup> Ellet, ekewe chon pwüng repwe mwareiti itom,  
ekewe mi wenechar repwe nonom fän mesom.

## 141

*Iotekin tünigor tūmwün seni ngau*

*141.1-10*

Echö än Tafit köl.

<sup>1</sup> Ai Samol mi Lapalap, üa kökköruk, kopwe kaito  
rei.

Kopwe aü selingom ngeni mweliei, lupwen üa  
kökköruk.

<sup>2</sup> Ai iotek epwe wewe ngeni eu asoren apach mi  
pwokus me mwom,  
ai aitiätä pei epwe wewe ngeni eu asoren lekuniol.

☆

<sup>3</sup> Ai Samol mi Lapalap, kopwe awora eman chon  
masen awei,

---

☆ **141:2:** Pwär 5.8

kopwe tümwünü asamen tinawei.

<sup>4</sup> Kopwe tümwünüei pwe üsap föri mine a ngau,  
pwe üsap eti ekewe aramasangau lon ar föföringau,  
üsap pwal etiir le mongö ener mi annö.

<sup>5</sup> Eman aramasöch epwe wichiei are apwüngüei  
fän kirikiröch,  
nge üsap mwüt ngeni ekewe aramasangau pwe  
repwe asamoluei.

Pun lon ai iotek üa pälüeni ar kewe föfö mi ngau  
fansoun meinisin.

<sup>6</sup> Lupwen ekewe samol repwe koturutiu seni  
ekewe achau,  
ekewe aramas repwe mefi pwe ai kewe kapas ra  
let.

<sup>7</sup> Usun eman a tuw pwül o atatakisi,  
iei usun chür repwe toropas mesen ewe lenien  
sotup.

<sup>8</sup> Nge ngang üa chök anomu ai apilükülük womw,  
en ai Samol mi Lapalap ai Kot.

En ai lenien op.

Kosap asechieilong lon mäla.

<sup>9</sup> Kopwe tümwünüei seni ewe sär ra anomu fän itei,  
pwal seni än ekewe chon föföringau likatuputup.

<sup>10</sup> Ekewe aramasangau meinisin repwe turulong  
lon püsin ar kewe sär,  
nge ngang üpwe feila seniir, pun üsap tup lon.

# 142

*Eu iotekin tūngor alilis lon riaföü*

*142.1-7*

*(1.Sam 22.1; 24.3)*

Echö än Tafit kölün kait, lupwen a nom lon ewe föimw. Eu iotek.

<sup>1</sup>Üa siö ngeni ewe Samol mi Lapalap fän leüömong, üa alapätä mweliei o tūngor ngeni pwe epwe ümöümöch ngeniei.

<sup>2</sup>Üa uwato ren ai letipengau meinisin o asile ngeni ai kewe riaföü.

<sup>3</sup>Lupwen üa apilükingau, i a fen silei mine üpwe föri.

Ekewe chon oputaei ra aopala eu sär fän itei lon ewe al ia üa fetal ie.

<sup>4</sup>Lupwen üa nennela lepelifichi, üa küna pwe esap wor eman a alisie, esap wor ai lenien op, esap wor eman a tümwünüei.

<sup>5</sup>Ai Samol mi Lapalap, üa siö ngonuk.

Üa üra: En ai lenien op me ineti me lon fanüen chon manau.

<sup>6</sup>Kopwe afäli ai siö, pun üa fokun apilükingau.

Kopwe angasaei seni ekewe chon ariaföüüei, pun ra kon pöchökül ngeniei.

<sup>7</sup>Kopwe angasaeila seni lon ewe lenien fötek, pwe üpwe tongeni mwareiti itom.

Mürin, ekewe chon pwüing repwe mwicheto rei, pokiten ka afeiöchüei.

# 143

*Eu iotekin tüngr ngasala me emwen*

*143.1-12*

Echö än Tafit köl.

<sup>1</sup> Kopwe aüselinga ai iotek, ai Samol mi Lapalap,  
kopwe aü selingom ngeni ai kewe tüngr  
o pälueniei lon om allükülük me pwüng.

<sup>2</sup> Kosap atolongaei lon om kapwüng, ngang noum  
chon angang,  
pun esap wor eman aramas mi manau a pwüng  
fän mesom. ☆

<sup>3</sup> Iwe, ewe chon oputaei a tapweriei  
o purieitiu lepwül.

A anomuei lon rochopwak  
usun chokewe mi mäla me lom.

<sup>4</sup> Iei mine üa apilükingau,  
nge lelukei a fokun niuokus.

<sup>5</sup> Üa chechemeni ewe fansoun lom  
o ekieki usun mine ka fen föri.  
Üa ekieki usun om kewe föför.

<sup>6</sup> Üa aitetä pei lon ai iotek ngonuk,  
ngüni a kakaituk usun eu fanü mi pwasapwas a  
kakaiti üt.

<sup>7</sup> Ai Samol mi Lapalap, kopwe müttir le pälueniei,  
pun üa fokun apilükingau.  
Kosap aopa mesom seniei,  
pwe üsap wewe ngeni chokewe mi tolong lon ewe  
lenien sotup.

<sup>8</sup> Iteiten lesosor kopwe pwäri ngeniei om tong  
ellet,

---

☆ **143:2:** Rom 3.20; Kal 2.16

pun üa anomu ai apilükülük womw.  
Kopwe aiti ngeniei ewe al üpwe fetal won,  
pun üa suki ngonuk lelukei.

<sup>9</sup> Ai Samol mi Lapalap, kopwe angasaei seni ekewe  
chon oputaei.

Üa sü ngonuk pwe üpwe op reöm.

<sup>10</sup> Kopwe aiti ngeniei usun ai üpwe föri letipom,  
pun en ai Kot.

Ngünüm mi mürina epwe emweniei won efoch al  
mi sosenöch.

<sup>11</sup> Ai Samol mi Lapalap, kopwe tümwünü manaei  
pokiten itom.

Lon om pwüing kopwe emwenieiwu seni ai riaföü.

<sup>12</sup> Kopwe ärala ekewe chon oputaei pokiten ka  
tongeei

o arosala meinisin mi ariaföüüei,  
pun ngang noum chon angang.

## 144

*Eu iotek pwe Kot epwe amanaua o afeiöchükich  
144.1-15*

Echö än Tafit köl.

<sup>1</sup> Üpwe mwareiti ewe Samol mi Lapalap ai achau  
mi asipa pei ngeni maun,  
pwal kumuchi ngeni fiu.

<sup>2</sup> I ai Kot mi tongeei me imwei imwen maun, ai  
lenien op mi pöchökül  
me ai Chon Amanau,  
i a epeti seniei feiengau.

Üa anomu ai apilükülük won  
ewe mi akufätiau chon ekewe mwü fai.

<sup>3</sup> Ai Samol mi Lapalap, met aüchean aramas pwe  
ka chüngüw,  
nge met aüchean nöün aramas pwe ka ekieki usun?  
✧

<sup>4</sup> Pun eman aramas a wewe ngeni enienin ngasan-  
gas,  
nge ränin manauan a usun chök och nür mi mo-  
rokai.

<sup>5</sup> Ai Samol mi Lapalap, kopwe asanga om we läng  
o feitiu.  
Kopwe atapa ekewe chuk pwe repwe ötüöt.

<sup>6</sup> Kopwe efifi ekewe inefi o atoropasa chon op-  
utom,  
kopwe esefichala om kewe föün esefich o  
tinifeiliir.

<sup>7</sup> Kopwe aitiétü poum seni pekitä,  
kopwe amanauaei seni ekewe koluk mi alolol  
o angasaei seni fän nemenien ekewe chon ekis,  
<sup>8</sup> seni chokewe mi chök kapas chofana,  
ra mwo nge aitiétä pöüfichir lon ar akapelmwäl.

<sup>9</sup> Ai Kot, üpwe eäni ngonuk echö köl mi fö,  
üpwe ettiki ngonuk kitar mi wor engol saitenin.

<sup>10</sup> En ka awinna ekewe king,  
ka amanaua Tafit noum we chon angang.

<sup>11</sup> Kopwe amanauaei seni ekewe chon oputaei mi  
mochen afeiengauaei,  
kopwe angasaei seni fän nemenien ekewe chon  
ekis,  
seni chokewe mi chök kapas chofana,  
ra mwo nge aitiétä pöüfichir lon ar akapelmwäl.

✧ **144:3:** Hiop 7.17-18; Kölf 8.4



12 Amwo nöüch kewe ät  
repwe wewe ngeni irä mi mär pöchökül lon ar  
alüal,  
nge nöüch kewe nengin repwe wewe ngeni üren  
lepwokuku mi rup pwe alingen lon imwen  
king.

13 Amwo ach kewe lenien iseis  
repwe ur ren sokopaten föün irä,  
nge nöüch kewe sip  
repwe oupwätü ngeröü me engol ngeröü sip lon  
ach kewe mälämäl.

14 Amwo nöüch kewe pwiin kow repwe nöünöü  
chomong,  
nge esap mwet seniir nöür ika mä nöür.  
Amwo esap fis puchörün riaföü lon ach kewe al.

15 Feiöchün chon ekewe mwü a toriir ekei sokun  
feiöch.  
Feiöchün chon ekewe mwü mi eäni Kot ewe Samol  
mi Lapalap.

## 145

### *Kölün mwareiti än Kot kirikiröch me manaman 145.1-21*

Echö än Tafit kölün mwareiti Kot.

<sup>1</sup> Üpwe ingemwareiti ai Kot me ai king,  
üpwe mwareiti itom tori feilfeilachök.

<sup>2</sup> Iteiten rän üpwe mwareituk  
o alinga itom tori feilfeilachök.

<sup>3</sup> Ewe Samol mi Lapalap a tekia, aramas meinisin  
repwe fokun mwareiti i.

Esap wor eman a tongeni aükü an tekia.

4 Eu täppin aramas epwe ainga om kewe angang  
ngeni pwal eu,  
repwe arongafeili om kewe föför mi manaman.

5 Repwe kapas usun lingen om tekia,  
nge ngang üpwe ekinlonei usun amwararen om  
kewe föför.

6 Aramas repwe asilefeili manamanen om kewe  
föför mi eniwokus,  
nge ngang üpwe arongafeili om tekia.

7 Repwe apworausä usun om kirikiröch mi lapalap  
o osomong le kölü om pwüng.

8 Ewe Samol mi Lapalap a kirikiröch o lukpwetete,  
a songomang o wöün tong ellet.

9 Ewe Samol mi Lapalap a kirikiröch ngeni aramas  
meininis,  
an tong a nom won förian meinisin.

10 Ai Samol mi Lapalap, meinisin mine ka föri  
repwe kilisou ngonuk,  
noum chon pin meinisin repwe mwareituk.

11 Repwe kapas usun lingen mwum  
o apworausä usun om manaman,

12 pwe aramas meinisin repwe silei om föför mi  
manaman  
me amwararen lingen mwum.

13 Mwum eu mwü mi nom tori feilfeilachök,  
nge om nemenem a nonom won ekewe täppin  
aramas meinisin.

Ewe Samol mi Lapalap a allükülük lon an pwon  
meininis,  
a eäni ümöümöch ngeni förian meinisin.

14 Ewe Samol mi Lapalap a aütäi ir meinisin mi  
turula,  
a awenätä sokürün ir mi pworotiu.

15 Mönümanau meinsin ra nennetä ngonuk fän ar  
apilükülük,  
pun en ka ngeniir ener mongö, lupwen a tori otun.

16 Ka suki poum  
o ngeni ekewe mönümanau meinsin mine repwe  
menemenöch ren.

17 Ewe Samol mi Lapalap a pwüing lon meinsin  
mine a föri  
o kirikiröch lon an kewe föföör meinsin.

18 Ewe Samol mi Lapalap a arap ngeni ir meinsin  
mi köri,  
a arap ngeniir meinsin mi köri fän wenechar.

19 A föri mochenin ir meinsin mi niuokusiti i,  
a rong ar siö o amanaueer.

20 Ewe Samol mi Lapalap a tümwünü meinsin mi  
echeni i,  
nge a arosala ekewe aramasangau meinsin.

21 Üpwe mwareiti ewe Samol mi Lapalap,  
mönümanau meinsin repwe mwareiti itan mi pin  
tori feilfeilachök.

## 146

### *Kölün mwareiti Kot fän iten an föföör mi pwüing 146.1-10*

1 Ousipwe mwareiti ewe Samol mi Lapalap.

Ngüni, kopwe mwareiti ewe Samol mi Lapalap.

2 Üpwe mwareiti ewe Samol mi Lapalap lon un-  
usen manau.

Üpwe kölün mwareiti ai Kot lupwen fansoun ai  
manau.

<sup>3</sup> Ousap anomu ämi apilükülük won ekewe samol  
ika won eman aramas,  
pun resap tongeni amanaua eman.

<sup>4</sup> Lupwen ra mäla, ra liwiniti pwül.

Lon ewe chök rän ar kewe akot meinsin ra tala.

<sup>5</sup> A feiöch ewe aramas a eäni än Jakob we Kot  
soualilis,

a anomu an apilükülük won ewe Samol mi La-  
palap an we Kot,

<sup>6</sup> ewe mi föri läng me fanüfan, pwal ewe matau  
me meinsin mine a nom lor.

Ewe Samol mi Lapalap a allükülük tori feil-  
feilachök, ✧

<sup>7</sup> a eäni pwüng ngeni ekewe mi riaföü ren aramas  
o amongöni ekewe mi echik.

Ewe Samol mi Lapalap a angasala ekewe chon  
fötek,

<sup>8</sup> a aneloi mesen ekewe mi chun.

Ewe Samol mi Lapalap a awenätä sökürün  
chokewe mi pworotiu

o echeni ekewe chon pwüng.

<sup>9</sup> Ewe Samol mi Lapalap a tümwünü ekewe chon  
ekis,

a alisi ekewe fefin mi mä pwülüer me ekewe mi  
mäsen,

nge a atai mine ekewe aramasangau ra akota.

<sup>10</sup> Ewe Samol mi Lapalap epwe nemenem tori  
feilfeilachök.

Chon Sion, ämi we Kot epwe nemenem won ekewe  
täppin aramas meinsin.

Ousipwe mwareiti ewe Samol mi Lapalap.

---

✧ 146:6: Föf 4.24; 14.15

# 147

*Kölün mwareiti Kot fän iten an aücheani  
Jerusalem*

*147.1-20*

<sup>1</sup> Ousipwe mwareiti ewe Samol mi Lapalap.  
A fokun mürina ach sipwe kölün mwareiti ach we  
Kot.

A fich ngeni ach sipwe kölün mwareiti i.

<sup>2</sup> Ewe Samol mi Lapalap a aüsefälietä Jerusalem,  
a aliwinisefäli ekewe chon Israel mi oola.

<sup>3</sup> A apöchöküla ir mi tatakis leluker  
o filiti kinaser.

<sup>4</sup> A apwüngala iteiten ekewe fü  
o aita eföü me eföü ngeni itan.

<sup>5</sup> Ach Samol a tekia o fokun manaman,  
an mirit esap wor aükükün.

<sup>6</sup> Ewe Samol mi Lapalap a atekiatä chokewe mi  
tekison,  
nge a aturätü ekewe aramasangau lepwül.

<sup>7</sup> Oupwe köl ngeni ewe Samol mi Lapalap fän  
kilisou.

Oupwe köl ngeni ach we Kot fiti ükülele.

<sup>8</sup> I a pwölüela ekewe läng ren kuchu  
o apüngätü üt won fanüfan,  
a ämärätä fetil won ekewe chukuchukutä.

<sup>9</sup> A ngeni ekewe man ener mongö  
o amongöü ekewe apansüsün ängä mi tik.

<sup>10</sup> Ewe Samol mi Lapalap esap sani pöchökülen  
oris,

esap pwal pwapwa ren pöchökülen aramas,

<sup>11</sup> nge a pwapwa ren chokewe mi niuokusiti i,  
ren chokewe mi eäni apilükülük an tong ellet.

12 Ämi chon Jerusalem, oupwe mwareiti ewe  
Samol mi Lapalap,  
en Sion, kopwe mwareiti om Kot.

13 Pun i a apöchöküla lokkun asamalapom kewe  
o afeiöchü noum kewe aramas mi nom reöm.

14 A awora kinamwe lon fanüom  
o amongöu ngeni noum aramas chomong wiich  
mi mürina.

15 A tinato an allük won fanüfan,  
an kapas a müttir säfetal.

16 A tinato sno mi pwech usun chök ülen sip  
o amorafeili sno usun falang.

17 A amorätü föün ais usun chari.  
Iö a tongeni pwäk ngeni patapatan?

18 Kot a kapas, ewe ais a telila.  
A föri pwe an asepwäl a enien, iwe, ekewe koluk  
ra pupula.

19 A aronga ngeni nöün aramas an kapas,  
a ngeni chon Israel an kewe allük me pwüüng.

20 Ei sokun lapalap esap föri ngeni pwal eu mwü.  
Ir resap silei an kewe allük.

Ousipwe mwareiti ewe Samol mi Lapalap.

## 148

*Förien Kot meinsin ra angei föneer pwe repwe  
mwareiti i*

*148.1-14*

1 Ousipwe mwareiti ewe Samol mi Lapalap.  
Oupwe mwareiti ewe Samol mi Lapalap seni won  
läng,

oupwe mwareiti i me won ekewe leni tekia.

2 Oupwe mwareiti i, ämi nöün chon läng meinsin.

Oupwe mwareiti i, ämi nöün mwichen sounfiun  
läng meinsin.

<sup>3</sup> Oupwe mwareiti i, ämi akkar me maram,  
oupwe mwareiti i, ämi fü meinsin mi tin.

<sup>4</sup> Oupwe mwareiti i, ämi kewe läng mi fokun tekia,  
pwal ämi kewe koluk asen ekewe läng.

<sup>5</sup> Ir meinsin repwe mwareiti iten ewe Samol mi  
Lapalap.

Pun i a allük, nge ir ra fisitä.

<sup>6</sup> Kot a anükhareer lon lenier pwe repwe nom  
tori feilfeilachök  
ren eu allük esap tongeni tala.

<sup>7</sup> Oupwe mwareiti ewe Samol mi Lapalap seni  
won fanüfan,  
ämi kewe mönün lematau mi fokun watte me ämi  
kewe leni mi alolol,

<sup>8</sup> ämi inefi me ütten fau, sno me kuchu,  
pwal mölümöl mi apwönüetä an allük.

<sup>9</sup> Oupwe mwareiti i, ämi kewe chukutekia me  
chukutekison meinsin,

ämi kewe irä mi ua me ämi irä setar meinsin,

<sup>10</sup> ämi manmwacho me manfesir,  
ämi mantötö me mansüsü meinsin.

<sup>11</sup> Oupwe mwareiti i, ämi kewe kingen fanüfan me  
chon ekewe mwü meinsin,  
ämi samol me chon nemenem meinsin won  
fanüfan,

<sup>12</sup> ämi alüal me föpwül,  
pwal chinlap me semirit.

13 Ir meinisin repwe mwareiti iten ewe Samol mi  
Lapalap,  
pun itan a tekia seni it meinisin,  
an ling a nom asen fanüfan me läng.  
14 A apöchöküla mwün nöün aramas.  
Iei mine nöün kewe chon pin meinisin ra mware-  
iti,  
ir ekewe aramasen Israel a echeniir.  
Ousipwe mwareiti ewe Samol mi Lapalap.

## 149

*Chon Israel ra angei föneer pwe repwe mwareiti  
Kot*

### *149.1-9*

1 Ousipwe mwareiti ewe Samol mi Lapalap.  
Oupwe eäni ngeni ewe Samol mi Lapalap echö köl  
mi fö,  
oupwe kölün mwareiti i me lon ewe mwichen  
chon allükülük.  
2 Chon Israel repwe pwapwa ren ewe chon föriir.  
Ekewe aramasen Sion repwe mwänek ren ar king.  
3 Repwe mwareiti itan fän pworuk  
o köl ngeni fän pisekin kaktai me ükülele.  
4 Pun ewe Samol mi Lapalap a pwapwaäsini nöün  
aramas,  
a alinga ekewe chon tipetekison ren win.  
5 Ekewe chon pin repwe meseik lon ling,  
repwe köl fän pwapwa lon kier kewe.  
6 Kapasen mwareiti Kot fän leüömong epwe nom  
lon awer,  
nge ekewe ketilas mi seisei me rüepék repwe nom  
lon pöür,  
7 pwe repwe ngeni chon ekewe mwü chappen ar  
föför



o apwüngü ekewe aramas.

<sup>8</sup> Repwe föti ar kewe king ren sein,

nge ar kewe aramas tekia ren selimächä,

<sup>9</sup> pun repwe eäni apwüng wor usun Kot a fen allük.

Ren ei nöün kewe mi pin meinsin ra ling ren.

Ousipwe mwareiti ewe Samol mi Lapalap.

## 150

### *Sipwe mwareiti Kot*

#### *150.1-6*

<sup>1</sup> Ousipwe mwareiti ewe Samol mi Lapalap.

Oupwe mwareiti Kot me lon lenian mi pin,

oupwe mwareiti an manaman lon läng.

<sup>2</sup> Oupwe mwareiti i ren an kewe föföör mi manaman,

oupwe mwareiti an tekia esap wor aükükün.

<sup>3</sup> Oupwe mwareiti i ren tikin rappwa,

oupwe mwareiti i ren ükülele me kitar.

<sup>4</sup> Oupwe mwareiti i ren pisekin kaktai me pworuk,

oupwe mwareiti i ren pisekin ettik mi wor sait-enin, pwal ren aangün.

<sup>5</sup> Oupwe mwareiti i ren sokopaten pisekin kaktai mi tikiken,

oupwe mwareiti i ren sokopaten pisekin kaktai mi osomong.

<sup>6</sup> Mönümanau meinsin repwe mwareiti ewe Samol mi Lapalap.

Ousipwe mwareiti ewe Samol mi Lapalap.

cclxxiv

**Paipel**  
**The Holy Bible in the Chuukese language of the**  
**Federated States of Micronesia**

copyright © 1984, 1989, 1991, 2001 Liebenzel Mission

Language: Chuukese

Translation by: Liebenzell Mission

Old Testament © 1989, 2001 Liebenzel Mission New Testament © 1984, 1991  
Liebenzel Mission

This translation is made available to you under the terms of the Creative  
Commons Attribution-No Derivatives license 4.0.

You may share and redistribute this Bible translation or extracts from it in  
any format, provided that:

    You include the above copyright and source information.

    You do not make any derivative works that change any of the actual  
    words or punctuation of the Scriptures.

Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2024-01-24

---

PDF generated using Haiola and XeLaTeX on 18 Apr 2025 from source files  
dated 24 Jan 2024

c48fdfd7-5e91-508c-a792-018261cf838c